

# সখা

প্রমদাচরণ সেন কর্তৃক প্রবর্তিত।

পঞ্চম ভাগ।


১৮৮৫

শ্রীঅন্নদাচরণ সেন কর্তৃক  
প্রকাশিত।

"THE CHILD IS FATHER OF THE MAN."

কলিকাতা

২ নং বেণেটোলা লেন, "সখা"-যন্ত্রে, শ্রীনটবর চক্রবর্তী দ্বারা  
মুদ্রিত।



১০০

## সূচীপত্র ।

বিষয় ।	পত্রাঙ্ক ।
অতি লোভের শাস্তি	পণ্ডিত শিবনাথ শাস্ত্রী এম, এ ... ৬৩, ৭১
অনাথা বালিকা ( পদ্য )	শ্রীবিহারীলাল গুহ ... ১২২
অসন্তুষ্ট কাঠবিড়াল	শ্রীরামব্রহ্ম সান্যাল ... ১৮০
আলেকজান্দ্রিনা ভিক্টোরিয়া ( সচিত্র )	শ্রীভুবনমোহন রায় ... ১৭
আলেয়া	ঐ ... ১৫৯
আশ্চর্য বিনয় ( প্রাপ্ত )	শ্রীমতী সরলাসুন্দরী লাহিড়া ... ৪৪
আসিবে না ( পদ্য )	শ্রীবিহারীলাল গুহ ... ১৪২
এলিফাণ্টা গিরি-মন্দির	পণ্ডিত শিবনাথ শাস্ত্রী এম, এ ... ৭৫
কলিকাতায় মহোৎসব	শ্রীশ্রীচরণ চক্রবর্তী ... ২
কাশ্মীরে দেখিবার জিনিস	শ্রীভুবনমোহন রায় ... ৯৩
কুমারী তরুদত্ত ( সচিত্র )	ঐ ... ৪৯
কুসঙ্গের দোষ ( পুরস্কার প্রাপ্ত রচনা )	শ্রীললিতকুমার বসু ... ৫৬
রূপণ কুকুর	পণ্ডিত শিবনাথ শাস্ত্রী এম, এ ... ৭
কেগো ঐ বৃদ্ধা নারী ( সচিত্র পদ্য )	স্বর্গীয় প্রমদাচরণ সেন ... ২৯
কোহিনুর	শ্রীভুবনমোহন রায় ... ১২৭
গণ্ডার ( সচিত্র )	শ্রীবিহারীলাল গুহ ... ১১৯
গরিব ছুঃখীদিগের প্রতি ব্যবহার ( পুরস্কার প্রাপ্ত রচনা )	শ্রীনগেন্দ্রনাথ দাস ... ৩২
গ্রানভিল্ সার্প ( সচিত্র )	শ্রীভুবনমোহন রায় ... ১৬১
চীনের কথা ( সচিত্র )	শ্রীবিহারীলাল গুহ ... ৫৯
জন পাউণ্ডস্ ( সচিত্র )	শ্রীভুবনমোহন রায় ... ১৩৭
জোনাকীর বজ্জতা ( পদ্য ),	শ্রীবিহারীলাল গুহ ... ১৫৮
টাকা কড়ি ...	ঐ ... ৮৯
ঠগী ( সচিত্র )	শ্রীভুবনমোহন রায় ... ১৬৮, ১৭৭
দীপ-শিখা ...	শ্রীউপেন্দ্রকিশোর রায় চৌধুরী বি, এ ... ৮
দুঃখিনীর ছুঃখের কথা	শ্রীবিহারীলাল গুহ ... ১৭০
ধাঁধা	৪৮, ৯৬, ১২৮, ১৪৪, ১৬০, ১৭০, ১৮৬

নব বর্ষের সঙ্গীত ( পদ্য )	শ্রীচিরঞ্জীব শর্মা	...	৬৪
নানা প্রসঙ্গ	শ্রীউপেন্দ্রকিশোর রায় চৌধুরী বি, এ	...	২৫
পঞ্চম বর্ষ	পণ্ডিত শিবনাথ শাস্ত্রী এম, এ	...	১
পণ্ডিতের ভ্রান্তি	শ্রীদ্বিজেন্দ্রনাথ বসু	...	৭৭
পম্পীয়াই	শ্রীভুবনমোহন রায়	...	১১০
পরদেশ-পাখী ( সচিত্র )	শ্রীবিহারীলাল গুহ	...	১৫৫
পরোপকার ( পুরস্কার প্রাপ্ত রচনা )	শ্রীযত্ননাথ চক্রবর্তী	...	৩০
পলাতক পাখী ( পদ্য )	শ্রীবিহারীলাল গুহ	...	১৭৪
পেটুক পুষি ( সচিত্র পদ্য )	পণ্ডিত শিবনাথ শাস্ত্রী, এম, এ	...	৬
প্রজাপতি ( সচিত্র পদ্য )	শ্রীনিবারণচন্দ্র মুখোপাধ্যায়	...	২২
প্রতিশোধ	শ্রীবিহারীলাল গুহ	...	১৩২
প্রভুর কাজ	কুমারী কামিনী সেন বি, এ	...	৩৯
পাখীদের দেশ ভ্রমণ	শ্রীরামব্রহ্ম সান্যাল	...	৬৫, ৮১
পালিয়ারমেন্ট সভা ( সচিত্র )	শ্রীশ্রীচরণ চক্রবর্তী	...	২২
পিপীলিকার উপদেশ ( সচিত্র )	শ্রীদ্বিজেন্দ্রনাথ বসু	৩৫, ৫২, ৬৮, ৮৬	
ফরাসী বালিকার স্বদেশানুরাগ	শ্রীবিহারীলাল গুহ	...	৪১
ফুলের সাজি	শ্রীভবনাথ চট্টোপাধ্যায়	১৪, ১২৯, ১৪৫	
বর্ষ-শেষ ( পদ্য )	শ্রীবিহারীলাল গুহ	...	১৮৬
বাব-মানুষ ( সচিত্র )	ঐ	...	৭৮
বায়ু মণ্ডল	পণ্ডিত শিবনাথ শাস্ত্রী এম, এ	...	৮৩
বালক কলবার্ট	শ্রীআদিত্যকুমার চট্টোপাধ্যায় বি, এ	...	১০২
বালক বালিকার হাসি মুখ ( প্রাপ্ত )	ঢাকার জনৈক ছাত্র	...	১৬৭
বালকের সং শিক্ষা	শ্রীঅন্নদাচরণ সেন	...	২৬
বাল্য জীবনের অস্থির গতি ( পদ্য )	শ্রীচিরঞ্জীব শর্মা	...	১
বিদ্যাসাগরের মহত্ব	শ্রীঅন্নদাচরণ সেন	...	১৫৪
ভরত-বিলাপ ( পদ্য )	পণ্ডিত শিবনাথ শাস্ত্রী এম, এ	...	৭৩
ভারতের অসভ্য জাতি ( সচিত্র )	শ্রীরামব্রহ্ম সান্যাল	...	১১৭, ১২৩, ১৪৭
ভিখারিনীর প্রার্থনা ( পদ্য )	শ্রীবিহারীলাল গুহ	...	১০৫
মজার পড়া ( পদ্য )	শ্রীনবকৃষ্ণ ভট্টাচার্য	...	৩৭
মদ্য পানের অপকারিতা ( পুরস্কার প্রাপ্ত রচনা )	শ্রীঅমৃতলাল নাথ	...	৩৭
মহাভারতের গল্প ( পরোপকার )	শ্রীভুবনমোহন রায়	...	৩৩
মহর্ষি দেবেন্দ্রনাথ ঠাকুর ( সচিত্র )	পণ্ডিত শিবনাথ শাস্ত্রী এম, এ	...	৯, ২৫

মেডাময়সল্ লি ব্লাঙ্ক্ ( সচিত্র )	শ্রীভুবনমোহন রায়	...	৪৫
মেরী কার্পেন্টার ( সচিত্র )	ঐ	...	১০৬, ১১৩
মুক্তি-দাত ( সচিত্র )	শ্রীঅন্নদাচরণ সেন	...	১৫০
যেমন রোগ তেমনি ব্যবস্থা ( সচিত্র )	শ্রীভুবনমোহন রায়	...	১২৫
রমণীর দয়া	ঐ	...	৫৪
রাখি-বন্ধন	ঐ	...	১৫২
শৃঙ্খলা ও বন্দোবস্ত ( প্রাপ্ত )	শ্রীসতীশচন্দ্র চক্রবর্তী	...	১৮৩
সংগ্রহ	শ্রীভুবনমোহন রায়	...	১৭২
সাজি	ঐ	...	১৭৫
সাধুতার পুরস্কার ( বালকের রচনা )	শ্রীকুঞ্জবিহারী দাস	...	৭২
সুরা রাফস কোম্পানি অন্ লিমিটেড	শ্রীভুবনমোহন রায়	...	১৪২

স্বা



দেহের গঠন নূতন নূতন  
 ভাবে হয় পরিণত ;  
 মনের আকার তেমনি তাহার  
 তরল জলের মত ।  
 কার কি নিয়তি, কোন্ দিকে গতি  
 দেখিব ছুদিন পরে ;  
 যখন যৌবন লয়ে সেনাগণ  
 প্রবেশিবে দেহ ঘরে ।  
 কুশিক্ষার ফলে আনোদের ছলে  
 মাদক-গরল-পানে ;  
 কত সুকুমার করি পাপাচার  
 অকালে মরিবে প্রাণে ।  
 কুসঙ্গে মিশিয়া কুকথা শিথিয়া  
 হবে কুঅভ্যাসে রত ;  
 আপনি মরিবে অপরে মরিবে  
 থাকিবে পশুর মত ।  
 যৌবন গরবে অন্ধ হয়ে রবে  
 না জানিবে গুরুজনে ;  
 কবে মিথ্যা কথা, যাবে যথা তথা  
 নীচ অধমের মনে ।  
 কিন্তু পরিশেষে পাবে বহু ক্লেশ  
 পড়িয়া কণ্টক বনে ;  
 মরিবে কাঁদিয়া কুকর্ম্ম স্মরিয়া  
 নাহি পাবে সুখ মনে ।  
 বালক সৃজন হইবে যেজন  
 রহিবে সে সাবধানে ;  
 তার পরিমল ছুটিবে কেবল  
 চিরদিন স্বর্গপানে ।  
 মানব-সমাজে দেবলোক-মাঝে  
 বসিবে সে উচ্চাসনে ;  
 থাকিবে অক্ষিত তাহার চরিত  
 ইতিহাস-দরপণে ।

## কলিকাতায় মহোৎসব ।

সখার পাঠক পাঠিকাগণ! বড় বেশী দিনের কথা নয়, হয়ত তোমাদের মনে পড়িবে, গত ১৮৮৩ সনের মে মাসে যখন সুবিখ্যাত সুরেন্দ্রনাথ বন্দ্যোপাধ্যায়ের ছুমা-সের জেল হয় তখন তোমাদিগকে আমাদের দেশের-অনেক কথা বলা হইয়াছে। আমাদের দেশ যে পরাধীন, আমাদের দেশের লোক যে ইংরেজের অধীন এ বিষয় তোমরা গুনিয়া থাকিবে। এ দেশ স্বাধীন ও দেশ পরাধীন এ সকল কথার মানে বুঝিতে পারিলেও ভাব ভাল করিয়া বুঝা তোমাদের পক্ষে বড়ই কঠিন। তাই তোমাদিগকে এ সম্বন্ধে দুইএকটা কথা বলিতেছি। তোমরা হয়ত গুনিয়া থাকিবে ইংলণ্ডের মহারাণীই আমাদের দেশের রাণী এবং আমাদের ভারতবর্ষের সমস্ত রাজা প্রজা সকলেই সেই ইংরেজ রাণীর প্রজা। বাস্তবিক এ কথা সত্য। সেই মহারাণী শুধু ভারতবর্ষের কর্ত্রী নন, ইংলণ্ডের ছোটবড় সকল লোকই তাহার প্রজা। তবে ইংলণ্ডের লোক আমাদের ন্যায় পরাধীন নয়। আমাদের দেশের জমিদার তালুকদারগণ যেকোন তাঁহাদের অধীনের প্রজাগণের দ্বারা যাহা ইচ্ছা তাহাই করাইতে পারেন, যে দিক ইচ্ছা সেইদিকেই তাহাদিগকে পাঠাইতে পারেন, ইংলণ্ডের লোক মহারাণীর প্রজা হইলেও তিনি তাহাদিগের প্রতি সেইরূপ ব্যবহার করিতে পারেন না। বিলাতে একজন রাণী আছেন বটে, কিন্তু ইংরেজেরা জানে যে একজন লোকের ইচ্ছায় কোন কাজ হয় না, দেশ শাসনে ইহাদের সকলেরই কিছু কিছু

অংশ আছে। দেশটা যেদেশের লোকদেরই, তাহা চাহারা পর্যন্ত জানে। রাজা বা রাণীর নামে অনেক কাজ হয় বটে, কিন্তু ইংরেজেরা নিজে-রাই সব কাজ করিয়া থাকেন। তাহাদের দেশের লোকেরা সৈন্ত হইতে পারে, যুদ্ধ বিদ্যা শিখিতে পারে, যাহাতে দেশের ও নিজেদের কল্যাণ হয় এমন কাজ নির্ভয়ে করিতে পারে। কিন্তু আমাদের দেশের লোক সেই এক রাণীর অধিকারের প্রজা হইয়াও স্বাধীন-ভাবে কিছু করিতে পারে না। যে সকল ইংরেজ আমাদের দেশ শাসন করিতেছেন, তাহাদের অনেকেই আমাদের অসভ্য মনে করেন, পশুর মত ব্যবহার করেন, আমাদের প্রতি কত নময়ে কত অত্যাচার করেন, কত অবিচার করেন তাহা তোমরা হয়ত অনেকেই জান না। বিলাতের প্রজাগণের ছায় আমাদের কোন অধিকার নাই। আমরা মহারাণীর প্রজা হইলেও আমাদের ভারতবর্ষের নানা স্থানে যেমন মহারাণীর পরিবর্তে এক একজন শাসন কর্ত্তা রহিয়াছেন, যেমন বোম্বাইতে একজন গবর্নর, মাদ্রাজে একজন গবর্নর, পাঞ্জাবে একজন লেপ্টেনেন্ট গবর্নর এবং আমাদের বাঙ্গালা দেশে একজন লেপ্টেনেন্ট গবর্নর অর্থাৎ যাহাকে লোকে ছোটলাট বলে, তিনি, এবং সকলের উপরে গবর্নর জেনারেল অর্থাৎ বড় লাট বা খাজুর রহিয়াছেন, ইংলণ্ডের প্রজাদের শাসনের জন্ত একরূপ লোক নাই। আমাদের দেশে যেমন এই সকল বড়লাট ছোটলাটগণ আমাদের প্রতি যেকোন ইচ্ছা সেইরূপ ব্যবহার করিতে পারেন, যখন ইচ্ছা তখনই আমাদের নিকট হইতে ট্যাক্স (কর) আদায় করিতে পারেন, আমাদের শাসন করিবার জন্য ও আমাদের বিষয় সম্পত্তি রক্ষার জন্য যেকোন ইচ্ছা সেইরূপ আইন প্রস্তুত করিতে পারেন, ইংলণ্ডের লোকের প্রতি

এরূপ ব্যবহার করিবার নিয়ম নাই। অতি পূর্বকালে আমাদের হিন্দু রাজারা যেমন দেশের পণ্ডিতগণকে লইয়া একটা রাজসভা করিতেন এবং সেই জ্ঞানীলোকেরা সভায় বসিয়া যেকোন রাজাকে ভাল মন্দ উপদেশ দিতেন, ইংলণ্ডেও অতি পূর্বকাল হইতে তেমনি একটা রাজসভা চলিয়া আসিয়া আধুনিক পার্লামেন্ট নামক সভায় পরিণত হইয়াছে। পূর্বকালের হিন্দু রাজারা যেকোন দেশীয় পণ্ডিতগণের পরামর্শ লইয়া কার্য করিতেন বলিয়াই যাহা ইচ্ছা তাহা করিতে পারিতেন না, ইংলণ্ডের রাণী সেইরূপ পার্লামেন্টের সভ্যগণের বিনা সম্মতিতে কোন কাজ করিতে পারেন না বলিয়াই দেশের লোক সুখে আছে, স্বাধীন আছে। ইংলণ্ডের রাজা বা কোন রাজপ্রতিনিধি অপেক্ষা সাধারণ লোকেরই ক্ষমতা বেশী। রাণীর ক্ষমতা কেবল নামমাত্র, পার্লামেন্টই দেশের হর্ত্তা কর্ত্তা। এই পার্লামেন্ট নামক মহাসভার সভ্যগণই দেশের প্রকৃত শাসন কর্ত্তা এবং এই সকল সভ্যই আবার দেশের লোকের দ্বারা মনোনীত হইয়া থাকেন। এই মহাসভা দুইটা ভাগে বিভক্ত। একটিকে “হাউস অফ লর্ডস্” অর্থাৎ সম্রাটদের সমাজ এবং অপরটিকে “হাউস অফ কমন্স” অর্থাৎ সাধারণদের সমাজ কহে। খুব উঁচু বংশের লোকেরা ও বড় বড় পাঞ্জিরা মিলিত হইয়া লর্ডস্ সভার কাজ করেন। দুইজন প্রধান যাজক এবং চব্বিশজন যাজক, ও ডিউক, মার্কুইস্, অর্নল্ড, ভাইকাউন্ট, ব্যারন ইত্যাদি উপাধিধারী লর্ড পরিবারের কয়েকজন লোক লইয়া লর্ডসভা গঠন হইয়া থাকে। রাজার ন্যায় এই সম্রাটলোকদের শাসন ক্ষমতা পুরুষানুক্রমে চলিয়া আসিতেছে; দেশের কোন রাজকার্য লইয়া কোন গোলযোগ উপস্থিত হইলে এই সভাতেই সর্বশেষে

নিষ্পত্তি হইয়া থাকে। আবার নগর, গ্রাম, পল্লি-গ্রাম, জেলা ও বিশ্ববিদ্যালয়ের লোকেরা বাছিয়া বাছিয়া বিচক্ষণ লোকদিগকে কমন্স সভার সভ্য করিয়া পাঠান। এই সভ্যগুলি ভিন্ন ভিন্ন স্থানের সাধারণ লোকদের প্রতিনিধিস্বরূপ হইয়া রাজকার্য্য সম্বন্ধে মতামত প্রকাশ করিয়া থাকেন। সাধারণদের সমাজের বিশেষ ক্ষমতা এই যে, সমস্ত রাজ্যের আয়ব্যয়ের ভার ইহাদের হাতে এবং এই জন্তই ইহারা রাজাকে দমনে রাখিতে পারেন। পার্লামেন্টের দুই ভাগের সভ্যদের মধ্য হইতে রাজমন্ত্রীরা মনোনীত হইয়া থাকেন এবং বস্তুতঃ এই মন্ত্রীরাই রাজা বা রাণীর নামে রাজ্য শাসন করেন। দেশের কোন নূতন আইনকানুন করিতে হইলে মন্ত্রীরাই অনেক সময়ে সকল আইনের কথা সাধারণদের সভায় উপস্থিত করেন এবং সাধারণদের সভার অধিকাংশ সভ্যের মত হইলে লর্ড সভায় যায় এবং তথা হইতে রাণীর নিকটে সেই আইন সেই করাইতে পাঠান হয়, রাণীর সেই হইলেই আইন হইয়া যায়। যদি সাধারণদের সভার অনেকে কোন আইনের বিরুদ্ধে থাকেন এবং মন্ত্রীরা সেই আইনের প্রস্তাব করিয়া থাকেন, তবে অনেক সময় মন্ত্রীবর্গ তাঁহাদের পদ পরিত্যাগ করেন; পার্লামেন্ট সভা ভাঙ্গিয়া যায়; আবার দেশের লোকে নূতন সভ্য মনোনীত করিয়া নূতন পার্লামেন্ট সভা গঠন করিয়া লয়। পাঠক পাঠিকাগণ! এখন শুনিলেই ইংলণ্ডের প্রজাণের সহিত ভারতবর্ষের প্রজাণের কত তফাত! আমাদের দেশের লোক সেই একই রাণীর অধীনে থাকিয়া, একই রাজ্যের প্রজা হইয়া এত পরাধীন কেন বলিতে পার কি? তোমরা মনে করিও না যে, মহারাণী বা তাঁহার প্রতিনিধি বড় লাট সাহেব আমাদের দেশীয় লোক নন বা


এক জাতীয় লোক নন বলিয়াই আমাদের অবস্থার প্রতি দৃষ্টি করেন না। তোমরা বিশ্বাস করিও না যে, ইংরাজেরা ভারতবর্ষ জয় করিয়া এদেশের লোকের প্রতি নিষ্ঠুর অত্যাচার করিবেন বলিয়াই এ দেশের রাজ্যভার তাঁহাদের হাতে লইয়াছেন।

যদি আমাদের পেষণ করাই ইংরেজদের উদ্দেশ্য হইত, যদি আমাদের টাকাকড়ি কাড়িয়া লওয়াই ইংরেজদের ইচ্ছা হইত, তবে তাঁহারা আমাদের সুখ সুবিধার জন্ত এত কখনই করিতেন না। তাঁহারা আমাদের অবস্থা ভাল হইবে বলিয়া রেলের গাড়ি করিয়াছেন। আগে এক গ্রাম হইতে আর এক গ্রামে সংবাদ দিতে হইলে এক জন লোক পাঠাইতে হইত, এবং তাহাতে কত খরচ হইত ও কত সময়ে লোকও মিলিত না, এখন দুই পয়সার টিকিট দিয়া একখানা চিঠি লিখিলেই ডাকে চিঠি যাইতে পারে। অতএব তোমাদের মনে রাখা উচিত যে ইংলণ্ডের বড় বড় লোকের মত এই যে, আমাদের ভারতবর্ষের লোকেরা যতদিন ভারতবর্ষকে রক্ষা করিবার উপযুক্ত না হইবেন ততদিন ইংরেজেরা আমাদের কল্যাণের জন্তই আমাদের রাজকার্য্য করিবেন। ইংলণ্ডের লোকদের মত আমাদের যখন শরীরের বল, মনের তেজ, কার্য্যক্ষমতা ও কর্তব্যজ্ঞান হইবে, আমরা যখন খুব সাহসী হইয়া দেশের হিতের জন্ত প্রাণ দিতেও উদ্বাহিব না, আমরা যখন সত্যকাজ করিতে কাহারো ভয় করিব না, আমরা যখন ইংলণ্ডের লোকের ত্রায় ভারতের সমস্ত হিন্দু, মুসলমান, খ্রীষ্টান সকলকে এক দেশের এক জাতির ও এক বরের লোক বলিয়া দেখিতে শিখিব, একজনের ভাল দেখিয়া আর একজনে

হিংসা করিব না তখন আমাদের দেশ আমাদের দিগকে ফিরাইয়া দিয়া ইংরেজেরা ইংলণ্ডে ফিরিয়া যাইবেন। পৃথিবীর মধ্যে যে জাতি অশান্ত জাতি অপেক্ষায় খুব উঁচু হয়, পরমেশ্বর সেই জাতির লোক দ্বারায় নীচু জাতির লোকের ভাল করান।

তোমাদিগকে যে সকল কথা বলা হইল আমাদের ভারতবর্ষের সকল স্থানের বড় বড় লোকেরাই এ সকল কথা ভাল করিয়া বুঝিয়াছেন, তাই তাঁহারা সকলেই প্রাণপণে চেষ্টা করিতেছেন যাহাতে ইংলণ্ডের প্রজাদের ত্রায় আমরা হইতে পারি। গত ২৮শে ডিসেম্বর হইতে আরম্ভ করিয়া কয়েকদিন পর্য্যন্ত কলিকাতায় এবার মহা উৎসব হইয়া গিয়াছে। কলিকার “টাউন হল” ঘরে তিন দিন সভা হইয়াছিল। এই সভায় মাদ্রাজ, বোম্বাই, মধ্যভারত, পঞ্জাব, সিন্ধু, উত্তর পশ্চিম প্রদেশ ও অযোধ্যা হইতে দুই এক জন করিয়া দেশের মধ্যে যাহারা গণ্য, মাণ্ড, বিদ্বান, বুদ্ধিমান এমন সব লোক উপস্থিত হইয়াছিলেন। তাঁহাদের দেশের লোকেরা তাঁহাদিগকে প্রতিনিধি মনোনীত করিয়া পাঠাইয়াছিলেন। যাহাতে ভারতবর্ষের লোক ইংলণ্ডের লোকের ত্রায় যুদ্ধ বিদ্যা শিখিতে পারে, বড় বড় চাকুরী পাইতে পারে, দেশের আইন কানুন করিবার সময়ে গবর্ণমেন্টকে পরামর্শ দিতে পারে, এই সকল কথা লইয়া ভারতবর্ষের সকল স্থানের বড় বড় লোকেরা কলিকাতায় বসিয়া অনেক পরামর্শ করিয়াছেন। এবার কলিকাতায় যাহা দেখিয়াছি এমন আর কখনও দেখি নাই। ইতিহাসে পড়িয়াছি যে, এমন একদিন ছিল যখন আমাদের পূর্দপুরুষগণ অর্থাৎ আদিম হিন্দুজাতি একত্রে বাস করিতেন, তার পর তাঁহারা ভারতবর্ষেরও অনেক দূরদেশের

নানাস্থানে ছড়াইয়া পড়িয়াছিলেন এবং ভিন্ন ভিন্ন শিক্ষা, কৃতি ও ব্যবসায় অনুসারে নানা জাতির সৃষ্টি করিয়াছেন। আগে আমরা ভাবিতাম কেবল বাঙ্গালাদেশের লোকেরাই বৃষ্টি আমাদের দেশীয় লোক। এবার স্বচক্ষে দেখিয়া আমাদের সে ভ্রম দূর হইল। এবার দেখিলাম, ভারতবর্ষের উত্তর দক্ষিণ, পূর্ক পশ্চিম, নানা দিক হইতে ভারতসন্তানগণ উপস্থিত হইয়া একের ছুংখের কথা অতুলে বলিতেছেন, বাঙ্গালী পঞ্জাবীর গলা ধরিয়া ভাই ভাই যেমন প্রাণ খুলিয়া কথা কয় তেমনি কত মনের কথা কহিতেছেন; হিন্দু মুসলমানকে “ভাই” বলিয়া কত কথা কহিতেছেন, খ্রীষ্টান হিন্দুর গলা জড়াইয়া ধরিয়া কেমন সুন্দর ছবি দেখাইতেছেন। বোম্বাই মাদ্রাজ হইতে যাহারা সুশীল, সুবোধ, ধার্মিক লোক আসিয়াছেন আমাদের বাঙ্গালী স্ত্রীলোকেরা পর্য্যন্ত তাঁহাদের কত আদর ও সম্মান করিয়াছেন। বোম্বাই মাদ্রাজের সেই সকল ভাল লোকদিগকে নিমন্ত্রণ করিয়া অনেক বাঙ্গালী পুরুষ ও স্ত্রীলোক বাড়ীতে খাওয়াইয়াছেন ও ভালবাসা দিয়াছেন। এমন দৃশ্য যে দেখিল না সে বড়ই দুর্ভাগ্য।





### পেটুক পুষ্টি ।

থাবার পেয়ে খোকা বাবুর মুখটা যেন আলো ।  
ধামী হাতে, নিৰ্জনেতে বসলেন গিরা ভালো ।  
ভাবছেন মনে, ভাই বোনে টের না পেলেই হয়,  
একলা বসে, খাবেন কসে, খাবার সমুদয় ।  
নিষ্কণ্টকে, দিচ্ছেন মুখে যেই হাসি হাসি,  
হেন কালে, দেখতে পেল, পুষ্টি সৰ্বনাশি ।  
শত্রুর জালায়, খাওয়া যে দায়, এত শত্রুও আছে,  
পেটুক পুষ্টি বড়ই খুসী ঘনিয়ে আসে কাছে ।

খোকা ভাবে নেমে বাবে একটু পেলেই পরে  
নতুবা ডেকে আনবে কাকে নাজানি এ ঘরে ;  
ডাক শুনে ভাই বোনে যদি ছুটে আসে,  
কেড়ে খাবে সব ফুরাবে কাঁদে একা বসে ?  
ভাবি মনে, তার নন্দনে পশম খানি তুলে,  
দিয়ে তারে তুষ্ট করে, নিয়ে যাক চলে ।  
একটা পেয়ে খুসী হয়ে যায় না হতভাগা,  
লেজটা তুলে কাঁধে ঠেলে আর একখানির লাগি ।  
এমনি করি, হয় যে দেবী, ভাই বোনেরা আসে ;  
একলা থাবার, চেপ্টা খোকায়, দেখে সবাই হাসে ।

### রূপণ কুকুর ।

দেশের একজন ভদ্রলোকের একটা কুকুর ছিল, তাহাকে তিনি ডাণ্ডি ডাণ্ডি বলিয়া ডাকিতেন । ঐ কুকুরের বুদ্ধির কথা শুনিলে আশ্চর্য্য হইতে হয় । প্রভু যখন যে জিনিস আনিতে বলিতেন ডাণ্ডি তাহা দশটা জিনিসের মধ্য হইতে, খুঁজিয়া আনিতে পারিত । প্রভু বলিলেন কাপড়ের ভিতর হইতে চামড়ার ব্যাগটা আন, ডাণ্ডি গিরা কাপড় তাড়ি বিতাড়ি করিয়া ব্যাগটা বাহির করিয়া মুখে করিয়া আনিয়া দিল । এইরূপে প্রভু যখন যাহা আদেশ করিতেন ডাণ্ডি তখনই তাহা পালন করিত ।

একদিন সেই বাড়িতে কতকগুলি লোকের নিমন্ত্রণ হইয়াছিল । তাহাদের মধ্যে একজনের পকেট হইতে একটা আধুলি পড়িয়া যায় । কিছুক্ষণ পরে আধুলিটির খোজ হইল । সকলেই এদিকে ওদিকে খুঁজিতে লাগিলেন । ডাণ্ডি তখন ভাল মালুঘটির মত ঘরের এক কোণে বসিয়া আছে । তাহার প্রভু তাহার দিকে চাহিয়া বলিলেন, ডাণ্ডি আধুলিটা খুঁজে দে, তোকে একখানা বিস্কুট দিব । ডাণ্ডি আধুলিটা আনিয়া টেবিলের উপর রাখিল । ভিতরের কথা, ডাণ্ডি নিজে ঐ আধুলিটা কুড়াইয়া রাখিয়াছিল ।

তাহার প্রভুর বান্ধবগণ প্রায় তাহাকে দুই একটা পয়সা দিতেন । ডাণ্ডি জানিত যে পয়সা দিলে রুটি-ওয়ালার দোকান হইতে রুটি পাওয়া যায় । এই জন্ত সে পয়সা পাইলেই ছুটিয়া

রুটির দোকানে যাইত এবং রুটি কিনিয়া খাইত । এইরূপে ডাণ্ডি একটা আসল পথ-ভিকারী হইয়া উঠিল । পরিচিত লোক পথে দেখিলেই আকার ইঙ্গিতে পয়সা চাহিত এবং পয়সা পাইলেই রুটির দোকানে যাইত । একদিন ডাণ্ডি একজন ভদ্রলোকের নিকট পয়সা চাহিল । ভদ্রলোক বলিলেন “হায়! হায়! ডাণ্ডি আমার সঙ্গে পয়সা নাই, বাড়ীতে আছে,” এই বলিয়া তিনি চলিয়া গেলেন; স্বপ্নেও মনে করিতে পারিলেন না যে, ডাণ্ডি তাহার কথা বুঝিয়াছে । কিন্তু তিনি বেড়াইয়া ঘরে ফিরিয়া গিয়াছেন, হঠাৎ কে আসিয়া দ্বার ঠেলিতেছে । চাকরাণী খুলিয়া দেখে যে ডাণ্ডি । গৃহস্বামী বুঝিলেন ডাণ্ডি পয়সা আদায় করিতে আসিয়াছে । তাহাকে একটা পয়সা দিলেন । কিন্তু সেটা মেকি পয়সা । ডাণ্ডির অনেক তীক্ষ্ণ বুদ্ধি ছিল বটে কিন্তু মেকি পয়সা ধরিতে পারে এতদূর বুদ্ধি ছিল না । সে মেকি পয়সাটি লইয়া একছুটে রুটির দোকানে গেল এবং পয়সাটি রুটিওয়ালার হাতে দিল । রুটিওয়ালার মেকি পয়সা দেখিয়া রুটি দিল না বরং বলিল “চোর কুকুর! তুই আমাকে ঠকাইতে আসিয়াছিস্ ।” ডাণ্ডি বড় অপমানিত হইয়া সেই মেকি পয়সাটি লইয়া বরাবরসেই পয়সাদাতা ভদ্রলোকটির বাড়ীতে গেল । দ্বার ঠেলিতে লাগিল ; দাসী দ্বার খুলিলে তাহার পায়ের নিকট পয়সাটি রাখিয়া তাহার প্রাণে ঘৃণা ও বিরক্তিহৃৎক দৃষ্টি ফেলিতে ফেলিতে চলিয়া গেল ।

ডাণ্ডির সর্বাপেক্ষা প্রধান কীর্তি এখনও বলা হয় নাই । সে লোকের নিকট নিত্য যে পয়সা পাইত, তাহাতে তাহার পেট ভরিয়া রুটি খাইয়াও পয়সা বাড়িত । ডাণ্ডি ভাবিল এসব পয়সা সময়ে কাজে লাগিবে । এই ভাবিয়া সেই সকল

পয়সা আপনার শস্যার নিয়ে সঞ্চয় করিতে লাগিল। তাহার শস্যাত আর কেহ তুলিয়া দেখিত না, স্মতরাং সে তাহার উপর পরম স্নেহে শুইয়া থাকিত। রূপণ যেমন নড়ে চড়ে আর নিজের ধন দেখে, ডাঙি সেইরূপ নড়িত চড়িত আর নিজের শস্যাতীর উপরে আসিয়া শয়ন করিয়া থাকিত। একদিন রবিবার অতি প্রাতঃকালে ডাঙি রুটী কিনিয়া আনিতেছে, তাহার প্রভু দেখিয়া ভাবিলেন “এত সকালে ডাঙি পয়সা কোথায় পাইল? তবে বোধ হয় পয়সা জমাইয়া রাখে” এই ভাবিয়া চাকরাণীকে তাহার ঘর অন্বেষণ করিতে বলিলেন। স্ত্রীলোকটি যতক্ষণ এ দিক ওদিক খুঁজিয়া বেড়াইতেছিল, ততক্ষণ ডাঙি কিছু বলে নাই; সম্পূর্ণ উদাসীন ব্যক্তির ন্যায় আধপানি চক্ষু মুদিয়া শুইয়াছিল। যেই চাকরাণী আসিয়া তাহার শস্যাতে হাত দিল অমনি উঠিয়া সেই চাকরাণীর কাপড় ধরিয়া টানিয়া অন্য দিকে লইয়া বাইবার চেষ্টা করিতে লাগিল। বারণ না শুনিয়া চাকরাণীটি যখন শস্যাত তুলিবার চেষ্টা করিতে লাগিল, তখন ভয়ানক ক্রোধ করিয়া তাহাকে কামড়াইতে গেল। অবশেষে তাহার প্রভু আসিয়া বলপূর্বক তাহাকে ধরিয়া রাখিলেন। চাকরাণী শস্যাত নাড়িয়া দেখে যে, ডাঙি প্রায় চারি আনা পয়সা শস্যাত তলে সঞ্চয় করিয়া রাখিয়াছে; ডাঙি দেখিল বড় মুষ্কল, শস্যাত তলে পয়সা রাখিলে নিস্তার নাই। সেই অবধি পয়সা সে পাইলে মাটির মধ্যে পুতিয়া রাখিত। এমন কুকুরের কথা কি কেহ কখনও শুনিয়াছ?

## দীপশিখা ।

৩৩


**তেলের** বাষ্প বাতাসের অল্পজনের সহিত মিসিবার সময় যে একটা কাণ্ড কারখানা হয় তাহাকেই আমরা সাধারণ ভাষায় “প্রদীপ” বলিয়া থাকি। একটা জিনিস অল্পজনের সহিত মিসিয়া এই ব্যাপারের সৃষ্টি করিল। মিসিবার সময় একটা জিনিস তাতিয়া উজ্জ্বল হইয়া উঠিল, আর আমরা বলিলাম “ঐ আগুনের শিখা।” গতবারে আমরা মোটামুটি এই কথাগুলি শিখিয়াছি।

কিছুকাল হইল, আমাদের একজন পাঠক আমাদের একটা প্রশ্ন করিয়াছিলেন। আমরা তাহার উত্তর দিতে গিয়া এতদিন দেরি করিয়া ফেলিয়াছি, কিন্তু এপর্যন্ত কোন সহুত্তর খুঁজিয়া পাই নাই। বিষয়টা খুব কঠিন, তাহার সন্দেহ নাই; কিন্তু তা ছাড়া উত্তর না দিতে পারার আর একটা কারণ আছে। ছুঃখের বিষয়, আমরা যতবার কেরোসিন্ ল্যাম্পের পলিতা বাড়াইয়া দিয়াছি, একবারও তাঁহার পত্রো-ল্লিখিত আশ্চর্য ঘটনাটি দেখিতে পাই নাই। পলিতা কমানিয়া দিলে কতকটা ঐরূপ হয় বটে। আমাদের পাঠকগণের মধ্যে কেহ যদি এ বিষয়ে অনুসন্ধান করিতে ইচ্ছা করেন, তবে করিয়া দেখিতে পারেন। বিষয়টা এইঃ—

“আনি একদিন কেরোসিন্ ল্যাম্পের নিকট বসিয়া পড়িতেছিলাম, এমন সময় হঠাৎ একবার ঘর অন্ধকার হইল, ল্যাম্পের দিকে তাকাইয়া

দেখি যে, “পলিতার মুখে একটা ফুল (কালীতে যে একরূপ ফুলের স্থায় ল্যাম্পের মুখে হয়) হইয়া আছে ও নীলরঙ্গের শিখা উঠিতেছে, প্রকৃত আলো নাই। এইরূপে ৫৬ সেকেণ্ড পর দপ্ করিয়া জলিয়া উঠিল। পুনরায় ঐরূপ হয় কিনা দেখিবার জন্য তাকাইয়া রহিলাম। অধিকক্ষণ গত হইতে না হইতেই ঐরূপ হইল। কিন্তু সে বার অল্পকাল—প্রকৃত আলোই ল্যাম্পের মুখ হইতে ৩৪ অক্ষুণ্ড উপরে জলিতে লাগিল, ব্যবধান স্থানের মধ্যে কিছুই দেখা গেল না। এরূপ ৩৪ বার হওয়ার পর আলো একেবারে অদৃশ্য হইল, ৩ মিনিট পর্যন্ত অপেক্ষা করিয়া যাই দেখা-লাই জালিলাম তৎক্ষণাৎ ল্যাম্প ও আপনা হইতেই জলিয়া উঠিল। কিছুকাল পর যথার্থই প্রদীপ নিভিল। সেবার আমাকে পুনরায় উচিত মত ধরাইতে হইল।”

আমরা যতবার পলিতা বাড়াইয়া দিয়াছি, ততবারই আলোটা লম্বা জিব্ বাহির করিয়া কেবল ধূম উদ্গীরণ করিয়াছে। শেষে চিন্মী কাটয়া বাইবার আশঙ্কার আবার পলিতা কমানিয়া দিতে হইয়াছে।



## মহর্ষি দেবেন্দ্রনাথ ঠাকুর !

**প্রদীপ** খার পাঠক পাঠিকাগণ! তোমা-দিগকে অনেক মহাজনের জীবন-চরিত বলিয়াছি আজ এমন একজন মহাত্মার জীবনচরিত বলিব, যিনি জন্ম-গ্রহণ করিয়া আমাদের বাঙ্গালির মুখ উজ্জ্বল করিয়াছেন। ইহার স্থায় ঈশ্বর-পরায়ণ, ধান্মিক লোক এখন বাঙ্গালাতে জীবিত নাই, বলিলে অত্যাুক্তি হয় না। ইনি এখনও জীবিত আছেন কিন্তু আর অধিকদিন এ পৃথিবীতে থাকিবেন না। বার্কিক্য ও অসুস্থতাবশতঃ ইহার শরীরের অবস্থা দিন দিন ক্ষীণ হইতেছে; এবং দেখিয়া ভয় হইতেছে যে, এশরীর অধিকদিন রহিবে না। যেদিন ইনি এ সংসার পরিত্যাগ করিবেন সেদিন ভারতবর্ষের একটা উজ্জ্বল তারা খসিয়া পড়িবে।

তবে ইহার বিষয় কিছু শুন। ইহার নাম দেবেন্দ্রনাথ ঠাকুর। ইহার যে প্রতিমূর্তি দেখিতেছ ইহা তাঁহার অত্যন্ত প্রাচীন অবস্থার প্রতিমূর্তি; বিশেষতঃ আমাদের দেশে এখনও চিত্র-বিদ্যার ততদূর উন্নতি না হওয়াতে আমরা মনের মত করিয়া কোন লোকের ছবি করিতে পারি না। স্মতরাং এ ছবিতে সেই মহাপুরুষের আসল চেহারা কিছুই প্রকাশ করিতে পারা যায় নাই। ৪০ বৎসর পূর্বে কলিকাতাতে একজন বিখ্যাত বড় নাট্যশিল্পী ছিলেন। ঐশ্বর্য, ক্ষমতা, প্রভুত্ব-শক্তিতে তাঁহার সমকক্ষ লোক সে সময়ে কলিকাতায় ছিল না। গবর্নর জেনেরাল হইতে জজ ম্যাজিষ্ট্রেট পর্যন্ত সমুদায় ইংরাজ তাঁহার হাতধরা ছিল। দেশের লোকের ত কথাই নাই। তিনি ধনে,





মানে, পদে, সর্বাগ্র গণ্য ব্যক্তি ছিলেন। ইঁহার নাম দ্বারকানাথ ঠাকুর। ইঁহার নাম তোমরা শুনিয়া থাকিবে। দেবেন্দ্রনাথ ঠাকুর উক্ত দ্বারকানাথ ঠাকুরের জ্যেষ্ঠ পুত্র।

মহাত্মা রাজা রামমোহন রায় যখন ব্রাহ্মসমাজ স্থাপন করেন, তখন দ্বারকানাথ ঠাকুর তাঁহার বিশেষ সাহায্য করিয়াছিলেন। ১৮৩০ সালে রামমোহন রায় যখন ইংলণ্ডে গমন করেন, তখন তাঁহার জ্যেষ্ঠ পুত্র রাধাপ্রসাদ রায় ও

দ্বারকানাথ ঠাকুর এই দুইজনের প্রতি ব্রাহ্মসমাজের প্রধান ভার পড়ে। ১৮৩৩ সালে রামমোহন রায় ইংলণ্ডের ব্রিস্টল নগরে প্রাণত্যাগ করেন। মৃত্যুর পর রাধাপ্রসাদ রায় দিল্লীতে গমন করেন; তখন ব্রাহ্মসমাজের ভার দ্বারকানাথ ঠাকুরের উপর পড়ে। দেবেন্দ্রনাথ ঠাকুরের বয়স্ক্রম তখন ১৭ কি ১৮ বৎসর। ১৮১৮ খ্রীষ্টাব্দে তাঁহার জন্ম হয়। তাঁহার বাল্যকালে রামমোহন রায় একটা ইংরাজী স্কুল স্থাপন করেন; তাঁহার পিতা,

রামমোহন রায়ের সহিত বন্ধুতা থাকতে, প্রথমে তাঁহাকে সেই স্কুলে পাঠাইয়াছিলেন, তাহার পর তিনি হিন্দু কলেজে পড়িয়াছিলেন।

দ্বারকানাথ ঠাকুর যে কলিকাতার একজন বিখ্যাত ধনী ছিলেন, তাহা তোমাদিগকে পূর্বেই বলিয়াছি। সেরূপ ধনীর ছেলে হইলে মানুষ কত বাবুগিরিতে থাকে তাহা তোমরা বুঝিতেই পার। সেরূপ বিলাস ও বাবুগিরির মধ্যে বাস করিয়া লোকের ধর্ম-প্রবৃত্তি মলিন হইয়া যায়। নানা কুসঙ্গী জুটিয়া সর্বদা কুপথে যাইবার জন্ত পরামর্শ দিতে থাকে; স্বার্থপর লোকে আপনাদের কাজ সারিয়া লইবার জন্ত সর্বদা তোষানোদ করে; তাহাতে মস্তক ঘুরিয়া যায়; এই কারণে এদেশের বড় মানুষের ছেলেরা প্রায় নষ্ট হইয়া যায়। বড় মানুষের ছেলেদিগকে মানুষ করিবার জন্ত বত টাকা ব্যয় হয়, বত পরিশ্রম হয়, বত চেষ্টা হয়, কোন গরিবের ছেলের জন্ত তেমন হয় না। অথচ অতি অল্প বড় মানুষের ছেলেকেই মানুষ হইতে দেখা যায়। ছেলেবেলা হইতেই তাহাদের নানা পাপে মতি হয়, ও ধনের অহঙ্কারে মন পূর্ণ হয়। এখন বিবেচনা কর দেবেন্দ্রনাথ ঠাকুর কি আশ্চর্য্য প্রকৃতি লইয়া জন্মগ্রহণ করিয়াছেন, যে তাঁহার বয়স যখন ১৭ কি ১৮ বৎসর তখন হইতেই তাঁহার ধর্মে মতি হইল। যে ছই কারণে তাঁহার মনে ধর্ম চিন্তার উদয় হইল, তাহা গুনিলেও তোমরা আশ্চর্য্য বোধ করিবে; কারণ তেমন ঘটনা প্রতিদিন হাজার হাজার লোকের জীবনে ঘটিতেছে—কিন্তু সেরূপ চিন্তা অল্প কাহারও মনে উদয় হয় না। প্রথম, তিনি একদিন রাত্রিকালে ছাদের উপরে শয়ন করিয়া আকাশের শোভা দেখিতেছিলেন। মিশ্রল আকাশে অগণ্য নক্ষত্র ফুটিয়া

রহিয়াছে, দেখিয়া তাঁহার প্রাণ চমকিয়া উঠিল! মনে মনে চিন্তা করিতে লাগিলেন, ইহাদের উপরে কি কেহ কর্তা নাই? অল্প লোকের মনে এরূপ চিন্তা যদিও কখনও উঠে, ছইদণ্ডের মধ্যেই আবার মিলাইয়া যায়। কিন্তু এই মহাত্মা স্বতন্ত্র ধাতুতে নির্মিত, স্তত্রাং তাঁহার প্রাণে এই প্রশ্ন ঘুরিয়া বেড়াইতে লাগিল। তত বিষয় স্মৃতির মধ্যে থাকিয়াও এই চিন্তা তাঁহার প্রাণে জাগিতে লাগিল। এই সময়ে তাঁহার একজন আত্মীয়া বৃদ্ধার মৃত্যু হয়। সেই শব দাহের সময়ে তিনি শ্মশানে গিয়াছিলেন। শ্মশান হইতে সকলে ঘরে ফিরিয়া আসিল এবং আপন আপন কাজে নিযুক্ত হইল, কিন্তু তাঁহার প্রাণে এক যুগান্তর ঘটিয়া গেল। তিনি দিবাচক্ষে বিষয় স্মৃতিতে অনিত্য ও অসার বলিয়া দেখিতে পাইলেন। যেন কি এক অপূর্ণ আলোক তাঁহার প্রাণে আসিয়া পড়িল! তিনি যেন কি এক অমূল্য বস্তু লাভ করিলেন! এখন হইতে তাঁহার মনে ধর্ম-চিন্তা অত্যন্ত প্রবল হইয়া উঠিল। ধর্মের চর্চা ভিন্ন আর কোন চর্চা তাঁহার ভাল লাগিত না। তিনি সমবয়স্ক বন্ধু বান্ধবদিগকে লইয়া নিরন্তর ধর্মালোচনা নিযুক্ত হইলেন। তাঁহার বাড়ীর নিকটে ব্রাহ্মসমাজের বাড়ী, তাঁহার পিতা তাহার একজন প্রধান সভ্য ছিলেন, এবং তাহার রক্ষার জন্ত মাসে মাসে প্রায় ৮০৮৫ টাকা অর্থ সাহায্য করিতেন, তথাপি তিনি ইঁহার পূর্বে সেখানে বড় একটা বাইতেন না। যেদিন হইতেপ্রাণে ধর্ম-চিন্তা প্রবল হইল, তখন তিনি ব্রাহ্মসমাজে বাইতে আরম্ভ করিলেন। গিয়া দেখেন, সমাজের অতি হীন অবস্থা। রামমোহন রায় যে আচার্য্যকে নিযুক্ত করিয়া গিয়াছিলেন, তিনিই কোন প্রকারে উপাসনা কার্য সম্পন্ন করেন;

পুরাতন সভ্যদের প্রায় কেহই আর আসেন না। কেবল সমাজের দিন দুইচারিজন পথিক লোক আদিয়া বসে। ওদিকে সমাজে অনেক কুসংস্কার প্রচার হইতেছে। ইহা দেখিয়া ব্রাহ্মসমাজকে সংস্কার করিবার ইচ্ছা তাঁহার মনে অত্যন্ত প্রবল হইল। তখন তাঁহার বয়স অল্পমান ২০ বিশ বৎসর হইবে।

তিনি উৎসাহের সহিত ধর্মালোচনাতে প্রবৃত্ত হইলেন। ১৮৩৯ সালে “তত্ত্ববোধিনী সভা” নামে একটি সভা স্থাপন করিলেন। আমাদের দেশের প্রাচীন শাস্ত্রের আলোচনা করা, ধর্ম-বিষয়ে বিচার করা, ঐ সভার প্রধান কার্য হইল। এই সময়ে একটি ঘটনা হয় তাহাতেও ঐ মহাত্মার আশ্চর্য্য ধর্মভাবের ও দৃঢ়প্রতিজ্ঞতার পরিচয় দিতেছে। একদিন তিনি গভীর ধর্ম-চিন্তাতে মগ্ন হইয়া বেড়াইতেছেন এমন সময়ে একটি পুখীর পাতা বাতাসে উড়িয়া উড়িয়া আসিয়া তাঁহার পায়ে লাগিল; তিনি কুড়াইয়া লইয়া পড়িবার চেষ্টা করিলেন, ভাল বুঝিতে পারিলেন না। ব্রাহ্মসমাজের তদানীন্তন আচার্য্য রামচন্দ্র বিদ্যাবাগীশ মহাশয়কে জিজ্ঞাসা করিতে তিনি তাহার অর্থ করিয়া দিলেন। সেটি “ঈশোপনিষদ্” নামক বেদের এক গ্রন্থের প্রথম পাতা। দেবেন্দ্র নাথ দেখিলেন যে সেই একটি পাতাতে অতি আশ্চর্য্য গভীর সত্য সকল নিহিত রহিয়াছে! দেখিয়া তাঁহার বেদ ও উপনিষদের প্রতি ভক্তি বাড়িয়া গেল। তিনি উপনিষদ্ সকল পাঠ করিতে পারিবেন বলিয়া মনোযোগ সহকারে সংস্কৃত ভাষা শিক্ষা করিতে লাগিলেন।

এইরূপে পাঠ ও আত্মচিন্তা দ্বারা তাঁহার ধর্মভাব দিন দিন গাঢ় হইতে লাগিল। ১৮৪৩ খ্রীষ্টাব্দে “তত্ত্ববোধিনী পত্রিকা” নামে একখানি

মাসিক পত্রিকা বাহির হইল। এই পত্রিকা এখনও আছে এবং তাহাতে ধর্মসম্বন্ধে অতি গভীর সত্য সকল প্রকাশ হইয়া থাকে। তোমরা সকলেই অক্ষয় কুমার দত্তের নাম জান; তাঁহার প্রণীত চারুপাঠ, ধর্মনীতি প্রভৃতি গ্রন্থ তোমরা সকলেই পড়িয়াছ। সেই অক্ষয় কুমার দত্ত মহাশয় প্রথমে তত্ত্ববোধিনী পত্রিকার সম্পাদক নিযুক্ত হন। তাঁহার বিদ্যা বুদ্ধির গুণে তত্ত্ববোধিনী অল্প দিনের মধ্যে দেশের বাঙ্গলা সংবাদ পত্র সকলের মধ্যে সকলের শ্রেষ্ঠ হইয়া দাঁড়াইল। তত্ত্ববোধিনী পত্রিকার দ্বারা দেশমধ্যে ধর্মচিন্তা প্রবল হইয়া উঠিল; আমাদের দেশের যে সকল প্রাচীন শাস্ত্র এতদিন লোকে জানিতনা তাহা উদ্ধার হইতে লাগিল; সেই সকলের অনুবাদ দেখিয়া লোকে অবাক হইয়া যাইতে লাগিল; আমাদের প্রাচীন শাস্ত্ররূপ খনিতে যে এত রত্ন আছে তাহা জানিয়া সকলের মনে স্বদেশানুরাগ প্রবল হইতে লাগিল; যে ব্রাহ্মসমাজ মৃতপ্রায় হইয়াছিল, আবার তেজের সহিত বাড়িয়া উঠিল।

এদিকে দেবেন্দ্র নাথ ঠাকুর মহাশয় ধর্ম-চিন্তার অতি গভীর স্থানে প্রবেশ করিতেছেন। তখন তাঁহার মনে একটি প্রশ্ন বিশেষভাবে প্রবল হইল। তিনি মনে মনে ভাবিতে লাগিলেন, যদি সত্যস্বরূপ পরমেশ্বরের উপাসনাতে লোকের মতি না হয়, তাহা হইলে ধর্ম চর্চাতে ফল কি? যদি লোকে ঈশ্বরের পূজা না করে, তবে তাহা-দিগকে সাকার দেব দেবীর পূজা ছাড়াইয়া ফল কি? এই ভাবিয়া ১৮৪৪ খ্রীষ্টাব্দে তিনি এবং আরও কয়েক জন বন্ধু একত্রে ব্রাহ্মধর্ম-ব্রত গ্রহণ করিলেন, অর্থাৎ তাঁহারা এই বলিয়া প্রতিজ্ঞা করিলেন যে তাঁহারা রোগাদিরদ্বারা অশক্ত না হইলে

প্রতিদিন নিয়ম পূর্বক পরমেশ্বরের অর্চনা করিবেন। তাঁহার সহিত যত লোকে এই প্রতিজ্ঞা করিয়াছিলেন, তাহাদের মধ্যে কে কোথায় গিয়াছে, হয়ত তাহাদের মধ্যে অনেকেই সে প্রতিজ্ঞা লঙ্ঘন করিয়াছে কিন্তু তিনি ১৮৪৪ খ্রীষ্টাব্দে যে প্রতিজ্ঞা করিয়াছেন, একটি দিনের জন্ত তাহা ভঙ্গ করেন নাই। এখন তাঁহার শরীর জরাজীর্ণ এখনও তিনি সেই প্রতিজ্ঞা রক্ষা করিতেছেন। বুঝিয়া লও ইনি কি ধাতুর লোক। সমাজমধ্যে সত্যস্বরূপ পরমেশ্বরের উপাসনা যখন আরম্ভ হইল তখন লোকের ধর্ম-জীবন ফিরিতে লাগিল। তাঁহার সহবাসে থাকিয়া অনেক ছুরাচার লোকের চরিত্র শুধরাইয়া যাইতে লাগিল। কি আশ্চর্য্য ব্যাপার! সে সময়ে যে কেহ ইংরাজী শিক্ষা করিত, সেই ইংরাজী সভ্যতা ভাল বাসিত, সুরাপানে রত হইত; ধর্মের প্রতি একবারে উদাসীন হইয়া পড়িত। এই মহাত্মার জীবনে ইহার ঠিক বিপরীত ঘটনা ঘটিল। তাঁহার স্বদেশানুরাগ শতগুণ বাড়িয়া গেল; এদেশীয় শাস্ত্র, এদেশীয় ভাব, এদেশীয় রীতি নীতি, তাঁহার ভাল লাগিত; তিনি ঋষিদের প্রকৃত শিষ্য হইয়া তাঁহাদের পদতলে বসিলেন; মনোযোগ পূর্বক পাপাশক্তি ও দুর্গতি হইতে যুবকদিগকে ফিরাইবার চেষ্টা করিতে লাগিলেন; এবং ধর্মচিন্তাতে গম্ভীররূপে নিমগ্ন হইলেন। এই জন্যই বলিয়াছি ইহার প্রকৃতি সাধারণ প্রকৃতি নয়।

“সত্যস্বরূপ ঈশ্বর ব্যতীত কোন সৃষ্ট বস্তুর পূজা করিব না” এই প্রতিজ্ঞা করার পর তাঁহাকে অনেক ক্লেশ পাইতে হইত। তখনও তাঁহার অতুল প্রভাব-শালী পিতা বর্তমান। তখনও বাড়ীতে মহা ধুমধাম করিয়া দুর্গোৎসব হইত। সে সময়ে বাড়ীর

ছেলেদিগকে অঞ্জলি দিতে হইত, তিনি নিজের প্রতিজ্ঞা রক্ষা করিয়া তাহা দিতেন না। সেই কয়েক দিন বাড়ী ছাড়িয়া পথে পথে বাগানে বাগানে ঈশ্বরোপাসনা করিয়া কাটাইতেন।


ইহার কিছুদিন পরে তাঁহার পিতা ইংলণ্ডে গমন করেন এবং সেখানে তাঁহার মৃত্যু হয়। পিতার মৃত্যুর পর দুইটি ঘটনা হয় তাহাতে তাঁহার ধর্ম-বীরত্বের আশ্চর্য্য প্রমাণ পাওয়া গিয়াছে। প্রথম, তাঁহার পিতার আদ্যশ্রাদ্ধের দিন যতই নিকটে আসিতে লাগিল, ততই তাঁহার প্রাণে এই চিন্তা উপস্থিত হইতে লাগিল, আমি যখন সত্যস্বরূপের উপাসক তখন আমি কিরূপে সাকার দেবদেবীর পূজা করিয়া পিতার শ্রাদ্ধ করিব? মনে মনে প্রতিজ্ঞা করিলেন যে সাকার দেব-দেবীর পূজা করিবেন না। তাঁহার বাড়ীতে হলশূল পড়িয়া গেল। তিনি বাড়ীর বড়ছেলে তিনি শ্রাদ্ধে যোগ দিবেন না, পরিবার পরিজন সকলে কাঁদিতে লাগিল। তিনি কোনক্রমেই নিজের ব্রত লঙ্ঘন করিতে পারিলেন না। তাঁহার কনিষ্ঠ ভ্রাতা শ্রাদ্ধের অপরাপর কার্য সম্পন্ন করিলেন, তিনি কেবল দান উৎসর্গ করিয়া, সমস্ত দিন বেদপাঠ ও উপাসনাদিতে কাটালেন। এই সময় হইতে তাঁহার জাতি কুটুম্ব তাঁহাকে পরিত্যাগ করিলেন। ইহার কিছু দিন পরে আর একটি ঘটনা ঘটিল। তাঁহার পিতা মরিবার সময় অনেক লক্ষ টাকা ঋণ রাখিয়া গিয়াছিলেন। এই ঋণের দায়ে তাঁহার কারঠাকুর কোম্পানী নামে যে সওদাগরী ছিল তাহার পতন হইল। সওদাগরী ছাড়া দ্বারকানাথ ঠাকুরের যে বৃহৎ জমিদারী ছিল তাহার অধিকাংশ তাঁহার নিজের উপার্জিত এবং অল্পাংশ তাঁহার পৈতৃক ছিল। এই পৈতৃক জমিদারী তিনি পুত্রদের জন্ত নিজ

সম্পত্তি হইতে পৃথক করিয়া কয়েক জন বিশ্বস্ত ব্যক্তির জিহ্বায় তাহা রাখিয়া দেন। এই সম্পত্তির উপরে তাঁহার পাওনাদারদের হাত দিবার অধিকার ছিল না কিন্তু দেবেন্দ্রনাথ ঠাকুর যখন দেখিলেন যে তাঁহার পিতার উপার্জিত সমুদায় বিষয় বিক্রয় করিয়াও সমস্ত ঋণ শোধ হয় না, তখন তিনি নিজেদের খাওয়া পরার একমাত্র উপায় যে জমিদারী বিশ্বস্তদের জিহ্বায় আছে তাহাও বিক্রয় করিয়া তাঁহার ঋণ পরিশোধ করিতে প্রতিজ্ঞারূঢ় হইলেন।

দেবেন্দ্র নাথ ঠাকুর মহাশয় চিন্তা করিতে লাগিলেন,—“আমি যখন সত্য-স্বরূপের উপাসক হইয়াছি তখন নিজের বিষয় থাকিতে পিতার পাওনাদারদিগকে তাহা না দিয়া অধম্মে পতিত হইতে পারিব না?” কোন ক্রমেই মনকে তাহার জন্য প্রস্তুত করিতে পারিলেন না। ওদিকে তাঁহার পিতার এত ঋণ রহিয়াছে যে সমুদায় বিষয় বিক্রয় হইয়া তাঁহাদের ফকির হইয়া যাইবার কথা। তিনি সে দিকে দৃষ্টিপাত করিলেন না; বাড়ীর লোকদিগকে বলিলেন যে, “ফকির হই আর মরিয়াই যাই, আমি প্রবঞ্চনা করিতে পারিব না” বাড়ীতে কান্না-হাটি পড়িয়া গেল। তিনি পাওনাদারদিগকে ডাকাইয়া সমুদায় বিষয়ের একটি তালিকা করিয়া তাঁহাদের হস্তে সমর্পণ করিলেন। তাঁহার এই সাহস ও সাধুতা দেখিয়া পাওনাদারদিগের মধ্যে কেহ কেহ কাঁদিয়া ফেলিলেন। ইহার ফলে এই হইল তাঁহার বিষয় বিক্রয় করিয়া লইলেন না। দেবেন্দ্র বাবুর পরিবারের জন্য মাস-হারার বন্দোবস্ত করিয়া আপনাদের হাতে বিষয় রাখিয়া চালাইতে লাগিলেন। কিছুদিন পরে আবার তাঁহার নিজেই সেই বিষয় দেবেন্দ্র বাবুর হস্তে সম-

র্পণ করিলেন। তোমরা শুনিয়া সুখী হইবে দেবেন্দ্র বাবু বহুকাল ধরিয়া সেই সমুদায় ঋণ শোধ করিয়াছেন। এমন কি তাঁহার পিতা কলিকাতার চ্যারিটেবল সোসাইটিতে একলক্ষ টাকা দিবার যে লেখা পড়া করিয়াছিলেন কিছু দিন হইল তিনি সেই একলক্ষ টাকাও দিয়াছেন। এমন সুযোগ্য পুত্র কয়জন দেখা যায়। ধর্ম্মই ধার্ম্মিককে রক্ষা করেন, ইহার প্রমাণ যদি কোথাও দেখিতে চাও, তবে এই মহাত্মার জীবনে দেখ। আজ এই পর্য্যন্ত। এখনও অনেক বলিতে অবশিষ্ট রহিল পরে বলিব।

ক্রমশঃ।—



## ফুলের সাজি ।

ষষ্ঠ অধ্যায় ।

পিতা ও কন্যার সাক্ষাৎ ।

**মনোরমার** ছুঃখের কাহিনী শুনিলে পাষণ্ড গালিয়া যায়। পরমেশ্বর কোমল হৃদয়া বালিকাকে কি পরীক্ষাতেই ফেলিয়াছেন। দেখিতে দেখিতে আর একটি দিন চলিয়া গেল। কারাগারই এখন মনোরমার আবাসস্থান, দ্বারে ভীষণাকার প্রহরী, হৃদয়ে দয়ার লেশ মাত্র নাই, আকার দেখিলে সাক্ষাৎ যম বলিয়া বোধ হয়। হায়! বালিকা তুমি অকারণে

কত ক্লেশই পাইতেছ; ঈশ্বরই দেখিতেছেন তুমি কত যন্ত্রণা ভোগ করিতেছ।

মনোরমার কারাগৃহ ত্যাগ করিয়া আমরা একবার বিচারকের গৃহে গিয়া দেখি তিনি কি করিতেছেন। ঐ দেখ তাঁহার মুখে চিন্তার কালিমা পড়িয়াছে, কিছুই ঠিক করিতে পারিতেছেন না। বিষয় সমস্তা—কি করিবেন, তাহাই ভাবিতেছেন। ভাবিলেন—তাই ত এই বালিকার বিচার করিতে তিন দিন অতীত হইল, তথাপি সত্য নির্ণয় করিতে পারিলাম না। বালিকার নির্ভীক চিত্ত, সতেজ কথা শুনিলে তাহাকে নির্দোষী ভিন্ন আর কিছুই বোধ হয় না। কিন্তু যদি সে প্রকৃত অপরাধী হয় তাহা হইলে একরূপ কপট ও ছুষ্ট প্রকৃতি বালিকা আমি এই প্রথম দেখিলাম।

তিনি এখনও কিছু ঠিক করিতে পারিলেন না বলিয়া আপনি রাজভবনে উপস্থিত হইলেন—এবং কোন বিশ্বস্ত রাজ-ভৃত্যকে অন্তঃপুরে পাঠাইয়া তাহার রাজমহিষী কথিত সমুদায় বিবরণ শ্রবণ করিলেন।

বিচারক মারাকে আবার ডাকিয়া বিবিধ প্রকারে তাহাকে অনেক প্রশ্ন জিজ্ঞাসা করিলেন।

বিষয় বিভ্রাট, অথচ একদিকে রাজ অন্তঃপুরে চুরী, অতীতকালে বিশেষ প্রমাণাভাবে একটি বালিকার প্রাণদণ্ড! কারণ তখন চুরী অপরাধে প্রাণদণ্ডের নিয়ম ছিল। সমস্তদিন অনেক ভাবিয়া তিনি পরিশেষে মনোরমার পিতাকে নিকটে ডাকিয়া বলিলেন “দীননাথ! তুমি একবার তোমার কন্যাকে ভাল করিয়া জিজ্ঞাসা করিয়া দেখ দেখি তোমায় সে কি বলে। দেখ, সকলে আমায় বলে আমি বড় কড়ালোক

কিন্তু আমি কখনও কোন অবিচার করি নাই। তুমি কি এমন ইচ্ছা কর যে তোমার মেয়ে-টীর প্রাণদণ্ড হয়—যে রূপ ঘটনা তাহাতে সে নিশ্চয় দোষী—এবং আমাদের দেশের আইন অহুসারে তাহার প্রাণদণ্ড হইবে। কিন্তু যদি সে এখনও তাহার দোষ স্বীকার করে ও আংটি ফিরাইয়া দেয় তাহা হইলে আমরা তাহাকে বালিকা বলিয়া অল্প শাস্তি দিয়া ছাড়িয়া দিব প্রতিশ্রুত হইয়াছি। নচেৎ তাহার প্রাণের আশা নাই, যাও যাহাতে সে আংটি ফিরাইয়া দেয় তাহা কর। তুমি পিতা, তুমি স্বীকার করাইয়া আংটি আদায় করিতে পারিবে। যদি তুমি না পার তোমাকেও আমরা দোষী জ্ঞান করিব এবং তোমাকেও দণ্ডগ্রহণ করিতে হইবে।”

দীননাথ উত্তর করিল “আপনি যেমন বলিলেন সেইরূপই হইবে কিন্তু তাহাকে অনেক বার ভালরূপে জিজ্ঞাসা করিয়া জানিয়াছি; সে নির্দোষী স্তরং তাহার দোষ স্বীকারের কিছুই দেখিতে পাই না, যাহা হউক আমি যে তাহাকে দেখিতে পাইবার অহুমতি পাইলাম ইহাই যথেষ্ট।”


এক জন প্রহরী বৃদ্ধ দীননাথকে কারাগারে মনোরমার নিকট লইয়া গেল; দীন নাথ তথায় প্রবেশ করিলে পর, প্রহরী দ্বার রুদ্ধ করিয়া বাহিরে গেল। তখন সন্ধ্যা অতীত হইয়াছে, বৃদ্ধ ক্ষীণ দীপালোকে দেখিল, মনোরমা ভূণ শয্যা গুইয়া নিদ্রা বাইতেছে। আহা! তাহার সে লাভ্য নাই! মুখের সে হাসি হাসি ভাব নাই, শুধু কমলের ন্যায় তাহার মুখখানি শীহীন হইয়াছে! বৃদ্ধ দেখিল পার্শ্বে একখানি থালায় কতকগুলি অন্ন ও ব্যঞ্জন এবং একটি ঘটিতে এক ঘটি

জল। অনুমানে তাহার বোধ হইল, মনোরমা তাহা স্পর্শও করে নাই। এই সকল দেখিয়া বৃদ্ধ চক্ষের জল রাখিতে পারিল না। হায় রে? ইহার এত কষ্টও ছিল, না জানি আরও বা কি ঘটে! সে এই চিন্তা করিতেছে এমন সময় মনোরমা স্বপ্ন দেখিয়া কাঁদিয়া উঠিল—বৃদ্ধ কন্ঠার গাত্রে হস্ত দিয়া বলিল “ভয় কি মা!” মনোরমা চক্ষু খুলিয়া দেখে, কাছে পিতা বসিয়া সান্ত্বনা দিতেছেন “ভয় কি মা”। আশাতিরিক্ত এই মিলনে তাহাদের হৃদয় যে কি আনন্দ অনুভব করিয়াছিল তাহা বর্ণনা করা অসাধ্য, প্রথমে কাহারও মুখে কথা বাহির হইল না, দুজনেই চিত্র পুস্তিকার আয় কিছুক্ষণ অবস্থিতি করিল। তৎপরে বালিকা পিতার পা ছুটি ধরিয়া কাঁদিতে লাগিল, নয়নজলে বৃদ্ধেরও বক্ষঃস্থল ভাসিয়া যাইতে লাগিল। পরিশেষে দীননাথ কন্ঠাকে তাহার আগমনের কারণ সমস্ত খুলিয়া বলিল। মনোরমা বলিল, বাবা তুমি ত ঠিক জান আমি নিরপরাধিনী, হায়! শেষে কি তুমিও আমায় চোর বলিয়া স্থির করিলে? পিতা বলিল, মনোরমে! স্থির হও আমি তোমায় নির্দোষী বলিয়া জানি কেবল বিচারপতির আজ্ঞায় তোমায় আবার প্রশ্ন করিয়াছিলাম। তোমার এই দশা দেখিয়া আমার প্রাণ ফাটিয়া যাইতেছে, না জানি তোমার আরও কি হয়।

মনোরমা বলিল বাবা, আমি নিজের জীবনের জন্ত একতিলও চিন্তিত নহি, তোমার যদি কোন আনষ্ট না হয় তাহা হইলে আমার প্রাণদণ্ড আজ্ঞা হইলেও আমি আনন্দে প্রাণত্যাগ করিতে পারিব।

পিতা বলিল “আমার জন্ত ভয় নাই, আমাকে

উহারা কোন দণ্ড দিবে না, কিন্তু তোমার কথা ভাবিয়া আমি বড় কাতর হইতেছি।” মনোরমা প্রফুল্লমনে কহিল যদি তোমার কোন ভয় না থাকে—তাহা হইলে আমার মৃত্যুও স্নেহের হইবে। কারণ আমি এ সংসার ত্যাগ করিয়া আমার পরম পিতা হরির কাছে যাইব—স্বর্গে আমার মার সঙ্গে আবার আমার মিলন হইবে। কথাগুলি শুনিয়া বিবাদের মধ্যেও দীননাথের প্রফুল্লতা আসিল—তখন তিনি কাঁদিতে কাঁদিতে বলিলেন “ধন্য ঈশ্বর! ধন্য তিনি যে তোমায় একপা নির্ভয়ের ভাব আসিয়াছে; কিন্তু বৃদ্ধ বয়সে একমাত্র কন্যার হারাণ আমার পক্ষে মৃত্যু অপেক্ষাও যন্ত্রণা-দায়ক। ঈশ্বর! তোমার ইচ্ছা পূর্ণ হউক, আমি মনোরমাকে তোমার হাতে দিলাম—তুমি তাহাকে রাখিতে হয় রাখ না রাখিতে হয় মার।” কিয়ৎক্ষণ পরে বাষ্পবেগ সংবরণ করিয়া আবার কহিলেন—“মনোরমে—তুমি জান মায়ার সাক্ষ্যদানেই তোমার এই বিপদ—কিন্তু তুমি কি মনে মনে তাহার অপরাধ মার্জনা করিতে পারিয়াছ! তাহার উপর তোমার কোন মন্দ ভাব নাই ত? মনোরমে! তাহাকে দয়া করিয়া ক্ষমা কর।” মনোরমা বলিল “আমি তাহার সকল অপরাধ ক্ষমা করিয়াছি; যাহা আমার ক্রেশ, সমুদায়ই হরির ইচ্ছায় হইয়াছে। অন্য কাহার দোষ দিব?” মনোরমার কথা শেব না হইতেই প্রহরী দোর খুলিয়া গৃহে প্রবেশ করিল। প্রহরী দীননাথের হস্ত ধারণ করিয়া বলিল “চল!” মনোরমা পিতার পা ধরিয়া কাঁদিতে লাগিল। প্রহরীর উত্তেজনায় অবশেষে তিনি ধীরে ধীরে পা সরাইয়া লইলেন, মনোরমা মূর্ছাপন্ন হইয়া তৃণের উপর পড়িয়া রহিল।



ফেব্রুয়ারি, ১৮৮৭।

## আলেকজান্দ্রিনা ভিক্টোরিয়া।

আমাদিগের পাঠক পাঠিকাদিগের মধ্যে সকলেই হয়ত জান না, যে আমাদিগের মহারাণীর সম্পূর্ণ নাম কি; কুইন ভিক্টোরিয়াই আমরা সকলে জানি; কিন্তু ইহার প্রকৃত নাম আলেকজান্দ্রিনা ভিক্টোরিয়া। সাধারণতঃ রাজারাণীদিগের ভাগ্যে যাহা প্রায় ঘটে না, ইহার ভাগ্যে তাহাই ঘটয়াছে; পঞ্চাশ বৎসর রাজত্ব করা প্রায় কোন রাজার ভাগ্যেই ঘটে না, কিন্তু আগামী ২০শে জুন আমাদিগের মহারাণীর রাজত্ব পঞ্চাশ বছর পূর্ণ হইবে। এই উপলক্ষে পৃথিবীর যে যে স্থানে মহারাণীর রাজত্ব আছে সকল স্থানেই মহা উৎসব হইবে। কিন্তু আমাদের দেশে, অর্থাৎ ভারতবর্ষের সকল স্থানে গত ১৬ এবং ১৭ই এই উৎসব শেষ হইয়া গিয়াছে। এই জুবিলি উপলক্ষে কলিকাতায় এবং অন্য অত্র স্থানে মহা ধুমধাম হইয়া গিয়াছে; অনেক ভাল কাজও হইয়াছে এবং অনেক ভাল

কাজের অনুষ্ঠানও হইয়াছে। এই জুবিলি উপলক্ষে এ দেশের জেল হইতে ২৩৩০৭ জন কয়েদীকে খালাস দেওয়া হইয়াছে। সমস্ত ভারতবর্ষে যাহার জন্য মহা উৎসব হইল তাঁহার জীবনের ঘটনা সকল জানিবার জন্ত অনেকের ইচ্ছা হইতে পারে, তাই আজ আমরা তাঁহার সংক্ষিপ্ত জীবনী উপহার দিতেছি।

১৮১৯ খৃষ্টাব্দে ২৪শে মে বিশাতে কেন্সিংটন রাজপ্রাসাদে মহারাণীর জন্ম হয়। ইহার পিতা এডওয়ার্ড ডিউক বা কেণ্ট, ইংলণ্ডের রাজা তৃতীয় জর্জের চতুর্থ পুত্র ছিলেন। মহারাণীর মাতার নামও ভিক্টোরিয়া, ইনি জার্মাণ দেশের কোন রাজবংশের কন্যা ছিলেন। তৃতীয় জর্জের মৃত্যুর পর তাঁহার ছোট পুত্র চতুর্থ জর্জ রাজা হইলেন। তাঁহার একমাত্র কন্যা ছিল, পুত্র সন্তান হয় নাই; কিছু দিন পরে সে কন্ঠারও মৃত্যু হয়; জর্জের মৃত্যুর পর, তাঁহার ভ্রাতা উইলিয়াম রাজা হইলেন। ইহার দুই কন্যা জন্মে, কিন্তু জন্মের অল্প দিন পরেই দুই কন্ঠারই মৃত্যু হয়। তৃতীয় জর্জের তিন পুত্র নিঃসন্তান হইয়া মরিলেন; চতুর্থ পুত্র এডওয়ার্ডের, ভিক্টোরিয়ার বয়স এক বৎসর হইতে না হইতেই, মৃত্যু হইয়াছিল। সুতরাং পিতৃহীনা বালিকা ভিক্টোরিয়া ১৮৩৭ খৃষ্টাব্দে



২০শে জুন বৃটিশ রাজ্যের রাণী হইলেন; এই সময়ে তাঁহার বয়স ১৮ বৎসর মাত্র ।

মহারাণী এখন বৃদ্ধা হইয়াছেন, তাঁহার বয়স ৬৮ বৎসর । ইনি খুব সুন্দরী ছিলেন; বাল্যকালে ইহাকে বড়ই সুন্দর দেখাইত, তাই ইহার পিতা মাতা ইহাকে আদর করিয়া “বাসন্তী কুমুম” বলিয়া ডাকিতেন । পূর্বেই বলিয়াছি, ভিক্টোরিয়ার বয়স এক বৎসর হইতে না হইতেই, তাঁহার পিতার মৃত্যু হয় । স্বামীর মৃত্যুর পর তাঁহার মাতা কন্যাকে সুশিক্ষিত করাই জীবনের ব্রত করিলেন, যাহাতে কন্যাকে সর্বগুণভূষিতা করিতে পারেন, তাহার চেষ্টা করিতে লাগিলেন । বাল্যকালে ভিক্টোরিয়া মার কাছে যে শিক্ষা পাইয়াছিলেন, তাহারই গুণে তিনি আজ এত বড় । তাঁহার মার শিক্ষা বহু ও চেষ্টার গুণেই তিনি আজ পৃথিবীর লোকের শ্রদ্ধা ভক্তি ও ভালবাসা পাইতেছেন । ছেলে বেলায় বাড়ীতে বিশেষতঃ পিতা মাতার কাছে যে শিক্ষা হয় সেই শিক্ষাই মানুষকে গড়িয়া তোলে; ভিক্টোরিয়া বাল্যকালে মার কাছে সুশিক্ষা পাইয়াছিলেন, জীবনে তাহার সুফলও ফলিয়াছে ।

আমাদের দেশে বড় লোকের ছেলেদেরই লেখাপড়া হয় না, মেয়েদের ত দূরের কথা । ছেলে বেলা হইতে এত অধিক আদর দেওয়া হয় যে অল্প বয়সেই ছেলেরা নিতান্ত খারাপ হইয়া যায় । ভিক্টোরিয়া রাজবংশে জন্মিলেও তাঁহার মাতা বিশেষ সতর্কতার সহিত তাঁহার শিক্ষা দিতে লাগিলেন । খাওয়া দাওয়া, লেখা পড়া, খেলা, বেড়ান এ সকল কাজেরই একটা বাঁধাবাধি নিয়ম ছিল । প্রথম প্রথম, লেখা পড়ায় বিশেষ মনোযোগ দিতেন না; বলিতেন “এটা শিখে কি হবে?” “ওটা শিখলে কোন

লাভ নাই।” কিন্তু ক্রমে লেখা পড়ায় তাঁহার মনোযোগ হইতে লাগিল, এবং যখন তাঁহার এগার বৎসর বয়স, তখনই লাটিন, ফ্রেঞ্চ, জার্মান প্রভৃতি ভাষায় সহজে কথা বলিতে পারিতেন, অক্ষশাস্ত্রে অনেক উন্নতি করিয়াছিলেন, এবং উৎকৃষ্টরূপে শিল্পবিদ্যা শিখিয়াছিলেন । আমাদের পাঠক পাঠিকাদিগের মধ্যে কয়জনের এ প্রকার বিদ্যা উপার্জননের প্রতি অহুরাগ আছে? একবার ভাবিয়া দেখ দেখি, এগার বৎসরের মেয়ের পক্ষে তিন চারিটা ভাষা শেখা কত আশ্চর্য! একখানা বাঙ্গালা বইএর ছুই গাতা উর্টাইতে পারিলেই আমাদের দেশের মেয়েরা মনে করেন ঢের হইল; অধিক লেখা পড়া শিখিবার একটা যে ইচ্ছা তা যেন এদেশে নাই । তার পর একটু লেখা পড়া শিখিলেও শিল্প শিক্ষার দিকে আমাদের মেয়েদের মনোযোগ বড় কম । মহারাণী চিত্রবিদ্যা অত্যন্ত সুন্দর জানিতেন, আমাদের দেশে অতি অল্প মেয়েই চিত্রবিদ্যা বা অল্প কোন শিল্প জানেন ।

ছেলেবেলা হইতেই মার কাছে ভিক্টোরিয়া সিতব্যয়ী হইতে শিখিয়াছেন । বিলাসিতা বা বাবুগিরির দিকে তাঁহার মন ছিল না; রাজবংশে জন্মিয়াও তিনি সামান্য ভাবে থাকিতেন । এক দিন ভিক্টোরিয়া শিক্ষয়িত্রীর সহিত কিছু জিনিষ কিনিবার জন্য বাজারে গিয়াছিলেন; কতকগুলি জিনিষ কিনিতেই, তাঁহার হাতে যে টাকা ছিল তাহা ফুরাইয়া গেল । একটা সুন্দর বাস দেখিয়া সেইটা লইবার জন্য তাঁহার বড় ইচ্ছা হইল, কিন্তু টাকা নাই কি করেন; দোকানদার অন্য অন্য জিনিষের সঙ্গে বাসটীও বাঁধিয়া দিল । শিক্ষয়িত্রী তাহাকে তিরস্কার করিয়া বলিলেন, “রাজকুমারীর হাতে টাকা নাই, তিনি এ বাস

আজ কিনিতে পারিবেন না।” দোকানদার অগত্যা বাজটা রাখিয়া দিল, মহারাণীও আর কোন কথা না বলিয়া বাড়ী চলিয়া আসিলেন, এবং পরে যখন হাতে টাকা হইল তখন কিনিয়া আনিলেন। আমাদের পাঠক পাঠিকারা কয়জন এরূপ করিয়া থাকেন? কোন জিনিস কিনিতে ইচ্ছা হইলে হাতে টাকা থাক্ আর নাই থাক্, তাহা কিনিতে হইবেই হইবে; পিতা মাতার উপর সে জন্য কত আবদার কত অত্যাচার করেন।

ভিক্টোরিয়ার যখন বার বৎসর বয়স তখন তাঁহাকে জানিতে দেওয়া হইল যে, তিনিই রাণী হইবেন; এক জন বার বছরের মেয়ে এত বড় একটা রাজ্যের রাণী হইবেন একথা শুনিলে ছয়ত অহঙ্কারে ধরাকে সর্না দেখেন, কিন্তু ভিক্টোরিয়া একটুও গর্কিত হন নাই; তিনি এই কথা শুনিয়া বলিলেন, “আমি তবে ভাল হব।” কয়জনের মনে এ কথাটি আসে? যাহার ছেলেবেলা হইতে এই সং ইচ্ছাটি থাকে, সেই কালে বড় হইতে পারে। ১৮৩৭ সালের ২০ এ জুন রাজা উইলিয়মের মৃত্যু হয়, তখন ভিক্টোরিয়ার বয়স ১৮ বৎসর। প্রধান পুরোহিত তৎক্ষণাৎ এই সংবাদ লইয়া ভিক্টোরিয়ার নিকট উপস্থিত হইলেন; ভিক্টোরিয়া এই সংবাদ শুনিয়া অত্যন্ত শোক পাইলেন, এবং পুরোহিতকে বলিলেন, “আপনি আমার জন্য প্রার্থনা করুন।” তখন তাঁহারাই হাঁটু গাড়িয়া এই দুঃখের সময় ঈশ্বরের নিকট প্রার্থনা করিলেন। সেই দিনই ১৮৩৭ সালের ২০ এ জুন ভিক্টোরিয়া ১৮ বৎসর বয়সে প্রকাণ্ড বৃটিশ রাজ্যের রাণী হইলেন। ইহার আট দিন পরে অভিষেক হইল এবং এই উপলক্ষে প্রায় ১২ লক্ষ

টাকা মূল্যের মণি মুক্তায় জড়িত এক মুকুট তাঁহার জন্য প্রস্তুত হইল।

বাল্যকাল হইতেই ভিক্টোরিয়া অতিশয় বুদ্ধিমতি ছিলেন। এই বালিকা বয়সে এতবড় একটা রাজ্যের রাণী হইয়া যে প্রকার ধীর ও গভীর ভাবে এবং বিবেচনার সহিত কার্য করিতেন, তাহাতে সকলেই চমৎকৃত হইয়াছিল। ১৮৪০ সনের ফেব্রুয়ারি মাসে ২১ বৎসর বয়সে জর্মন রাজকুমার ফ্রান্সিস্ এলবার্টের সহিত তাঁহার বিবাহ হয় এবং মহা স্নুখে স্বামীর সহিত জীবন যাপন করেন। কিন্তু ১৮৬১ সনে মহারাণী বিধবা হন, স্বামীর মৃত্যুর পর বহুকাল কোন আনন্দ আহ্লাদে যোগ দেন নাই। মহারাণীর চারি পুত্র এবং পাঁচ কন্যা; তার মধ্যে এক পুত্র এবং এক কন্যার মৃত্যু হইয়াছে।

মহারাণীর যে পঞ্চাশ বৎসর রাজত্ব উপলক্ষে এত উৎসব হইল, এই পঞ্চাশ বৎসর অনেক বড় বড় ঘটনা হইয়া গিয়াছে। বিশেষতঃ আমাদের দেশে এই পঞ্চাশ বৎসরে রাজনীতি সম্বন্ধে, সমাজ সম্বন্ধে, ধর্ম ও নীতি সম্বন্ধে যে কত পরিবর্তন, কত উন্নতি হইয়াছে তাহা তোমরা বড় হইলে বুঝিতে পারিবে।

আমাদিগের মহারাণী রাজবংশে জন্মিয়া, এত বড় বৃটিশ রাজ্যের অধিষ্ঠাত্রী হইয়াও বাল্যকাল হইতেই দয়া ধর্ম প্রভৃতি নানা সদগুণে বিভূষিতা ছিলেন। গর্ক বা অহঙ্কার তাঁহার একেবারেই নাই, তিনি বড় বিনয়ী। তিনি তাঁহার অসংখ্য প্রজাদিগকে বড়ই স্নেহ করেন; তাঁহার এই সকল সদগুণে মোহিত হইয়াই ইংরেজ ও তাঁহার আর আর প্রজারা তাঁহাকে এত ভক্তি করে এবং ভালবাসে; প্রজার এত শ্রদ্ধা, ভক্তি ও ভালবাসা অতি কম রাজার ভাগ্যেই ঘটয়া

থাকে। মহারাণী বড় ধার্মিকা; তাঁহার অভিষেকের পর বাড়ী ফিরিয়া যাইয়া মার কাছে বলিলেন, “মা আমি যে ইংলণ্ডের রাণী তাহা আমার বিশ্বাস হয় না, কিন্তু যাহা হউক, মা রাণী হইয়া তোমার কাছে আমার প্রথম অনুরোধ এই যে, আমাকে অন্ততঃ দুই ঘণ্টা কাল একলা থাকিতে দাও।” মাতা তাহাতে সম্মতি দিলেন, তখন ভিক্টোরিয়া একাকী সেই দুই ঘণ্টা কাল, এই বালিকা বয়সে তাঁহার উপর যে গুরুতর কাজের ভার পড়িল, তাহার জন্ত ঈশ্বরের নিকট প্রার্থনা করিতে লাগিলেন।


মহারাণীর দয়া অত্যন্ত অধিক; তিনি রাণী হইবার অল্পদিন পরেই ডিউক অব ওয়েলিংটন তাঁহার কাছে একখানি মৃত্যুর আজ্ঞা সহি করাইতে আসিলেন। একজন সৈনিক দল পরিত্যাগ করিয়া চলিয়া গিয়াছিল, কোর্টমার্সেলে তাহার মৃত্যু দণ্ড হইয়াছে, মহারাণীর তাহাতে সহি দিতে হইবে। মহারাণীর প্রাণে অত্যন্ত কষ্ট হইতে লাগিল, কেমন করিয়া একজনের প্রাণ বধের আজ্ঞা দিবেন। তাঁহার এত কষ্ট হইল যে চক্ষু দিয়া জল পড়িতে লাগিল, তখন ডিউককে জিজ্ঞাসা করিলেন, “এব্যক্তির স্বপক্ষে কি কিছুই বলিবার নাই?” ডিউক বলিলেন, “এ লোকটা অতি অকর্মণ্য, কোন কাজই করে না, তবে জানি না, শুনিয়াছি ইহার চরিত্র ভাল।” মহারাণী আহ্লাদে চিৎকার করিয়া বলিয়া উঠিলেন, “ডিউক আপনাকে শত শত ধন্যবাদ; এ ব্যক্তি মংলোক, এইজন্য ইহাকে আমি ক্ষমা করিলাম।” কি উপায়ে এ হতভাগ্যের জীবন রক্ষা করিবেন তাহাই ভাবিতেছিলেন, যখন শুনিলেন সে ব্যক্তির চরিত্র ভাল, তখন সেই জন্তই তাহার প্রাণ দণ্ড রহিত করিলেন।

ভিক্টোরিয়া অত্যন্ত সাধু চরিত্রা এবং ন্যায়পরায়ণা। এক সময়ে প্রধান মন্ত্রী তাঁহাকে কোন একটা দলিল সহি করিবার জন্য অনুরোধ করেন, এবং বলেন যে কাজের সুবিধার জন্য সেটা করা বড় দরকার; কাজটা বোধ হয় ন্যায়সঙ্গত ছিল না। সাধুশীলা ভিক্টোরিয়া উত্তর করিলেন, “ন্যায় যাহা তাহা কর্তব্য, অন্যায় যাহা তাহা কখনই করা উচিত নহে, ইহা আমি বাল্যকালই শিখিয়াছি, কাজের সুবিধা আমি বুঝি না, যাহা ন্যায় তাহা করিব, যাহা অন্যায় তাহা করিব না।” এই সকল সদগুণ না থাকিলে মহারাণী আজ এত বড় হইতে পারিতেন না।

মহারাণী অত্যাঁয় দেখিতে পারেন না। এক দিন বাড়ীতে একজন বৃদ্ধা স্ত্রীলোক রেলিং এ বাণিশ লাগাইতেছিল; তাঁর ছুটি মেয়ে, তাহারা তখন খুব ছোট ছিল, গিয়া সেই বৃদ্ধার কাছে আবদার করিতে লাগিল যে, তাহারা বাণিশ করিবে। বৃদ্ধা ত কিছুতেই দিতে সম্মত হয় না, কিন্তু শেষে অগত্যা বাণিশ করিবার তুলি তাহাদিগের হাতে দিল। তুলি পাইয়া রেলিং বাণিশ করা দূরে থাক্, তাহারা সেই বৃদ্ধার মুখ রং করিয়া দিয়া দোঁড়িয়া পলাইল। মহারাণী এই কথা শুনিবামাত্র দুইজনকে ধরিয়া সেই বৃদ্ধার কাছে লইয়া গেলেন, এবং তাহার কাছে ক্ষমা চাহিতে বলিলেন, তারপর বাজার হইতে সেই বৃদ্ধার জন্য তাহাদিগের দ্বারা কাপড় ক্রয় করাইয়া আনাইলেন; কারণ তাহারা বৃদ্ধার কাপড়ও নষ্ট করিয়া ফেলিয়াছিল, সেই কাপড়ের দাম মেয়েদের নিজের টাকা হইতে দিতে হইল। দুঃখী দরিদ্র সকলের প্রতিই মহারাণীর সমান ব্যবহার। যখনই কোন অগ্নিদাহ প্রভৃতি কোন প্রকার দুর্ঘটনা হয়, মহারাণী তৎক্ষণাৎ যথা

সাধ্য গরিব ছুঃখীদিগকে সাহায্য করিয়া থাকেন, তাহাদিগকে নিজে সাহায্য দিয়া পত্র লেখেন।

একবার লণ্ডন হাঁস্পাতালের একটি ছোট বালিকা তাঁহাকে দেখিতে চায়; সে বলে যে, “বদি আমি একবার মহারাণীকে দেখিতে পাই তাহা হইলে আমার সকল ব্যারামের কষ্ট দূর হইবে।” হাঁস্পাতালের অধ্যক্ষ এই কথা মহারাণীকে জানাইবামাত্র, তিনি তৎক্ষণাৎ হাঁস্পাতালে উপস্থিত হন, এবং সেই বালিকাটির কাছে যাইয়া তাহাকে কত স্নেহের কথাই সাহায্য দেন। এই সকল ঘটনায় বেশ বুঝা যায় যে, মহারাণীর প্রকৃতি কত সদৃশে ভূষিত। তাঁহার সম্বন্ধে এই প্রকার আরও অনেক গল্প আছে; সময় হইলে পরে বলা যাইতে পারে। আমরা আশা করি মহারাণী রাজবংশে জন্মিয়া, এত বড় রাজ্যের রাণী হইয়া দয়া, ধর্ম, ন্যায়, সততা প্রভৃতি যে সকল সদৃশে তাঁহার প্রজাগণের এত শ্রদ্ধা, ভক্তি ও ভালবাসা পাইতেছেন, আমাদিগের পাঠিকারাও সেই সকল গুণে ভূষিত হইতে যত্নবতী হইবেন।




## পার্লিয়ামেন্ট সভা ।

দীর্ঘ পাঠিকাগণ! গতবারে তোমাদিগকে ইংলণ্ডের সুবিখ্যাত পার্লিয়ামেন্ট সভার বিষয়ে কিঞ্চিৎ বলা হইয়াছে।

এই যে প্রকাণ্ড ছবিটি দেখিতেছ, এইটি পার্লিয়ামেন্ট গৃহের ছবি। দেখ দেখি ইহার ছাদের উপরে কেমন বড় বড় চূড়া! মহারাণীর রাজবাড়ী হইতে এই পার্লিয়ামেন্ট গৃহ অতি অল্প দূর টেমস্ নদীর তীরে অবস্থিত। এই পার্লিয়ামেন্ট গৃহ এত বড় যে প্রায় চব্বিশ বিঘা জমি ব্যাপিয়া ইহা দাঁড়াইয়া আছে। এই বাড়ীটি নিৰ্মাণ করিতে সাড়ে তিন কোটি টাকা খরচ হইয়াছে। পার্লিয়ামেন্টের ঘরের বিষয়ে যাহা হউক ছুই এক কথা তোমরা শুনিলে, এখন এই ঘরে বসিয়া কি কাণ্ড কারখানাটা হয়, তাহাই তোমাদিগকে বলিবার ইচ্ছা আছে।

বৎসরের মধ্যে প্রায় ৭ মাস কাল পার্লিয়ামেন্ট সভার অধিবেশন হয়। অধুনা ফেব্রুয়ারি মাসের মধ্যভাগ হইতে আরম্ভ করিয়া আগষ্ট মাসের মাঝামাঝি শেষ হইয়া থাকে। কোন কার্যের জন্য পার্লিয়ামেন্টের অধিবেশনের প্রয়োজন হইলে রাজা বা রাণীকে ১৪ দিন পূর্বে বিজ্ঞাপন দিতে হইবে। তোমাদের হয়ত স্মরণ আছে যে, এই সভা ছুই ভাগে বিভক্ত এবং তাহার এক ভাগের নাম সম্রাটদের সভা, অপর ভাগের নাম সাধারণদের সভা। সম্রাটদের সভার সভাগণ খুব উঁচু বংশের লোক। প্রাচীন কালে প্রায় রাজার ইচ্ছায়ই সম্পূর্ণরূপে সভার



সভাগণ নিযুক্ত হইত। রাজা সম্রাট পরিবারের যাহাকে ইচ্ছা লর্ড সভায় গ্রহণ করিতে পারিতেন; কিন্তু এখন আর সেরূপ হইবার নিয়ম নাই। যাহার পিতা লর্ড সভার সভ্য থাকেন তিনি পিতার মৃত্যুর পরে উপযুক্ত হইলে লর্ড সভার সভ্য

হইবার অধিকার পাইতে পারেন। রাজার আজ্ঞানুসারে সম্রাট পরিবারের লোকদিগের মধ্য হইতেও ছুই এক জনকে কখন কখন লর্ড সভার সভ্যের পদে নিযুক্ত করা হইয়া থাকে। লর্ড সভার সভ্যের কোন নির্দিষ্ট সংখ্যা নাই, রাজার


ইচ্ছানুসারে নূতন পদের সৃষ্টি হইয়া থাকে। স্কটলণ্ড এবং আয়ারলণ্ড দেশ হইতে ইংলণ্ডের এই মহাসভায় প্রতিনিধি আসিয়া থাকে, এই সকল প্রতিনিধিগণ ও লর্ডসভার সভ্যগণের সমস্ত অধিকার পাইয়া থাকেন।

সাধারণের সভা এক কথায় বলিতে গেলে ইংলণ্ডের সর্বসাধারণ লোকের সভা। কিন্তু কি প্রণালীতে এই সভার সভ্যগণ নিযুক্ত হইয়া থাকেন এবং কি উদ্দেশ্যে এবং কাহারাই বা তাঁহাদিগকে নিযুক্ত করিয়া থাকেন তাহাই এখন তোমাদিগকে বলিতেছি। ইংলণ্ডে যে কোন ব্যক্তি অন্ততঃ বার্ষিক দশ পাউণ্ড আয় হয় এমন এক খণ্ড জমি ভোগ দখল করিয়া থাকেন, তিনি সাধারণ সভার সভ্য মনোনীত করিবার পক্ষে সম্মতি দিতে পারেন। আবার যিনি কোন ব্যক্তির চাকুরী বা কোন রাজকাৰ্য্যোপলক্ষে কোন একটা বাদ স্থানের সম্পূর্ণ কর্তা হইয়া বাস করিতে থাকেন, তিনিও সভ্য নির্বাচন উপলক্ষে আপনার মত দিতে পারেন। এই সকল লোকেরাই গ্রাম, নগর, ও বিশ্ববিদ্যালয় প্রভৃতিদেশীয় নানা স্থান হইতে দুই এক জন করিয়া প্রতিনিধি নিযুক্ত করিয়া পাঠান এবং এই প্রতিনিধিগণই সাধারণদের সভা গঠন করিয়া লন। প্রাচীন কালে এই সকল প্রতিনিধিগণ যে গ্রাম বা নগর হইতে প্রেরিত হইতেন সেই গ্রাম বা নগরের লোকদিগের নিকট হইতে বেতন স্বরূপ টাকা লইতেন এবং সেই জন্য অনেক ভাল ভাল গ্রাম ও নগরের লোকেরা দারিদ্র্য বশতঃ প্রতিনিধি পাঠাইতে পারিত না। এখন আর প্রতিনিধিগণ টাকা লইতে পারেন না, সূত্রাং সকল গ্রাম ও নগরের লোকেরাই লোক সংখ্যা অনুসারে প্রতিনিধি পাঠাইবার সুবিধা পাইয়াছেন।

মহারাজীই পার্লামেন্ট সভার প্রধান অধ্যক্ষ; রাজ কার্য্যও তাঁহার নামে চলে, এবং তাঁহার উপরেই রাজ্যের সমস্ত ভার ন্যস্ত। কিন্তু কাজে তাহা নয়। সমস্ত রাজকার্য্য নির্বাহের জন্ত একটা মন্ত্রী-সভা আছে, তাহাকে ক্যাবিনেট বলে। এই ক্যাবিনেটের সভ্যগণ পার্লামেন্টের সভ্যগণের দ্বারা বিশেষতঃ কমন্স অর্থাৎ সাধারণদের সভার লোকদিগের দ্বারাই নিয়োজিত হইয়া থাকেন। “ধনাগারের প্রথম লর্ড” এই সর্বোচ্চ পদ মন্ত্রী-সভার প্রধান মন্ত্রীকেই দেওয়া হইয়া থাকে। তোমরা হয়ত “সুবিখ্যাত গ্লাডষ্টোন সাহেবের নাম শুনিয়া থাকিবে, তিনি এক সময়ে এই প্রধান পদে নিযুক্ত থাকিয়া মহারাজীকে রাজকার্য্য নির্বাহ বিষয়ে পরামর্শ দিয়াছেন ও সাহায্য করিয়াছেন। প্রধান মন্ত্রীর নীচে সর্বশুদ্ধ ১৪ টি পদ আছে। এই ১৪ জন কর্মচারীর মধ্যে আমাদের ভারতবর্ষের রাজকার্য্য নির্বাহের জন্য একজন অধ্যক্ষ আছেন; তাঁহাকে ভারতের স্টেট-সেক্রেটারী বলে, তিনি বড় লাট বাহাদুরেরও উপরের কর্মচারী।

পার্লামেন্ট মহাসভার অধিবেশনের সময়ে সভ্য ভিন্ন অন্য লোকের পক্ষে পার্লামেন্ট গৃহে প্রবেশ করা বড় সহজ নহে, কোন সভ্যের অনুমতি না লইয়া ত যাওয়াই যায় না, তার পর আবার অনুমতি পাইলেও বসিবার স্থান পাওয়া যায় না। লর্ড-সভার সভ্যগণের জন্য পৃথক স্থান, কমন্স-সভার সভ্যগণের জন্য পৃথক স্থান, মন্ত্রী-সভার সভ্যগণের জন্য স্বতন্ত্র স্থান, দর্শকগণের জন্যও একটা বসিবার স্থান আছে বটে কিন্তু সে স্থানটা এত অপ্রশস্ত যে অনেকের ভাগ্যেই সেখানে প্রবেশ করা সম্ভব হয় না। পার্লামেন্টে অনেক কাণ্ড কারখানা হয়; সে সকল কথা

তোমরা এখন বুঝিবে না এই পর্য্যন্ত শুনিয়া রাখ যে, আমাদের দেশে যখন পার্লামেন্টের আয় দেশীয় লোকের একটা রাজ-সভা হইবে তখন আমাদের দেশের অনেক কল্যাণ সাধন হইবে; পাঠক পাঠিকাগণ তোমরা যদি এই বাল্য কাল হইতেই ভাল হইবার চেষ্টা কর তবে দেশের অবস্থা ফিরিবে এরূপ আশা করিতে পারা যায়।



খার পাঠক পাঠিকা! এই মহান্নার জীবনের অনেক কথা তোমরা গতবারে শুনিয়াছ, কিন্তু অনেক কথা এখনও বলিতে বাকি আছে, সে সমুদায় আজ বলিয়া উঠিতে পারা যাইবে না। তাহার অনেক বিষয় আবার একবার অল্পসন্ধান দ্বারা জানা প্রয়োজন। কিন্তু ছুঃখের বিষয় এই কিছুদিন হইতে ভক্তিভাজন মহাশয় অত্যন্ত পীড়িত রহিয়াছেন। তাঁহার শরীর দিন দিন ক্রম ও অবসন্ন হইয়া পড়িতেছে। আমরা যে গিয়া তাঁহার নিকট কিছু জিজ্ঞাসা করিব তাহারও যো নাই। তোমরা সকলে প্রার্থনা কর যে, তিনি ত্বরায় আরোগ্য লাভ করুন। তিনি যতদিন এ দেহে থাকেন, ততদিনই দেশের লাভ।

দ্বারকানাথ ঠাকুর মহাশয় পরলোক গমন করিলে, তাঁহার আদ্যাশ্রমের সময় দেবেজনাথ ঠাকুর মহাশয় যেরূপ ধর্ম-বীরের কার্য্য করিয়াছিলেন তাহা তোমাদিগকে পূর্বেই বলিয়াছি। পিতার মৃত্যুর পর তিনি সমধিক উৎসাহের সহিত ব্রাহ্মধর্ম প্রচারে প্রবৃত্ত হইলেন। তোমরা সকলেই বোধ হয় বেদের নাম শুনিয়াছ। হিন্দুমাত্রই বেদ-গ্রন্থের আদর করিয়া থাকেন। আমাদের দেশে প্রাচীন কালে এই বিশ্বাস ছিল, এবং এখনও অনেকে সেরূপ বিশ্বাস করিয়া থাকেন যে, বেদ—মহুবোয় রচিত নয়, তাহা সাক্ষাৎ সৃষ্টিকর্তার মুখ হইতে নির্গত হইয়াছে। এই বেদের বিষয় তোমাদিগকে কিছু বলা আবশ্যক। অতি প্রাচীন কালে যখন বর্ণমালার সৃষ্টি হয় নাই, এবং লিখিবার রীতি প্রচলিত হয় নাই, তখন বড় বড় ঋষিরা মুখে মুখে অনেক স্তুতি ও বন্দনা রচনা করিতেন। এই সকল স্তুতি ও বন্দনা অপর লোকে মুখে মুখে শিক্ষা করিত, ও মুখে মুখে শিখাইত। এইরূপ অনেক শত বৎসর মুখে মুখে চলিয়া আসার পর যখন বর্ণমালার সৃষ্টি হইল, তখন মধ্যে মধ্যে এক একজন পণ্ডিত সেই সমুদায় মন্ত্র সংগ্রহ করিয়া গ্রন্থের আকারে বদ্ধ করেন। এইরূপে বেদ চারিভাগে বিভক্ত হয়;—ঋক্, যজুঃ, সাম, ও অথর্ক। এই সকল বেদের মধ্যে অনেক ধর্মোপদেশ আছে। প্রাচীন কালের হিন্দুরা বলিতেন যে, বেদ অভ্রাস্ত, অর্থাৎ তাহা ঈশ্বর-প্রদীত এবং তাহাতে ভ্রম নাই। ব্রাহ্ম-সমাজ যখন প্রথমে স্থাপিত হয়, তখন প্রথম প্রথম বেদকে অভ্রাস্ত বলিয়া গ্রহণ করা হইয়াছিল। ব্রাহ্মসমাজের আচার্য্যগণ সমাজের বেদী হইতে বেদকে অভ্রাস্ত বলিয়া প্রচার করিতেন।



ব্রাহ্মসমাজের ভারগ্রহণ করার কয়েক বৎসর পরে দেবেন্দ্রনাথ ঠাকুর মহাশয়ের মনে এই প্রশ্নের উদয় হইল যে, বেদকে অশ্রুত ঈশ্বর-প্রণীত গ্রন্থ বলা যায় কি না? শুনিতে পাওয়া যায় তত্ত্ববোধিনীর সম্পাদক সুবিখ্যাত অক্ষয়-কুমার দত্ত মহাশয়ের সহিত এ বিষয়ে তাঁহার সর্কদা তর্ক বিতর্ক হইত। অল্প লোক হইলে তাঁহার মনের তর্ক দুই দিন পরে মনে মিলাইয়া বাইত; আবার তিনি সংসারের অপর কার্যে লিপ্ত হইতেন। কিন্তু এই মহাত্মা স্বতন্ত্র ধাতুতে গঠিত; স্মরণ্য তিনি এ বিষয়ের সবিশেষ অনু-সন্ধান করিবার জন্ত ব্যগ্র হইলেন। তিনি চারিজন বুদ্ধিমান যুবক বাছিয়া চারি বেদ অধ্যয়ন করিবার জন্ত কাশীতে পাঠাইলেন। তাঁহার মনোযোগ সহকারে সেখানে থাকিয়া বেদ পাঠ করিতে লাগিলেন, কিছুদিন পরে দেবেন্দ্রনাথ ঠাকুর স্বয়ং কাশীতে গমন করিলেন। তখন কাশীতে যাওয়া সহজ ছিল না; এখনকার মত রেলওয়ে ছিল না; বাইতে হইলে হয় নৌকা-যোগে, না হয় পদব্রজে, না হয় পাকী করিয়া বহুদিনে পৌঁছিতে হইত। আবার পথে চোর ডাকাতির ভয় ছিল। লোক স্মৃতে বাইতে পারিত না। দেবেন্দ্রনাথ ইহার কিছুতেই ভয় পাইলেন না। তিনি অনেক পথশ্রম ও ব্যয় স্বীকার করিয়া কাশীতে উপস্থিত হইলেন। সেখানে সুপ্রসিদ্ধ পণ্ডিতগণকে আহ্বান করিয়া পরমা-নন্দে তাঁহাদিগের সহিত শাস্ত্রালাপে সময় যাপন করিতে লাগিলেন। এইরূপ বহু অন্বেষণ ও পাঠের পর তাঁহার বিশ্বাস জন্মিল যে, বেদ মহুস্যের রচিত, স্মরণ্য অশ্রুত নহে; তাহাকে অশ্রুত ও ঈশ্বর-প্রণীত গ্রন্থ বলিয়া স্বীকার করা যায় না। যেই মাত্র তাঁহার বিশ্বাস জন্মিল যে,

বেদকে অশ্রুত বলিয়া মানা বাইতে পারে না, অর্থাৎ তিনি সে মত পরিত্যাগ করিলেন। ইহা কত বড় সত্য-প্রিয়তার ও বীরত্বের কথা তাহা একবার ভাবিয়া দেখ। যে বেদ এতদিন ধরিয়া ব্রাহ্মসমাজের ভিত্তিস্বরূপ ছিল, এবং বাহার প্রতি দেশ শুদ্ধ লোকের এত আদর, তাহাকে পরিত্যাগ করা কত বড় সাহসের কর্ম। সত্যের প্রতি তাঁহার এত অনুরাগ না থাকিলে তিনি কখনই সে সাহস পাইতেন না। আরও আশ্চর্য্য দেখ, বেদ অশ্রুত এই মত তিনি পরিত্যাগ করিলেন বটে, কিন্তু বেদের সঙ্কল্পদেশ সকলের প্রতি ও আমাদের দেশের প্রাচীন শাস্ত্র সকলের প্রতি তাঁহার যে গভীর শ্রদ্ধা ছিল তাহার বিন্দুমাত্র ও হ্রাস হইল না। তিনি বেদ, উপনিষদ, পুরাণ, তন্ত্র প্রভৃতি আমাদের প্রাচীন ধর্মশাস্ত্র সকল হইতে ভাল ভাল উপদেশ সংগ্রহ করিয়া “ব্রাহ্ম-ধর্ম” নামে একখানি উৎকৃষ্ট গ্রন্থ প্রণয়ন করিলেন। এই গ্রন্থখানি তোমরা অনেকে দেখ নাই। এমন অমূল্য উপদেশপূর্ণ গ্রন্থ আমাদের বাঙ্গালা ভাষাতে আর নাই বলিলে হয়। এখানি ঐ মহাত্মার এক প্রধান কীর্তি। দুর্ভাগ্যবশতঃ আমাদের দেশের লোকের ধর্মপ্রবৃত্তি মলিন হইয়া রহিয়াছে, এই জন্ত এই গ্রন্থের মূল্য এখনও লোকে বুঝিতে পারিতেছে না, কিন্তু কালে ইহার মূল্য লোকে জানিতে পারিবে।

মহর্ষি মহাশয় এক দিকে ব্রাহ্মধর্ম গ্রন্থ প্রণয়ন করিয়া ব্রাহ্মসমাজের লোকের ধর্মোন্নতির প্রধান একটা উপায় করিলেন, অল্পদিকে উৎসাহের সহিত দেশমধ্যে ব্রাহ্মধর্ম প্রচার করিতে লাগিলেন। নানা স্থানে ব্রাহ্মসমাজ স্থাপিত হইতে লাগিল, তিনি স্বয়ং নানা স্থানে গিয়া তাহা-দিগকে উৎসাহ দান করিতে লাগিলেন। কেবল

মুখের উৎসাহ নয়, ব্রাহ্মধর্ম প্রচারের জন্ত প্রতি বৎসর হাজার হাজার টাকা ব্যয় করিতে লাগিলেন। এখন তিনি বার্কিকা ও শারীরিক অসুস্থতাবশতঃ আর নিজে কোন স্থানে বাইতে পারেন না, কিন্তু এখনও তিনি ব্রাহ্মধর্ম প্রচারের জন্ত প্রচুর অর্থ সাহায্য করিয়া থাকেন। সাধারণ ব্রাহ্মসমাজের উপাসনা মন্দির যখন নির্মাণ হয় তখন তিনি ঐ কার্যের সাহায্যের জন্ত ৭০০০ সাত হাজার টাকা দিয়াছিলেন, এইরূপ কত সমাজে যে সাহায্য করিয়াছেন তাহার সংখ্যা হয় না। মহাত্মা রাজা \*রামমোহন রায় ব্রাহ্ম-সমাজের জন্ত একটা সামান্য বাড়ী নির্মাণ করিয়া রাখিয়া গিয়াছিলেন। ইহার নাম এখন আদি ব্রাহ্মসমাজ। মহর্ষি মহাশয় নিজ ব্যয়ে ঐ বাড়ীর উপর দ্বিতল গৃহ নির্মাণ করিয়াছেন, এবং ব্রাহ্মসমাজের কার্য চালাইবার জন্ত মাসে মাসে ৪৫ শত টাকার ও অধিক ব্যয় করিয়া থাকেন। তাঁহার ব্রাহ্মসমাজের যোগ দেওয়া অবধি অদ্য পর্য্যন্ত তিনি ব্রাহ্মধর্ম প্রচারের জন্ত যে ব্যয় করিয়াছেন তাহা একত্র করিলে অনেক লক্ষ টাকা হইবে।

ব্রাহ্মধর্মের প্রতি তাঁহার এত অনুরাগ যে, ইহার জন্ত তিনি কোন ক্রেশকেই ক্রেশ বলিয়া গণ্য করেন নাই। তাঁহার পিতা কলিকাতায় বড়লোকদিগের মধ্যে সর্বাগ্রগণ্য ব্যক্তি ছিলেন, রাজাদিগের নিকট সম্মান লাভ করিয়াছিলেন, তিনি যদি মনে করিতেন তাহা হইলে তাঁহার পিতার স্থায় রাজ-সম্মান লাভ করিতে পারিতেন; কিন্তু সে দিকে তাহার মন ছিল না। যে পথে গেলে রাজাদিগের দৃষ্টি আকর্ষণ করা যায়, তিনি সে পথে চলিতেন না। বড় বড় পদস্থ ইংরাজেরা সাধ্য সাধনা করিয়া ও তাঁহাকে পাইত না,

কিন্তু একটা সামান্য লোকও ঈশ্বরোপাসনা করিবার জন্ত ধরিলে তাহার ভবনে গিয়া উপাসনা করিয়া আসিয়াছেন।


এইরূপে কায় মন প্রাণে বহু বৎসর ব্রাহ্মধর্ম প্রচার করার পর, ১৮৫৬ কি ১৮৫৭ সালে তিনি কিছুকাল তপস্যায় যাপন করিবার জন্ত হিমালয় শৃঙ্গে গমন করিলেন। এই সময়ে তিনি প্রায় দুই বৎসর কাল পর্বতশৃঙ্গে বাস করেন। সেখানে দুই একটা ভৃত্য মাত্র সঙ্গে করিয়া একাকী কেবল ভজন সাধন ও আত্ম-চিন্তাতে যাপন করিতেন। এই সময়ের মধ্যে একদিকে যেমন জ্ঞানের উন্নতি অল্প দিকে তেমনি ধর্মভাবের গভীরতা বৃদ্ধি হইল। তিনি যে ধ্যানপরায়ণতার জন্ত চির-দিন প্রসিদ্ধ সেই ধ্যানপরায়ণতা এই সময়ে বিশেষরূপে বিকসিত হয়। এরূপ শুনা গিয়াছে যে, এক একদিন ধ্যানে বসিয়া সমস্ত দিন অতিবাহিত করিয়াছেন; আহার নিদ্রা মনেই থাকিত না, ঈশ্বর-চিন্তায় নিমগ্ন হইয়া থাকিতেন। তাহার পরেও তাঁহার ধ্যানপরায়ণতার আরও অনেক দৃষ্টান্ত দেখা গিয়াছে। অনেকবার এরূপ দেখা গিয়াছে যে, ঈশ্বর-চিন্তাতে নিমগ্ন হইয়া ঘণ্টার পর ঘণ্টা কাটিয়া গিয়াছে তিনি বাহু জ্ঞানশূন্য। নয়ন মুদ্রিত করিয়া গভীর ধ্যানে নিমগ্ন রহিয়াছেন। ঈশ্বরের প্রতি এমন উজ্জল বিশ্বাস ও প্রেম আমরা আর কখনও দেখি নাই। উপনিষদের যে সকল বচনে পরমেশ্বরের মহিমা প্রকাশিত আছে তাহার কোন বচন কেহ উচ্চারণ করিলে তাঁহার মস্তকের কেশ পর্য্যন্ত দাঁড়াইয়া উঠিয়াছে।

দুই বৎসর হিমালয়ে বাস করিবার পর তিনি দেশে ফিরিয়া আসিলেন। আদিবার সময় পথেই বা কত কষ্ট। তাহার কিছুদিন পূর্বেই

সিপাইগণ বিদ্রোহী হইয়াছিল। ইংরাজগণ অনেক কষ্টে সেই বিদ্রোহ শান্ত করিয়া দিলেন। ফিরিয়া আসিবার সময় কোন কোন স্থানে তাহার বন্দী দশায় পড়িবার আশঙ্কা হইয়াছিল। বাহা হউক অনেক কষ্টে ও অনেক বায়ে তিনি দেশে আসিয়া পৌঁছিলেন। আসিয়া আবার উৎসাহের সহিত ব্রাহ্ম ধর্ম প্রচারে নিযুক্ত হইলেন। দুই বৎসর কঠিন ভজন সাধন দ্বারা যে সকল অমূল্য রত্ন লাভ করিয়াছিলেন তাহা ব্রাহ্মদিগকে বিতরণ করিতে লাগিলেন। তখন তিনি ব্রাহ্মসমাজের বেদী হইতে যে সকল উপদেশ দিতেন, তাহার যে কিরূপ জলন্ত জীবন্ত ভাব ছিল তাহার বর্ণনা হয় না। তাহা এক দিন শুনিতে দশদিন মন এক নূতন ভাবে থাকিত। তিনি যেমন বলিয়া যাইতেন অমনি সেই সকল উপদেশ লিখিয়া লওয়া হইত। সেই সকল উপদেশ সংগ্রহ করিয়া ব্রাহ্ম-ধর্মের ব্যাখ্যান নামে একখানি অত্যুৎকৃষ্ট গ্রন্থ হইয়াছে। এই গ্রন্থ যে কি গভীর জ্ঞানে পূর্ণ তাহার বর্ণনা হয় না। তোমরা বড় হইলে তাহা পড়িতে ও বুঝিতে পারিবে। ইহাও তাঁহার এক প্রধান কীর্তি। এই সময় হইতে সুবিখ্যাত কেশবচন্দ্র সেন তাঁহার সঙ্গে যোগ দিলেন। কেশব বাবুকে দক্ষিণ হস্তের ত্রায় পাইয়া তাঁহার উৎসাহ দশগুণ বর্দ্ধিত হইল। কেশব বাবুর সাহায্যে ব্রাহ্ম বিদ্যালয় নামে যুবকদিগকে ধর্মোপদেশ দিবার জন্ত একটি সাপ্তাহিক বিদ্যালয় প্রতিষ্ঠিত হইল, তাহাতে কেশব বাবু ইংরাজীতে এবং তিনি বাঙ্গালাতে বক্তৃতা করিতেন। দেখিতে দেখিতে দলে দলে শিক্ষিত যুবক ব্রাহ্মসমাজে প্রবেশ করিতে লাগিল, অনেকে বিষয় কর্ম পরিত্যাগ করিয়া ধর্মপ্রচার করিবার নিমিত্ত প্রস্তুত হইলেন। ব্রাহ্মসমাজ হইতে

একখানি ইংরাজী সংবাদ পত্র প্রকাশিত হইল। কেশব বাবু কলিকাতা কলেজ নামে একটি স্কুল স্থাপন করিলেন, তাহাতে বালকদিগকে শিক্ষা দেওয়া হইত। এই সময়ে দেবেন্দ্রনাথ ঠাকুর মহাশয় ব্রাহ্মধর্ম অনুসারে নিজ কন্যার বিবাহ দিলেন এবং ব্রাহ্মদিগের নিমিত্ত একখানি অনুষ্ঠান পদ্ধতি গ্রন্থ প্রণয়ন করিলেন। তাহা তাহার আর একটি কীর্তি। চারিদিকে ব্রাহ্মধর্মের অনুষ্ঠান আরম্ভ হইল।

ইহার কিছুদিন পরে কোন কোন বিষয়ে মতভেদ উপস্থিত হওয়ার শ্রীযুক্ত বাবু কেশবচন্দ্র সেন শিষ্যদল সমভিব্যাহারে আদি ব্রাহ্মসমাজ পরিত্যাগ করিলেন। এই উপলক্ষে ব্রাহ্মদিগের মধ্যে বিরোধাগ্নি প্রজ্জ্বলিত হইল। ইহার সবিশেষ বিবরণ বলিবার প্রয়োজন নাই। এই বিবাদের অল্পকাল পরেই মহর্ষি মহাশয় স্বীয় উপযুক্ত পুত্রদিগের উপরে ব্রাহ্মসমাজের কার্যভার অর্পণ করিয়া চিরদিনের মত অবসর গ্রহণ করিলেন। তদবধি তিনি নির্জনে বাস করিয়া আসিতেছেন। ধ্যান ধারণা পাঠ ও আত্মচিন্তা ভিন্ন অগ্র কার্য নাই। ইহাতেই তাঁহার আনন্দ। এ বিষয়েও তিনি প্রাচীন ঋষিদিগের শিষ্যের ত্রায় কার্য করিয়াছেন। আমাদের দেশের প্রাচীন শাস্ত্রে এই আদেশ আছে যে, পঞ্চাশ বৎসরের পরে বনে বাইবে, তিনি তাহাই করিয়াছেন।



## কেগো ওই বৃদ্ধা নারী !

কেগো ওই বৃদ্ধা নারী পথ দিয়া যায় !  
ছিন্নবস্ত্র, পক্ককেশ, করে যষ্টি ধরি,  
লোল চর্ম, দৃষ্টি ক্ষীণ, কাঁপে দেহ, হার !  
প্রতি পদ বেতে তাঁর, পর পর করি ।

পেছল হয়েছে পথ ঘন বৃষ্টিপাতে  
এ ঘোর সময়ে বৃদ্ধা কেন পথ মাঝে ?  
জলেতে ভিজিছে দেহ ছাতা নাই হাতে,—  
প্রাচীন বয়সে, হার ! এ কষ্ট কি সাজে ?

দেখিয়া নারীর দশা স্মৃতি বালক  
ছাতা লয়ে দ্রুতগতি ছুটি কাছে গেল,  
ছাতা দিয়ে, হয়ে তার পথ-প্রদর্শক,  
বৃদ্ধারে গৃহের দিকে লইয়া চলিল ।

নিজের লাগিছে বৃষ্টি, তাতে দৃষ্টি নাই—  
“এ হেন বৃদ্ধার বেন ক্রেশ নাহি হয় !”  
এই মনে সে বালক ভাবিছে সদাই ;  
জলে ভিজে তাই ওই প্রকৃত্তাময় ।

সহায় করিল নারী বালকের কাঁধ,  
বালকে সহায় করি স্বগৃহেতে গেল ;  
বৃদ্ধার আত্মীয়গণ হাতে পে'ল চাঁদ  
অপার সুখেতে সবে ভাসিতে লাগিল ।

কাজ শেষ করি সেই বালক স্মজন  
আপনার বিদ্যালয়ে ফিরিয়া আইল ;  
আর্দ্রবস্ত্র পরিত্যাগ করিয়া তখন,  
অতঃপর সমপাঠী সকলে কহিল ;—

“না জানি কাহার মাতা—এ ঘোর সময়  
“প্রাণের তনয় আছা ! কাছে নাই তাঁর,—  
“এমন সময়ে এই বিপত্তি উদয়—  
“থাকিত সন্তান যদি হ’ত উপকার ।


“মা আমার যদি হেন বিপদ মাঝারে  
“পড়েন, সন্তান তাঁর যবে দূর দেশে,  
“সে সময় যদি কেহ না দেখে তাঁহারে  
“বল, বন্ধুগণ ! মন দহে কিনা ক্রেশে ?

“আমার প্রাচীনা মার ছুঃখ যদি হেন  
“দূর দেশে থেকে মোর প্রাণকুল করে,  
“অভাগিনী মাতা ওই—বল তবে কেন  
“সন্তানের মত নহি সেবিব উহারে ।”

বলিতে বলিতে চক্ষু জলেতে পূরিল—  
দূরদেশে মাতা তাঁর তাই খেদ মনে ;  
সন্তানের কার্য শিশু অপরে করিল,  
‘কাহারো জননী বুঝা’ এই মনে জেনে ।

বুঝা নারী গৃহে গেল, বাঁচিল পরাণে—  
নতজানু, দয়াময়ে ডাকে প্রাণ খুলে—  
“এমন সন্তান যার তাঁকে, এই জনে,  
“দয়াময় দীনবন্ধু রেখো পদতলে ।”

স্বর্গীয় প্রমদা চরণ সেন ।



## পুরস্কার প্রাপ্ত রচনা ।

### পরোপকার ।

অল্প ব্যক্তিকে নিজের প্রাণ পর্যন্ত দিয়া যে সাহায্য বা উপকার করা হয় তাহাকেই পরোপকার বলিয়া থাকি । বাস্তবিক মনে মনে বিবেচনা করিয়া দেখিলে পরোপকারের ত্রায় ধর্ম জগতে অতি বিরল । জীবমাত্রেরই সুখ ছুঃখ সমান । সকলেই সুখাবস্থায় সুখী এবং ছুঃখাবস্থায় কষ্ট অনুভব করিয়া থাকে । এই ছুঃখাবস্থায় তাহাদের ছুঃখমোচন করিলে তাহারা নিশ্চয়ই বেশ সুখী হয় এবং উদ্ধার বা মোচনকারীকে অন্তরের সহিত ভালবাসে ।

যেমন আমি কোন কষ্টে পড়িলে দশ দিক অন্ধকার দেখি । মনে করুন আমি মাতৃ পিতৃ হীন, আমার আত্মীয় বন্ধু কেহ নাই । আমি ছুটি খেতে পাই না । অনের চিন্তায় শরীর শুষ্ক হইতেছে, ছুই চারি দিন আদপেই খেতে পাই নাই, এইরূপ অবস্থায় যদি কেহ আমাকে ছুটি ভাত আনিয়া দেয়, তখন কি আমি সাতিশয় আনন্দিত হইয়াও সবিশেষ উপকৃত হইয়া আমার উপকারককে ধন্যবাদ দিব না ? তখন কি আমার মনে তাহার আশীর্বাদসূচক বাক্য আসিবে না ?

এইরূপ সকলেরই আছে । আমি যেমন এইরূপ আনন্দিত হই, অত্রের কষ্টের অবস্থাতে সাহায্য করিলেও সেও নিশ্চয়ই এইরূপ আনন্দিত হইবে, এবং সর্কান্তঃকরণে আমাকে ভালবাসিবে ।

এটা নিঃসন্দেহেই প্রতীয়মান হইতে পারে যে, আমার মত সকলেরই সুখ ছুঃখ বোধ আছে । সুতরাং আমি যেমন ছুঃখে পড়িলে কষ্ট অনুভব

করি, এবং অপরের সাহায্য প্রাপ্তির জন্ম উৎসুক হই অল্পাত্ম সকলেরও ঐরূপ অবস্থায় ঠিক ঐরূপ হইয়া থাকে । এবং আমি যেমন ঐ অবস্থা হইতে মুক্ত হইলে বড়ই সুখীও আনন্দিত হইয়া থাকি এবং মুক্তকারীকে খুব ভালবাসি, অপরেও ঠিক সেইরূপই মনে করিবে । বিশেষতঃ পরের উপকার করিলে নিজের মনেও একটা আত্মপ্রসাদ উপস্থিত হয় । এবং মন সর্কদা প্রফুল্ল থাকে । সকলেরই পরের উপকার করিতে সাধ্য মত চেষ্টা পাওয়া উচিত । কাহাকেও কোনও বিষয়ে মনোকষ্ট না দিয়া সকলকেই সুখী করার চেষ্টা পাওয়া সর্কতোভাবে কর্তব্য ।

কোনও একটা বালক বন্ধুবান্ধব হীন এবং অতি দরিদ্র । তাহার মনে করুন পুস্তকাদি বিহনে পাঠ চলিতেছে না, এরূপ অবস্থায় আমার সাধ্যমত তাহাকে সাহায্য করা উচিত । যাহাতে তাহার পাঠ চলিতে পারে তাহা করা উচিত । তাহা হইলে সে অবশ্যই মনে মনে অত্যন্ত আনন্দিত হইবে । এবং যদি আমি কোন বিপদে পড়ি তাহা হইলে সেও রুতজ্ঞ অন্তরে আমাকে সাহায্য করিতে পারে ।

এইরূপ বন্ধুহীনকে বন্ধু দান, অন্নহীনকে অন্ন দান প্রভৃতি রূপে সাহায্যের অভাব তাহা যে কেহ মনোযোগ সহকারে মোচন করে সকলেই তাহাকে ভাল বাসে ; এবং ঈশ্বর তাহার প্রতি সন্তুষ্ট থাকেন ।

এটা সর্কক্ষণই মনে রাখা উচিত যে, পরম পিতা পরমেশ্বর সংকল্প জন্ম অর্থ দিয়াছেন । সুতরাং তাহার সন্ধ্যয় করিতে পারিলেই ঈশ্বরের অভিপ্রায়রূপ কার্য করা হয় । এবং তাহা হইলে ঈশ্বর তাহাকে ভাল বাসেন ।

যে সকল লোক দরিদ্র ছুঃখী, খাইতে পায় না, পরিতে পায় না, তাহাদিগকে দেওয়ার চেয়ে

আর ধর্ম নাই । আমরা যে অর্থ মিঠাই খাইয়া বা অল্পাত্ম অসং উপায়ে ব্যয় করি, যদি তাহা না করিয়া দীন ছুঃখীদিগের উপকারের জন্য রাখিয়া দিই তাহা হইলে কত ছুঃখী ব্যক্তি সাহায্য পায় !

যাহা হউক যিনি যেক্ষণেই পারেন সাধ্যমত পরের উপকার করা উচিত । দীন ছুঃখী দেখিলেই সাহায্য করা উচিত । আহা ! তাহা হইলে কত ছুঃখীজনই যেন উপকার পায় । কতজনই যেন সুখী হয় !

পৃথিবীতে এইরূপ কত ছুঃখীজন যে সাহায্য অভাবে ছুঃখে জীবনযাপন করিতেছে তাহা কে বলিতে পারে ? আহা ! যদি সকলে এইরূপে যথাসাধ্য সাহায্য করে, তাহা হইলে না জানি কতজনই যেন ছুঃখবন্দনা হইতে ত্রাণ পায় ! সকলেরই এবিধে মনোযোগ দিয়া সাহায্য করা উচিত ।

দেখুন, বত লোকে পরের উপকারের জন্য চেষ্টা করিয়াছেন, উপকার করিয়াছেন তাঁহাদের যশ দেশ বিদেশে ঘোষিত হইতেছে । মহাত্মা মফ্রেটস কত কাল মানবলীলা সম্বরণ করিয়াছেন তবুও তাঁহার নাম ঘোষিত হইতেছে । আর মহাত্মা পোলগুবীরবর কসিয়ঙ্কো এমন পরোপকারক ছিলেন যে, এমন কি ভ্রমণে বহির্গত হইবার সময়ও তিনি এক পলি টাকা লইয়া বহির্গত হইতেন এবং দরিদ্র দেখিবার্ষ্যই দান করিতেন । এমন দাতা কে ?

আর ভাগিনী ভোরা পরোপকারীর জীবন্ত দৃষ্টান্ত । ইহার মত পরোপকারী প্রায়ই দেখা যায় না । সে রোগী রোগবন্দনায়া ছটফট করিতেছে, ভাগিনী ভোরা তাহার নিকট বসিয়া তাহাকে শুশ্রুতা করিতেছেন ; ঔষধ দিতেছেন । যে ব্যক্তি

মদ, গাজা পাইরা উচ্ছন্ন যাইতেছে ভগিনী ডেরা তাহাদিগকে উপদেশ দিয়া সংপথে আনিতেন। এইরূপ শত শত কার্য্য তাঁহার জীবনে বিদ্যমান। ইহার সমস্ত জীবন এইকার্য্যে ব্যয় হইয়াছে। সকলেরই ইহার পরোপকারীতা শিক্ষা করা উচিত।

আর অধিক কি, আমাদের মহাত্মা ঈশ্বরচন্দ্র বিদ্যাসাগর মহাশয়ের কার্য্যাবলী পর্যালোচনা করিলেই বুঝা যায় যে, ইনি দয়ার সাগর। ইহার মত পরোপকারক আর দেখা যায় না। ছুঃখীকে বস্ত্র, অন্ন, টাকাকড়ি প্রভৃতি ইনি অকাতরে দান করিয়া থাকেন। ইহার অনুগ্রহে আজ কত লোক ছুঃখ হইতে মুক্ত হইয়া সুখ ভোগ করিয়া আসিতেছেন তাহা বলা যায় না। বাস্তবিক ইনিই ঈশ্বর দত্ত অর্থের সদ্যবহার করিতেছেন। ইহার অনায়িকতা প্রভৃতির গল্প শ্রবণ করিলে আশ্চর্য্য হইতে হয়। যদি ইনি শুনিলেন একজন ছুঃখী অনাভাবে কষ্ট পাইতেছে, তখন তিনি যে অবস্থায়ই থাকুন না কেন, তাহাকে সাহায্য করিবেনই করিবেন। ইনি ছুঃখীকে উপকার করিতে অণুমানও কাতর নহেন। ঈশ্বর সমীপে প্রার্থনা তিনি ইঁহাকে দীর্ঘ জীবন করুন এবং সকল ব্যক্তির অন্তরে ইঁহার মত পরোপকারের বীজ নিহিত করেন।

যাহা হউক পরোপকার করা যে সর্ব্বতোভাবে উচিত, তাহাতে আর সংশয় নাই। এবং সকলেরই পূজ্যপাদ বিদ্যাসাগর মহাশয়ের দৃষ্টান্ত অনুকরণ পূর্ব্বক সাধ্যমত পরের উপকার করা কর্তব্য।

শ্রীযত্ননাথ চক্রবর্তী, নবদ্বীপ।  
বয়স ১৩ বৎসর।


## পুরস্কার প্রাপ্ত রচনা। গরিব ছুঃখীদিগের প্রতি ব্যবহার।

যাহাদের বিদ্যা ও ধন কিছুই নাই তাহাদিগকে গরিব বলে। কোনও গরিব বাড়ীতে আসিলে তাহাকে তাহার যে বস্তুর অভাব থাকে তাহা তাহাকে প্রথমে দিবে এবং যাহাতে সে চিরজীবন সুখে স্বচ্ছন্দে কাটাইতে পারে তাহার জন্ত চেষ্টা করিবে।

\* \* \* \* \*

তাহাকে যদি সকল ধন না দিয়াও বিদ্যাধন দেওয়া যায়, তাহা হইলেই উচিত কাজ করা হয়। কারণ তাহার যদি সকল ধন না থাকিয়াও বিদ্যা ধন থাকে তাহা হইলেই সে চিরকাল চলিতে পারে। যদি ভূমি তাহাকে টাকা পয়সা দাও, কি ১ খানা কাপড় দাও তাহা হইলেও সে সন্তুষ্ট হইবে কিন্তু পূর্ব্বের স্থায় হইবে না; কারণ তাহার ধন কয়েক মাসেই ফুরাইয়া যাইবে এবং কাপড়ও ২।৩ মাসের মধ্যেই ছিঁড়িয়া যাইবে। এই জন্য সে পূর্ব্বের ন্যায় ধন হারা হইয়া পড়িবে; তখন আবার পূর্ব্বের ন্যায় গরিব হইয়া দ্বারে দ্বারে ভিক্ষা করিয়া বেড়াইবে। এই কারণেই তাহাকে বিদ্যা শিক্ষা দেওয়া ভাল। কোন এক জন গরিব আমার বাটীতে আসিল, আমি যদি তাহার সহিত ভাল ব্যবহার করি তবে সে সন্তুষ্ট হইবে; আর আমি যদি তাহার সহিত ভাল ব্যবহার না করিয়া তাহাকে তাড়াইয়া দিই, তাহা হইলে সে ছুঃখিত অন্তরে চলিয়া যাইবে।

শ্রীনগেন্দ্রনাথ দাস, জোনসিংহ।  
বয়স ৭ বৎসর।



মার্চ, ১৮৮৭।

## মহাভারতের গম্প।

(পরপোকার।)

দেবলোকে মহা বিপদ উপস্থিত। বৃত্রাসুরের উৎপাতে দেবগণ মহা ব্যতিব্যস্ত হইয়া পড়িয়াছেন। মহা তেজস্বী দুর্জয় বৃত্রাসুর অগণ্য দৈত্য সেনা লইয়া দেবলোকে নানা প্রকার অত্যাচার আরম্ভ করিয়াছে। দেবতাগণের ধর্ম্ম কর্ণে নানা প্রকার বিঘ্ন জন্মাইতেছে; দেবলোকের নাস্তি নষ্ট করিতেছে। দেবরাজ ইন্দ্র বৃত্রাসুরের মুহিত বুদ্ধে পরাস্ত হইয়া রাজত্ব পরিত্যাগ করিয়া পলায়ন করিয়াছেন। দেবতাগণও দেবলোক ছাড়িয়া তাঁহার সহিত পলায়ন করিয়াছেন। কি উপায়ে এই বিপদ হইতে রক্ষা পাইবেন সেই চিন্তা করিতে করিতে দেবগণ ব্রহ্মার নিকট গিয়া উপস্থিত হইলেন। ব্রহ্মা বলিলেন “নাভূষের হাতে বৃত্রাসুরের মৃত্যু নাই; অতএব তোমরা নারায়ণের নিকট যাও, তিনি ইহার উপায় করিবেন।” দেবগণ নারায়ণের নিকট যাইয়া বৃত্রাসুরের উৎপাতের কথা বলিলেন। নারায়ণ বলিলেন “বৃত্রাসুর আমার পরম ভক্ত, আমি তাহাকে বধ করিতে পারিব না। তোমরা দধীচি মুনির

নিকট যাও। তিনি পরম দয়ালু এবং পরোপকারী তাঁহার জীবনের ব্রত। তাঁহার নিকট এই মহা বিপদের কথা বলিয়া, তাঁহার অস্থি ভিক্ষা চাও। তিনি কৃপা করিয়া অস্থি দিলে, সেই অস্থি বিশ্বকর্ম্মার নিকট লইয়া যাও। বিশ্বকর্ম্মা তাহা দ্বারা বজ্র প্রস্তুত করিয়া দিবেন; সেই বজ্রে বৃত্রাসুরের মৃত্যু হইবে।” তখন দেবগণ ইন্দ্রের সহিত দধীচি মুনির নিকট উপস্থিত হইয়া বৃত্রাসুরের অত্যাচারের কথা বলিলেন। এবং সেই অত্যাচার হইতে রক্ষা করিবার জন্ত তাঁহার নিকট প্রার্থনা করিতে লাগিলেন। পরোপকারব্রত দধীচি সমস্ত কথা শুনিয়া বলিলেন;—“দেবরাজ আমার কি সৌভাগ্য! আজ আমার জীবন সার্থক হইল। আমার এই জীর্ণ অস্থি—তুই দিন পরে পুলায় মিশাইত, আজ তাহা দেবতাগণের উপকারে লাগিবে, ইহা অপেক্ষা আমার আর কি সৌভাগ্য আছে! পরোপকারের জন্ত যাহার জীবন যায় তাহারই সার্থক জীবন; আমার একটি জীবন দিলে যদি এতগুলি জীবন রক্ষা হয়, তবে এই মুহূর্ত্তেই আমি তাহার জন্ত প্রস্তুত আছি।” শিষ্যগণ তাঁহার এই কথা শুনিয়া ক্রন্দন করিতে লাগিল। তখন তিনি শিষ্যগণকে বলিতে লাগিলেন,—“তোমরা কেন অশ্রুপাত করিতেছ! এ আমার পরম সৌভাগ্য; পরের হিতের জন্ত এ সংসারে কয় জনে প্রাণ দিতে


পারে? আজ আমি পরোপকারের জন্ত প্রাণ দিতে পারিতেছি, ইহাতে তোমরা আনন্দ কর। পরহিত করিতে প্রাণে কেন কষ্ট হইবে! ধূলার শরীর দুদিন পরে ধূলাতে মিশাইবে, পরহিতে যদি ইহা না লাগিল, তবে এই শরীর লইয়া কি করিব? মানুষ হইয়া যদি মানুষের উপকারে না আসিলাম, তবে এ জীবন লইয়া কি করিব? মানুষ মানুষের উপকার করিবে, মানুষের ছুঃখ কষ্ট মানুষ দূর করিবে, এই জন্তই মানুষের জন্ম। যে তাহা পারিল না;—যে ছুঃখীর ছুঃখ দূর করিল না, বিপন্নকে আশ্রয় দিল না,—দরিদ্রকে সহায়তা করিল না,—ক্ষুধিতের মুখে একগ্রাস অন্ন তুলিয়া দিল না—বস্ত্রহীনকে একখণ্ড ছিন্ন বস্ত্রও দিল না, তাহার মনুষ্য জন্মই বৃথা। অশ্রের ছুঃখ দূর করিবার জন্ত, অশ্রের দুর্দশা মোচন করিবার জন্ত, সমস্তই দিতে হইবে; পরের হিতের জন্ত জীবন পর্য্যন্ত উৎসর্গ করিতে হইবে। ইহা যিনি পারেন, তাঁহারই মনুষ্য জন্ম সার্থক।”

এই বলিয়া মূনি পটবস্ত্র পরিধান করিয়া এবং উত্তরীয় ধারণ করিয়া ধ্যানে বসিলেন। শিষ্যগণ বেদগান করিতে লাগিল এবং মধুর হরিসংকীর্তন হইতে লাগিল। দধীচির নয়ন নিমীলিত হইয়া আসিল, নাদিকা নিশ্বাস শূন্য হইল, শরীর নিশ্চল ও নিস্পন্দ হইল; অকস্মাৎ ব্রহ্মরন্ধু বিদীর্ণ হইয়া প্রাণ বায়ু বাহির হইয়া গেল। দধীচি মূনি পরোপকারের জন্ত জীবন উৎসর্গ করিলেন,—স্বর্গ হইতে পুষ্পবৃষ্টি হইতে লাগিল।

তখন ইন্দ্র দধীচির অস্থি লইয়া বিশ্বকর্মার নিকট গমন করিলেন। বিশ্বকর্মা তাহা দ্বারা এক অপূর্ণ বজ্র নির্মাণ করিলেন। সেই মহা বল-শালী বজ্রে বৃত্রাসুরের মৃত্যু হইল, ইন্দ্র পুনরায় রাজত্ব পাইলেন। দেবলোক নিরাপদ হইল।

আবার দেবলোকে শান্তি বিরাজ করিতে লাগিল। মহাভারতের এই গল্পটির উপদেশ আমাদের হৃদয়ে গাঁথিয়া রাখা উচিত। পরের হিতের জন্ত জীবন উৎসর্গ করা অপেক্ষা মানুষের জীবনের আর অধিক সুখ—অধিক সৌভাগ্য কি হইতে পারে? মৃত্যুর পর যে শরীর আগুনে পুড়িয়া ভস্ম হইয়া যাইবে, যদি তাহা পরের উপকারে লাগে, যদি একটি জীবন দিলে দশটা জীবন রক্ষা হয়, তবে কেন তাহা দিবে না? পরের ছুঃখ দূর করা, পরের চক্ষের জল মুছাইয়া দেওয়া, নিরাশ্রয়কে আশ্রয় দেওয়া, ক্ষুধিতকে অন্ন দেওয়া—ইহারই জন্ত মানুষের জন্ম। অশ্রের উপকার করা, অশ্রকে সুখী করাই মানুষের এক প্রধান কর্তব্য। যদি তুমি তাহা না পারিলে, যদি অশ্রের ছুঃখ দূর করিতে না পারিলে, অশ্রকে সুখী করিতে না পারিলে তবে তোমার জন্মই বৃথা। মহাভারতের এই গল্পটিতে আমরা শিখিতেছি যে, অশ্র সকল দুরে থাক, পরোপকারের জন্ত জীবন পর্য্যন্ত উৎসর্গ করিতে হইবে; আর শিখিতেছি যে, যাহার কোন শক্তি নাই, কোন সামর্থ্য নাই, সেও যদি পরের হিতের জন্ত জীবন উৎসর্গ করে, তবে সে বজ্রের বল পায়। যাহার কোন শক্তি ছিল না, কোন সহায় ছিল না, পরোপকার করিতে গিয়া সে দেখিতে পায় যে, সে বজ্রের বল পাইয়াছে, পরের হিত সাধনের জন্ত তাহার হৃদয়ে বজ্রের শ্রায় বল, বজ্রের শ্রায় শক্তি উপস্থিত হইয়াছে। একটি কথা আছে—সাধু যাহার ইচ্ছা, ঈশ্বর তাহার সহায়। কথাটি বড় খাটি। তুমি সংকার্য্য করিতে যাও, ঈশ্বর তোমার সহায় হইবেন। তোমার যদি কোন সম্বল না থাকে, তথাপি দেখিতে পাইবে যে, তুমি যে সাধু কার্য্যে হাত দিয়াছ, শত সহস্র

বিঘ্ন বাধা সত্ত্বেও, তাহা হইয়া যাইতেছে। সাধু ইচ্ছা থাকা চাই। পরোপকার করিবার জন্ত সংকল্প থাকা চাই। যদি আর কিছুও না পার, পরের ছুঃখে একফোঁটা চক্ষের জল ফেলিও, সেই একফোঁটা চক্ষের জলের মূল্য লক্ষ টাকা।



## পিপীলিকার উপদেশ।

আমি কাল ঘুমের ঘোরে স্বপন দেখিলাম যে, একটা ফড়িং হইয়া গিয়াছি এবং এদিক ওদিক করিয়া লাফাইয়া বেড়াইতেছি। বেড়াইতে বেড়াইতে এক পুকুরের ধারে আসিয়া উপস্থিত হইলাম। সেখানে অল্প অল্প ঠাণ্ডা ঠাণ্ডা শীতাস বহিতেছিল, আর অননি আমার সম্মুখে ফড়িং কণ্ঠের গান ধরিয়া দিলাম। সে গানে মুগ্ধ হইয়া এক পিপীলিকে আমার কাছে আসিয়া উপস্থিত হইল। তাহার সঙ্গে অনেক ক্ষণ আলাপ করিয়া আমাদের দুজনার মধ্যে বেশ বন্ধুতা জন্মিয়া গেল। পিপীলিকে তাহাদের বাড়ী নাইতে আমাকে নিমন্ত্রণ করিল। তাহাদের বাড়ী পুকুরের ওপারে। পুকুর পার হওয়া বড় কঠিন ব্যাপার। দুজনার বুদ্ধি খাটাইয়া আমরা দুটা খড়ের ডাঁটার উপর একটা পাতা জড়াইয়া ভেলা তৈয়ার করিলাম। তার উপর দুজনা চড়িয়া একটা লম্বা খড় দিয়া ঠেলিতে ঠেলিতে চলিলাম। পুকুরে অনেক

শেওলা, পান্না, ঘাস জন্মিয়াছিল, তাহাতে আমাদের ভেলা বাধিয়া যাইতে লাগিল; অনেক কষ্টে সে গুলি অতিক্রম করিয়া চলিতে লাগিলাম। পুকুরের মাঝখানে গিয়া দেখি জল হইতে বিড় বিড় করিয়া বুবুদ উঠিতেছে। পিপীলিকে জিজ্ঞাসা করিলাম “ও কি ভাই” সে বলিল “তাও জান না, ওখানে জলের ভিতর মাকড়সা ভুড় ভুড়ি তুলুছে।” আমি আগে শুনিয়া ছিলাম যে “মাকড়সারা কেবল স্থলেই থাকে।” পিপীলিকে বলিতে লাগিল “এরকমের মাকড়সারা জলের ভিতর থাকে আর জলের পোকা ধরিয়া খায়। সকলের রুচি ত আর সমান নয়, কেহ পাঁঠা খাইতে ভাল বাসে, কেহ আবার নিরানিষই খায়। ইহারা জলের পোকাই খাইতে ভাল বাসে তাই জলের ভিতর থাকে। জলের ভিতর থাকিয়াই নিশ্বাস টানে। জলের ভিতর গাছড়া থাকে, তাহাতে নিজের সূতা জড়ায় আর উঁচু ছোট ঘণ্টীর মত একটা বাসা সেই সূতা দিয়া তৈয়ার করে। বাসাটা প্রথমে জলে পূর্ণ থাকে, মাকড়সা জলের উপর উঠিয়া একগাল বাতাস টানিয়া লইয়া সেই বাসার তলে যাইয়া মুখের বাতাস ছাড়িয়া দেয়। বাতাস টুকু বাসার ভিতরে উপর দিকে থাকিয়া যায়। এইরূপ অনেকবার করিতে করিতে বাসাটা বায়ুতে পূর্ণ হইয়া যায় তখন মাকড়সা ইহার মধ্যে বাস করে ও স্বচ্ছন্দে, নিশ্বাস টানে। অনেক দিন পরে যখন ঘরের বাতাসটা খারাপ হইয়া যায় তখন মাকড়সা সেই বাসাটাকে কাত করিয়া ঘরে আর ঘরের সব বাতাস বাহির হইয়া যায়। পুনরায় নূতন বায়ু আনিয়া বাসা পূর্ণ করে। ইহাদের সর্কান্ন রেসমের মত কোনল লোমে আবৃত, তাই জলে ইহাদের গাত্র ভিজিয়া যায় না।”

এইরূপ কথা বার্তার পর আমাদের ভেলা পুকুরের ওধারে আসিয়া লাগিল। পিপড়ের হাত ধরিয়া তাহাকে ভেলা হইতে নামাইলাম। ছুজনার হাত ধরাধরি করিয়া চলিতে লাগিলাম।



পথে কত নূতন নূতন জিনিস দেখিতে দেখিতে চলিলাম। অনেক দূর গিয়া এক গর্তের সন্মুখে আসিয়া উপস্থিত হইলাম। গর্তের ভিতরটা বেশ শীতল। পরিশ্রম করিয়া ক্লান্ত হইয়া পড়িয়াছিলাম তাই অল্পক্ষণের জন্ত ছুজনার ঘুমাইতে লাগিলাম। প্রথমে আমার ঘুম ভাঙ্গিল, তখন চারিটা বাজিয়া গিয়াছে। আমরা আবার চলিতে লাগিলাম। পথিমধ্যে এক বাবুর সহিত সাক্ষাৎ হইল। তাঁহার সহিত আমাদের আলাপ পরিচয় নাই তথাপি তিনি এমনি অশিষ্ট যে আমাদের নাম ধরিয়া ডাকিতে লাগিলেন এবং তাঁহার বাসায় যাইতে অনুরোধ করিলেন। একটা



গাছে স্থতা জড়ান জালের মত তাঁহার বাসা। দূর হইতে দেখিলাম কতকগুলি মাছির কঙ্কাল সেই বাসায় ঝুলিতেছে। আমি যাইতেছিলাম কিন্তু আমার পিপালিকা বন্ধু আমার কাণে কাণে বলিলেন “উহাকে বিশ্বাস করিওনা ও দস্যুবৃত্তি করিয়া জীবন ধারণ করে, পক্ষীকে নিজের বাড়ীতে ভুলাইয়া লইয়া গিয়া তাহার প্রাণ বধ করে, উহার নাম মাকড়সা।” মাকড়সা আমায় জিজ্ঞাসা করিল “কোথায় যাইতেছ?” আমি বলিলাম “পিপড়াদের বাড়ি” “তুমি কি পাগল হইয়াছ, প্রাণটা হারাবে না কি, যদি প্রাণের প্রতি কিছু মায়া থাকে তবে খবরদার পিপড়াদের বাড়ী যেও না। পিপড়েরা বড় ছুপ্ত লোক, বড় রাগী, ওদের রাজ্যে সবাই সমান, রাজা টাজা নাই, মার্কিন দেশের মত সবাই রাজা।” আমি বলিলাম “আমার বন্ধু পিপড়া যে ওরকমের লোক তা আমার বিশ্বাস হয় না, তিনি বলিয়াছেন কোন ভয় নাই।” আমরা তথা হইতে চলিয়া গেলাম। পিপড়া মাকড়সার মুখে স্বজাতির নিন্দা শুনিয়া ক্রোধে অগ্নিশর্মা হইয়া উঠিল, এবং বলিতে লাগিল “আপনি ও ব্যাটাাদের জানেন কি?” আমি ওদের সব কুলের খবর জানি, আপনাকে সব বলিব।” আমরা পশ্চাতে তাকাইয়া দেখি মাকড়সা মুখটা চুন করিয়া নিতান্ত বিমর্ষ হইয়া নিজের জালে গিয়া বসিয়া রহিল। মনে করিয়াছিল আমাদের ভুলাইয়া তাহার জালে লইয়া গিয়া আমাদের ঘাড় ভাঙ্গিয়া রক্ত চুষিয়া উদর পূর্ণ করিবে। কিন্তু আমার বন্ধুর পরামর্শে আমি না গিয়া রক্ষা পাইয়াছি। মাকড়সার কুলের খবর আমার বন্ধুর নিকট যাহা শুনিলাম তাহা বড় আশ্চর্যজনক, আমি আগামী বারে তাহা বলিব।

## মজার পড়া ।

ঘোড়ার মত দৌড়ে এত চলবো না ক নেচে ।  
পা পিছলে পড়ে যাই ত নাকট বাবে ছেঁচে ॥  
আমার বড় মন্দ স্বভাব—কাঁটা খোঁচা দলি’ ।  
যখন তখন, যেথা সেথা, বড়ই ছুটে চলি ॥  
সবাই করেন মানা, তবু গুনিতে ত কথা ।  
বুকে মুখে মাথায় চুকে তাই পাই সে ব্যথা ॥  
কষ্ট এত পেয়েও কি তাই মনে থাকে ছাই ।  
আড়াই পা না যেতে যেতে সকল ভুলে যাই ॥  
সিঁড়ির উপর ছড়-ছড়-ছড় সেই দণ্ডেই ছুটি ।  
পা পিছলে আবার পড়ি—আবার কেঁদে উঠি ॥  
মা ব’লেছেন তাই সে আমার, কষ্ট পেয়ে বড় ।  
“নিছামিছি ছুটে গিয়ে এবার যদি পড় ॥  
‘আহা’ ব’লে তুলব না ত, নেবো না ত কোলে ।  
মুখ মুড়িয়ে দেবো না ত মিষ্ট কথা ব’লে ॥  
খেলার সময় দৌড়ে খেল, বারণ তাতে নাই ।  
চলতে গিয়ে পড়বে টলে দেখতে নাহি চাই ॥  
বরং তুমি পড়তে যদি ভাল বাস বড় ।  
বই নে এস, কাছে ব’স, ‘দশ’ ‘রস’ পড় ॥  
নূতন পড়া পড়বে যদি,—নাসি মাকে ডেকে ।  
গড়গড়িয়ে দেখাও পড়ে ‘বড় গাছ’টা থেকে ॥”

## পুরস্কার প্রাপ্ত রচনা । ( মদ্য পানের অপকারিতা । )

সুরাপান যে সর্বপ্রকারে দূষণীয়, তাহা সকল দেশে ও সকল উপদেশ-গ্রন্থে চিরকাল বিধোষিত হইয়া আসিতেছে, কিন্তু আক্ষেপের বিষয় এই যে, এমন কোন স্থান নাই যেখানে সন্মুখে বা পরোক্ষে, উক্ত সুরাসুর আধিপত্য না করিতেছে! সুরাপান করিলে মনুষ্যের স্বাভাবিক জ্ঞান লোপ পায়, তন্নিমিত্ত নানা প্রকার অসৎ কার্য্য করিতেও সুরাপায়ীরা কুণ্ঠিত হয় না। যে পর্য্যন্ত মদের নেশা বিদূরিত হইয়া না যায় ঐ পর্য্যন্ত, সুরাপায়ীগণ মনুষ্য লোক পরিত্যাগ করিয়া এক প্রকার পশুলোকে বিচরণ করে; এবং তজ্জন্যই তাহাদিগকে পাশব আচরণে লিপ্ত থাকিতে অধিকাংশ সময় দেখা যায়। আমরা ধারণ শক্তির সাহায্যে এই সংসার মধ্যে নিয়ত নির্বিল্ল ও অভ্রান্ত ভাবে কার্য্য করিয়া সংসার যাত্রা ও অন্যান্য কাণ্ড নির্বাহ করিয়া থাকি। মদ্যপান করিলে আমাদের সেই উপকারিণী স্মৃতি শক্তির অভাব ঘটে। সেই শক্তির হ্রাস প্রযুক্ত আমাদের অনেক কার্য্যের ব্যাঘাত জন্মে। মোহ, তন্দ্রা, প্রলাপ এই সকল সুরাপানের নিত্য সহচর, আমাদের কাম, ক্রোধ, রিপু সকলও সুরাপান করিলে বিশেষ প্রবল হইয়া, কুপথে মতি জন্মায়। চক্ষু, কর্ণ, নাসিকা, জিহ্বা, তক, ইত্যাদি ইন্দ্রিয়-গণও সেই নেশার আবির্ভাবে স্ব স্ব কার্য্য করিতে অক্ষম হইয়া নানা প্রকার মারাত্মক কার্য্যের অন্তর্ধান করে। আমাদের এমন কোন ইন্দ্রিয় ও



এমন কোন শক্তি নাই, সুরাপান করিলে যাহার বৈক্রব্য না ঘটে। ঈশ্বর আমাদের সুরা স্বেচ্ছন্দে পৃথিবী মধ্যে অবস্থান করিবার নিমিত্ত যে সকল উপকরণ প্রদান করিয়াছেন, যাহাতে তাহাদের বল, ও কার্য্য পটুতা জন্মে, তৎপ্রতি মনোযোগী থাকিয়া তাহা সম্পাদন করাই আমাদের সর্ব্বতোভাবে কর্তব্য। কোন ক্রমে তাহার বিপরীতাচরণ করা উচিত নহে। করিলে পদে পদে বিপদ ঘটবার একান্ত সম্ভাবনা। কাজেই সুরাপান যে নিতান্ত দুষণীয় কাজ তাহাতে অনু-মাত্রও সন্দেহ নাই। যেহেতু সুরাপান করিলে সর্দদা ঈশ্বরাজ্ঞা উল্লঙ্ঘিত হইয়া থাকে।

সুরাপানের আর একটা মহৎ দোষ এই যে, যে সকল দেশে ইহার আধিপত্য আছে শীঘ্রই ঐ সকল দেশ দরিদ্রতার চরম সীমায় উপনীত হয়। ঐ অসুর যাহাকে একবার স্বকীয় মোহ মস্ত্রে দীক্ষিত করিয়াছে, সে আর তাহার হস্ত হইতে পরিত্রাণ পাইতে পারে না। ঐ ব্যক্তি যাহা কিছু উপার্জন করে সকলই সুরা দেবীর পূজার্থ ব্যয় হইয়া থাকে; তথাপি আকাজ্ঞা নিবৃত্তি না হওয়ার প্রথমে গ্লান, ও তৎপরে চৌর্য্যাদি ছুষ্টিয়া দ্বারা, নরকের পথে অগ্রসর হয়।


সুরাপান করিয়া মোগল বংশের আদি সম্রাট বাবর যে প্রকার বিপদে পতিত হন, তাহা ইতি-হাসের পাঠক মাত্রই অবগত আছেন। হিন্দুকুল-গৌরব পৃথিবীরাজের হস্ত হইতে ভারতের স্বাধীনতা-স্বয়ং অস্তমিত হওয়ার সুরাপানই কি এক প্রধান কারণ নয়? যাহা হউক সে দূরের কথা, যে ক্রন্দ-নের রোল এখনও বঙ্গ হইতে বিদূরিত হয় নাই, সেই তিন কড়ির ফাঁসীর কারণ কি সুরাপান নয়? এই প্রকার কত কত বিপজ্জনক ও লোম-হর্ষণ কাণ্ড যে সুরাপানের প্রসাদাৎ সম্পাদিত

হইতেছে তাহার ইয়ত্তা করা দুষ্কর। অতএব দেখা যায় যে, সুরাপান নিসংশয়ে দুষণীয়। সুরা-পান করিলে মনুষ্যের পরিপাক শক্তির হ্রাস ঘটে। তৎকৃত শরীর অসুস্থ হইলে কাজেই অন্যান্য কার্য্যের অসুবিধা ঘটে। সুরাপান করিতে করিতে অনেককে ভবধাম পরিত্যাগ করিতে দেখা গিয়াছে। অতএব সুরাপানের অপকার যে হাতে হাতে ফলে তাহার সন্দেহ নাই।

যে সকল কারণে বিদ্যার্জনের ব্যাঘাত জন্মে, সুরাপান তাহার অন্যতম। সুরাপানের এমনই অদ্ভুত শক্তি যে, সে উদ্যোগী পুরুষের উদ্যোগ, পরিশ্রমীর পরিশ্রম, সত্যভাষীর সত্য, ধার্মিকের ধর্ম্ম, ইহাদিগকে অনায়াসে বিনাশ করিয়া ফেলে। যে প্রকার রত্নাদি সংযোজিত বহুমূল্য বস্তাদি অগ্নি সংযোগে বিনাশ প্রাপ্ত হয়, সেই প্রকার সুরাপান দ্বারা উৎপাদিত নেশায়, মনের স্বেচ্ছা, ধৈর্য্য, ইত্যাদি সমূলে বিনষ্ট হয়। পূর্বে বলা হইয়াছে নেশাতে ইন্দ্রিয়াদির বৈক্রব্য ঘটয়া থাকে; তন্নিবন্ধন বাগান্দিয় দ্বারা অভিমত বাক্য উচ্চা-রিত না হইয়া অস্পষ্ট পাশব ভাষার সৃষ্টি হয়। তাহার কোন প্রকার ভাবার্থ থাকে না। সেই প্রকারে হস্তাদি ও স্ব স্ব কার্য্য হইতে বিচ্যুত হয়। নেশাকালে আত্ম বিস্মৃতি ঘটয়া নেশা-খোরের যে প্রকার হৃদশা ঘটে, তাহা অনেকে প্রত্যক্ষ করিয়াছেন, তদ্বিষয় লেখা বাহুল্য।

শ্রীঅমৃতনাথ নাথ, মূলপাড়া।

বয়স ১৯ বৎসর।



## প্রভুর কাজ ।

একদিন সন্ধ্যার একটু আগে কুকুর সেয়ানরামদাস বাগানে বেড়াইতেছে, এমন সময়ে বৃদ্ধ শৃগাল ধূর্তকৃষ্ণ চতুর-চুড়ামনি একটা আড়াল জারগা হইতে বাহির হইয়া, অতি সাবধানে এ দিক ও দিক তাকাইতে লাগিল। তখন সেয়ানকে সম্মুখে দেখিয়া, হাসিতে হাসিতে বলিল, “কি হে ভায়া, অনেক দিন পরে দেখা হইল, ভাল আছত?”

সেয়ান উত্তর করিল না; কারণ বৃদ্ধের সহিত তাহার কোন কালেও আলাপ বা সম্প্রীতি ছিল না। কোন কারণ বশতঃ সেয়ান অনেক-বার ইহার খোঁজ করিয়াছে বটে, কিন্তু তাহা লৌকিকতা বা ভদ্রতার পাত্তিরে নহে। বেথানে হৃদয়ের সন্দেহ নাই, সেখানে অসত্য জানোয়ার কখনই মৌখিক বন্ধুত্ব প্রকাশ করে না।

শৃগাল উত্তর না পাইয়া বলিতে লাগিল; “তা তোমার বেশ চেহারা খুলিয়াছে, তা নাইবা হইবে কেন, কপাল গুণে অতি দয়ালু মনিব পাইয়াছ, স্বেচ্ছন্দে আছ, ঈশ্বর করুন চির-কাল এমনই থাক। তা, বাটীর সর্দার সর্দধা কুশল ত?”

সেয়ান বিস্মৃত দন্তপাটী প্রকাশ করিয়া গম্ভীর স্বরে বলিল, “বড় কুশল নহে; কি হইয়াছে তাহা বোধ হয় মহাশয়ের অবিদিত নাই।” এই বলিয়া কুকুর এক দৃষ্টে শৃগালের দিকে চাহিয়া রহিল, যেন তাহার চক্ষু ধূর্তের অন্তর পর্য্যন্ত দেখিয়া লইতেছিল। বৃদ্ধ নির্লজ্জ এবং মনো-

ভাব গোপনে বিশেষ পটু হইলে ও তাহার মুখ ও কাণ ছুটি লাল হইয়া উঠিল; তথাপি নিতান্ত ভদ্র লোকের গায় বলিল, “আমিত কিছু জানি না। আমি বনচারী, গৃহস্থের ঘরের খবর আমার জানা কিক্রমে সম্ভবে?”

সেয়ান দন্ত কিড়িমিড়ি করিয়া বলিল, “আচ্ছা, আমি বলিতেছি। তিন দিন হইল ছোট দিদি মণির ছুটা খরগোস হারাইয়াছে, আবার খোকা বাবুর সাদা হাঁস পাওয়া যাইতেছে না।”

“আ-হা-হা! আ-হা-হা! কি বলিলে? ছুটা খর-গোস—খোকা বাবুর সা-দা হাঁ-স—হায়! হায়! হায়! আহা হা হা হা!” বলিতে বলিতে বৃদ্ধের কণ্ঠ রোধ হইয়া আসিল, ছুই হাত তুলিয়া গুঁক চক্ষু মুছিতে মুছিতে চক্ষু ছুটি একটু সজল ও আরক্ত হইয়া উঠিল। তখন বাম হাতে কপাল টিপিয়া ধরিয়া, ডাইন হাত বৃদ্ধের উপর রাখিয়া বলিতে লাগিল—“তুমি কিছু টের পাও নাই, কি করিয়াই বা পাইবে, তুমি কর্তার ঘরে পুমা-ইয়া থাক। আর কি বলিব, বাচ্চা, খরগোস ও হাঁস বড় নিমক হারাম জন্ত, পুণিতে নাই। জীব-বিজ্ঞান পড় নাই বুঝি? তাহাতে লেখা আছে খরগোস জাতির স্বভাবই এই যে রাত্রিকালে সুরবিধা পাইলে উহার বাহির হইয়া যায়, বড় একটা ঘরে ফেরে না। আর হাঁসের কথা কি বলিব? দেশ বিদেশে ঘুরিয়া বেড়ান উহাদের এক রোগ।”

সেয়ান বলিল, আমি জীব-বিজ্ঞান পড়ি নাই, কিন্তু এতটা বুঝিতে পারি যে, দেশ বিদেশে বাইতে হইলে, কেহ বাড়ীর কোনে ঠ্যাং ফেলিয়া যায় না। ঐত ছুখানা হাঁসের ঠ্যাং পড়িয়া রহি-য়াছে। মহাশয়ের অনেক বিদ্যা বুদ্ধি, ঠ্যাং

ফেলিয়া বেড়াইতে যাইবার কারণ অবশ্যই জানা আছে।”

সেয়ানের কণ্ঠস্বর, অধরের হাস্য এবং দন্তের আভা দেখিয়া, শৃগালের বুক ছুরু ছুরু করিতে লাগিল, অতএব “আজ আসি, হাতে অনেক কাজ” এই বলিয়া তিনি মানে মানে বিদায় লইলেন। সেয়ান মনে মনে বলিল—“এই বুড়ারই যত ডাকাতি। যাই, মা হারা হাঁসের ছানাগুলির কখন কি ঘটে জানি না। কুঁড়ে ঘর খানার বেড়া ভাঙ্গিয়া গিয়াছে। রাত্রে আর কর্তার ঘরে শুইব না, ছানাগুলির কাছে বসিয়া থাকিব। কিন্তু কুঁড়ে ঘর খানা নিতান্তই শ্রুঁত শ্রুঁতে, চালে খড় নাই, ভিতরে ঠাণ্ডা বাতাস যায়, রাত্রে বড় শীত ভোগ করিতে হইবে। কিন্তু কি করি, প্রভু আমাকে বাড়ীর প্রহরী করিয়াছেন, প্রভুর কাজ করিতেই হইবে, নহিলে অবিধাসীর কাজ হয়। বিধাসী ভৃত্য প্রভুর কাজ অবহেলা করে না। শারীরিক অসুবিধা ভোগ করিয়া যদি তাহার নিকট নিরপরাধী থাকিতে পারি তাহাই আমার লাভ, তাহাই আমার সুখ।”

এইরূপ ভাবিয়া সেয়ানরামদাস নিজের সুখ দুঃখ অগ্রাহ করিয়া যেখানে হাঁসের ছানাগুলি ছিল, সেই ক্ষুদ্র কুঁড়েতে আসিল। ছানাগুলি মার ডানার তলে নির্ভয়ে কেমন আরামে ঘুমাইয়া থাকিত, এখন তাহাদের দুঃখ ও ভাবনার সীমা নাই। সেয়ানকে দেখিয়া তাহারা আল্লাদে ট্যা ট্যা করিতে করিতে তাহার নিকটে আসিয়া তাহার গায়ে গা দিয়া ঘিরিয়া বসিল, কারণ জন্মিয়া অবধি তাহারা সেয়ানকে বন্ধু বলিয়া চিনিয়াছে। চতুষ্পদ রক্ষক সন্মুখে দ্বিপদ আশ্রিত দিগকে অভয় দিয়া, তাহাদের পার্শ্বে শুইয়া রহিল।

ক্রমে রাত্রি হইল, সেয়ানের চক্ষু ঘুমের ঘোরে ঢুলিয়া পড়িতে লাগিল। কিন্তু অসহায় ছানাগুলির কথা ভাবিয়া তাহার ঘুমাইতে সাহস হইল না, কণ্ঠে চক্ষু খুলিয়া রহিল। হঠাৎ তাহার মনে হইল যেন, কে পা টিপিয়া টিপিয়া চোরের মত কুঁড়ের দিকে আসিতেছে। সেয়ান ধীরে আসিয়া বেড়ার ভাঙ্গা দিকে দাঁড়াইয়া রহিল। তখন পায়ের শব্দ থামিয়া গেল। আবার একটু খট্ করিয়া শব্দ হইল। সেয়ানের চক্ষু নড়িতেছে না, নিশ্বাসটিও পড়িতেছে না। ছুটা পা একটা লম্বা মাথা, ক্রমে সমস্তটা শরীর ঘরে প্রবেশ করিল। শৃগাল ভায়া পা বাড়াইয়া একটি হাঁসের ছানার দিকে যেই মাথা বাড়াইতেছেন অমনি খপ্ করিয়া কুকুর তাহার গলা কামড়াইয়া ধরিল। ধূর্তকৃষ্ণের শরীর কুকুরের শরীরের প্রায় দেড়া, কিন্তু হইলে কি হইবে, শৃগাল-চন্দ্র যুদ্ধ সজ্জায় ছিলেন না, কুকুর তাহাকে বড় কায়দা করিয়া ধরিয়া ছিল; আর একটি কথা, ঞায়ের পক্ষে যে যুদ্ধ করে সে দুর্বল হইলে ও বলবান হয়, তাহার বল কিছুতেই টুটে না।

অনেক ক্ষণ তুমুল যুদ্ধ হইল। শব্দ শুনিয়া মালীর ঘুম ভাঙ্গিল, সে ব্যাপার দেখিয়া প্রথমে অবাচ্ হইয়া রহিল, পরে শৃগালের গলায় এক গাছা বড় দড়ি বাধিয়া কুকুরকে ছাড়াইয়া লইল। শৃগাল চন্দ্র সারারাত কয়েদ্ রহিলেন; সকাল বেলা বাড়ীর কর্তার হুকুম মত তাহার যাহা হয় হইবে। সেয়ান তখন নিশ্চিত মনে ছানাগুলির কাছে গিয়া ঘুমাইয়া পড়িল, তাহার আর কোন ভাবনা নাই, সুতরাং ঘুমাইবার বাধা নাই। প্রভুর কাজ ভালরূপে সম্পন্ন করিয়াছে বলিয়া তাহার প্রাণ ভরা আল্লাদ। সমস্ত রাত কেবল সুন্দর সুন্দর স্বপ্ন দেখিয়াছিল।

## ফরাসী বালিকার স্বদেশানুরাগ ।

চতুর্দশ শতাব্দীর প্রারম্ভে ফরাসী সম্রাট চতুর্থ চার্লসের মৃত্যু হয়। তখন তৃতীয় এডওয়ার্ড ইংলণ্ডের রাজা ছিলেন। এডওয়ার্ড পরলোকগত ফরাসী সম্রাটের ভগিনীপুত্র ছিলেন এবং তাহার মৃত্যুর পর ফরাসী সিংহাসন অধিকার করিবার জন্য চেষ্টা করেন। আমাদের দেশে যেমন পুত্র সন্তান না থাকিলে ভাগিনেয় বিয়ের অধিকারী হয় ফরাসী দেশে সে নিয়ম ছিল না। সুতরাং এই বিষয় লইয়া ইংরাজরাজ এডওয়ার্ড এবং ফরাসী সম্রাট ফিলিপের সঙ্গে বিবাদের সূত্র পাত হয়। এই যুদ্ধ এক শত বৎসরের ও অধিক কাল স্থায়ী হইয়াছিল। তাহারা প্রথমে যুদ্ধ আরম্ভ করেন তাহাদের পৌত্র প্রপৌত্রেরা এই যুদ্ধের শেষ করিয়াছিলেন। এতদীর্ঘকাল ব্যাপী যুদ্ধের বিবরণ পৃথিবীর ইতিহাসে অন্য কোন স্থানে দৃষ্ট হয় নাই।

এই যুদ্ধে প্রথম প্রথম ইংরেজেরাই জয়লাভ করেন। তাহারা ক্রমে ক্রমে ফরাসী দেশের অনেক স্থান অধিকার করিয়া ফেলিলেন। ফরাসীরা দিন দিন হীনবীর্য হইয়া পড়িতে লাগিল; ইংরাজ সৈনিকেরা ফরাসীদিগকে বিড়াল কুকুরের ঞায় মনে করিতেন; আজ কাল আমরা যেমন পদে পদে ইংরাজ কর্তৃক অপমানিত হই সেই সময়ে ফরাসীদের ও এইরূপ দুর্দশা হইয়াছিল। ফরাসীরমণী এবং বালক বালিকারা ইংরেজদিগকে সর্প কিংবা ব্যাঘ্রের ন্যায় ভয় করিত। বাস্তবিক তখন ফরাসীদিগের আশা যেন একেবারে

বিলুপ্ত হইয়াছিল; আর যে ফরাসীরা স্বাধীন হইবে—আর যে তাহারা ইংরেজদিগের অত্যাচার ও অপমান হইতে মুক্তি লাভ করিবে এ আশা ছিল না। কিন্তু চিরদিন কি সমান যায়? পাপ ও অত্যাচারের কতদিন শ্রীবৃদ্ধি হইয়া থাকে? তাহারা অন্যায় পূর্বক পরের রাজ্য অধিকার করিতে চাহে ন্যায়বান পরমেশ্বর কি তাহাদের ইচ্ছাই পূর্ণ করিয়া থাকেন? তাহা নয়। তাহারা ক্ষণকালের জন্য প্রভুত্ব পাইয়া নির্দোষীর প্রতি অত্যাচার করে—আপনাদিগের গর্কে ক্ষীণ হইয়া ন্যায়ের পথ লঙ্ঘন করে—তাহাদের শীঘ্রই সে গর্ক ও মূর্খতার জন্ত অনুতাপ করিতে হয়। আর তাহারা ঈশ্বরের দিকে চাহিয়া ন্যায় ও সত্যের পথে যাইবার জন্য চেষ্টা করেন—শত দুর্বল হইলেও ঈশ্বর তাহাদের প্রতি প্রসন্ন হন। একদিন না একদিন তাহাদের যোর দুঃখ-রজনীর অবসান হয়—অপমান ও নির্গাতনের শেষ হইয়া যায়।

একশত বৎসরের দুঃখ ও দাসত্ব সহ্য করিয়া ফরাসীদের ভাগ্যেও তাহাই হইল। এই একশত বৎসর তাহারা নিশ্চেষ্ট ছিলেন না এবং অশিক্ষিত ও কাপুরুষ লোকের মত অদৃষ্টের উপর নির্ভর করিয়াই সন্তুষ্ট থাকিতেন না। আপনাদের ক্ষুদ্র বল ও সাহস লইয়া জয়ী ইংরেজদিগের সহিত যুদ্ধ করিয়াছেন—কতবার পরাজিত হইয়াছেন তবুও সে চেষ্টার বিরাম নাই। ফরাসীরা এইরূপ চেষ্টা করিয়াছিল বলিয়া—স্বাধীনতার জন্য এইরূপ প্রাণপণে খাটয়াছিল বলিয়া—ঈশ্বর তাহাদের দুঃখের দিন অবসান করিলেন। আশ্চর্য ও অভাবনীয় উপায়ে তাহাদের স্বাধীনতা পুনঃপ্রতিষ্ঠিত হইল।

পঞ্চদশ শতাব্দীর প্রথমভাগে ইংরেজেরা “অরলিন্দ” নামক স্থান অবরোধ করিয়াছে। কত-



দিন কতনাস চলিয়া গেল ফরাসীরা কিছুতেই তাহাদিগকে পরাজয় করিতে সক্ষম হইল না। দুর্ভিক্ষ ও অনাহারে ফরাসীরা একেবারে অবসন্ন হইয়া পড়িয়াছে। ইংরেজদিগের নিকট অল্পগ্রহ ভিক্ষা ভিন্ন আর উপায়ান্তর নাই। সকলেই বুঝিতে পারিল এইবার ফরাসীরা চিরকালের জন্য ইংরেজদিগের অধীন হইবে—দাসত্ব ভিন্ন তাহাদের অন্য গতি নাই। কিন্তু সহসা তাহাদের ভাগ্যের পরিবর্তন হইল। ফরাসীরা ইংরেজদিগের হস্তে আত্মসমর্পন করিবে এমন সময় অষ্টাদশ বর্ষীয়া এক বালিকা তাহাদের উদ্ধারের জন্য অগ্রসর হইল।

এই বালিকা ডম্‌রেমী গ্রামের কোন এক কৃষক-কন্যা এবং ইহার নাম জোয়ান। জোয়ান শিশুকাল হইতে অতিশয় ধীর ও শান্ত ছিলেন এবং মাতার সঙ্গে সঙ্গে সমুদায় গৃহকার্য সম্পন্ন করিতেন। নিকটস্থ অরণ্যে যাইয়া পক্ষীদিগকে আহ্বান করিতেন আর তাহারা নির্ভয়ে জোয়ানের হস্ত হইতে খাদ্য গ্রহণ করিত। জোয়ানের শান্ত ধীর স্বভাব এবং তাঁহার পবিত্র জীবন যেন দেশের এই মহৎ কার্য সাধন করিবার জন্তই গঠিত হইয়াছিল। যখন আহত ও ক্লান্ত সৈনিকগণ ডম্‌রেমীর নিকট দিয়া গমন করিত তখন তিনি স্বহস্তে তাহাদের সেবা ও শুশ্রূষা করিতেন; আহার ও পানীয় দ্বারা তাহাদের ক্ষুৎপিপাসা নিবারণ করিতেন। কে জানিত যে এই ধীর ও শান্ত স্বভাবের মধ্যে বীরত্ব ও দেশানুরাগের খনি নিহিত রহিয়াছে? ক্রমে দেশের দুর্দশা দেখিয়া বালিকার হৃদয় বিগলিত হইল এবং নিঃস্বপ্নে ও নীরবে দেশের কথাই তাঁহার মনে হইত। তখন ফরাসী দেশে এক জনরব ছিল যে “লোরেনের নিকটস্থ কোন কৃষক কন্যা ইংরেজদিগের হস্ত হইতে স্বদেশ উদ্ধার করিবে।” জোয়ানের মনে সে

কথা উদয় হইলে কয়দিন তিনি ইহাই ভাবিতে লাগিলেন। অবশেষে এক দিন স্বপ্নে দেখিলেন যে সাধু মাইকেলের আত্মা তাঁহাকে স্বদেশ উদ্ধারের জন্য আদেশ করিতেছেন। পরদিন তিনি নিকটস্থ রাজ কক্ষচারীর নিকট উপস্থিত হইয়া, এই কথা বলিলেন। কিন্তু তাহার কথা কেহ বিশ্বাস করিল না—খন্দ্র যাজকেরা একাধ্যকে অধন্দ্র বলিয়া প্রতিপন্ন করিতে লাগিল। কিন্তু কিছুতেই তাহার প্রতিজ্ঞা নড়িল না, তিনি বলিলেন “আমি যদি মাতার নিকট থাকিয়া গৃহকার্য সম্পন্ন করিতে পারিতাম তাহা হইলেই আমি অধিক সুখী হইতাম কিন্তু কি করিব! এ প্রভুর আজ্ঞা; আমি লজ্বন করিতে পারি না।” অবশেষে জোয়ান রাজ সমীপে নীত হইলেন; কিন্তু সেখানেও পুরোহিতেরা একাধ্য অধন্দ্র বলিয়া প্রতিপন্ন করিতে লাগিল। তখন জোয়ান ধীরতার সহিত বলিলেন “আপনাদের পুস্তক অপেক্ষা ঈশ্বরের পুস্তক অধিক মাননীয়।” এবং যখন রাজ সভার মধ্যে রাজা কর্তৃক গৃহীত হইলেন তখন আপনার পরিচয় প্রদান করিবার কালে বলিলেন “আমার নাম কুমারী জোয়ান, ঈশ্বর আমাকে আদেশ করিয়াছেন যে আপনাকে রিমজ্ নগরে অভিষেক করিতে হইবে। ঈশ্বরই এ রাজ্যের রাজা; আপনি তাঁহার প্রতিনিধি হইয়া কার্য করিবেন।”

যখন এই পবিত্র স্বভাবা অষ্টাদশবর্ষীয়া কুমারী আপাদ মস্তক শ্বেত বস্ত্রে আবৃত হইয়া এবং শ্বেত পতাকা হস্তে গ্রহণ করিয়া অস্বারোহণে “অরলিন্স” অভিমুখে গমন করিলেন তখন সকলে বিস্ময়ে স্তব্ধ হইয়া রহিল। কুচরিত্র ইংরাজ সৈনিকেরা তাঁহাকে নানারূপ কুৎসিৎ ভাষায় উপহাস করিতে লাগিল কিন্তু তিনি সেদিকে কণ

পাত ও করিলেন না। ঈশ্বরের যে আদেশ পালন করিতে আসিয়া ছিলেন তাহা সম্পন্ন করিতেই অগ্রসর হইলেন। তাঁহার অধ্যবসায়, ঈশ্বরের প্রতি অবিচলিত নির্ভরের দৃষ্টান্ত দেখিয়া ফরাসী সৈনিকদিগের উৎসাহ প্রদীপ্ত হইল এবং একে একে সমস্ত দুর্গ ফরাসীদিগের হস্তগত হইল। শেষ দুর্গ জয় করিবার সময় জোয়ান আহত হইয়া পড়িলেন কিন্তু তথাপি যুদ্ধের বিরাম হইল না। তিনি বুঝিয়া ছিলেন যাহা ঈশ্বরের আদেশ তাহা সম্পন্ন হইবেই। তাহাই হইল। যখন ইংরেজেরা পশ্চাদপদ হইল তখন জোয়ান ঈশ্বরের প্রতি গভীর কৃতজ্ঞতাভরে কাঁদিয়া ফেলিলেন এবং সমস্ত সৈন্য তাঁহার সঙ্গে ক্রন্দন করিতে লাগিল। কি চমৎকার দৃশ্য! যুদ্ধের নরহত্যা প্রভৃতি পৈশাচিক ব্যাপারের মধ্যে এমন আশ্চর্য স্বর্গীয় ভাব!! যদি সংসারে সমস্ত যুদ্ধ কার্য এমন দেবভাবে চালিত হইত তবে আর পৃথিবীতে এত নির্দোষ রক্ত পাত ও নরহত্যা সংঘটিত হইত না। ইহার পর তিনি রাজার পদতলে পড়িয়া আপনার জন্মস্থানে ভ্রাতা ভগিনীর নিকট যাইবার অল্পমতি ভিক্ষা করিলেন। কিন্তু রাজা তাহাতে সন্মত হইলেন না।

অতঃপর ইংরাজেরা সৈন্যবল বৃদ্ধি করিয়া আবার যুদ্ধ করিতে আসিল এবং জোয়ান উৎসাহের সহিত যুদ্ধ করিলেন কিন্তু তাঁহার মনে বিশ্বাস ছিল যে একাধ্য তাঁহার জন্ত নহে এবং ঈশ্বরের আদেশ তিনি সম্পন্ন করিয়াছেন। বোধ হয় এই বিশ্বাসের জন্তই তিনি এবার শত্রু হস্তে বন্দী হইলেন। একবন্দর কারাগারে অতিবাহিত হইলে ইংরেজেরা তাহার নামে এই অভিযোগ আনিলেন যে “তিনি ধর্ম বিক্রম কাজ করিয়াছেন

এবং মন্ত্র ও ইজ্জত দ্বারা এই কার্য সম্পন্ন করিয়াছেন।” বিচারকেরা তাঁহার প্রতি প্রশ্নের উপর প্রশ্ন করিতে লাগিল কিন্তু তাঁহার একই উত্তর “ঈশ্বর আমাকে এ কার্যে আদেশ করিয়াছেন, তাঁহার আদেশেই ইহা করিয়াছি।” যখন তাহাকে বলা হইল যে যদি ঈশ্বরের অভিপ্রায়ই হইত তবে তুমি কেন বন্দী হইবে অতএব ইহা ঈশ্বরের ইচ্ছা নহে। তখনও জোয়ান বলিলেন “যদি আমার পতনই ঈশ্বরের ইচ্ছা হয় তবে তাহাই হউক, কারণ ঈশ্বরের আদেশে যাহা করিয়াছি তাহার জন্ত অনুতপ্ত হইব না।” নির্দয় বিচারকেরা তাঁহার অপরাধ সাব্যস্ত করিয়া প্রজ্জ্বলিত অগ্নিতে দগ্ধ করিবার জন্ত আদেশ করিল। জোয়ান নির্ভয়ে এক উচ্চস্থানে আরোহণ করিলেন, নিম্নে ভয়ানক অগ্নি প্রজ্জ্বলিত হইল। ক্রমশ কাষ্ঠ বক্ষে ধারণ করিয়া মস্তক অবনত করিলেন। প্রজ্জ্বলিত অগ্নিশিখায় তাঁহার পবিত্র দেহ বেঠন করিল। শেষ মুহূর্ত্তে একবার খ্রীষ্টের নাম উচ্চারণ করিয়া নরপিশাচদিগের অত্যাচারে তিনি আত্ম সমর্পণ করিলেন। যখন সকলে চলিয়া বাইতে লাগিল তখন এক জন ইংরেজ সৈনিক বলিয়া উঠিল “আমরা আজ এক সাপ্তাহকে দগ্ধ করিলাম আমাদের জয়ের আশাও এইসঙ্গে বিলুপ্ত হইল।” বাস্তবিক ও সেই দিন হইতে ইংরেজদিগের আশা একেবারে নিমূল হইল। জোয়ান সে আত্মত্যাগ ও দেশানুরাগের দৃষ্টান্ত প্রদর্শন করিয়া অগ্নিতে ভস্মীভূত হইলেন তাহাতে ফরাসী হৃদয়ে এক অভূতপূর্ব্ব বলের সঞ্চার হইল। এক নূতন সাহস ও বীর্যে ফরাসীরা পরাক্রান্ত হইল। শত শত বৎসর চলিয়া গিয়াছে আজও ফরাসীরা সেই দেবীর স্মরণ করিয়া কৃতজ্ঞতা ভরে অবনত হইয়া থাকে—সহস্র সহস্র বৎসর

চলিয়া যাইবে তবুও জোয়ানের, স্বদেশান্তরাগ স্বর্ণাক্ষরে পৃথিবীর ইতিহাসে অঙ্কিত থাকিবে; আর সেই সঙ্গে সঙ্গে ইংরেজদিগের কুকীর্তির কালিমা চিহ্নও মানব জাতির চক্ষের সমক্ষে স্পষ্ট-রূপে প্রদর্শিত হইবে।



(প্রাপ্ত।)


## আশ্চর্য্য বিনয় ।

কৃষিয়ার সত্রাট আলেকজ্যাণ্ডারের লাহার্প নামক একজন শিক্ষক ছিলেন। লাহার্প অতি-শয় দরিদ্র লোক হইলেও তাঁহার উপর আলেকজ্যাণ্ডারের প্রগাঢ় ভক্তি ছিল। রাজবেশ পরিত্যাগ পূর্ব্বক তিনি শিক্ষকের কুটীরে গিয়া তাঁহার সহিত সদালাপ করিতে ভাল বাসিতেন। একদা এই প্রকার সমান্তবেশে লাহার্পের গৃহে গিয়া তাঁহার সহিত দেখা করিতে প্রার্থনা করেন। দ্বারবান নূতন লোক, রাজাকে চিনিতে না পারিয়া কহিল, “মহাশয় আমার প্রভু এখন পাঠে বাস্তু, এক ঘণ্টার জন্ত তাঁহাকে বিরক্ত করিতে আমার নিষেধ আছে” এবং তাঁহাকে চাকরদিগের গৃহে বসিতে অনুরোধ করিল। ভৃত্যদিগের আহ্বারের সময় উপস্থিত হওয়াতে অভ্যাগতকে তাহারা আহ্বারে নিমন্ত্রণ করিল। সমগ্র

কৃষিয়ার অধিপতি, যাহার আহ্বারের জন্য পৃথিবীর উৎকৃষ্ট ভোগ্য বস্তু একত্রিত হয়, এই প্রকার অনুরুদ্ধ হওয়াতে অসন্তুষ্ট হওয়া দূরে থাকুক, অতিশয় আহ্লাদ সহকারে ভৃত্যদিগের সামান্য আহ্বারে প্রবৃত্ত হইলেন। আহ্বারান্তে দ্বারবান প্রভুকে জানাইল যে “আলেকজ্যাণ্ডার নামক একজন যুবক তাঁহার সন্দর্শন প্রার্থী।” লাহার্প তাঁহাকে ভিতরে লইয়া আসিতে আদেশ করিলেন। সত্রাট হাসিতে হাসিতে ঘরে প্রবেশ করিলে পর, শিক্ষকের লজ্জার পরিসীমা রহিল না। কমা প্রার্থনা করিলেন। আলেকজ্যাণ্ডার আপনার হস্ত দ্বারা শিক্ষকের মুখ বন্ধ করিয়া কহিলেন “ছিঃ মহাশয় আমার নিকট আপনার প্রার্থনা অন্যায়া। আপনার এক ঘণ্টা আমার এক দিনের সমান—বিশেষতঃ এত ক্ষণ বাহিরে বসিতে না হইলে আপনার ভৃত্যদিগের সহিত অতি সুন্দর আহ্বারে আমাকে বঞ্চিত হইতে হইত।”

দ্বারবান অবাক—কৃষিয়ার সত্রাটকে সে নিমন্ত্রণ করিতে সাহসী হইয়াছিল!! মহামতি আলেকজ্যাণ্ডার সহাস্য বদনে তাহাকে আশ্বাস প্রদান করিলেন ও তাঁহার সন্তোষের চিহ্নস্বরূপ দ্বারবানকে এক শত রুবল (এক রুবল প্রায় দেড় টাকা) উপহার প্রদান করিলেন।

শ্রীমতী সরলাসুন্দরী লাহিড়ী ।



## মেডাময়সল্ লি ব্লাঙ্ক ।


গািকাকী বনের মধ্যে পরিত্যক্ত হইয়া একটি বালিকার যে কি দশা হইয়াছিল নিম্নলিখিত ঘটনাটী পড়িলে তাহা জানিতে পারিবে।

১৭৩১ সনে ফ্রান্সের উত্তর-পূর্ব প্রান্তে সরনী নামক গ্রামে গ্রামবাসীরা এক দিন সন্ধ্যাকালে একটা উৎসব করিতেছিল; এমন সময়ে তাহারা এক আশ্চর্য্য ঘটনা দেখিতে পাইল। দেখিল যে, একটা জানোয়ার তাহাদিগের নিকটে আসিতেছে, জানোয়ারটার আকৃতি মানুষের মত, তাহার লম্বা চুল পিঠ পর্যন্ত পড়িয়াছে, সমস্ত শরীর প্রায় অনাবৃত, হাতে একগাছি ছোট লাঠি। এই অদ্ভুত জানোয়ার দেখিয়া গ্রামবাসীদিগের উৎসব আনন্দ ত দূরে গেল; ভয়ে কেহ তাহার সন্মুখেও যাইতে সাহস করিল না। একটা খুব বড় তেজাল কুকুর ছিল। সে সকল দেশের লোকেরা চোর ডাকাতির হাত হইতে আত্মরক্ষা করিবার জন্ত এই সকল বড় বড় তেজাল কুকুর রাখিত, কুকুরের গলায় বড় বড় লোহার কাঁটা দেওয়া কলার পরান থাকিত। সেই কুকুরটাকে তাহারা ছাড়িয়া দিল; কিন্তু তাহাতে সেই অদ্ভুত প্রাণী একটুও ভীত হইল না, বরং আত্মরক্ষার জন্ত লাঠি হাতে করিয়া স্থির ভাবে দাঁড়াইয়া আক্রমণ প্রতীক্ষা করিতে লাগিল। কুকুরটাকে খুব উত্তেজিত করিয়া দেওয়াতে, সে এক ভয়ঙ্কর লক্ষ্য দিয়া তাহাকে আক্রমণ করিতে যেমন গিয়াছে, অমনি এক লাঠির আঘাতে তাহাকে

ভূতলশায়ী করিয়া, এই অদ্ভুত প্রাণী তৎক্ষণাৎ সেখান হইতে দ্রুতপদে চলিয়া গেল; এবং একটা বনের ভিতর প্রবেশ করিয়া, কাঠবিড়ানী-গুলি যেমন নিপুণতার সাহিত গাছে উঠে, সেই রূপ নিপুণতার সহিত একটা গাছে গিয়া উঠিয়া বসিল। সে গ্রামের লোকেরা সাহস করিয়া আর তাহার অনুসরণ করিতে পারিল না; এবং কয়েক দিন পর্যন্ত আর এই অদ্ভুত প্রাণীর কোন সংবাদ পাওয়া গেল না।

কয়েক দিন পরে সেখানকার জমিদার এই প্রাণীর কথা শুনিয়া চারিদিক অনুসন্ধান করিতে লাগিলেন, কিন্তু কোন সংবাদ পাইলেন না। মস্তাহ থানেক পরে একদিন তাহার একজন চাকর আসিয়া সংবাদ দিল যে, একটা আতা গাছের উপর একটা অদ্ভুত আকৃতির জানোয়ার বসিয়া আছে; তাহারা কাছে যাইবা মাত্র, সে একটা গাছ হইতে আর একটা গাছে, সে গাছ হইতে আর একটা গাছে, এই রকম করিয়া অবশেষে বাগানটা পরিত্যাগ করিয়া, একটা খুব উচু গাছের উপর গিয়া বসিল। জমিদার তখন লোকজন জড় করিয়া সেই গাছের তলায় গিয়া উপস্থিত হইলেন, এবং কি উপায়ে ইহাকে ধরবেন তাহারই চেষ্টা করিতে লাগিলেন।

গ্রামের লোকেরা দেখিয়াই চিনিল যে এইই যেদিন তাহাদিগের কুকুরটাকে হত্যা করিয়াছে। কিন্তু সেই ভদ্রলোক তাহাদিগকে বলিলেন যে, হোমেরা কোন ভয় করিও না। ইহাকে একটু ছোট বালিকার মত দেখা যাইতেছে, বোধ হয় এ পাগল, ইহাকে আবদ্ধ করিয়া রাখা হইয়াছিল, কোন মতে পলাইয়া সোপ হয় বনে বনে ঘুরিয়া বেড়াইতেছে। তাহারা সমস্ত রাত্রি এবং তার পর দিন ও অনেকক্ষণ পর্যন্ত সেই গাছ তলায়



দাড়াইয়া পাহারা দিতে লাগিল। তখন সেই ভদ্রলোক বলিলেন যে, একটা পাত্রে খানিকটা জল গাছতলায় রাখিয়া সকলে সেখান হইতে চলিয়া যাও। সকলে তাহাই করিল। তখন দেখা গেল যে, একটু ইতস্ততঃ করিয়া সে ধীরে ধীরে নামিল, এবং জলের কাছে আসিয়া বোড়া প্রভৃতি বেমন করিয়া জল খায়, তেমনি করিয়া সমস্ত জলটা খাইয়া ফেলিল। তখন দেখানে যত লোক ছিল সকলে তাহাকে ধরিবার জন্ত একেবারে আসিয়া পড়িল, এবং অনেক কষ্টে অবশেষে তাহাকে ধরিয়া বাড়ী লইয়া গেল।

প্রথমে তাহাকে রান্না ঘরে লইয়া গেল; সেখানে কতগুলি পানী ছিল; সে কাঁচাই তাহা খাইয়া ফেলিল। খাওয়ার পর সে চারিদিকে চাহিতে লাগিল, তাহার চাহনি দেখিয়া বোধ হইল যে, সে কখনও এসকল জিনিস দেখে নাই। তাহাকে দেখিয়া বোধ হইল যে, তাহার বয়স বার তের বৎসর হইয়াছে। তখনও কোন কথা বলিতে পারিত না, কেবল এক এক প্রকার অস্পষ্ট শব্দ করিতে পারিত।

এই অদ্ভুত জীব লইয়া কি করিবেন, তখন সেই ভদ্র লোক তাহা ভাবিতে লাগিলেন। সমস্ত

দিন সে নিতান্ত অস্থির হইয়া বেড়াইতে লাগিল, এবং ক্রমাগত পলাইবার চেষ্টা করিতে লাগিল। রাত্রিতে তাহাকে খাবার দেওয়া হইল, কিন্তু সে তাহা স্পর্শও করিল না, বোধ হয় রান্না করা জিনিস দেওয়া হইয়াছিল, ইহাই তাহার কারণ। শুইবার জন্ত তাহাকে বিছানা করিয়া দেওয়া হইল, কিন্তু কোন মতেই সে বিছানায় শুইল না; কাপড়ও পরাইবার চেষ্টা করা হইল, কিন্তু তাহাতেও কোন ফল হইল না। তখন সেই ভদ্রলোক ভাবিতে লাগিলেন, ইহাকে লইয়া কি করিবেন। কথাও বলিতে পারিত না, স্মরণঃ এ হতভাগ্য বালিকার কোন কথাই জানা গেল না। কিন্তু বাহাই হউক, সেই ভদ্রলোকটি অতি-যত্নের সহিত তাহাকে লালন পালন করিতে লাগিলেন! ক্রমে তাহার স্বভাবও পরিবর্তন হইতে লাগিল এবং ক্রমে সে কাপড় পরিতেও আরম্ভ করিল। এবং মাস খানেক পরে দেখা গেল সে আর পলাইবে এ প্রকারও সম্ভাবনা নাই। কিছু কাল পরে তাহাকে এক দিন বাড়ীর বাহিরে লইয়া যাওয়া হইল; কিন্তু তাহাতে এক বিপদ ঘটিল। বাড়ী ছাড়িয়া মাঠে যাইবা মাত্র সে হঠাৎ দৌড়িতে আরম্ভ করিল, এবং এত দ্রুতবেগে দৌ-

ড়িতে লাগিল যে, কেহ তাহাকে দৌড়িয়া ধরিতে পারিল না। কিন্তু সেই ভদ্রলোক ঘোড়ার চড়িয়া গিয়াছিলেন, স্মরণঃ সে পলাইতে পারিল না। পলাইবার তাহার ইচ্ছাও ছিল না। কারণ দেখা গেল যে, সে একটা বড় পুকুরের ধারে উপস্থিত হইয়া, কাপড় খুলিয়া রাখিয়া জলে ঝাঁপ দিয়া পড়িল, এবং চারিদিক সাঁতরাইয়া বেড়াইতে লাগিল। একবার সে ডুব দিয়া এতক্ষণ জলের মধ্যে ছিল যে, সে ভদ্রলোকটি ভাবিয়াছিলেন যে, হযত সে ডুবিয়া মরিয়াছে। তিনি তাহাকে তুলিবার জন্ত প্রস্তুত হইতেছিলেন, এমন সময়ে দেখা গেল যে সে একটা মাছ মুখে করিয়া ভাসিয়া উঠিয়াছে। তারপর তীরে উঠিয়া আবার কাপড় পরিয়া সকলের সঙ্গে বাড়ী ফিরিয়া আসিল।

সে কথা বলিতে পারিত না বটে কিন্তু বনের সকল প্রকার পাখীর ডাক সুন্দর রূপে অহুকরণ করিতে পারিত; এবং অনেক সময় তাহাকে পাখী বলিয়া ভ্রন হইত! এই সকল দেখিয়া বোধ হইল যে, সে পাগল নহে, কিন্তু কোন ঘটনা বশতঃ ছেলে বেলায় বনে পরিত্যক্ত হইয়াছিল, এবং বনে কোন প্রকার জীবন ধারণ করিয়া সে এত বড় হইয়াছে। তাহাকে কথা বলিতে শিখাইবার জন্ত অনেক কষ্ট ও পরিশ্রম স্বীকার করিতে হইয়াছিল, এবং অবশেষে সে চেষ্টার সফলও ফলিয়াছিল। কিন্তু তাহার কথা বলিবার শক্তি যত বাড়িতে লাগিল, ছেলেবেলায় কথা ততই তুলিতে লাগিল! কতক কতক কথা সে মনে করিয়া রাখিতে পারিয়াছিল। তাহাতেই তাহার ছেলেবেলায় বিবরণ কতক জানিতে পারা গিয়াছে।

সে বলে যে, প্রায় তাহার সমবয়সী আর একটা বালিকার সহিত সে বনে বাস করিত। পিতা

মাতার সম্বন্ধে কোন কথাই তাহার মনে নাই। শীতকালে বন পশুর চামড়া দ্বারা তাহার ছুই ভগ্নীতে শীত নিবারণ করিত, এবং গ্রীষ্ম কালে একটা ঘাঘরার মত কিছু পরিত, এবং তাহাতে ছোট লাঠি গাছটি বুলাইয়া রাখিত। এই লাঠি দ্বারা বন পশু মারিয়া আহার করিত। রক্ত পান করিতে বড় ভাল বাসিত, বিশেষতঃ পরগোসের রক্ত তাহাদের বড় প্রিয় ছিল। সে বলে যে, তাহার সঙ্গিনীর মৃত্যু হইয়াছে। একদিন তাহার ছুই জনে একটা নদীতে সাঁতরাইতেছিল, এমন সময় হঠাৎ বন্ধুকের আওয়াজ হওয়াতে ছুই জনেই ডুব দিয়া অনেক দূরে গিয়া ভাসিয়া উঠে। সেখানে তাহার মালার মত কি একটা জিনিষ পায়, এবং তাহাকে কে লইবে এই লইয়া ছুই জনের মধ্যে বিবাদ হয়। তাহার ভগ্নী তাহাকে এক আধাং করে এবং সেও সেই লাঠি দিয়া তাহার মাথার এক আধাং করে। এই আধাংতে সে পড়িয়া যায় এবং মাথা হইতে রক্ত বাহির হইতে থাকে। ইহা দেখিয়া তাহার অত্যন্ত দুঃখ হয় এবং তাহাকে বাঁচাইবার জন্ত সে কি ঔষধ আনিতে যায়। কোন লতা পাতার রক্ত বন্ধ হইবে, তাহা বোধ হয় তাহার জানিত। কিন্তু সে ফিরিয়া আসিয়া আর তাহার ভগ্নীকে দেখিতে পাইল না। ইহাতে তাহার দুঃখ আরও অধিক হইল, এবং সে বনে বনে তাহার অনুসন্ধান করিয়া ফিরিতে লাগিল। এই সময়ে সে ধরা পড়ে। তাহার ভগ্নীর আর কোন সন্ধান পাওয়া যায় নাই।


এই হতভাগ্য বালিকার স্বভাব যদিও ক্রমে পরিবর্তন হইতে লাগিল, তথাপি অনেক সময় তাহাকে শাসনে রাখা বাইত না, এবং সে

সহজেই অত্যন্ত রাগিয়া উঠিত। বিশেষতঃ পুরুষ জাতির উপর তাহার কেমন এক প্রকার স্বাভাবিক রাগ ছিল; পুরুষ দেখিলেই সে অত্যন্ত ক্রোধাক্ত হইয়া উঠিত। একজন ধর্মযাজক এই জন্ত তাহাকে একটা কনভেন্টে (convent) রাখিতে পরামর্শ দেন, কারণ সেখানে পুরুষের যাতায়াত একেবারেই নাই। কনভেন্টে আনিয়া তাহাকে খৃষ্ট ধর্মে দীক্ষিত করা হইল, এবং মেডাময়সল্ লি ব্লাঙ্ক এই নাম তাহাকে দেওয়া হইল। জীবিত প্রাণীর উপর তাহার লোভ তখন পর্য্যন্তও সম্পূর্ণ যায় নাই। এক দিন একটা খুব সুন্দরী স্ত্রীলোক তাহাকে দেখিতে যান; তিনি আহ্বার করিতে বসিয়াছেন, এমন সময় তাহাকে তাঁহার সম্মুখে লইয়া যাওয়া হয়। একটা রান্না করা মুরগী টেবিলের উপর ছিল, লিব্লাঙ্কের চেহারা দেখিয়া বোধ হইল, তাহার খাইবার ইচ্ছা হইয়াছে, তাই সে স্ত্রীলোকটী তাহাকে খানিকটা দিতে গেলেন, তখন সে একটু উত্তেজিত এবং সম্পূর্ণ সরলতার সহিত বলিল, “না আমি উহা চাই না, আমি তোমাকে চাই।” এই বলিয়া সে তাঁহাকে ধরিতে বাইতেছিল, এমন সময় বলপূর্ব্বক সেখান হইতে তাহাকে লইয়া যাওয়া হইল।

এই কনভেন্টে বসন সেই বালিকা থাকিত তখন পোলাণ্ডের রাণী তাহাকে দেখিতে যান। তাঁহার একজন কর্মচারী তাহাকে কি একটু বিক্রপ করতে সে তাঁহার গলা টিপিয়া মারিয়া ফেলিবার উপক্রম করে; কিন্তু অনেক কষ্টে শেষে রক্ষা পান।


কনভেন্টে আসিয়া তাহার শরীর ক্রমে খারাপ হইতেছিল এই জন্ত তাহাকে একটা আশ্রমে রাখা হয় এবং তাহার পরিচর্য্যার জন্ত

লোক নিযুক্ত করিয়া দেওয়া হয়। এই বালিকার যখন অধিক বয়স হইয়াছিল, তখন তাহার পূর্ব্বের স্বভাব কিছুই ছিল না, বেশ ধীর শান্ত ভাবে মাহুষের মত জীবন যাপন করিত। পারিস নগরে ১৭৮০ সনে ৬২ বৎসর বয়সে এই হতভাগ্য বালিকার মৃত্যু হয়। উপরে লিখিত ঘটনা ভিন্ন, তাহার জীবনের আর কোন ঘটনা জানা যায় নাই।





## ধাধা।

১। ৪৫কে এমন ৪ ভাগে বিভক্ত কর যে, প্রথম ভাগকে ২ দিয়া যোগ করিলে, দ্বিতীয় ভাগ হইতে ২ বিয়োগ করিলে, তৃতীয় ভাগকে ২ দিয়া গুণ করিলে এবং চতুর্থ ভাগকে ২ দিয়া ভাগ করিলে প্রত্যেক ফলই ১০ হইবে।



এপ্রিল, ১৮৮৭।



দি ফুলের গন্ধ থাকে, তবে তাহা চারিদিকে ছড়াইয়া পড়ে। সকল ফুলে গন্ধ থাকে না; একটা বাগানের মধ্যে শত শত ফুল ফোটে, কিন্তু তার মধ্যে অনেকই দেখিতেই সুন্দর। অশোক গাছে বড় বড় রান্না রান্না থোপা থোপা ফুল ফোটে, কিন্তু তাহাতে গন্ধ নাই; এমনিভাবে অনেক ফুলই ফোটে বাহার গন্ধ থাকে না, দেখিতেই কেবল সুন্দর। কিন্তু বাগানের মধ্যে আবার এমন এক একটা ফুল ফোটে, যার গন্ধ চারিদিক আমোদিত করিয়া তোলে। এই ফুলগুলি ফুটিয়া, চারিদিক সৌরভ বিস্তার করিয়া, অবশেষে শুকাইয়া ঝরিয়া যায়; যত করিয়া রাখিলে, শুকাইয়া ঝরিয়া গেলেও, ইহাদিগের সুগন্ধ একেবারে যায় না।


ত্রিশ বৎসর হইল এমনিভাবে একটা ফুল কলিকাতায় এক বাঙ্গালীর ঘরে ফুটিয়াছিল। তাহার সৌরভ কেবল বাঙ্গালাদেশে নহে, সমস্ত ভারতবর্ষ

এবং ইংলও ও ফ্রান্স প্রভৃতি দেশে বিস্তৃত হইয়া পড়িয়াছিল। কিন্তু অকালে ভাগ করিয়া ফুটিতে না ফুটিতে ফুলটা শুকাইয়া ঝরিয়া গিয়াছে। ঝরিয়া গেলেও তাহার সৌরভ এখনও যায় নাই।

কলিকাতার রামবাগানের দত্ত পরিবার লেখা পড়া প্রভৃতির জন্ত বিশেষ বিখ্যাত। ১৮৫৬ সালের ৪ঠা মার্চ এই প্রসিদ্ধ দত্ত পরিবারে তরুর জন্ম হয়। তরুর পিতা বাবু গোবিন্দচন্দ্র দত্ত বিদ্বান এবং ধর্মপারায়ণ ছিলেন। ইনি গভর্ণমেণ্টের উচ্চ কার্য করিতেন এবং শেষ অবস্থায় কর্ম পরিত্যাগ করিয়া বিদ্যা ও ধর্মালোচনায় জীবন অতিবাহিত করেন। ইহার একটা পুত্র ও দুইটা কন্যা হয়। পুত্রের নাম অক্ষ এবং কন্যা দুটির নাম অরু এবং তরু।

অক্ষর বয়স যখন চৌদ্দ বৎসর তখন তাহার মৃত্যু হয়; পুত্রের কাছে গোবিন্দ বাবু অনেক আশা করিতেন, কিন্তু অকালে মৃত্যু হওয়াতে তাঁহার আশা পূর্ণ হইল না। পুত্রের মৃত্যু হইল, তখন গোবিন্দ বাবু কন্যা দুটিকে অতি যত্নে শিক্ষা দিতে আরম্ভ করিলেন। অরু এবং তরু উভয়েই অতিশয় বুদ্ধিমতী ছিলেন, কিন্তু সকলের অপেক্ষা তরুর প্রতিভা অধিক ছিল। অনেক সময়ে দেখিতে পাওয়া যায় যে, তৃতীয় সন্তান অল্প সকলের অপেক্ষা অধিক বুদ্ধিমান হয়। যাহা হউক অরু বড় হইলেও তরুর অন্তর্গত হইয়া—তরুর ইচ্ছামত

চলিত। যেমন একটা উজ্জল আলোকের কাছে একটা ছোট আলোকের প্রভা দেখিতে পাওয়া যায় না, তেমনি তরুর কাছে অরুর প্রভা প্রকাশ পাইত না; কিন্তু তাই বলিয়া তরুর কাছে কথায় বা ব্যবহারে কখনও অহঙ্কারের ভাব প্রকাশ পাইত না।



তরুর শিক্ষা এবং তাঁহার মনের বিকাশের প্রধান সহায় যে তাঁহার পিতা ছিলেন, তাহার আর কোন সন্দেহ নাই। গোবিন্দ বাবু প্রথম হইতেই বাহাতে সম্ভানদের সুশিক্ষা হয় তাহার বিশেষ বন্দোবস্ত করেন; এবং সর্বদা তাহা-দিগকে আপনার সঙ্গে সঙ্গে রাখিয়া নানা উপায়ে উন্নত করিতে চেষ্টা করেন। অরু ও

তরু ফ্রান্স দেশে কয়েক মাস ভিন্ন আর কখনও কোন বিদ্যালয়ে পড়েন নাই। যাহারা মনে করেন স্কুলে না পড়িলে লেখা পড়া শিক্ষা হয় না, তাঁহারা দেখিবেন স্কুলে না পড়িয়াও তরু যে প্রকার লেখা পড়া শিখিয়াছিলেন, অনেকে বি এ, এম এ, পাশ করিয়াও তাহা পারেন নাই। যদি ইচ্ছা ও যত্ন থাকে, তাহা হইলে ঘরে বসিয়াও অনেক লেখা পড়া, অনেক জ্ঞান লাভ করা যায়। তরু আট মাস মাত্র ফ্রান্সের একটা বালিকা বিদ্যালয়ে পড়িয়াছিলেন, কিন্তু তাহা নাম মাত্র; গৃহে আপনার বড়ই অধিক শিক্ষা করিতেন।

গোবিন্দ বাবু ১৮৬৯ সালে ইউরোপ যান, এবং সেই সময় অরু ও তরুকে সঙ্গে লইয়া যান। শিক্ষা দেওয়াই তাহাদিগকে সঙ্গে লইয়া যাইবার প্রধান উদ্দেশ্য। ইহারা ফ্রান্সে কিছুকাল থাকেন, এবং ইংলণ্ডে তাহার অপেক্ষা কিছু অধিক কাল থাকেন। কিন্তু ইংলণ্ডে অপেক্ষা ফ্রান্সের উপর তরুর প্রাণের একটা টান ছিল। ফ্রান্সে যখন ছিলেন তখন তরুর বয়স চৌদ্দ বৎসর মাত্র। ফরাসী কাব্য পড়িবার জন্ত তাঁহার একটা বিশেষ আগ্রহ ছিল। কেবল যে পড়িয়াই ক্ষান্ত হইতেন তাহা নহে, ছোট বড় সকল কবিদিগের লেখাই তিনি অল্পবাদ করিয়াছিলেন। তাঁহার আশ্চর্য স্মরণ শক্তি ছিল, তিনি যে রাশি রাশি কবিতা অল্পবাদ করিয়াছিলেন, সে সকলই তাঁহার মুখস্থ ছিল। তিনি অনেক পড়িয়াছিলেন, এবং যাহা পড়িতেন তাহা খুব ভাল করিয়া পড়িতেন, একটাও শব্দ কথা তাঁহার নিকট এড়াইবার যো ছিল না; ছোট বড় সকল অভিধান হইতে সেই কথার ঠিক অর্থ না জানিয়া নিশ্চিন্ত হইতেন না। তাঁহার পিতার

সহিত তাঁহার যদি কখনও কোন কথার প্রকৃত অর্থ লইয়া তর্ক হইত, তাহা হইলে দশটীর মধ্যে সাত আটটীতে তিনিই জিতিতেন। তিনি প্রথমে অনেক ইংরেজী বই পড়িয়াছিলেন, কিন্তু শেষে প্রায় আর তিনি ইংরেজী বই পড়িতেন না, অধিকাংশ সময় ফরাসী ও জার্মান বই লইয়াই দিব্যাত্র থাকিতেন। ৩৪ আন্মারী পরিপূর্ণ ফরাসী ও জার্মান বই পড়া একটা বাঙ্গালী মেয়ের পক্ষে সামান্য প্রশংসার কথা নয়। ফরাসী জাতি তাঁহার প্রাণের ভাল বাসার বস্তু ছিল। যখন ফ্রান্সের সহিত প্রুসিয়ার যুদ্ধে ফ্রান্সের সর্বনাশ হইল, তখন তরু ইংলণ্ডে ছিলেন, এবং তাঁহার বয়স ১৫ বৎসর মাত্র। তখন তিনি তাঁহার দৈনিক বিবরণে লিখিয়াছেন—“একদিন বাবা মাকে সম্রাটের কথা কি বলিতেছিলেন, আমি তাড়াতাড়ি গিয়া গুনিলাম ফরাসীরা হার মানিয়াছে। আমি তখন কি ভাবে আবার সিঁড়ি দিয়া উঠিলাম তাহা স্মরণ আছে, কে যেন আমার গলা চাপিয়া ধরিল, হাঁপাইতে হাঁপাইতে কাঁদ কাঁদ স্বরে অরুকে সকল কথা বলিলাম। ফ্রান্সের কেন পতন হইল? ইহার অনেক লোক শাপ ও নাস্তিকতার ডুবিয়াছে—এইজন্ত কি? হে ফ্রান্স তোমার কি ভয়ানক পতন হইল! এই অবমাননার পর ঈশ্বরকে ভাল করিয়া পূজা ও সেবা করিতে শিখিও। জুর্ভাগ্য ফ্রান্স তোমার জন্ত আমার হৃদয় ফাটিয়া যাইতেছে।” এই সময়ে তিনি একটা কবিতা লেখেন; তাহার মর্ম এই যে—ফ্রান্স মরে নাই, কিছুকালের জন্ত মুছা গিয়াছে; সকলে মিলিয়া ইহার শুদ্ধীকরণ, আবার ফ্রান্স সকল জাতির উপরে দাঁড়াইবে। পনের বছরের বালিকার কি সহৃদয়তা, —কি ধর্মভাব!

সংসারের কাজ কর্মে তিনি অতিশয় নিপুণা ছিলেন; কোন কাজকেই নীচ বলিয়া মনে করিতেন না। তিনি অতিশয় সুন্দর গান করিতে পারিতেন এবং পিয়নো বাজাইতে পারিতেন; তাঁহার মৃত্যুর পর তাঁহার পিতা লিখিয়াছেন যে, “আজিও যেন সেই মধুর শব্দ আমার কর্ণে বাজিতেছে।” অরু ও তরু উভয়ের ইচ্ছা ছিল একখানি উপন্যাস লিখিয়া প্রকাশ করিবেন, তরু লিখিবেন এবং অরু তাহাতে ছবি আঁকিয়া দিবেন। তরু সেই উপন্যাস লিখিয়াছিলেন, কিন্তু ১৮৭৪ সালে অরুর মৃত্যু হওয়াতে তাঁহার ইচ্ছা আর সফল হয় নাই। ১৮৭৯ সালে একজন ফরাসী মহিলা তাঁহার জীবনী সহিত তাঁহার লিখিত উপন্যাস খানি মুদ্রিত করেন। একটা বাঙ্গালী মেয়ের রচিত ফরাসী উপন্যাস দেখিয়া ইউরোপের লোক বার পর নাই আশ্চর্য হন; ইহাতে তাঁহার প্রতিভার অনেক পরিচয় পাওয়া যায়। কিন্তু উপন্যাস অপেক্ষা পদ্য লেখায় তাঁহার প্রতিভা বিশেষ প্রকাশ পায়; এবং কবিত্বের জন্তই ভারতবর্ষে এবং ইংলণ্ড ও ফ্রান্স প্রভৃতি দেশে তাঁহার এত আদর। জীবিতাবস্থায় তাঁহার কয়েকটা মাত্র কবিতা প্রকাশিত হয়। ১৮৭৬ সালে তাঁহার পিতা তাঁহার একখানি পদ্য গ্রন্থ প্রকাশ করেন। এই পুস্তকের এত সুখ্যাতি হইয়াছিল যে, অতি অল্প সময়ের মধ্যেই দ্বিতীয় সংস্করণ করিতে হইয়াছিল এবং ৬৭ টাকা মূল্যে বিক্রয় হইয়াছিল। ১৮৮২ সালে ভারত গীতিমালা নামে আর একখানি পদ্য প্রকাশিত হয়—এবং ইহাই তাঁহার শেষ কীর্তি। ইহা দ্বারা তাঁহার কবিত্বশক্তি বিশেষরূপে প্রকাশিত হয়—এবং তাঁহার যশ চারিদিকে বিশেষরূপে বিস্তৃত হয়। ১৯২০ বৎসরের একটা বাঙ্গালী রম-

গীর পক্ষে ইহা কি সামান্য প্রশংসার কথা! আজ কাল অনেক মহিলারা পদ্য লিখিতেছেন এবং কেহ কেহ ভাল ভাল কবিতাও লিখিতেছেন; কিন্তু বিদেশীয় ভাষায়—ইংরাজিতে পদ্য লিখিয়া ইংরেজের নিকট প্রশংসা লাভ করা সামান্য ক্ষমতার কথা নহে। ১৮৭৩ সালে দেশে ফিরিয়া আসিয়া পিতার সহিত সংস্কৃত অধ্যয়নে নিযুক্ত হন। বোধ হয় দেশীয় ভাষার পুস্তক প্রকাশ করিবার জন্ত তাঁহার ইচ্ছা হইয়াছিল, কিন্তু অকাল মৃত্যুতে সে আশা আর সফল হইতে পারে নাই। বিষ্ণুপুরাণ, রামায়ণ, মহাভারত প্রভৃতি মনোযোগের সহিত পড়িতেছেন এমন সময় তাহার শরীর অসুস্থ ছিল। স্মতরাং আর পড়া শুনা হইল না। বিষ্ণুপুরাণের দুইটা গল্প ইহার মধ্যে ইংরাজিতে অনুবাদ করিয়া প্রকাশ করেন। প্রাচীন ভারত রমণী নামক একখানি ফরাসী পুস্তক পড়িয়া তিনি তাহা অনুবাদ করিতে আরম্ভ করেন। কিন্তু এই পুস্তক লিখিতে লিখিতে ব্যারাম ক্রমে কঠিন হইয়া দাঁড়াইল এবং ১৮৭৭ সালের ৩০শে আগষ্ট একুশ বৎসর বয়সে তাঁহার মৃত্যু হইল। অল্প বয়সে তরুর মৃত্যু হইয়াছে; কিন্তু এই অল্প সময়ের মধ্যেই তিনি যে কীর্তি রাখিয়া গিয়াছেন তাহাতে সহজে লোকে তাঁহার নাম ভুলিতে পারিবে না। তাঁহার যশ ভারতবর্ষ ছাড়িয়া ইউরোপে বিস্তৃত হইয়া পড়িয়াছে; ইংলণ্ড ও ফ্রান্সে তাঁহার কত আদর! তরু গিয়াছেন—ফুলটা শুকাইয়া ঝরিয়া গিয়াছে, কিন্তু তাহার সৌরভে চারিদিক আমোদিত রহিয়াছে। এমন স্থল বেশী কোটে না। যে কুমুম ভাল করিয়া না ফুটিতেই এত শোভা এত সৌরভ; ফুটিলে তাহার কি শোভা কি সৌরভই না হইত!

## পিপীলিকার উপদেশ।

( ৩৬ পৃষ্ঠার পর। )

পিপপড়ে বলিতে লাগিল—মাকড়সা আশ্চর্য্য কীট। ইহার বড় হিংস্র; মায়া দয়া কিছুমাত্রই নাই। জীবন্ত কীট পতঙ্গ ধরিয়া খায়। আহা, সেই পোকগুলি তখন কত ছট্ ফট্ করিতে থাকে, তাহা দেখিয়াও তাহাদের দয়া হয় না। অনেক ছুট্ ছেলে আছে যারা পোকা মাকড় ব্যাং দেখিলেই কত যন্ত্রণা দেয় ও মারিয়া ফেলে, কিছুই দয়া হয় না, মাকড়সাও সেইরূপ। নিরামিশ ত খাইবেই না, তার পর মরা পোকা মাকড় ও খাইবে না। আমরা পিপপড়ে, বুঝিলে ভাই, জেয়ন্ত পোকা টোকা খাই না, উদ্ভিদ খাই, চিনি খাই, মধু খাই, সন্দেশের ত কথাই নাই, আর মড়া জিনিসের মাংস খাই। জীব হিংসা করিতে আমাদের কেমন প্রাণে লাগে। ভাই! মাকড়সার অবস্থা দেখিলে আমাদের বড় দুঃখ হয়। তুমি ওদের গিয়ে এ বিষয়ে উপদেশ দিতে পার! ওদের শিক্ষা দিলে অনেক লাভ হইতে পারে।

ভাই! মাকড়সার আটা পা। আটা চোক। তলপেটে একটা থলিয়া আছে, সে থলিয়া হাঁসের ডিমের সাদা পদার্থের মত এক রকম রসে পূর্ণ। সে থলিয়ার গায়ে কতকগুলি স্থল ফাঁপা লোম আছে, তাহার ভিতর দিয়া সেই রস বাহির হয়। বাহির হইবামাত্রই জমিয়া স্ততার মত হইয়া যায়। এই স্থল স্ততাগুলি একত্রিত হইয়া এক এক গাছি মাকড়সার স্ততা হয়। এই স্ততা দড়ির মত খোলা যায়। এই স্ততা মাকড়সার

অনেক কাজে আইসে। এক স্থান হইতে অল্প স্থানে বাইতে, উপরে উঠিতে বা নীচে নামিতে, বাস স্থান নির্মাণ করিতে, শিকার ধরিবার জন্ত ফাঁদ পাতিতে, নিজের ডিমগুলি সাবধানে ঢাকিয়া রাখিতে, শীত হইতে পরিত্রাণের জন্ত বস্ত্র বয়ন করিতে—এই সকলেই মাকড়সা স্ততা ব্যবহার করিয়া থাকে। সকল মাকড়সাই একই প্রকারের জাল বুনে না। ইহাদের মধ্যেও মহারাট্টা, হিন্দুস্থানী, পঞ্জাবী, পার্শী আছে। ইহার জাতীয় রীতি বজায় রাখিতে বড়ই ইচ্ছুক। বাঙ্গালীর মত আবার জাতীয় রীতি অনুকরণ করিতে ভাল বাসে না; কোন কোন মাকড়সা গাড়ির চাকার মত জাল বুনিয়া দাঁড় করাইয়া রাখে, কেহ আবার মাঝখানটা গর্ত—ভিক্ষার ঝুলির মত—জাল বুনিয়া ঝুলাইয়া রাখে, আবার কেহ কেহ গর্ত বা কোর্টারের মুখে বোম্বাই চাদরের মত পুরু জাল দিয়া ছয়ার নির্মাণ করিয়া নিরাপদে তাহার ভিতর বাস করে। সে ছয়ার মাকড়সা নিজের ইচ্ছায় খুলিতে বা বন্ধ করিতে পারে, অপরের পক্ষে সে ছয়ার খোলা বড় কঠিন ব্যাপার। কেহ দিবসে নিদ্রা যায়, রাত্রে আহ্বারের অবেশে বাহির হয়। কেহ রাত্রে ঘুমায়, সমস্ত দিবস শিকার খুঁজিয়া বেড়ায়। কেহ কেহ একস্থানে ফাঁদ পাতিয়া বসিয়া থাকে, কখন ফাঁদে শিকার পড়িবে তাই ভাবিতে থাকে; সে স্থান হইতে আর নড়ে না। কাহার বা নির্দিষ্ট বাসস্থান নাই, দিন রাত ঘুরিয়া ঘুরিয়া বেড়ায়। কেহ শিকারের পশ্চাতে নিঃশব্দে আস্তে আস্তে যায়, তৎপরে হঠাৎ তাহার গায়ে লাফাইয়া পড়িয়া ঘাড় ভাঙ্গিয়া রক্ত পান করে। কেহ কেহ বাতাসে নিজের স্ততা উড়াইয়া দেয়, যখন স্ততাটা বেশ বড় হয় তখন আর মাকড়সার

তার স্ততাকে ধরিয়া রাখিতে পারে না; মাকড়সা শুদ্ধ স্ততা বাতাসে উড়িয়া বাইতে থাকে, ইহাকেই “চাঁদের বুড়ীর স্ততা” বলে।

মাকড়সার বুদ্ধি অতি প্রশংসনীয়। একবার একটা মাকড়সা ছুটি বৃক্ষের মধ্যে একটা প্রকাণ্ড জাল তৈয়ার করে। জালটা বড় বলিয়া টান হয় নাই, বাতাসে বড় ছলিত, তাহাতে মাকড়সার বড় অসুবিধা হইত। টান করিবার জন্ত জালের নীচের দিকে তিন চারিটা স্ততা বাঁধিয়া সেগুলিকে গাছতলায় পাথর আর ঘাসের সহিত আটকাইয়া দেয়। কিন্তু গাছতলা দিয়া লোক এবং গরু ও ছাগলের যাতায়াতে সে বাঁধ গুলি ছিঁড়িয়া যায়। তখন মাকড়সা স্ততার সাহায্যে নীচে নামিল এবং ভূমি হইতে একটা ছোট কাঁকর লইয়া পুনরায় সেই স্ততার সাহায্যে উপরে উঠিয়া জালের নীচে সেইটিকে বাঁধিয়া ঝুলাইয়া দিল। কাঁকরের ভারে জালটা বেশ টান হইয়া রহিল। জালের তলা দিয়া অনায়াসে লোকজন যাতায়াত করিতে লাগিল, আর পূর্বের ত্যায় ছিঁড়িয়া বাইবার আশঙ্কা রহিল না।

মাকড়সা রাগ এবং অভিমান প্রকাশ করিয়া থাকে। কোন ব্যক্তি মাছি ধরিয়া একটা মাকড়সার জালে ফেলিয়া দিতেন, আর বেই মাকড়সা সেই মাছি ধরিত, অমনি তিনি মাছিটিকে কাড়িয়া লইয়া বাইতেন। এইরূপ পাঁচ ছয় বার করাতে মাকড়সার বড় রাগ হইল। পুনরায় মাছি ফেলিয়া দিলে সে আর ধরিতে আসিল না, জাল কাটিয়া দিয়া মাছিকে নীচে ফেলিয়া দিল। সেই লোকটা তারপর দিন মাকড়সার কত খোসামুদি করিলেন তথাপি তাঁহার মাছির দিকে দৃকপাত করিল না। অনেকক্ষণ পরে সেটিকে দূরে ফেলিয়া দিল।

মাকড়সা বড় সঙ্গীতপ্রিয়। মুহূর্ত্তে বেহালা, হারমোনিয়াম বা পিয়ানো বাজাইলে মাকড়সা-দিগকে অনেক সনয়ে জাগ ছাড়িয়া বাজনার নিকটে আসিতে দেখা গিয়াছে। সঙ্গীতে এতই মুগ্ধ হয় যে, সে সনয়ে তাহারা কোন বিপদের আশঙ্কা করে না। শব্দ কর্কশ হইলেই তাহারা পলাইয়া স্বস্থানে যায়।

অন্যত্র জীবের মত মাকড়সাও মৃত্যুর ভাণ করে। ভেতকে আঘাত করিলে যেমন মড়ার মত পড়িয়া থাকে, কেন্নো পোকা নাড়িলে গুঁড়ি গুঁড়ি হইয়া যেমন পয়সার মত নিশ্চল হইয়া পড়িয়া থাকে, মাকড়সাকে আঘাত করিলে সেই রূপ মড়ার মত পড়িয়া থাকে, পা ছিঁড়িয়া লইলেও নড়ে না। তারপর পিঁপড়ে বলিতে লাগিল—এরা কেমন যে এক রকমের জীব তা বলা যায় না। এদের সমাজ নাই, শাসন-প্রণালী নাই। পারিবারিক স্নেহবন্ধন কিছুই নাই। ইহারা বড় স্বার্থপর, নিজের ষোল আনাই বুঝে। অপরের খোঁজ খবরও রাখে না। একলা একলা থাকে, দু তিন জন এক সঙ্গে থাকিবে না, পরস্পরকে সাহায্য করিবে না, কাজেই ইহারা হিংস্র স্বভাব। যাহারা মিলিয়া মিশিয়া থাকে না, যাহাদের সমাজ নাই, তাহাদের দয়া, মায়া, স্নেহ, অনুরাগ, ভালবাসা—এই সকল বৃত্তি কিরূপে জন্মিবে? আমরা পিঁপড়েরা ক্ষুদ্র জীব, আমরা পরের জন্ত সারা-দিন রাত খাটি, ভাই ভাই এক সঙ্গে থাকি, আমাদের সমাজ-বন্ধন আছে, শাসন-প্রণালী আছে, অপরের অসময়ে সাহায্য করি, পীড়ার সময়ে সেবা সূক্ষমা করি। আমাদের মধ্যে কেমন স্নেহ, বন্ধুতা আছে। আমরা বেশ সুখী—এইরূপ কথাবার্তা হইতে হইতে আমরা পিঁপড়ের বাড়ী আসিয়া পৌঁছলাম।

## রমণীর দয়া ।

স্বীজাতি স্বভাবতঃ দয়াশীলা। পুরুষের অপেক্ষা স্ত্রীজাতীর হৃদয়ে স্নেহ, দয়া প্রভৃতি অনেক অধিক। অস্ত্রের কষ্ট দেখিলে মেয়েদের যেমন কষ্ট হয়, পুরুষের তেমন হয় না। কাহারও দুঃখ বিপদ দেখিলে মেয়েদের প্রাণ কাঁদিয়া উঠে, কাহাকেও কাঁদিতে দেখিলে মেয়েরা চখের জল রাখিতে পারেন না। দয়া মনুষ্যের একটি উৎকৃষ্ট ভূষণ। পাঠিকাগণ! তোমরা যেন এই ভূষণ হারাইও না। পরমেশ্বর স্নেহ দয়াতে তোমাদিগের হৃদয় পূর্ণ করিয়া দিয়াছেন, তোমরা যেন তাহা অবহেলা করিও না। অস্ত্রের দুঃখ ক্লেশ দূর করিবার জন্ত যেন তোমাদের প্রাণ সর্বদা প্রস্তুত থাকে, অস্ত্রের চক্ষের জল মুছাইয়া দিবার জন্ত, স্নেহের অঞ্চল যেন সর্বদা তোমাদের হাতে থাকে।

১৮৫৭ সালের সিপাহী বিদ্রোহের সময় আমাদের দেশের স্ত্রীলোকেরা অনেক দয়ার কাজ করিয়াছেন, এমন কি অস্ত্রকে রক্ষা করিবার জন্ত প্রাণ পর্যন্ত দিয়াছেন। তৃতীয় বর্ষের সখাতে তোমরা তাহার একটি ঘটনা পড়িয়াছ। আজ তোমাদিগকে আর দুইটা ঘটনা গুণাইব।


ফরজাবাদের সিপাহীরা যখন বিদ্রোহী হইল, তখন সেখানকার ডেপুটী কমিসনার একজন লোক দিয়া তাঁহার স্ত্রীকে, সকল পরিত্যাগ করিয়া, সেই লোকের সঙ্গে শীঘ্র নদীকূলে যাইতে বলিয়া পাঠান। বিবি সেই লোকের সঙ্গে পাক্কীতে নদীকূলে যাইতে লাগিলেন। ক্রমে সন্ধ্যা হইল, তখন বিবি পাক্কী হইতে নামিয়া একখানি

গ্রামের ভিতরে প্রবেশ করিলেন। একটা এ দেশীয় স্ত্রীলোক তাঁহাকে অসহায় দেখিয়া নিজের ঘরে আশ্রয় দিল এবং একটি তুন্দুরের ভিতরে লুকাইয়া রাখিল। সিপাহীরা রাত্রিতে ঐ গ্রামে প্রবেশ করিয়া পলায়িত ইউরোপীয় স্ত্রী-পুরুষ দিগের খোঁজ করিতে লাগিল। এবং সকলকে এই বলিয়া ভয় দেখাইতে লাগিল যে, যাহারা পলাইতদিগকে আশ্রয় দিয়াছে, তাহারা যদি তাহাদিগকে না বাহির করিয়া দেয়, তবে তাহাদিগকেও হত্যা করিবে। কিন্তু ঐ স্ত্রীলোকটি নিজের প্রাণ যাইবে জানিয়াও সেই বিবিিকে বাহির করিয়া দিল না। সেই বিবি যে সে বাড়ীতে ছিলেন তাহা অনেকেই জানিত কিন্তু কেহই তাহা প্রকাশ করিল না। বিবি সমস্ত রাত্রি ভয়ে কাঁপিতে লাগিলেন; কিন্তু সিপাহীরা কোন খোঁজ না পাইয়া অত্র গ্রামে চলিয়া গেল। পর দিন প্রাতঃকালে বিবির সঙ্গের সেই লোকটি সেখানকার একজন জমিদারের নিকট গিয়া এক খানি নৌকা চাহিয়া আনিল। তখন সেই নৌকায় ডেপুটী কমিসনারের স্ত্রী এবং আরও কয়েকজন ইউরোপীয় স্ত্রীলোক তাঁহাদের সন্তানাদি লইয়া নৌকায় উঠিলেন। জন কতক বিশ্বাসী সিপাহী তাঁহাদিগকে লইয়া চলিল। সন্ধ্যার সময় নৌকা লাগাইয়া কয়েকজন গ্রামের মধ্যে খাদ্য সংগ্রহ করিতে গেল। এখানেও স্ত্রীলোকেরা তাহাদিগকে অনেক সহায়তা করিয়াছিল। ইহাদিগের দুঃখবস্থা দেখিয়া তাহারা কতই ক্লেশ পাইয়াছিল। একটা ছোট ছেলে ক্ষুধায় ক্লেশ পাইতেছে দেখিয়া একজন আসিয়া তাহাকে স্তন্যদান করিতে লাগিল। যাহারা এই নিরাশ্রয় ইউরোপীয়দিগকে এই প্রকার সাহায্য করিতেছিল, সিপাহীরা জানিতে পারিলে

হয়ত তাহাদিগকে বধ করিত; কিন্তু তাহা জানিয়াও তাহারা আশ্রয় দিতে ক্ষান্ত হয় নাই।

বিদ্রোহের কিছু পূর্বে একজন ইংরেজ সেনাপতি তাঁহার স্ত্রী ও ছেলেদের ইংলণ্ডে পাঠাইয়া দেন, কেবল একটীমাত্র দেড় বৎসরের ছেলে তাঁহার নিকট ছিল। একজন মুসলমান ধাত্রী ঐ ছেলেটীকে পালন করিত। সে একদিন ছেলেটীকে কোলে লইয়া বেড়াইতেছে, এমন সময় শুনিতে পাইল যে, সেখানকার সিপাহীরা বিদ্রোহী হইয়াছে। সিপাহীরা ইউরোপীয় স্ত্রী পুরুষ, বালক বালিকা সকলকেই বধ করিতেছে শুনিয়া, তৎক্ষণাৎ বাড়ী ফিরিয়া গেল এবং আপনার কাপড় লইয়া তাহার দ্বারা বেশ করিয়া ছেলেটীকে জড়াইয়া ঘরের এককোণে লুকাইয়া রাখিল, এবং তাহাকে পিছনের দিকে রাখিয়া সে আপনি সন্মুখে বসিয়া রহিল। সিপাহীরা ঘরে প্রবেশ করিয়া তাহাকে বলিল, “আমরা ইউরোপীয়দিগকে বধ করিব, ছেলেটীকে কোথায় রাখিয়াছ বল।” সে সে কথার কোন উত্তর না দিয়া, আমাকে রক্ষা কর—প্রভৃতি অশ্লীল কথা বলিতে লাগিল। সিপাহীরা তাহাদিগের কথার উত্তর না পাইয়া অত্যন্ত বিরক্ত ও ক্রুদ্ধ হইল এবং একজন তাহার হাতের অস্ত্র দিয়া তাহাকে আঘাত করিল। তাহার শরীর হইতে রক্ত বাহির হইতে লাগিল, কিন্তু তবুও সে তাহাদিগের কথার কোন উত্তর দিল না। সিপাহীরা তাহাকে আরও আঘাত করিল, এবং আঘাতের পর আঘাত পাইয়া সে একেবারে অচেতন হইয়া পড়িল। সিপাহীরা তখন চলিয়া গেল। খানিক পরে চেতনা লাভ করিয়া শিশুটীকে লইয়া সে নিজের বাড়ীতে গেল এবং ইংরেজ বলিয়া কেহ জানিতে না পারে এই জন্ত তাহার

গারে এক প্রকার রং মাখাইয়া দিল। কিছুদিন পরে সে শুনিতে পাইল যে, তাহার প্রভু লক্ষ্মী নগরে আছেন; এই সংবাদ পাইয়া শিশুটিকে লইয়া সেখানে গেল এবং তাঁহাদিগের ছেলে তাঁহাদিগকে দিয়া আসিল। তাহার শরীর তখনও সুস্থ হয় নাই এই জন্ত সে নিজ বাড়ীতে ফিরিয়া যাইতে চাহিল; বিদ্রোহ শান্তি হইলে তাহাকে পুরস্কার করিবেন এই বলিয়া তাহার প্রভু তাহাকে তখন বিদায় দিলেন। কিন্তু সেই বিদ্রোহের সময়ই তাহার প্রভু ও তাঁহার স্ত্রী লক্ষ্মী নগরে হত হন, এবং ঐ শিশুটী অত্যাচার অনাথ সন্তানের সঙ্গে ইংলণ্ডে প্রেরিত হয়।



## পুরস্কার প্রাপ্ত রচনা ।

(কুসংসর্গের দোষ ।)

**কু**সংসর্গ মানবের একটি প্রধানতম অঙ্গ। সংসর্গ ব্যতীত মানব, মানব সমাজের যোগ্য হইতে পারে না। হস্ত পদাদি প্রত্যেক অঙ্গ যেরূপ আমাদের শরীরের প্রয়োজনীয় এবং যাহাদের একটীর অভাবে আমাদের অত্যন্ত কষ্টে নিপতিত হইতে হয়, সেইরূপ সংসর্গের অভাব হইলেও আমরা একাকী পড়িয়া

অত্যন্ত কষ্টে পতিত হই; এসংসারে কেহই একাকী থাকিতে ভাল বাসে না, সঙ্গ লাভের ইচ্ছা মনুষ্য মাত্রেই আছে। মনুষ্যের স্বভাব দেখিলেই প্রতীতি হয় যে, সে একা থাকিবার জন্ত সৃষ্ট হয় নাই। আমরা অহরহ বহু পরিজন মধ্যে অবস্থান করিয়া থাকি এবং যখন যাহার নিকট গেলে সুখী হইব বলিয়া মনে করি তখনই তৎসমীপে গমন করিতে সক্ষম হই। এজন্ত একাকী থাকা কতদূর কষ্টকর তাহা সহজে অনুভূত হয় না। কিছুকাল নির্জনে বাস করিলেই আবার পুনরায় আমাদের স্বজন-বাসের আকাঙ্ক্ষা বলবতী হইয়া উঠে। বহুকাল একাকী অবস্থান করিলে মনে যে গুরুতর কষ্ট হয় তাহার সহিত অন্য কোন কষ্টের তুলনা হইতে পারে না। সঙ্গ লাভের ইচ্ছা মনুষ্যের এত প্রবল যে, যখন অপর মনুষ্যের সহিত মিলিত হওয়া একান্ত অসম্ভব হয় তখন কোন ইতর প্রাণীর সহিত সন্মিলিত হইতে পারিলেও বহু পরিমাণে সচ্ছন্দ অনুভূত হয়। ইহার একটি গল্প আমরা ইংরাজী পুস্তকে অধ্যয়ন করিয়াছি, তাহার অনুবাদ নিম্নে উদ্ধৃত করিতেছি।

পেরিস নগরীতে বেছটাইল নামক একটি বৃহৎ ছুর্গ ছিল তথায় বন্দীসমূহ রক্ষিত হইত। তথায় কোন সময় লেটিউত নামক জনৈক বন্দী রক্ষিত হইয়া ছিল। তিনি তথায় সঙ্গী শূন্য হইয়া কোন এক নিভৃত প্রকোষ্ঠে প্রায় চল্লিশ বৎসর পর্যন্ত বাস করিয়া ছিলেন কিন্তু তথায় তিনি জেল রক্ষক ব্যতীত কাহাকেও দেখিতে পারিতেন না। তাঁহার ঐ কুটীরে একটি রক্ত প্রবিষ্ট কিঞ্চিৎ আলোক ব্যতীত আর কোন আলো আসিত না। তিনি একদা ঐ সুরঙ্গ মধ্যে একটি ইঁহুর দেখিতে পাইলেন এবং

উহাকে দেখিবামাত্র তাঁহার মনে কেমন এক প্রকার তৃপ্তি উপস্থিত হইল যে, তিনি উহাকে তাঁহার নিকটে আসিবার জন্ত আহারীয় সামগ্রী দ্বারা উহাকে প্রলোভিত করিতে লাগিলেন, ক্রমে ঐ ইঁহুরটার ভয় হ্রাস হওয়ায় সে ঐ বন্দীর নিকট আসিয়া তাহার আহারীয় পাত্র হইতে আহারীয় দ্রব্য লইয়া ভক্ষণ করিতে লাগিল। এবং এইরূপ ক্রমে ক্রমে তিনি চতুর্দিকে ১০।১২টী ইঁহুর কর্তৃক পরিবেষ্টিত হইয়াছিলেন এবং অবশেষে তিনি তাহার বন্ধন যন্ত্রনা একেবারে বিস্মৃত হইয়াছিলেন। এমন কি তিনি তাহার মুক্তির বিষয় মনেও ভাবিতেন না। ইহার পর যখন তিনি জেল রক্ষকের আজ্ঞা ক্রমে অণু কোন কুঠরীতে নীত হইয়া তাঁহার সঙ্গী সমূহ হইতে বিচ্ছিন্ন হইয়াছিলেন তখন তাঁহার হৃদয়ে বন্ধন যাতনার কষ্ট অত্যন্ত প্রবল হইয়া উঠিল। কি আশ্চর্য্য! ইঁহুর মনুষ্যের ভাব কিছুই অনুভব করিতে পারে না এবং মনুষ্যের সহিত তাহার কোন ও প্রকার সহানুভূতি হওয়াই সম্ভাবনা নাই; তথাপি আসঙ্গ লিপ্সার কি আশ্চর্য্য প্রভাব! বন্দী স্নেহশীল বন্ধুর দ্বারা তৎপ্রতি অনুভূত হইয়াছিলেন। সংসর্গ দ্বিবিধ; সংসর্গ ও কুসংসর্গ। কুসংসর্গের অপকারীতাই প্রবন্ধের মূল বিষয়। বিশুদ্ধ এবং পবিত্র স্বভাব বিশিষ্ট শিক্ষিত লোকদিগের সঙ্গকেই সংসর্গ বলা যাইতে পারে। সংসর্গই লোকের শিক্ষা লাভের মূল কারণ; এবং সেই শিক্ষাই মানব জীবনের একমাত্র উদ্দেশ্য। শিক্ষাই জীবনের হিত সাধক ও মহোপকারী। শিক্ষাই মানুষের যাবতীয় উন্নতির মূল। অশিক্ষিতের হৃদয় আকর নিহিত অপরিষ্কৃত প্রস্তরবৎ। ঐরূপ শ্রীহীন প্রস্তর সূচাক্রমে গঠিত, পরিষ্কৃত ও

পরে মার্জিত হইলে যেমন উজ্জ্বল ও রমণীয় হয় তদ্রূপ শিক্ষা দ্বারা মনুষ্যের লুক্কায়িত মানসিক শক্তি পূর্ণ বিকসিত এবং প্রকৃতি সুগঠিত ও মধুর হয়। ইংরাজিতে একটি কথা আছে “used key is always bright” ব্যবহার্য্য চাবী সর্বদাই উজ্জ্বল হইয়া থাকে অর্থাৎ সংসর্গরূপ উপযুক্ত শিক্ষা এবং চালনা ব্যতীত মানবের তমসাচ্ছন্ন হৃদয় কখন বিকাশ প্রাপ্ত হয় না। জ্ঞান শিক্ষা সংসর্গের উপর সম্পূর্ণ নির্ভর করিতেছে। কেবল জ্ঞান শিক্ষাকে প্রকৃত শিক্ষা বলা যায় না। শিক্ষায় মনুষ্যের মন যেমন জ্ঞানে উন্নত হইবে, সেইরূপ গুণে বিভূষিত হইবে; স্বভাব যেমন উন্নত ও দৃঢ় হইবে সেইরূপ গুণে বিভূষিত হইবে। জ্ঞানে যিনি উন্নত হইয়াছেন অথচ চরিত্রে সাধু হন নাই তিনি মুর্খেরও অধম। বাস্তবিক যাবতীয় মানসিক শক্তির পূর্ণ ও স্বাভাবিক বিকাশ এবং চরিত্রের সাধুতা ও সৌন্দর্য্য সম্পাদনই শিক্ষার প্রকৃত উদ্দেশ্য। সে উদ্দেশ্য পুস্তক অধ্যয়ন ব্যতীত হইতে পারে; উন্নত সমাজে উন্নত পরিবারে বাস করিলে গ্রন্থাদি পাঠ ব্যতীতও মানসিক উন্নতির সুশিক্ষার বহুপরিমাণে অধিকারী হওয়া যায়; যাহারা সাধু ও সংসঙ্গে বাস করেন তাহাদিগকে নীতিশাস্ত্র শিক্ষা না দিলেও তাহারা বহুপরিমাণে সুনীতি সম্পন্ন হইয়া থাকেন। অবস্থার বিপাকে পড়িয়া কত কত ধার্মিক ও মহাজন, কত বীর ও বিজ্ঞানবিদ, কত জ্ঞানী ও গুণী, ইতর আলয়ে লুক্কায়িত থাকিয়া তাহাদের ক্ষমতা প্রকাশ করিতে পারিতেছেন না। নিয়মিত শিক্ষা ও সংসর্গের দোষে চিরকালের জন্ত গভীর তমসাচ্ছন্ন হইয়া রহিয়াছেন। সংসর্গ লোকের পরীক্ষা স্থল। যাহার যেরূপ রুচি সে সেরূপ দলে ভুক্ত হয়; যাহারা সং তাহারা



সজ্জনের সংসর্গ ত্যাগ করে না। এবং যাহারা  
দুশ্চরিত্র তাহারাও কখন অসং সংসর্গ পরিত্যাগ  
করিতে বাসনা করে না। সাধারণতঃ সন্নিবস  
অপেক্ষা অসন্নিবসে মনুষ্যের মন অধিক আকৃষ্ট  
করে, কাজেই কুনীতি সহজে শিক্ষা হয়। এজন্য  
অসং লোক সজ্জনের সহিত সমাগম করিলেও  
তাহাদের চরিত্র সহজে পরিবর্তিত হইতে পারে  
না। কিন্তু সংলোক অধিক দিন কুসঙ্গে বাস  
করিলে কুজনের দোষরাশী সহজেই তাহাদের  
অভ্যস্ত হইয়া উঠে। \* \* \*  
\* \* \* \* \*  
\* \* \* কুসঙ্গে থাকিলে যেকোন  
দুর্দশায় পড়িতে হয় তাহা দেখাইবার জন্য একটা  
ঐতিহাসিক ঘটনা এস্থলে লিখিত হইতেছে।  
হিন্দুদিগের রাজত্বের পর দিল্লীতে পাঠান  
বংশীয় রাজার রাজত্ব আরম্ভ হয়। এই পাঠান-  
বংশীয় মুসলমানদের মধ্যে কৈকোবাদ নামে এক  
ব্যক্তি এক সময় দিল্লীর অধিপতি ছিলেন। যখন  
কৈকোবাদ দিল্লীর বাদসাহ হইয়াছিলেন তখন  
তাহার বয়স্ক্রম অষ্টাদশ বৎসর ছিল। নিজাম  
নামে কৈকোবাদের এক প্রধান মন্ত্রী ছিল। ইহার  
চরিত্র সাতিশয় মন্দ ছিল। এই মন্দ লোকের  
সংসর্গ দ্বারা কৈকোবাদের চরিত্র দূষিত হইয়া  
যায়। কৈকোবাদ কুচরিত্র নিজামের পরামর্শে  
অল্প বয়সে মদ্য পানাদি নানাপ্রকার পাপকার্যে  
এত আসক্ত হন যে, শীঘ্রই তাহার শরীর ভগ্ন হইয়া  
পড়ে। কৈকোবাদের পিতা বখর খাঁ এই সময়  
বাজ্পালার নবাব ছিলেন। তেজস্বিতা ও সং-  
স্বভাবের জন্য তাহার স্মৃতি ছিল। পুত্র  
কুসংসর্গে পড়িয়া খারাপ হইয়া যাইতেছে শুনিয়া  
তাঁহাকে সত্বপদে দিবার জন্য দিল্লীতে আসি-  
লেন। এদিকে কুমন্ত্রী নিজাম কৈকোবাদকে

পরামর্শ দিল যে, বাজ্পালার নবাব দিল্লীর বাদসাহের  
অনুমতি ব্যতীত গৈলু নইয়া দিল্লীতে আসি-  
য়াছে, স্তুরাং সে রাজবিদ্রোহী; তাহার  
সহিত যুদ্ধ করা কর্তব্য। কৈকোবাদ কুমন্ত্রীর  
কুহকে মুগ্ধ হইয়া পিতার সহিত যুদ্ধ করিতে  
অগ্রসর হইলেন, বখর খাঁ পুত্রের এই ভাব দেখিয়া  
তাঁহাকে লিখিলেন, “বৎস! যুদ্ধ করিতে হয়,  
পরে করিও, আমি অগ্রে তোমার সহিত একবার  
সাক্ষাৎ করিতে ইচ্ছা করি।” কৈকোবাদ পিতার  
এই পত্র পাইয়া তৎক্ষণাৎ পিতার সহিত সাক্ষাৎ  
করিতে সম্মত হইলেন। কিন্তু কুমন্ত্রী নিজাম  
তাঁহাকে এই পরামর্শ দিল যে, কৈকোবাদ রাজ  
পরিচ্ছদ পরিধান করিয়া, সিংহাসনে বসিয়া থাকি-  
বেন, বখর খাঁ সামান্য ভৃত্যের স্থায় সেলাম  
করিতে করিতে তাঁহার নিকট উপস্থিত হইবেন।  
বখর খাঁ কি করেন, রাজসভায় আসিয়া ভূমিষ্ট  
হইয়া পুত্রকে তিন বার সেলাম করিলেন।  
এরূপ অবস্থাতেও কৈকোবাদ সিংহাসনে রহি-  
য়াছেন দেখিয়া, বখর খাঁ নিতান্ত ছুঃখ বোধ  
করিয়া রোদন করিতে লাগিলেন। কৈকোবাদ  
পিতাকে কাঁদিতে দেখিয়া, সিংহাসন হইতে  
নামিয়া তাঁহার পা ধরিতে গেলেন, বখর খাঁ  
পুত্রকে এই কার্য করিতে নিরস্ত করিয়া হস্তদ্বারা  
তাঁহার গল দেশ ধারণ করিলেন। তখন পিতা  
পুত্র উভয়েই শোকে অধীর হইয়া, অনবরত অশ্রু  
মোচন করিতে লাগিলেন। সভাস্থ লোক ইহা  
দেখিয়া একবারে মুগ্ধ হইয়া গেল। কৈকো-  
বাদ সমুচিত সম্মান ও আদর করিয়া পিতাকে  
নিজের সিংহাসনে বসাইলেন। পিতা পুত্র  
অনেকক্ষণ আলাপ হইল। অনন্তর বখর খাঁ  
কয়েক দিন নির্জনে বসিয়া পুত্রকে সংপথে  
আসিতে অনেক উপদেশ দিলেন। কৈকোবাদ


প্রকৃত পক্ষে বড় সরল ও কথার বাধ্য ছিলেন।  
কেবল ছুঃস্বভাব নিজামের সংসর্গে থাকাতে তিনি  
নানাপ্রকার গর্হিত কার্যে প্রবৃত্ত হন। এক্ষণে  
পিতার সংপরামর্শে তাঁহার স্বভাব শুধরাইতে  
লাগিল। তিনি পিতার নিকট প্রতিজ্ঞা করি-  
লেন আর কখনও নিজামের কথা শুনিবেন না;  
এবং তাহার কথায় কুসংসর্গে রত হইবেন না।  
বখর খাঁ পুত্রের কথায় সন্তুষ্ট হইয়া, আপ-  
নার রাজ্যে গমন করিলেন। বখর খাঁ বাজ্পালার  
চলিয়া গেলে, নিজাম স্ত্রীযোগ পাইয়া, আবার  
কৈকোবাদকে নানাপ্রকার কুমন্ত্রণা দিতে লাগিল।  
কৈকোবাদ কুমন্ত্রীর সংসর্গে পড়িয়া আবার  
হৃৎসর্গে প্রবৃত্ত হইলেন। সর্বদা পাপকার্য্য করিতে  
শীঘ্রই কৈকোবাদের পক্ষাঘাত রোগ হইল।  
এদিকে রাজ্যে নানা প্রকার গোলযোগ ও বিশৃ-  
ঙ্খলা হইতে লাগিল। এই গোলযোগের সময়  
একদল লোক প্রবল হইয়া, কৈকোবাদের প্রাণ  
সংহার পূর্বক দিল্লীর সিংহাসন কাড়িয়া লইল।

দেখুন! কৈকোবাদ দিল্লীর বাদসাহ ও অতুল  
ঐশ্বর্য্যের অধিপতি হইয়াও কেবল কুসংসর্গে পড়ি-  
য়াই, তরুণ বয়সে তাহার কি পরিণাম হইল?  
সর্বদা সংসর্গে থাকা উচিত। কুসংসর্গে থাকিয়া  
আপনার অনিষ্ট করা কর্তব্য নহে।


অপরিণত বয়সে লোকের অনুকরণ-প্রিয়তা প্রবল  
ও কার্যক্ষম থাকে কিন্তু পরিণত বয়সে সেরূপ  
থাকে না। শিশু স্তম্ভ পানের সঙ্গে সঙ্গে মাতার  
প্রকৃতি অধিকার করে ও তাহার ব্যবহারের  
অনুকরণ করিতে শিক্ষা করে, বালক সমবয়স্ক  
সহচরদিগের রীতি পদ্ধতি গুণ দোষ চক্ষুর সম্মুখে  
স্থাপন করিয়া তদনুকরণে প্রবৃত্ত হয়। যুবক  
বন্ধুগণের চরিত্র ও ব্যবহার দেখিয়া স্বীয়  
চরিত্র সংগঠন করে; জ্ঞাতসারেই হউক বা

অজ্ঞাত সারেই হউক তাহাদের প্রকৃতি ও আয়ত্ত  
করে। কিন্তু প্রৌঢ় ও বৃদ্ধদিগের পক্ষে তেমন  
নহে। বস্তুত অপরিণত বয়সেই অনুকরণ ইচ্ছা  
ও অনুকরণ ক্ষমতা অধিকতর প্রবল থাকে।  
মোম দ্বারা যেকোন ইচ্ছা সেইরূপ প্রতিমূর্ত্তি অনা-  
য়াসে গঠন করিতে পারা যায়, অল্প বয়সে  
যখন মন কোমল থাকে তখন তাহাকে যে পথে  
ইচ্ছা সেই পথে অনায়াসে চালিত করা যায়।  
এবং ভাল মন্দ যেকোন ইচ্ছা সেরূপ চরিত্র অনা-  
য়াসে সংগঠিত হইতে পারে, অতএব বাল্যকাল  
হইতে যাহাতে কোন কুব্যবহার অভ্যস্ত হইতে  
না পারে বরং অন্তঃকরণ নানা মনোহর গুণ-  
গ্রামে শুশোভিত হইতে পারে তৎপক্ষে প্রত্যেক-  
কেই একান্ত যত্নপর হওয়া কর্তব্য। অতএব  
ছেলে বেলা হইতেই লোকের কুসঙ্গ পরিহার  
করা সর্বতোভাবে কর্তব্য এবং সংসর্গে থাকা  
বিধেয়।

শ্রীললিতকুমার বসু, বরিশাল।  
বয়স ১৫ বৎসর।



## চীনের কথা ।



কুমন্ত্রী গত বৎসরের “সখা”র চীন  
দেশের গল্প পড়িয়াছে। চীনের লো-  
কেরা ছেলে মেয়ের প্রতি কিরূপ  
যত্ন করে, ছেলেবেলা হইতে তাহাদের কাঁধে  
কিরূপ কাজের বোঝা চাপাইয়া দেওয়া হয়—

তাহা তোমরা গুনিয়াছ। ছেলেরা কিরূপে সারা-দিন খুলে থাকে, মাষ্টার মহাশয় কেমন আফিম খাইবার নল এবং খলে হাতে করিয়া গম্ভীর ভাবে বসিয়া আছেন তাহাও দেখিয়াছ। চীন দেশের লোকগুলি দেখিতে কেমন, তাহাদের বাড়ী ঘর কেমন, তাহাদের কিরূপ আবার ব্যবস্থা ইহা কি তোমাদের গুনিতে ইচ্ছা হয় না? কোন দেশের কিম্বা লোকের বিষয় একটু কিছু জানিলে আরো বেশী জানিতে ইচ্ছা হয়। তাই তোমাদিগকে আজ চীন দেশীয় লোকেরা দেখিতে কেমন সেই সম্বন্ধে কিছু বলিব।

আমাদের দেশে যেমন এক এক জনের এক এক রকম বর্ণ তাহাদের তাহা নয়। আমাদের দেশে হয়ত তিন চারিজন ভাইবোন তিন চার রকম রঙের। কেহবা মিট্‌মিটে কাল, কেহবা আধময়লা, কেহবা একটু কাল এইরূপ পাঁচ রকমের পাঁচ জন দেখা যায়। কিন্তু চীন দেশে সে রকম নয়। সেখানে সকলেরই এক রকম রঙ; কেবল তাহাই নহে দেখিতেও প্রায় সকলেই এক রকম; হঠাৎ দেখিলে কোনরূপ প্রভেদ বুঝা যায় না। সকলেরই চ্যাপ্টা মুখ, খাদ্য নাক এবং মিট্‌মিটে ছোট ছোট চোখ। আমাদের চাইতে তাহাদের রঙ অনেক ফরসা এইজন্য কলিকাতায় তাহাদিগকে সামান্য লোকেরা “চীনে সাহেব” বলিয়া থাকে। রঙ ফরসা বলিয়া চীনেরা সুন্দর নহে। ছেলেবেলা তাহাদিগকে বেশ সুন্দর দেখায়, কিন্তু যতই বয়স বাড়ে ততই মুখ ক্রমে চ্যাপ্টা হইতে থাকে এবং আকৃতি কদাকার হইয়া উঠে। বৃদ্ধাবস্থায় তাহারা নিতান্ত কুৎসিৎ হয়।

চীনেদের ছুই একটা অতিশয় হাস্যকর প্রথা প্রচলিত আছে। তাহারা মনে করে এইরূপে

তাহাদিগকে অতি সুন্দর দেখায়; কিন্তু প্রকৃত পক্ষে তাহারা আরও কদাকার হয়। ভ্রূনোকদিগের মধ্যে স্ত্রী ও পুরুষ সকলেই বাম হাতের নখ রাখিয়া থাকে এবং সময়ে সময়ে ইহা পাঁচ ইঞ্চি পর্যন্ত বড় হয়। এই নখ রাখা অতিশয় সম্মান-জনক কার্য বলিয়া বিবেচিত হয়; কারণ যাহারা শারীরিক পরিশ্রম ও কঠিন কার্য করে তাহারা নখ রাখিলে তাহা ভাঙ্গিয়া যায় এই জন্য দরিদ্র লোক এবং শ্রমজীবীরা তাহা রাখিতে পারে না। বড় বড় নখ থাকিলেই বুঝা যায় যে, তাহারা ভ্রূনোক এবং কোন হীন কাজ করে না। আমাদের দেশে ও মাঝে মাঝে লোকে তারকেধরের কিম্বা অন্য কোন দেবতার নামে নখ ও চুল মানস করে। বড় বড় নখ রাখিলে হয়ত হঠাৎ ভাঙ্গিয়া যাইতে পারে এবং তাহা হইলে বড় কষ্ট পাওয়া যায়; চীনেরা এই বিপদ হইতে উদ্ধার পাইবার জন্ত নখের ছুই পার্শ্বে ছুই খণ্ড বাঁসের বাখারি দিয়া বাঁধিয়া রাখে।

ইহা অপেক্ষা আর একটা প্রথা অতিশয় কষ্টদায়ক। তোমরা হয়ত গুনিয়াছ চীনেদের মেয়েদের পা অতিশয় ছোট। তাহাদের ছোট পা সৌন্দর্যের প্রধান চিহ্ন বলিয়া মনে করা হয়। সকল দেশেই এ রকম কোন না কোন কুসংস্কার আছে। ইংলণ্ডের স্ত্রীলোকেরা কোমর সুরু করিবার জন্ত নানা প্রকার উপায় অবলম্বন করে। আমাদের দেশেও যে মেয়েদের মপে ছুই একটা সৌন্দর্য্য বৃদ্ধি করিবার নিয়ম নাই তাহা নহে। তবে চীন দেশীয়দের এইরূপে সৌন্দর্য্য বৃদ্ধি করিতে অনেক আড়ম্বর করিতে হয়। কিরূপে তাহারা পা ছোট করে তাহা গুনিতে অতি অদ্ভুত। যখন মেয়েদের তিন চারি কিম্বা পাঁচ বৎসর বয়স হয় তখন এই মহৎ ব্যাপারের

অনুষ্ঠান আরম্ভ হয়। এই ব্যাপার শেষ হইতে প্রায় ছুই তিন বৎসর সময় লাগে এবং সেই সমস্ত সময় সুন্দরীরা অনেক যন্ত্রণা ভোগ করিয়া থাকেন। পা বাঁধিবার জন্ত চীন দেশে এক-রকম সাদা রাঙা ব্যাণ্ডেজ (পুলটিস) কিনিতে পাওয়া যায়। ইহা সাধারণতঃ ছুই ইঞ্চি প্রশস্ত এবং ৮ হাত লম্বা। ইহা দ্বারা পা বাঁধিবার পূর্বে ফিটকিরির গুড়া ছড়াইয়া দেওয়া হয়, কারণ তাহা হইলে পরে কোন রূপ ফোঁড়া কিংবা ঘা হইতে পারে না। পা এত শক্ত করিয়া বাঁধা হয় যে প্রায় একখানা পাকে মাঝখানে ভাঙ্গিয়া ছুই ভাগ করা হয়। ইহাতে রক্তের চলাচল বন্ধ হইয়া যায় সুতরাং পা আর বড় হইতে পারে না। ইহাতে কি কষ্ট হয় তাহা একবার অনুভব করিয়া দেখিলেই বুঝা যায়; কিন্তু তবু সুন্দরী হইবার এত প্রবল ইচ্ছা যে চীনের বালিকারা ইহা অমান বদনে সহ করে।

এইরূপ প্রায় একমাস কাল পা বাঁধা থাকে। একমাস পরে এইরূপ বাঁধা পা ছুইখানাকে খুব গরম জলে অনেকক্ষণ ডুবাইয়া রাখা হয়। তখন পুলটিসটি আস্তে আস্তে খুলিয়া ফেলিতে হয় এবং সঙ্গে সঙ্গে পায়ের এক পরদা মরাচাম উঠিয়া যায়। এই সময়ে কাহারো কাহারো পায়ের তলায় কতকগুলি মাংস অথবা ছুই তিনটি আঙ্গুল ও খসিয়া পড়ে।

যখন পা জলে ভিজিয়া যায় তখন বেশ করিয়া পুছিয়া ফেলা হয়। তাহার পর আবার কিছু ফিটকিরির গুড়া ছড়াইয়া ৫ ফুট লম্বা নূতন এক পুলটিস দ্বারা পা বাঁধা হয়। এবারকার বাঁধা পূর্কোপেক্ষাও অধিক শক্ত হয়। ইহার পর স্ত্রীলোকেরা মাসে একবারের অধিক পা খুলে

না। পা খুলিলে আর তাহারা হাটিতে পারে না এবং ভয়ানক যন্ত্রণা হয়।

যখন প্রথম এইরূপে পা ছোট করিবার জন্ত ব্যাণ্ডেজ বাঁধা হয় তখন প্রথম প্রথম তিন চারি মাস ভয়ানক যন্ত্রণা থাকে। কেহ কেহ বা এক বৎসর কালও এই যন্ত্রণা ভোগ করে। সারাদিন রাত্রিতে একটুও শান্তি নাই, যেন কেহ ছুঁচ বিঁধাইয়া দিতেছে। এইরূপে ক্রমে যখন পা অবশ হইয়া যায়, তখন আর কিছু বোধ হয় না। কিন্তু উহা চিরকালের জন্ত অকর্মণ্য ও কদাকার হইয়া থাকে। তোমরা হয়ত মনে করিতে পার যে চীনের বালিকারা এই ভয়ানক কার্য করিতে ভীত হয় কিন্তু তাহা নহে; আমাদের দেশে যেমন অলঙ্কার পরিবার সাথে মেয়েরা অক্লেশে নাক ও কাণ বিঁধাইতে পারে সেখানেও মেয়েরা সুন্দরী হইবার অভিলাষে নিজে-রাই পায়ের ব্যাণ্ডেজ বাঁধিয়া থাকে।

এইরূপ ব্যাণ্ডেজ বাঁধা পা যেমন অকর্মণ্য হয় তেমনই কদাকার হয়। যে বালিকার চিত্র দেওয়া হইতেছে তাহার পায়ের দিকে একবার দৃষ্টিপাত কর তাহা হইলেই বুঝিতে পারিবে। চীনের স্ত্রীলোকেরা এই কুপ্রথা উঠাইবার জন্ত অনেক চেষ্টা করিতেছেন কিন্তু বড় কৃত-কার্য হন নাই, কারণ চীনদিগকে একথা বলিলে তাহারাও বলে “কেন বাপু, তোমাদের মেয়েরাও ত কোমর সুরু করিবার জন্ত কত উপায় অবলম্বন করে; তবে আর আমাদের দোষ কি?” পাদরী সাহেবেরা তখন মুখ ফিরাইয়া ঘরে আসেন। নিজেদের দোষ থাকিলে পরের দোষ সংশোধন করা বড়ই কঠিন। একজন অন্ধ আর একজন অন্ধকে পথ দেখাইতে পারে না। অতএব যাহারা জীবনে কোন সৎ-



কার্য করিতে চাহে তাহাদের বাল্যকাল হই-  
তেই আপনাদিগের সংপথে চালাইতে চেষ্টা  
করা কর্তব্য।


চীন দেশের বালক এবং পুরুষেরা সকলেই  
পশ্চাতে একটা বেণী মাত্র রাখিয়া মাথার আর  
সমুদয় চুল ফেলিয়া দেয়। তাহারা দাড়ি গোঁফ  
ও প্রায় রাখে না। তবে কোন কোন স্থানের  
লোকেরা চল্লিশ বৎসর পরে গোঁফ ও ষাটি  
বৎসরের পর দাড়ি রাখিয়া থাকে। সকলেই এক  
একটা বেণী রাখিয়া থাকে। যখন চীনেরা  
মৃত ব্যক্তিদিগের জন্ত শোক প্রকাশ করে তখন  
মস্তকের সকল স্থানেই চুল রাখিয়া থাকে।

বেণী কাটিয়া দেওয়া চীনের মতে ভয়ানক  
অপমানের কথা। এই উপায়ে চোরদিগকে  
মধ্যে মধ্যে সাজা দেওয়া হয়। চীনদেশীয় কৃষক  
ও শ্রমজীবীরা যখন কাজ করিতে যায় তখন  
পাগড়ীর মত মাথার চারিদিকে বেণী বাঁধিয়া  
থাকে।

চীন দেশীয় স্ত্রীলোকেরা অতি আশ্চর্যরূপে  
চুল বাঁধিয়া থাকে। এক এক জনের চুল  
বাঁধিতে দুই চারি ঘণ্টার কমে হয় না। ইংরেজেরা  
চুল ঠিক রাখিবার জন্ত পোমেটাম ব্যবহার  
করে, আমাদের মেয়েরা পোমেটামের কথা  
শুনিবার আগে মোম ব্যবহার করিতেন এখনও  
হয় ত পাড়াগাঁয়ে কেহ কেহ সেই পূর্ব প্রকারের  
অঙ্গুরণ করিয়া থাকেন। চীন দেশীয় স্ত্রীলো-  
কেরা এক রকম গাছের আটা ব্যবহার করিয়া  
থাকে। ইহা দ্বারা তাঁহারা নানা সময়ে চুলের  
নানা রকম আকৃতি করিয়া থাকে। কখনও  
ফুলদান কখনও বা পাখীর মত এবং কখনও বা  
অন্য কোন রকমের আকৃতি করিয়া চুল বাঁধা হয়।

ইহারা সুন্দর দেখাইবার জন্ত মুখ সাদা ও  
লাল রঙে চিত্রিত করিয়া থাকে। কিন্তু ইহাতে  
বরং আরও বিশ্রী দেখায়। সুন্দর দেখাইবার  
ইচ্ছা সকলেরই আছে, কিন্তু সে ইচ্ছা যখন অস্বা-  
ভাবিক হয় তখন লোককে সুন্দর না করিয়া

বরং কুৎসিত করে। ঈশ্বর আমাদের কাছে  
দিয়াছেন, প্রকৃতির যাহা নিয়ম তাহা অতিক্রম  
করিলেই লোক অস্বাভাবিক ও কুৎসিত হইয়া  
পড়ে। চীনেরা যদি অস্বাভাবিক উপায়ে পা-  
ছোট না করিত এবং মুখ চিত্রিত না করিত তবে  
তাহাদিগকে সুন্দর দেখা যাইত সন্দেহ নাই। কিন্তু  
তাহাদের অতি সুন্দর হইবার ইচ্ছাই তাহাদিগকে  
অতিশয় কুৎসিত করিয়া রাখিয়াছে। ইহাতে  
কি আমাদের কিছু শিক্ষা করিবার নাই?



## অতি লোভের শাস্তি ।

( সত্য ঘটনা । )

কলিকাতার পনর বোল ক্রোশ দূরে কোন  
পল্লীগ্রামে এক দরিদ্র ব্রাহ্মণ বাস করিতেন।  
ব্রাহ্মণের বিদ্যাসাধ্য কিছুই ছিল না কিন্তু অল্প  
ধরমে বিবাহ হওয়াতে ছেলেপিলে অনেক গুলি  
হইয়াছিল। সন্তানগুলি সকলেই বুদ্ধিমান কিন্তু  
ব্রাহ্মণের এমন ক্ষমতা ছিল না যে কোনটিকে  
ভাল করিয়া লেখা পড়া শিক্ষা দেন; ভাত যুটে ত  
কাপড় যুটেনা এই প্রকার অবস্থা। বড় ছেলেটি  
১৩।১৪ বৎসরের ছেলে হইয়া উঠিল তথাপি  
পড়াশুনার কোন বন্দোবস্ত হইল না। অমূল্য সময়  
বৃথা বহিয়া যাইতে লাগিল। ছেলেটি এক এক  
বার একখানি সংস্কৃত পুথী হাতে করিয়া এক  
একবার ভট্টাচার্যের চতুর্পাটিতে গিয়া বসিত  
আর অধিকাংশ সময় ঘুড়ি উড়াইয়া, মাছ ধরিয়া,

পাখীর ছানা চুরি করিয়াও গৃহস্থের গাছের ফল  
পাকড় পাড়িয়া বেড়াইত। যতই বয়স বাড়িতে  
লাগিল ছেলেটির লেখাপড়া শিখিবার বাসনা  
ততই প্রবল হইতে লাগিল। সে চাহিয়া চিন্তিয়া  
কয়েকখানি পুস্তক সংগ্রহ করিল, তাহা লইয়া  
স্কুলের বালকদিগের নিকট গিয়া পড়া বলিয়া  
আনিত ও যথাসাধ্য শিখিবার চেষ্টা করিত।

ঐ দরিদ্র বালকটির একজন আত্মীয় ব্রাহ্মণের  
কলিকাতার দক্ষিণ বর্তী ভবানীপুর নামক স্থানে  
একখানি টোল চতুর্পাটি ছিল। তিনি বালকটির  
শিক্ষার জন্য ব্যগ্রতা দেখিয়া তাহাকে নিজ  
টোলে বায়গা দিতে স্বীকৃত হইলেন। বালকটি  
ভবানীপুরে আসিল। তখন কলিকাতার সংস্কৃত  
কলেজে ব্রাহ্মণ পণ্ডিতের সন্তানদিগকে ১ টাকার  
অধিক বেতন দিতে হইত না। একজন দয়ালু  
লোক মাহিনার টাকাটি দিতে প্রস্তুত হইলেন।  
তখন বালক আনন্দের সহিত কলেজে ভর্তি  
হইল। কলিকাতার সংস্কৃত কলেজ ভবানীপুর  
হইতে ২৫ ক্রোশ তিন ক্রোশের কম হইবে না।  
বালকটি প্রত্যহ এই পথ হাঁটিয়া স্কুলে যাইত ও  
অপরাহ্নে আবার হাটিয়া আসিত। ইহা ভিন্ন  
তাহাকে আশ্রয়দাতার সাহায্যের জন্য তাহার  
ঈর্জমান বাড়ীতে নিত্য পূজা করিতে হইত  
ও রাত্রে ঠাকুরদের আরতি করিতে হইত।  
ইহাতে সেই বালকের এত সময় যাইত যে, সে  
আর ছবেলা আহার করিবার সময় পাইত  
না; রাত্রে একবার রাঁধিত প্রাতে সেই পান্ডুভাত  
খাইয়া স্কুলে যাইত। এইরূপ নিত্যই যাইত।

এইরূপ কয়েক বৎসর কাটিয়া গেলে একজন  
আত্মীয় লোক দয়া করিয়া কলিকাতার বাসায়  
তাহাকে স্থান দিতে সম্মত হইলেন। বালকের  
দুঃখ ঘুচিল। সে কলিকাতায় থাকিয়া পড়াশুনা

করিতে লাগিল। কিন্তু ওদিকে তাহার আরও অনেকগুলি ভাই ভগিনী জন্মিয়াছে এবং ভাই গুলি বড় হইতেছে। বেচারাকে জনক জননীরা সাহায্যের জন্য প্রাইভেট পড়াইয়া কিছু কিছু টাকা বাড়ীতে পাঠাইতে হইত; সমুদায় সময় পড়াতে মন দিতে পারিত না। এইরূপ করিয়া অতি কষ্টে দিন কাটিতে লাগিল। তখন সংস্কৃত কালেজের যে শ্রেণীতে উঠিলে বৃত্তির পরীক্ষা হইত সে অনেক কষ্টে সেই শ্রেণী পর্যন্ত উঠিল। ভাবিয়াছিল যে সেই শ্রেণীতে একটি বৃত্তি পাইবে তাহা হইলে আর তাহার পড়ার বিষয় ঘটিবে না। পড়া শুনাও চলিবে এবং পিতা মাতাকেও কিছু কিছু সাহায্য করিতে পারিবে। কিন্তু ছুর্ভাগ্য বশতঃ পরীক্ষাতে সে কৃত কার্য হইতে পারিল না। ওদিকে পিতা মাতা তাহারও বিবাহ দিয়াছেন এবং একটি সন্তানও জন্মিয়াছে। সুতরাং তাহাকে বাধ্য হইয়া এই বয়সেই লেখা পড়া সাক্ষ করিতে হইল।

ক্রমশঃ

## নববর্ষের সঙ্গীত ।

(১)

বরষে বরষে দিবসে দিবসে  
নিমেষে নিমেষে সময় যায় ;  
তাহার তরঙ্গে নানা রঙ্গ ভঙ্গে  
জীবন প্রবাহ ছুটিয়া ধায় ।

(২)

কোথায় কে ছিল কোথায় আসিল  
কিছুই বুঝিতে পারি না ভাই ;  
সময়ের গতি, সুগভীর অতি  
ধরিতে ছুঁইতে নাহিক পাই ।

(৩)

অজ্ঞান আঁধার রাখি সবাঁকার  
জগতের পতি করণাময় ;  
করেন পালন মায়ের মতন  
জীবনে মরণে তাঁহারি জয় ।

(৪)

প্রকৃতির মাঝে নব নব সাজে  
দেন দেখা তিনি মানব গণে ;  
যেন বাজীকর বহু গুণাকর  
করেন বিহার আনন্দ মনে ।

(৫)

নূতন বরষে নূতন হরষে  
নবীন বালক বালিকা সবে ;  
সেই জননীরে, চারি দিকে ঘিরে  
কর জয় গান মধুর রবে ।

(৬)


ঐ দেখ কত ফল ভরে নত  
নবপল্লবিত পাদপরাজী ;  
নমিছে ঈশ্বরে সমীরণ-ভরে  
নবীন কুসুম ভূষণে সাজি ।

(৭)

মলয় বাতাসে সুনীল আকাশে  
ভাসিছে নবীন নীরদ রাশি ;  
তরু কুঞ্জবনে মা বাপের সনে  
নবজাত পাখী বসিল আসি ।

(৮)

যাঁহার রূপায় মৃত প্রাণ পায়,  
সাজে সবে নিত্য নবীন বেশে ;  
তিনি চির নব প্রেমরসার্ণব,  
তাঁহার বিভব দেখ হে এসে ।



মে, ১৮৮৭।

## পাখীদের দেশ ভ্রমণ ।

জ্ঞান

খার পাঠক পাঠিকাগণ! তোমরা

কি কখন লক্ষ্য করিয়াছ যে, শীত ও বসন্ত কালে এমন কতকগুলি পক্ষী দেখিতে পাওয়া যায় যেগুলি গ্রীষ্মকালে আর দেখা যায় না? বৈশাখ মাস শেষ হইয়াছে, এখন আর বাড়ির উঠানে, প্রশস্ত রাস্তার মাঝখানে খঞ্জন পাখী নেচে নেচে বেড়ায় না। আঁব, কাঁটালের বাগানে, কোঁপে, জঙ্গলে আর হৃদহৃদ, কচ্ কচে প্রভৃতি পাখীর ডাক শুনিতে পাওয়া যায় না। মাঠে, ঘাটে, কিম্বা ধাতুক্ষেত্রে নানা বর্ণের নানা প্রকার হাঁস, টিল, মুনিয়া প্রভৃতি পাখী সকল মনের স্মৃতি আর চরিত্র বেড়ায় না। বসন্ত কাল অনেক দিন চলিয়া গিয়াছে, কিন্তু এখনও কোকিল ও পাপিয়ার মিষ্ট রব এক আধ বার শুনিতে পাওয়া যায়, কিছু দিন পরে আর তাহাদের গান শুনিতে পাইব না। কলিকাতা এবং বঙ্গদেশের অগ্রাণু স্থানে, এখন কাঁকে কাঁকে চল দেখা যায় কিন্তু বর্ষা আসিলে উহাদের সংখ্যা অনেক কমিয়া যাইবে, তখন তুই একটা এখানে ওখানে দেখা যাইবে মাত্র। কলিকাতায় আজ কাল হাড়গিলা

পাখী একেবারেই দেখিতে পাওয়া যায় না, কিন্তু আর কিছুদিন পরে অনেক আসিয়া উপস্থিত হইবে। খঞ্জন, হাঁস, প্রভৃতি পক্ষীরা এখন কোথায় গিয়াছে? চিলেরা কোথায় যাইবে? ইহারা কেনই বা যায় আর কেনই বা আসে, এই সকল বিষয় তোমরা কি কখন অনুসন্ধান করিয়া থাক?

তোমরা বোধ হয় নকমেই শুনিয়াছ যে, আনাদের দেশের বড় লাট, ছোট লাট প্রভৃতি বড় বড় ইংরাজ কর্মচারীগণ শীতের কয়েক মাস মাত্র কলিকাতায় থাকিয়া গ্রীষ্মকাল উপস্থিত হইলেই শিমলা, দার্জিলিং প্রভৃতি পার্বত্য প্রদেশে গিয়া থাকেন এবং গ্রীষ্মের কয়েক মাস সেই খানেই বাস করেন। শীত আসিতে না আসিতে আবার এদেশে ফিরিয়া আসেন। কি জন্ত তাঁহারা পাহাড়ে যান তা তোমাদের মত বুদ্ধিমান ও বুদ্ধিমতী পাঠক পাঠিকাকে বলিয়া দিতে হইবে না। তাঁহারা শীত প্রধান দেশের লোক, একেত গ্রীষ্ম প্রধান দেশে থাকাই তাঁহাদের পক্ষে কষ্টকর, তাহাতে আবার গ্রীষ্মকাল উপস্থিত হইলে তাঁহাদের পক্ষে এদেশে বাস করা আরও কষ্টকর, এমন কি অসাধ্য হইয়া উঠে। কাযে কায়েই তাঁহারা গ্রীষ্মকালটা এমন কোন স্থানে বাস করেন যেখানকার জল বায়ু অনেক অংশে তাঁহাদের স্বদেশের জল বায়ুর মত। এই সকল বড়

বড় কর্মচারীদের যথেষ্ট সুবিধা আছে বলিয়াই তাঁহারা কখন পর্কতে কখন এদেশে বাস করিতে পারেন। যখন আমরা গ্রীষ্মের জ্বালায় ছট্‌ফট্‌ করি তখন কি আমাদের কোন শীতল স্থানে বাস করিতে ইচ্ছা হয় না? পৌষ, মাঘ মাসের শীতে শরীর যখন কাঁপিতে থাকে তখন কি আমরা অপেক্ষাকৃত উষ্ণ স্থানে বাস করিতে ইচ্ছা করি না? আমাদের ইচ্ছা হইলেও সুবিধা নাই, কাষেই শীত ও গ্রীষ্মে কষ্ট পাইলেও তাহা সহ্য করিতে হয়। কিন্তু পক্ষীরা তা আমাদের মত নয়, তাহারা স্বাধীন, তাহাদের এক স্থান হইতে অল্প স্থানে বাইবার সুবিধাও যথেষ্ট, এক দেশ ছাড়িয়া অল্প দেশে যাওয়াও তাহাদের পক্ষে অতি সহজ ব্যাপার। আমরা শীতকালে যে সকল পক্ষী দেখিতে পাইতাম আর এখন তাহাদের দেখিতে পাই না—তাহারা সকলেই বেশী গ্রীষ্ম সহ্য করিতে পারে না বলিয়া শীত প্রধান দেশে চলিয়া গিয়াছে।

এখন তাহারা যেখানে বাস করিতেছে সেখানে শীত বেশী হইলেই আবার এদেশে ফিরিয়া আসিবে। কেবল যে শীত ও গ্রীষ্মের হাত হইতে পরিত্রাণ পাইবার জন্তই পক্ষীরা এদেশ ওদেশ করিয়া বেড়ায় তা নয়, আহাৰ অবেষণের নিমিত্তও সময়ে সময়ে তাহাদের এক দেশ ত্যাগ করিয়া অল্প দেশে যাইতে হয়। আহাৰ খুঁজিয়া বেড়ান প্রাণী মাত্রেরই স্বভাব। অতি প্রাচীন কালে যখন সমস্ত মানবজাতি অসভ্য ছিল, কাহারো ঘর ছুয়ার ছিল না, তখন মানুষেরও আহাৰের সুবিধা অসুবিধা বুঝিয়া এক স্থান ত্যাগ করিয়া অল্প স্থানে যাইত। এখনও মধ্যআসিয়া নিবাসী অসভ্য জাতির তাহাই করিয়া থাকে। যখন দেখে যে, বাসস্থানের নিকট

আর বড় একটা আহাৰোপযোগী বন্য পশু পাওয়া যায় না তখন অল্প এমন কোন স্থানে চলিয়া যায় যেখানে অন্ততঃ কিছু দিন আহাৰের ব্যাপারটা ভাল চলে। কিন্তু মানুষ বল, আর পশু বল, ইহাদের চলা ফেরার সুবিধা অপেক্ষাকৃত অনেক কম। বাইবার রাস্তায় যদি একটি বৃহৎ নদী পড়িল তাহা হইলে মানুষের নৌকা চাই, না হইলে মানুষ আর এক পা চলিতে পারেন না, একটি উচ্চ পাহাড় সম্মুখে থাকিলে সেটি আর অতিক্রম করিবার যো নাই। অত্যাচ্ছ চতুষ্পদ পশুদের পক্ষেও তাই। হয় তো এক স্থানে শীত ও বাতাসে কষ্ট পাইতেছে, বরফ পড়িয়া সমস্ত প্রদেশ ঢাকিয়া গিয়াছে, একটি তৃণ নাই যে আহাৰ করে, একশত ক্রোশ রাস্তা চলিয়া গেলেই সমস্ত কষ্ট দূর হয়, শীত ও বাতাস হইতে বাঁচে, যথেষ্ট আহাৰ পায়, কিন্তু বাইবার যো নাই, সম্মুখে হয় তো একটি সমুদ্রের খাড়ি, কিম্বা একটি পাহাড়, পশু ভায়ার সাধ্য নাই যে, এ বিপন্ন অতিক্রম করিয়া যান। পক্ষীরা কিন্তু এ সকল বাধা বিপত্তি কিছুই মানে না, তাহাদের আবশ্যিক হইলেই তাহারা এক দেশ হইতে অল্প দেশে চলিয়া যাইতে পারে। তোমরা গুনিয়া আশ্চর্য হইবে যে, হিমালয়ের মত উচ্চ পাহাড় অতিক্রম করিয়াও অনেক পক্ষী বৎসরের মধ্যে অন্ততঃ দুই বার আসা যাওয়া করে।

পূর্বেই বলা হইয়াছে যে, হাস, টিল প্রভৃতি জলচর পক্ষী আর মাঠে, ঘাটে, ধান্যক্ষেত্রে দেখিতে পাওয়া যায় না। একবারেই যে দেখিতে পাওয়া যায় না তাহা বলিতে পারি না; ছুই একটি স্থান বিশেষে থাকিতেও পারে, কিন্তু কাঁকে কাঁকে, দলে দলে আর দেখা যায় না। সুখার পাঠক পাঠিকার মধ্যে অনেকে হয় ত শীতের

ছুটিতে বাড়ী বাইবার সময় নদীর বালুকাময় চড়ায় নানা বর্ণের হাজার হাজার হাঁস বসিয়া থাকিতে দেখিয়া থাকিবেন। কতকগুলি হাঁস এক পা গুটাইয়া এক পায়ের উপর ভর দিয়া মাথাটি ডানাতে লুকাইয়া সুখে ঘুমাইতেছে; আবার কতগুলি ঐ বালুকাময় তটের নিকট নদীর নিম্নল জলে কেমন সাঁতার দিয়া বেড়াইতেছে, দেখিতে কি সুন্দর! কি আমোদজনক! কিন্তু এবার গ্রীষ্মের ছুটির সময় কি হাঁসের কাঁক দেখিতে পাইয়াছিলে? নিশ্চয় দেখিতে পাওনি। আর কেমন করেই বা দেখিতে পাইবে, তারা কি আর এ দেশে আছে! এখন তাহারা মধ্য আসিয়ার নানা প্রদেশের নদী, হ্রদ, তড়াগে মনের সুখে বিচরণ করিতেছে। কোন কোন জাতীয় হাঁস আবার সাইবিরিয়া পর্যন্ত গিয়া বাসা নিৰ্মাণ করিবার আয়োজন করিতেছে, বাসা! নিৰ্মাণ হইলেই ডিম পাড়িবে। আবার শীত পড়িলেই ছানা গুলিকে সঙ্গে লইয়া এদেশে চলিয়া আসিবে।

অক্টোবর মাস আরম্ভ হইতে হইতেই মধ্য আসিয়ার মঙ্গোলিয়া প্রভৃতি স্থানে অত্যন্ত শীত পড়িতে থাকে, হাঁস প্রভৃতি জলচর পক্ষী সকল তখন ঐ প্রদেশ ত্যাগ করিয়া ভারতবর্ষের দিকে যাত্রা করে। ঐ সকল প্রদেশে এখন যত হাঁস বাস করিতেছে সবগুলিই যে এক দিনে চলিয়া আসে তাহা নয়। ক্রমে শীত ও যেমন বৃদ্ধি হইতে থাকে হাঁসেরাও তেমনি দলে দলে চলিয়া আসে। নবেম্বর মাসের শেষ ভাগে যখন নদ, নদী, হ্রদ প্রভৃতি বরফে ঢাকিয়া যায় তখন আর একটি হাঁসও সেখানে থাকে না। মার্চ ও এপ্রিল মাসে আবার গিয়া জমা হয়। কর্ণেল প্রেজ ভ্রাস্কি নামক রুস দেশীয় একজন বিখ্যাত সৈনিক পুরুষ মধ্য আসিয়ার অনেক স্থানে পরিভ্রমণ করিয়া


আপনার চোখে হাঁস জাতির গতি বিধি ও স্বভাব বেশ করিয়া দেখিয়াছেন।

হাঁসেরা যখন হিমালয় অতিক্রম করিয়া ভারতবর্ষে আসিয়া উপস্থিত হয় তখন তাহারা প্রথমতঃ হিমালয়ের নিকটবর্তী অপেক্ষাকৃত শীত প্রধান প্রদেশে সকলে বাস করে; ক্রমে যত শীত বেশী হয় তত বাঙ্গলা প্রভৃতি নিম্ন দেশে চলিয়া আসে। ইহারা আপন আপন বাসস্থান বেশ মনে করিয়া রাখিতে পারে, এবং প্রতি বৎসর নির্দিষ্ট স্থানে আসিয়া উপস্থিত হয়। ইহারা দল ছাড়া থাকে না। একটি হাঁসকে কিন্তু আশ্চর্য রকম দল ছাড়া হইতে দেখা গিয়াছে।


১৮৭৭ খৃষ্টাব্দের ডিসেম্বর মাসে নানা জাতীয় অনেকগুলি হাঁস আলিপুর পশুশালার ঝিলে ছাড়িয়া দেওয়া হয়। কয়েক দিন পরে তিন চারিটি হাঁস বড় ঝিল ত্যাগ করিয়া গুণ্ডারের পুষ্করিণীতে গিয়া বাস করিতে লাগিল। কিছুদিন এইখানে থাকিয়া হাঁস কয়েকটি কোথায় চলিয়া গেল কেহ খোজ খবর করিল না! ১৮৭৮সালে ডিসেম্বর মাসের প্রথম গুণ্ডারের পুষ্করিণীতে একটি হাঁস খেলিয়া বেড়াইতে দেখা গেল, দেখিয়া বোধ হইল যে, যে কয়েকটি হাঁস চলিয়া গিয়াছিল এটি তাহাদের মধ্যের একটি, তৎকালে কিন্তু উহা বিশেষ মনযোগ আকর্ষণ করিল না, কারণ, আবার মার্চ মাস আসিতে না আসিতেই হাঁসটি কোথায় অদৃশ্য হইল। পরবৎসর ২৭সে নবেম্বর পুনরায় ঐ হাঁসটি আসিয়া উপস্থিত। এইরূপ পাঁচ বৎসর কাল হাঁসটি শীতের সময় আসিত এবং গ্রীষ্ম কালে চলিয়া যাইত। বিগত তিন বৎসর হইল হাঁসটিকে আর দেখা যায় না। হয় তো কোন নিষ্ঠুর শিকারীর হাতে প্রাণ হারাইয়াছে কিম্বা কোন দলে মিশিয়া গিয়াছে।

হাঁসটির কেমন স্মরণ শক্তি এবং স্থান বিশেষের প্রতি ভালবাসা! হাঁসেরা যখন হিমালয়ের উত্তর পশ্চিম কোণস্থিত গিরিশঙ্কট পার হইয়া যাওয়া আসা করে তখন কত শত হাঁস শীতে মরিয়া যায়।

পক্ষীদিগের স্থান পরিবর্তনের বিষয় আরও অনেক বলিবার রহিল, আগামী বারে বলা যাইবে।



## পিপীলিকার উপদেশ।



যখন পিপীলিকার বাড়ী আসিলাম তখন প্রায় সন্ধ্যা হইয়াছে। সেখানে যাইবামাত্রই বড় এক মজার যুদ্ধ দেখিলাম। একটা ক্ষুদ্র গুবরে পোকাকার সহিত বার তেরটা পিপীলিকার যুদ্ধ বাধিয়াছে। বেচারী গুবরে পোকা একলা, তথাপি সে নির্ভয়ে অতি বীরত্বের সহিত বার তেরটা পিপীলিকার সহিত যুদ্ধ করিতে লাগিল। আমি নিতান্ত উৎসুক-চিত্তে যুদ্ধ দেখিতে লাগিলাম, অনেকক্ষণ পর্যন্ত ঘোরতর যুদ্ধ চলিতে লাগিল; অবশেষে গুবরে

পোকাকারই জয় হইল, তাহার বীরত্বে চমৎকৃত হইয়া আমি করতালী দিয়া 'সাবাস সাবাস' করিয়া চীৎকার করিয়া উঠিলাম। তাহার পর বাড়ীর ভিতর গিয়া আহারাদির পর কিছু ক্ষণ আমার বন্ধুর সহিত গল্প করিতে করিতে শরীরের ক্রান্তি প্রযুক্ত শীঘ্রই ঘুমাইয়া পড়িলাম।



রাতটা বেশ নিরীক্রে কাটিয়াছিল, স্ননিদ্রার কোন ব্যাঘাত হয় নাই; ভোর হইবামাত্র আমার বন্ধু আসিয়া আমাকে জাগাইল। এবং আমার খাবার জন্ত এক টুকরা মিছরি লইয়া আসিল। আমার আহার সমাপ্ত হইলে পর পিপীলিকে কিছু গভীর ভাবে আমাকে বলিল, "ভাই আমি তোমাকে একটা বিষয়ে সাবধান করিয়া দিতেছি, আমাদের দলের লোকের সহিত গুবরে পোকাকার যে যুদ্ধ হইতেছিল তাহাতে আমাদের দলের লোক হারিয়া যায় সেই জন্ত তুমি গুবরে

পোকাকে 'সাবাস' বলিয়াছিল, তাহাতে আমাদের উদ্ধত স্বভাব কৃতিগ্ন যুবক বড় চটিয়াছিল, দেখ আমাদের হোঁড়ারা বড় গোঁয়ার, তাদের অগ্রপশ্চাৎ কোন বিবেচনা নাই, আর বড় অভিমानी, তাদের সম্বন্ধে কোন কথা বলিও না, অনর্থক ঝগড়া বাধাইয়া কাষ কি?" আমার তখন মাকড়সার কথাগুলি সব মনে পড়িতে লাগিল, আর ভাবিতে লাগিলাম পরের ধানে মই দিতে যাওয়া বড়ই অত্যাচার। আমার বন্ধুকে বলিলাম "আমি প্রতিজ্ঞা করিতেছি অতি সাবধানে তোমার ভাতৃবর্গের সহিত ব্যবহার করিব।" তাহার পর আমরা দুজনে পিপীলিকার দেশ দেখিতে লাগিলাম, তাহাদের বাড়ী ঘর ছয়ার বাস্তা নগর সমস্তই দেখিতে লাগিলাম। ইহাদের নগরটা প্রকাণ্ড এক গাছের গুঁড়ির পাশে; অর্ধেক মাটির উপরে অর্ধেক মাটির ভিতরে। ইহাদের বাস্তাগুলি মাটিতে সুড়ঙ্গ করা, ঘরগুলিও মাটি খুদিয়া তৈয়ার করা। মাটির উপরের অংশটা পিপীলিকাদের খুব পরিশ্রমের পরিচয় দেয়। মাটি দিয়া কেমন ছাত তৈয়ার করিয়াছে, ছোট ছোট খড়ী কুটা ও মাটি দিয়া প্রাচীর নির্মাণ করিয়া ছোট ছোট ঘর করিয়াছে, সেগুলি দেখিতে যেমন সুন্দর তেমনই পরিষ্কার!

পিপীলিকে বলিতে লাগিল "আমাদের এ নগর অতি প্রাচীন। ইহার নির্মাণ কার্য যে কবে আরম্ভ হয় তাহা ইতিহাস খুঁজিয়া পাওয়া যায় না। কেহই বলিতে পারে না ইহা কত দিনকার। তবে আমাদের ইতিহাসে অপেক্ষাকৃত আধুনিক ব্যাপারের নির্দেশ আছে। আমাদের দেশে কত যুদ্ধ হইয়া গিয়াছে, কত হত্যাকাণ্ড হইয়াছে। আমরা যুদ্ধে কত বন্দী আনিয়াছি। সন্ধি বিগ্রহ যে কত হইয়াছে তাহার হিসাব নাই। আমার

মনে আছে এবং এই কথা আমরা পুরুষাবলুক্রেমে গুনিয়া আসিতেছি যে, একদিন আবাল বৃদ্ধ সকলেই মহাভীত হইয়া একেবারে দিশাহারা হইয়া পড়িয়াছিলেন। ব্যাপারটা এই যে, আমাদের দেশে ভয়ানক ভূমি কম্প উপস্থিত হইল, সমস্ত ঘর বাড়ী ভাঙ্গিয়া ছারখার হইয়া গেল, কত লোক চাপা পড়িয়া মরিল, আমাদের শিশু সমস্ত কত হারাইল। তাঁহাদের মধ্যে যাহারা সাহসী ছিলেন তাঁহারা বাহিরে আসিয়া দেখেন যে, পাহাড়ের মত একটা প্রকাণ্ড অসুর, লম্বায় দশ বার হাজার হাত, চওড়ায় দু তিন হাজার হাত, দুটা হাত ও দুটা পা, আসিয়া আমাদের নগরের অর্ধেক উপড়াইয়া লইয়া গেল, তাহারই জন্ত এত কাণ্ড হইয়াছিল। অনেক অহুসন্ধানের পর ঠিক হইল যে সেই শত্রুটা মানুষ বলিয়া যে একদল প্রকাণ্ড প্রকাণ্ড অসুর আছে তাহারই একটা। ইহারা আমাদের শাবক চুরি করিতে আইসে, ইহারা শালিক ময়না বুলবুলী পোষে; তাহাদিগকে সেইগুলি খাইতে দেয়। আর মাছ ধরিবার সময়ে আমাদের ছোট ছোট বাচ্চা ধরিয়া তাহা দিয়া টোপ তৈয়ার করে। এই নিষ্ঠুর পাষণ্ডদের কিছুমাত্র মায়া দয়া নাই, আবার এই অসুরেরা সকলের প্রভু হর্তা কর্তা বিধাতা বলিয়া থাকি করিয়া বেড়ায়। কেউত আর বলবার নাই, গায়ে জোর বেশী, যা খুসী তাই করে। কিন্তু ভাই, আমরা দলে বেশী, আমরাও সময়ে সময়ে তাদের বড় জব্দ করিয়া থাকি।" আমি বলিলাম "ওদের জব্দকল্পিত কথা আর বলিও না। আমরা ফড়িং আমাদেরও ঐ রকম জোর করিয়া ধরিয়া লইয়া যায়, আর তাদের পোষা পাখিদের খাইতে দেয়। আমার ভাই, একদল মাসতুত ভাই আছে, তাদের কাছে ভায়ারা বড় জব্দ

থাকেন, তখন ইহাদের সব বীরত্ব ও চালাকি বাহির হইয়া যায়। আমার মাসতুত ভাইরা পঙ্গপাল, তাহারা যখন ঝাঁকে ঝাঁকে আসিয়া ওদের দেশে শত্রু ক্ষেত্রে পড়ে, সেই বার ভায়রা না খাইয়া মরেন, তাহাদের গায় পড়িলে ছটপট করিয়া মরেন, তখন আর ঘরের বাহিরে আসিতে সাহস হয় না, তাদের গরু বাছুর ঘোড়া সবই পঙ্গপালের জালায় ছট ফটয়া মরে।”

এই রকম কথা বার্তার পর আমি কতকগুলি নূতন নূতন পোকাকার বাড়ী দেখিতে পাইলাম। এক রকম শুঁয়োপোকা দেখিয়া জিজ্ঞাসা করিলাম একি ভাই। পিপড়ে বলিল “ওরা অনেক এখানে আছে। আমরা ওদের কিছু বলি না, আমাদের বাপ দাদারাও কিছু বলিতেন না, তাহারা আরও যত্ন করিতেন। আমাদের ছোট ছোট শিশুরা খোসা বদলায়, ইহারা সেইগুলি খায়। আমাদের অগ্নাত্ত যত ময়লা আবর্জনা থাকে ইহারা তাহা খাইয়া পরিষ্কার করিয়া দেয়। ইহারা আমাদের বড় উপকারে আসে। ইহারা না থাকিলে আমাদের বড় কষ্ট হইত। সেই জন্ত আমরা ইহাদের ঘর বাড়ী দিয়াছি ও যত্ন করিয়া থাকি।”

তারপর একটা ছোট হলুদে রঙ্গের গুবরে পোকাকার মত একটা পোকা দেখিয়া বলিলাম “একি ভাই!” পিপড়া বলিল “ওদের আমরা পুষিয়াছি। ওরা আমাদের গরু। ওবা দুধ দেয়। ওরা কেমন মধুর মত একরকম রস বের করে তা খাইতে বড়ই উপাদেয়। আমরা ইহাদের বড় যত্ন করি ও ভাল ভাল খাবার দি। আমাদের গোয়াল ঘরে আর এক রকমের গরু আছে, চল দেখবে চল।” গিয়া দেখি ছিম্ গাছে বেগুন গাছে

ও অগ্নাত্ত গাছে যে ছোট ছোট উকুনের মত পোকা থাকে তাই অনেক আছে।

পিপড়ে বলিল, “আমরা যখনই ইহাদের গাছের উপর দেখিতে পাই তখনই গুঁড় দিয়া ইহাদের ল্যাজের উপর স্ফুঁ স্ফুঁ দি আর অমনি ওরা কোন উচ্চ বাচ্য না করিয়া এক রকম রস বাহির করে, আমরা তাহা পান করিতে বড়ই ভালবাসি। তাই আমাদের ছেলেরা, ইহারা পোষ মানে কি না তাই পরীক্ষা করিবার জন্ত ধরিয়া আনিয়াছিল, এখন ইহারা বেশ পোষ মানিয়াছে এবং আমাদের ইচ্ছামত স্ফুঁ স্ফুঁ দিলেই সেই রস নির্গত করিয়া দেয়। ইহাদের ধরিয়া আনিয়াছি, এখানে আসিয়া ইহারা কিছু মাত্র অসন্তুষ্ট নহে, কারণ আমরা ইহাদের সহিত কোন অসদব্যবহার করি না। তবে ইহাদের পোষা কিছু কষ্টকর, ইহারা গাছের রস ভিন্ন আর কিছুই খায় না, আমাদের এদেশে গাছ নাই তবে আমরা গাছ রোপনের চেষ্টায় আছি।”

পিপড়ের গোয়াল ঘরে এই রকমের সব গরু দেখিলাম।

ক্রমশঃ ।




## অতি লোভের শাস্তি ।

১৬৪ পৃষ্ঠার পর ।

বিদ্যালয় ছাড়িয়া সে কলিকাতাতেই ১৫৭ টাকা বেতনের একটা কর্ম পাইল। সে আয়ে তাহার যদিও এক প্রকার কুলাইতে পারিত কিন্তু অসময়ে লেখা পড়া ছাড়িয়া দেওয়াতে তাহার মনে বড় ক্ষোভ হইল; সে মনে মনে প্রতিজ্ঞা করিয়াছিল যে তাহার ত লেখা পড়া হইলই, না, ভাইগুলিকে একবার মনের সাধে লেখা পড়া শিখাইবে। এই ভাবিয়া সে স্কুলের কর্মের উপরে তিন চারিটা প্রাইভেট পড়ান যুটাইল। বাপুর্বে সে কি ভয়ানক পরিশ্রম! অতি প্রত্যুষে উঠিয়া মুখ হাতে জল দিয়া পড়াইতে বাহির হয়। দুই জায়গায় পড়াইয়া ৯ টার সময় ফিরিয়া আসে, আসিয়া আহার করিয়া ১০টার সময় বিদ্যালয়ে যায়, আবার সেখানে হইতে ৪টার পর বাহির হইয়া, দুই জায়গায় পড়াইয়া ৮১২টার সময় বাসাতে আসে। এইরূপে সে যথেষ্ট অর্থ উপার্জন করিত। দুই তিনটা ভাইকে আনিয়া নিজের নিকট রাখিয়া অতি উত্তমরূপ লেখা পড়া শিখাইতে লাগিল। ক্রমে বাড়ীর চেহারা ফিরিয়া গেল, জনক জননীর হাহাকার দৈন্য দশা ঘুচিয়া গেল। বধূর অঙ্গে দুই দশখান গহনা হইল। লোকে দেখিতে লাগিল যে, সে দিন দিন বেশ উন্নতি করিতেছে। কিন্তু হঠাৎ একদিন রাত্রে সে ব্যক্তি পড়াইয়া বাসায় ফিরিয়া আসিয়া মুখ হাত ধুইয়া আহার করিতে যাইবে এমন সময়ে মাথা বেদনা করিতেছে বলিয়া চঞ্চল হইয়া উঠিল এবং দেখিতে দেখিতে অজ্ঞান হইয়া

পড়িল। ভাইগুলি অন্ত গতি হইয়া তৎক্ষণাৎ পাল্কা করিয়া হাসপাতালে লইয়া গেল। আত্মীয় স্বজন কলিকাতাতে যে দুই একজন ছিলেন সকলেই সংবাদ পাইয়া ছুটিয়া আসিলেন। বড় বড় ডাক্তারেরা তাহার চৈতন্ত করিবার জন্ত অনেক চেষ্টা করিলেন কিন্তু কিছুতেই চৈতন্ত হইল না। কয়েকদিন সেই অবস্থায় থাকিয়া তাহার মৃত্যু হইল। ডাক্তারেরা সকলেই বলিলেন যে, অতিরিক্ত পরিশ্রমের জন্ত সে মারা পড়িল।

আমরা সকলে হায় হায় করিতে লাগিলাম। এত পরিশ্রম না করিলেও তার চলিত। বধূর অঙ্গে এত গহনা না হোক, পরিবারের সকলে সুখে থাইয়া পরিয়া থাকিতে পারিত। কিন্তু মানুষের যখন আশা বাড়ে তখন বাড়িতেই থাকে, অবশেষে অর্থ-লোভে মানুষ শরীরকে শরীর বলিয়া গণনা করে না, শ্রমকে শ্রম বলিয়া ভাবে না। তাহার শাস্তিও পায়। এ ব্যক্তি যদি এত অতিরিক্ত শ্রম না করিত, তাহা হইলে আরও কত দিন বাঁচিয়া পিতা মাতার সেবা করিতে পারিত, ও ভাইদিগকে লেখা পড়া শিখাইতে পারিত। তাহার কিছুই হইল না। তাহাদের যে দৈন্ত দশা সেই দৈন্ত দশাই রহিয়া গেল। ভাইগুলিকে পড়া ছাড়িয়া কর্মের চেষ্টা দেখিতে হইল, এবং সমুদায় উন্নতির ব্যাঘাত হইয়া গেল। কোন প্রকারের লোভে শরীরের স্বাস্থ্য নষ্ট করিলে ঈশ্বরের নিকট অপরাধী হইতে হয়।



প্রাপ্ত ।

(বালকের রচনা ।)

## সাধুতার পুরস্কার ।

**বিশ্বাস**, নম্রতা, সত্য, বিশ্বাস, শ্রায়, ক্ষমা, পরোপকার প্রভৃতি গুণে যিনি অলঙ্কৃত, তাঁহাকে সাধু কহে। সাধুর ভাবকে সাধুতা ও তাহার পুরস্কারকে সাধুতার পুরস্কার কহে।

কি বালক, কি বালিকা, কি বৃদ্ধ, কি যুবা, সকলেরই ভাল বা সাধু হইবার ইচ্ছা হয়। কিন্তু বহুবিধ কারণ প্রযুক্ত এইভাবে কাহাতেও অধিক, কাহাতেও কম, তজ্জন্ত অনেকেই ভাল বা সাধু হইতে পারেন না। আমরা যদি বাল্যকাল হইতেই সাধু সঙ্গে থাকি, সংকথা শুনি, সচ্চিন্তা করি ও সাধুদিগের জীবন-চরিত পাঠ করি, এবং পিতা মাতা প্রভৃতি গুরুজনের প্রতি সদাচরণ করি, ও তাঁহাদের বশবর্তী হইয়া কার্য করি, তাহা হইলে আমরাও সাধু হইতে পারিব। এবং সাধু হইলেই তাহার পুরস্কার আছে। আর যদি তাহা না করিয়া সর্বদা খেলাইয়া বেড়াই, ও উন্নতির কথা ভুলিয়া গিয়া, বৃথা আমোদ, বৃথা গল্প করিয়া অমূল্য সময়কে নষ্ট করি, কুসঙ্গে বেড়াই, কুচিন্তা করি, তাহা হইলে ক্রমে সাধু না হইয়া সাধুর বিপরীত অসাধু হইব। আর আমাদের সাধু হইবার ইচ্ছাও কখন উন্নত হইবে না। সুতরাং আমাদের দিগকে দেখিলে সকলেই ঘৃণা করিবে; এমন কি আমাদের সহিত বাক্যালাপও করিবে না।

বিশ্বাস, সত্য, শ্রায় প্রভৃতি যাহা সাধুদিগের ভূষণ তাহাদেরই ছই একটীর পুরস্কারের বিষয় উল্লেখ করিব।

বিশ্বাস—আমাদের দেশের মহাত্মা রাজা রামমোহন রায় যিনি প্রথমে “ব্রাহ্মধর্ম” আবিষ্কার করেন, যাহার জীবন-চরিত গুণিতে বালক, বালিকা, বৃদ্ধ, যুবা, সকলেই ভালবাসে, তিনি যখন উক্ত (ব্রাহ্ম) ধর্ম আবিষ্কার করেন, ও শিক্ষিত লোকেরা গ্রহণ করিতে আরম্ভ করেন, তখন মহা হল স্থল ঘটিল, একবারে চারিদিকে ঘেঘানল প্রজ্জ্বলিত হইল, পুরাতন দিগ্গজ পণ্ডিতেরা ও প্রাচীনসংস্কারাপন্ন লোকেরা তাঁহার উপর কত অত্যাচার ও উৎপীড়ন করিতে আরম্ভ করিল; এবং ধর্মপ্রচারের নিমিত্ত কত বাধা দিতে আরম্ভ করিল, কিন্তু পর্তত যেমন সহস্র সহস্র তরঙ্গঘাতেও বিচলিত হয় না, সেইরূপ মহাত্মা রামমোহন রায়ও আপনার বিশ্বাস হইতে কিঞ্চিন্মাত্রও বিচলিত হইলেন না। তিনি এইরূপ অনেক পরিশ্রম করিয়া কলিকাতায় প্রকাশ্যে একটি ঈশ্বরের উপাসনালয় স্থাপন করিয়া বান। অধুনা সেই “ব্রাহ্মসমাজ” নানা শাখা বিশাখায় বিস্তৃত হইয়া পরমপিতা পরমেশ্বরের যশঃকীর্তন করিতেছে ও সঙ্গে সঙ্গে মহাত্মা রামমোহন রায়ের স্মরণ জীবনের পরিচয় দিতেছে। দেখ দেখি ভাই ভগিনী সকল, কেমন সাধুতার পুরস্কার হইল।


শ্রায় পরায়ণতা—স্ববিখ্যাত মৃত রামচন্দ্রলাল দে যিনি বাল্যকালে অনাভাবে কলিকাতায় মদনমোহন দত্ত মহাশয়ের বাটীতে থাকিয়া কিঞ্চিৎ ইংরাজী লেখা পড়া শিখিয়া তাঁহারই আকির্ষে ১০ দশ টাকা বেতনে মুদ্রি রূপে নিযুক্ত হন, তিনিই শ্রায় পরায়ণতার জন্ত সময়ে কলিকাতায় একজন প্রভূত ধনশালী বলিয়া বিখ্যাত হইলেন।

কোনও সময় রাম চন্দ্রলালের প্রভু তাঁহাকে কিছু টাকা দিয়া টালা কোম্পানির বাটীতে একটা

নির্দিষ্ট নীলাম ক্রয় করিতে পাঠান। তাঁহার (রামচন্দ্রলালের) আসিবার কিঞ্চিৎ পূর্বেই উক্ত নীলাম বিক্রয় হইয়া গিয়াছিল। কিন্তু অবিলম্বেই শুনিলেন যে, একখানি জাহাজ নীলামে ধরা হইয়াছে। তিনি এই জাহাজ খানি কয়েক দিবস পূর্বে দেখিয়াছিলেন। এবং তাহাতে কত মূল্যের দ্রব্য আছে, কি রূপেই বা উদ্ধৃত হইতে পারে, তাহা একপ্রকার নিরূপণ করিয়াছিলেন। এক্ষণে শুনিবা মাত্র তাঁহার পূর্বনির্দিষ্ট জাহাজ বলিয়া জানিতে পারিলেন, এবং শীঘ্রই তথায় উপস্থিত হইলেন। উপস্থিত হইয়া দেখিলেন যে, বাহা তিনি অনুমান করিয়াছিলেন, তদপেক্ষা অনেক অল্প মূল্যে ডাক হইতেছে; সুতরাং জাহাজ খানি ক্রয় করিবার নিমিত্ত অত্যন্ত বাগ্র হইলেন। তাঁহার ডাক সর্বাপেক্ষা অধিক হওয়ার, প্রভু মদনমোহনের নামে ১৪০০০ চৌদ্দ হাজার টাকার ক্রয় করিলেন। এই সকল কাণ্ড শেষ করিয়া তিনি নিকটস্থ অল্প কোনও গৃহে বিশ্রাম করিতেছেন, এমন সময় এক সাহেব উক্ত বস্ত্র ক্রয় করিবার নিমিত্ত তাঁহার নিকট আসিলেন; এবং তাহা লইবার জন্ত বাবু রামচন্দ্রলালকে কত ভয় দেখাইলেন, ও কত গালি দিলেন, কিন্তু তিনি কিছুতেই ভীত হইলেন না। অবশেষে তাঁহাকে বিক্রয় করিতে অহুরোধ করিতে বাবু রামচন্দ্রলাল চৌদ্দ হাজারের উপর প্রায় একলক্ষ টাকা লাভ রাখিয়া ছাড়িয়া দিলেন। এই লক্ষ টাকা মদনমোহনের গ্রাণ্য, কিন্তু তিনি মনে করিলেই আত্মসাৎ করিতে পারিতেন, কিন্তু লাভের টাকা লওয়া দূরে থাকুক, বরঞ্চ প্রভুর বিনামূল্যে এই কার্য করিয়াছেন বলিয়া সন্তুচিত ভাবে প্রভুর সন্যাসে গমন করিলেন। এবং সন্তোষের কারণে বিনীত ভাবে যথাযথ সমুদয়

বনিলেন; এবং স্বীয় দোষের জন্ত ক্ষমা প্রার্থনা করিয়া টাকাগুলি সম্মুখে ফেলিয়া দিলেন। মদনমোহন দত্ত মহাশয় বাবু রামচন্দ্রলালের শ্রায়পরায়ণতা ও সরলতা দেখিয়া তাঁহাকে পূর্বোক্ত লাভের সমস্ত টাকা পুরস্কার স্বরূপ দিলেন। এই খান হইতেই বাবু রামচন্দ্রলাল দে উন্নতির পথ প্রশস্ত হইল। শুনা যায় যে, শেষে তিনি কোটা টাকা করিয়া গিয়াছিলেন। আমাদের ত ইহাতে অনেক শিক্ষণীয় বিষয় রহিয়াছে; কিন্তু যাহারা বলিয়া থাকেন যে, মিথ্যা কথা, চুরি প্রভৃতি কদাচার কার্য না করিলে বাণিজ্য হয় না, তাঁহাদের বাবু রামচন্দ্রলাল দে মহাশয়ের দৃষ্টান্ত অল্পকরণ করা উচিত। আইস ভাই ভগিনী সকল! আমরাও এখন হইতে সাধু হইতে চেষ্টা করি, তাহা হইলে বড় হইয়া সাধু হইতে পারিব।

শ্রীকৃষ্ণবিহারী দাস, চন্দননগর।



## ভরত-বিলাপ ।

কৈকেয়ী রাম, লক্ষণ ও সীতাকে চতুর্দশ বৎসরের জন্ত বনে পাঠাইয়া, ভরতকে মাতামহের ভবন হইতে আনাইল। ভরত রামের বনগমনের কথা কিছুই জানিতেন না। তিনি গৃহে আসিয়া রামের বন গমন সংবাদ ও পিতার মৃত্যু সংবাদ জানিতে পারিয়া শোকে অধীর হইয়া পড়িলেন। নিজ মাতা কৈকেয়ীকে অনেক তিরস্কার করিয়া তৎপরে মহারাণী কৌশল্যার নিকট গমন করিলেন। কৌশল্যার সহিত তাঁহার কিরূপ কথা বার্তা হইয়াছিল তাহারই বিবরণ



বান্ধীকির সংস্কৃত রামায়ণ হইতে সহজ বাঙ্গলাতে অনুবাদ করিয়া দেওয়া গেল। এবারে স্থানাভাবে কৌশল্যার সহিত সাক্ষাৎ করা পর্যন্ত দেওয়া গেল, ভারতের বিলাপ আগামী-বারে দেওয়া যাইবে।

ভরত চেতনা পেয়ে বহুক্ষণ পরে,  
কাতরে বিলাপ করে, ভাসে নেত্র-ধারে।  
কৈকেয়ী সমীপে বসি হেঁট-মুখ লাঞ্জে,  
ভরত ভৎসনা করে সভাঙ্গন মাঝে;—  
“চাহি না এ রাজ্য-পদ, তোর কুমন্ত্রণা  
করিবু প্রতিজ্ঞা আর কাণে লইব না।  
রাম অভিবেকে পিতা করিলা বাসনা;  
দূরে থেকে বার্তা তার কিছুই জানি না;  
শক্রর ভয়ের সনে থাকি দূরদেশে,  
না জানি কেমনে রাম গেলা বনবাসে।  
প্রাণের লক্ষণ ভাই, ঠাকুরাণী সীতা,  
গেলা শূত্র করি ঘর, না জানি বারতা।”  
ভরত কাঁদিয়া কহে কত আর্তস্বরে!  
শুনিয়া কৌশল্যা ভাকি কন স্নমিত্রারে;—  
“ওলো শোনু ঘরে বুঝি আসিল ভরত,  
শোন লো বিলাপ করি কাঁদিতেছে কত।  
ভরত ধান্নিক ধীর সাধু সদাশয়,  
বারেক দেখিতে তারে ব্যাকুল হৃদয়।”  
এত বলি রাম-মাতা, শোকেতে মলিনা,  
শীর্ণ-দেহ, শ্লান-কান্তি, যেন দীন হীনা,  
চলিতে শক্তি নাই কাঁপে থর থর,  
ভরত উদ্দেশে মাতা যান তার ঘর।  
ওদিকে ভরত মায়ে নিন্দিয়া বিশেষ,  
কৌশল্যা দর্শন আশে যান অবশেষ,  
সঙ্গেতে শক্রর নীর; বায় ছুই জনে;  
পথেতে হইল দেখা কৌশল্যার সনে।  
অমনি হারয়ে জ্ঞান পড়িলা জননী;  
আলিঙ্গিয়া ধরি তোলে ছুই নরমণি!

পাইয়া চেতন মাতা দেখে নেত্র-জলে  
ভাসিছে দৌহার মুখ; সম্বোধিয়া বলে;—  
“রাজ্য যদি চাও বাপ ভুঞ্জ নিষ্কণ্টকে,  
মা তোর কৌশলে রাজ্য ঘটাইল তোকে,  
প্রাণের কুমারে মোর পাঠাইল বনে;  
না জানি কি গুণ তাতে বুদ্ধিল বা মনে।  
বল বাপ মায়ে তোর, করুণা করিয়া  
অভাগীকে সেই বনে দিক পাঠাইয়া।  
তোরা থাক রাজ্যে বাপ, আমি অভাগিনী  
বনে যাই, গেল বথা আনার বাছনি।  
ধান্নিক বশস্বী বীর আমার শ্রীরাম,  
যাই তার পাশে, রাজ্যে নাহি মোর কাম।  
দেও অহুমতি বাপ স্নমিত্রারে লয়ে,  
ছাড়িয়া এ রাজ্য-পদ যাই দূর হয়ে।  
রাজার আদেশ আছে তর্পণ তাঁহার  
করিতে পাবে না তুমি, নাহি অধিকার।  
সেই আগ্নহোত্র লয়ে পলাই ছুজনে,  
নিজে রেখে এস বাপ, সে ঘোর কাননে।  
যেখানে প্রাণের রাম তপস্রাতে রত,  
দিয়ে এস সেই স্থানে বাপরে ভরত।  
স্ববিস্তীর্ণ এই রাজ্য, হস্তি অশ্ব রথ,  
ভুঞ্জ তুমি, কৈকেয়ীর পূর মনোরথ।”  
ব্রণেতে ফুটালে স্মৃতি যেমন যাতনা,  
ভরত পাইলা প্রাণে তেমনি বেদনা।  
হারয়ে চেতনা বীর কৌশল্যা চরণে  
পড়ে গেল, দর দর ধারা ছনয়নে।  
বহুক্ষণে পেয়ে জ্ঞান, উঠিয়া বসিল,  
অঞ্জলি বাঁধিয়া মায়ে বলিতে লাগিল।  
“মাগো আমি জ্ঞানে ধর্ম্মে কিছুই না জানি;  
পোড়াও না বাক্যানলে আমারে জননি!

ক্রমশঃ।

## এলিফাণ্টা গিরি-মন্দির ।

বুদ্ধ খার পাঠক পাঠিকা; তোমরা বোধ  
হয় শুনিয়া থাকিবে যে, আমাদের এই  
দেশে ছুই তিন হাজার বৎসর পূর্বে  
বৌদ্ধ-ধর্ম্ম প্রচার হইয়াছিল। ভারতবর্ষের ম্যাপ  
খুলিয়া তোমরা বেহার ও অযোধ্যার মধ্যে  
গোরকপুর নামে একটি নগর দেখিবে, তাহার  
কিরদূরে আড়াই হাজার বৎসর পূর্বে কপিলাবস্ত  
নামে একটি বড় নগর ছিল। ঐ নগরে সেই  
সময়ে শুদ্ধোদন নামে শাক্য বংশীয় একজন রাজা  
রাজ্য করিতেন। মহাত্মা বুদ্ধ তাঁহার ঘরে জন্ম-  
গ্রহণ করিয়াছিলেন। তাঁহার প্রকৃত নাম ছিল  
গৌতম; পরে অলৌকিক জ্ঞান-সম্পন্ন হওয়াতেই  
বুদ্ধ নাম প্রাপ্ত হইয়াছিলেন।

গৌতম বাস্তু্যাবধিই ধর্ম্মাচুরাগী ও চিন্তাশীল  
ছিলেন। রাজ সংসারের ধূম ধাম তাঁহার ভাল  
লাগিত না। তাঁহার পিতা তাঁহার মন ফিরা-  
ইবার জন্ত অনেক চেষ্টা করিয়াছিলেন, কিন্তু  
কিছুতেই কৃত-কাথ্য হইতে পারেন নাই। অবু-  
শেষে গৌতম রাজ সম্পদ পরিত্যাগ করিয়া  
সন্ন্যাসী হইয়া গেলেন। ছয় বৎসর কঠোর  
তপস্রার পর তিনি এক নূতন ধর্ম্মমত প্রচার  
করিতে আরম্ভ করিলেন। দিন দিন তাঁহার  
দলে শত শত লোক যুটিতে লাগিল। ক্রমে  
বড় বড় রাজারা তাঁহার নতাবলম্বী হইল। বর্ত-  
মান পাটনা নগর যেখানে দেখিতেছ, তখন  
ঐ স্থানে একটি রাজ-নগর ছিল। সেই নগরে  
অশোক নামে একজন রাজা ছিলেন। তিনি  
বৌদ্ধ-ধর্ম্ম গ্রহণ করিয়াছিলেন। উক্ত ধর্ম্ম গ্রহণ

করিয়া তিনি দেশ বিদেশে ধর্ম্ম-প্রচারক পাঠা-  
ইয়াছিলেন। ভারতবর্ষের সর্বত্রই বৌদ্ধ প্রচা-  
রকরণ ছড়াইয়া পড়িয়াছিলেন; এমন কি ভারত-  
বর্ষ পার হইয়া সিংহল দ্বীপ ও পূর্বে জাভা,  
জাপান, চীন প্রভৃতি স্থানেও গিয়া পড়িয়া-  
ছিলেন। অশোক রাজা আর একটি কার্য্য করিয়া-  
ছিলেন; তিনি অনেক পর্ব্বতের গুহার মধ্যে মনো-  
হর গিরি-মন্দির সকল নির্মাণ করাইয়াছিলেন।  
বৌদ্ধ তাপসগণ তাহার মধ্যে বসিয়া ধ্যান ধারণা  
করিতেন। সেখানে প্রস্তরফলকে বুদ্ধের উপদেশ  
সকল খোদিত হইয়াছিল।

ভারতবর্ষের নামাঙ্ক্যে একরূপ বৌদ্ধ-কীর্ত্তি  
সকল এখনও বিদ্যমান আছে। অশোকের খোদিত  
অনেক প্রস্তরফলক পাওয়া গিয়াছে, তাহার কতক-  
গুলি কলিকাতার মিউজিয়মে আনিয়া রাখা হই-  
য়াছে। একরূপ বোধ হয়, গিরি-গুহা খনন করিয়া  
মূর্ত্তি নির্মাণ করার পথ বৌদ্ধেরা প্রথমে প্রদ-  
র্শন করিয়া থাকিবে। তৎপরে হিন্দুধর্ম্মাবলম্বীগণ  
তাঁহার অনুসরণ করিয়াছেন। কোন কোন  
স্থানে একরূপ দেখা যায় যে, কোন গিরিগুহাতে  
অগ্রে বৌদ্ধগণ মন্দির নির্মাণ করেন, তৎপরে  
আবার হিন্দুর প্রতাপ বাড়িলে তাহাতে হিন্দুদের  
দেবীর মন্দির নির্মিত হইয়াছে।

ভারতবর্ষে একরূপ ধর্ম্মে ধর্ম্মে বিবাদের অনেক  
চিহ্ন দেখিতে পাওয়া যায়। উত্তর পশ্চিম অঞ্চলে  
ও পঞ্জাবে অনেক মুসলমানের মসজিদ দেখা যায়  
যাহা এক সময়ে হিন্দুর দেবালয় ছিল, মুসলমান  
রাজাগণ হিন্দুর দেবালয় ভাঙ্গিয়া তাহার উপরে  
মসজিদ নির্মাণ করিয়াছেন। আবার শিকদিগের  
অমৃত-সরস্বিত স্বর্ণ-মন্দির দেখিলে বোধ হয়  
শিক রাজগণ মুসলমান মসজিদ ও গোরস্থান  
হইতে উৎকৃষ্ট প্রস্তর সকল হরণ করিয়া সেই

মন্দির নিৰ্মাণ করিয়াছেন। কিছু দিন পূর্বে গুজরাটের আমেদাবাদ নগরের একটা প্রস্তরে বাঁধান রাস্তার কতকগুলি পাথর উঠিয়া যাওয়ায় উণ্টাইয়া দেখা গেল যে, তাহার অপরিদিকে হিন্দুর দেবমূর্তি রহিয়াছে। পরে যে পাথর খানি তোলা যায় সেই খানেই একটা দেবমূর্তি। ইহাতে অনুমান হয় যে, ঐ নগরের কোন মুসলমান রাজা কোন হিন্দু দেবালয় ভগ্ন করিয়া সেই সকল দেবমূর্তি দ্বারা ঐ রাস্তা নিৰ্মাণ করিয়াছিলেন, উদ্দেশ্য এই যে, লোকে তাহাদিগকে পদ দ্বারা দলন করিয়া ষাউক।

যাহা হউক যে গিরি-মন্দিরটির বিষয় আমরা বর্ণনা করিব, তাহার বিষয় কিছু বলি। এই গিরি-মন্দিরটা বোম্বাই সহরের কিছুদূরে সমুদ্র মধ্যস্থিত একটা পর্বতের উপরে অবস্থিত। বোম্বাই হইতে লোকে বোট করিয়া এই গিরি-মন্দির দেখিতে গিয়া থাকে। বোম্বাইএর নিকটে সমুদ্র সর্বদা আন্দোলিত, সাহসী লোক না হইলে বোট যাইতে বড় ভয় পায়। বোট ডোবে না কিন্তু তরঙ্গের উপরে নাচিতে থাকে, ও কখন কখনও তরঙ্গের জল বোটের উপরে আসিয়া আরোহিদিগকে স্নান করাইয়া দেয়। এই জন্ত এলিফাণ্টা গিরিগুহা দেখিতে যাইবার সময় লোকে অনেক সময় দুই স্কট কাপড় লইয়া যায়। বোট নাচিতে নাচিতে, ছলিতে ছলিতে, সেই পর্বতের নিকট উপস্থিত হইলে দেখি, বরাবর পাৰ্বাণ-নিৰ্ম্মিত সোপানশ্রেণী উপরে উঠিয়া গিয়াছে। উঠিয়া দেখি, সোপানগুলি কি সুন্দর! তাহাতেই বা কত পরিশ্রম হইয়াছে! ক্রমে গিরিমন্দিরের দ্বারে গিয়া পৌঁছিলাম। সেখানে দুই একখানি ঘর বাঁধিয়া প্রহরীস্বরূপ দুই চারিজন লোক আছে। তাহারা পথ প্রদর্শন করিল। ভিতরে প্রবেশ করিয়া

দেখি, এক আশ্চর্য্য দৃশ্য। দেখিলে বোধ হয় সেখানে একটা সামান্য গুহা ছিল, তারপরে মানুষের পরিশ্রমের গুণে সেই গুহা এক আশ্চর্য্য মূর্তি ধারণ করিয়াছে। তাহার ভিতরে বড় বড় থাম, নানা প্রকার খোদিত মূর্তিবিশিষ্ট ঘর। এক পার্শ্বে একটা জলপূর্ণ ক্ষুদ্র উদপান (চৌবাচ্চা), সেখানে দিনরাত্রি জল ঝরিয়া পূর্ণ রাখিতেছে। ঘরগুলি প্রকোষ্ঠে ( মহলে মহলে ) বিভক্ত। বিশ্রাম কর, রাখিয়া থাও,—ধ্যান ধারণা কর, সকল কার্যের পক্ষে উপযুক্ত স্থান। সচরাচর বৌদ্ধ-নিৰ্ম্মিত গিরিমন্দিরে যে সকল ধ্যানস্থ বুদ্ধ মূর্তি দেখিতে পাওয়া যায়, এখানে তাহা বড় দেখিতে পাইলাম না। কতকগুলি প্রকাণ্ড প্রকাণ্ড মূর্তি দেখিলান, তাহার অবয়ব সকল কালক্রমে কোন কোন স্থানে ভাঙ্গিয়া গিয়াছে, ভাল করিয়া লক্ষ্য করিতে পারা গেল না। অনুমানে বোধ হইল কোন হিন্দু দেব দেবীর মূর্তি হইবে। এমনও হইতে পারে যে, এই গিরিমন্দির এক সময়ে বৌদ্ধদিগের দ্বারা নিৰ্ম্মিত হয় তৎপরে হিন্দুরাজাদিগের রাজত্ব কালে হিন্দুদিগের হস্তে পতিত হয়। তাঁহারা ইহাকে আপনাদের বিশ্বাস অনুসারে পরিবর্তিত করিয়াছেন।

পর্বতে যাঁহারা কখনও যান নাই, তাঁহারা গিরি-গুহা কি তাহা বুঝিতে পারেন না। পর্বতের গায়ে বা দুইটা পাহাড়ের মাঝে কখনও কখনও এক একটা গর্ত দেখিতে পাওয়া যায়। কোন কোন গর্তের মুখ এমন ছোট যে, একজন মানুষকে অতি কষ্টে প্রবেশ করিতে হয়। বাহির হইতে দেখিলে বোধ হয় যে, গর্তটা অতি সামান্য ও অধিক দূর বিস্তৃত নয় কিন্তু প্রবেশ করিয়া দেখ, দেখিতে পাইবে যে, তাহা বহুদূর-বিস্তৃত, কোন কোনটার মধ্যে যাইবার বেশ পথ আছে; কোন

কোনটা বে কতদূর বিস্তৃত তাহার ঠিকানা করা যায় না। ভিতরে এমনি অন্ধকার ও বায়ু এমন বন্ধ যে যাইতে ভয় হয় ও নিঃশ্বাস বন্ধ হইয়া আসে। এই সকল গিরিগুহাকে কাটিয়া বৌদ্ধ ও হিন্দু শিল্পীগণ মনোহর দেব-মন্দির নিৰ্ম্মাণ করিয়াছিলেন। এলিফাণ্টা গিরি-মন্দির তাহার একটা। সখার পাঠক পাঠিকা! গিরি-মন্দিরের কথা যদি তোমাদের শুনিতে ভাল লাগে আরও কতকগুলির বর্ণনা সংগ্রহ করিয়া শুনাইতে পারি।

## পণ্ডিতের ভ্রান্তি ।

**গিরি** মন্দির সময়ে সময়ে বড় বড় পণ্ডিতের বড় বড় ভ্রান্তির কথা শুনিয়া কত কৌতুক করিয়া থাকি। আমাদের দেশে প্রাচীন কালে ত্রায়শাস্ত্রের বড় চর্চা ছিল। সর্বদা স্মৃষ্ণ স্মৃষ্ণ বিষয়ের বিচার করিয়া নৈয়ায়িক পণ্ডিতেরা অনেক সময় স্থূল স্থূল বিষয় ভুলিয়া যাইতেন। একরূপ গল্প আছে যে, একবার একজন মহামহোপাধ্যায় নৈয়ায়িক পণ্ডিত ত্রায়ের স্মৃষ্ণ স্মৃষ্ণ তর্ক ভাবিতে ভাবিতে বাড়ীতে আসিতেছিলেন। তিনি তখন চিন্তাতে এমনি নিমগ্ন যে, বাহিরের বিষয় একেবারে ভুলিয়া গিয়াছেন। এমন সময়ে একজন লোক আসিয়া কৌতুক করিয়া খুব গভীরভাবে তাঁহাকে বলিল—“ভট্টাচার্য্য মহাশয় আপনার বাড়ী বড় অমঙ্গল সংবাদ। আপনার গৃহিণী বিধবা হইয়াছেন।” ব্রাহ্মণের এ বুদ্ধিটুকুও তখন যোগাইল না যে, তিনি বাঁচিয়া থাকিতে তাঁহার পত্নী কিরূপে বিধবা হইবেন। তিনি খুব চিন্তান্তিত অন্তরে ঘরে ফিরিয়া আসিলেন।

যখন তাঁহার পত্নী তাঁহার পা ধুইবার জল দিতে আসিলেন তখনও তাহার ভ্রান্তি বুচে নাই; তাঁহার শরীরে অলঙ্কার দেখিয়া ব্রাহ্মণ একেবারে কুপিত হইয়া উঠিলেন এবং নিজের বিধবা কন্যাকে ডাকিয়া জিজ্ঞাসা করিলেন; “আমি শুনিয়া আসিলাম তোমার গর্ভধারিণী বিধবা হইয়াছেন, তথাপি তাঁহার দেহে অলঙ্কার; এ কিরূপ বিধি?” কন্যা হাসিয়া বলিল, “সে কি বাবা! ত্রায় পড়িয়া তোমার বুদ্ধিভ্রান্তি কি একেবারে গিয়াছে? তুমি থাকিতে মা কিরূপে বিধবা হইবেন।” তখন ব্রাহ্মণ ভাবিলেন—তাই তো!”

ইংলণ্ডেও একরূপ অনেক গল্প প্রচলিত আছে; তাহার কয়েকটা নিম্নে দেওয়া গেল।

প্রসিদ্ধ গণিতবেত্তা ও বৈজ্ঞানিক আইসাক নিউটন সাহেব বাচ্চা গুদ একটা বিড়াল পুষিয়া ছিলেন। বিড়ালের থাকিবার জন্ত একটা ছোট কাঠের ঘর তৈয়ার করেন। বিড়ালটার সেই ঘরে ঢুকিবার জন্ত একটা খুব বড় ছিদ্র করিয়া রাখেন। তার পর মনে মনে ভাবিলেন যে, বড় বিড়ালটার যাইবার পথ ত করিলাম, ছোট বিড়ালটা ঘরে ঢুকিবে কি করিয়া? এই বলিয়া তিনি সেই বড় ছিদ্রের পাশে ছোট বিড়ালটা ঢুকিতে পারে এই রকম একটা ছোট ছিদ্র করিলেন। বড় ছিদ্র দিয়া বড় বিড়াল যাইবে, ছোট ছিদ্র দিয়া ছোট বিড়ালটা যাইবে। যিনি অঙ্কশাস্ত্রের অতি কঠিন এবং দুর্লভ প্রশ্নের মীমাংসা করিতে পারিয়াছিলেন, তাঁহার বুদ্ধিতে আর এটা যোগাইল না যে, যে ছিদ্র দিয়া বড় বিড়াল প্রবেশ করিতে পারে সেই ছিদ্র দিয়া ছোট বিড়ালও প্রবেশ করিতে পারিবে।


বিখ্যাত নাটককার এবং অদ্বিতীয় বক্তা শেরিডান সাহেব একটা বাগান বাড়ী ভাড়া

করেন। সে বাড়ীর চারিদিক বেড়া দিয়া ঘেরা ছিল। একদিন বাড়ীর বাহির হইয়া বেড়ার কাঁপ বা দরজা দড়ি দিয়া বাঁধিয়া চলিয়া গিয়াছিল। ফিরিয়া আসিয়া আর সে দড়ির বাঁধন খুলিতে পারিলেন না। অগত্যা বেড়া লাফাইয়া আসিতে হইল। এইরূপ ছুই দিন ধরিয়া যতবার আবশ্যক হইত ততবারেই বেড়া লাফাইয়া আনা যাওয়া করিতেন। ছুইদিন পরে তাঁহার এক বন্ধু তাঁহার সহিত সাক্ষাৎ করিতে আইসেন। শেরিডান বলিলেন, অল্পগ্রহ করিয়া বেড়াটা লাফাইয়া আসুন। তাঁহার বন্ধু বলিলেন, দরজাটা খুলিয়াই দিন্ না কেন? তিনি উত্তর করিলেন ও দড়ির বন্ধন আমি খুলিতে পারি না। বন্ধু বলিলেন, দড়িটা তবে কাটিয়া ফেলেন না কেন? তখন শেরিডান প হইয়া তাঁহার বন্ধুর দিকে কিছু ক্ষণ তাকাইয়া রহিলেন, তৎপরে পকেট হইতে ছুরি বাহির করিয়া দড়ি কাটিয়া দিলেন ও সজোরে এক লাথি মারিয়া বেড়ার দরজা ভাঙ্গিয়া ফেলিলেন এবং তাঁহার বন্ধুকে বলিলেন “আপনি যদি আমার বন্ধু হন এবং আমাকে কিছুমাত্র ভাল বাসেন তবে আমার পৃষ্ঠে ঐরূপে পদাঘাত করুন।” বাঁহার হাসি ঠাট্টার সময়ে, রসিকতার সময়ে মজার মজার কথা বলিতে এবং নাটকে মানব মনের গূঢ় ও বিচিত্র ভাব সকলের বর্ণনা করিতে যে বুদ্ধি যোগাইত, বেড়ার দড়ি কাটিলে যে বেড়া খোলা যায় সে বুদ্ধি আর যোগাইল না!

মার্কিন দেশীয় একজন পণ্ডিতের বাড়িতে সন্ধ্যার সময়ে তাঁহার এক বন্ধু তাঁহার সহিত দেখা করিতে গিয়াছিলেন। তিনি বলেন যে, আমি তাঁহার যে ঘরে গিয়া উপস্থিত হইলাম, সেই ঘরে এত কম আলো ছিল যে, বলিতে গেলে আমি কিছুই দেখিতে পাইতেছিলাম না; অতি কষ্টে এক

ধার হইতে অল্প ধারে গেলাম। দেখিলাম তিনি চিঠি লিপিতে চেপ্টা করিতেছেন; তিনি আমাকে বলিলেন যে, তাঁহার চোখ খারাপ হইয়া আসিতেছে, তিনি কি লিখিতেছেন তাহা স্পষ্ট দেখিতে পান না। আমি কিছু আশ্চর্যান্বিত হইয়া মিট মিট করিয়া সে ঘরে যে গ্যাস জ্বলিতেছিল তাহা বাড়াইয়া দিলাম। তখন আমার বন্ধু চমৎকৃত হইয়া যে কিরূপ ভাবে একবার গ্যাসের দিকে একবার আমার দিকে একবার চিঠির দিকে তাকাইতে লাগিলেন তাহা বর্ণনা করা যায় না।

## বাঘ-মানুষ ।



যে মানুষে কেমন ভাব তাহা সকলেই জানে। ফাঁক পেলে কেহও কাহাকে ছেড়ে কথা বলে না। ব্যাত্র মহাশয় যদি সুবিধা পান তবে ঘাড় ভাঙ্গিয়া মানুষ ভায়ার রক্ত পান করিতে ক্রটি করেন না; আর মানুষে সন্ধান পাইলেও গোলা বারুদের তোপ-ধ্বনি করিয়া দাদা মহাশয়ের অভ্যর্থনা করিয়া থাকেন। \* আনাদের দেশে বাঘ ও মানুষের একরূপ আদর অভ্যর্থনা প্রায়ই হইয়া থাকে। কিন্তু সময়ে সময়ে আবার ইহাও শুনা যায় যে, বাঘের ঘরে মানুষের সন্তান পালিত হইয়া থাকে। আমার মনে আছে ছেলে বেলা এই রকম কত গল্প শুনিয়াছি। যখন বড় হইয়া ইংরাজী পড়িতে আরম্ভ করিলাম তখন

\* আমরা ডারউইন সাহেবের হস্ত অনুসারে ব্যাত্রকে জ্যেষ্ঠ বলিলাম, বোধ হয় ইহাতে কাহারও আপত্তি হইবে না।

আর এসমুদায় গল্পে বড় বিশ্বাস হইত না। কিন্তু ইংরাজী পড়িয়াও মিস্তার নাই। রোমের ইতিহাসে পড়িলাম রোমের স্থাপন কর্তা এক বাসিন্দার ভ্রম খাইয়া বাঁচিয়াছিলেন। সে সত্য যুগের কথাও বরং অশিষ্ট্য করিতে পারি, কিন্তু আজ কাল যাহা শুনিতে পাই তাহা আর গল্প বলিয়া উড়াইয়া দেওয়া যায় না।

১৮৫৭ সালে সিপাহী বিদ্রোহের সময়ে ফতেপুরে বাঘের ঘর হইতে একটা মানুষের বাচ্ছা আনা হইয়াছিল। সেখানকার সিভিল সার্জনের প্রদত্ত বিবরণে জানা যায় যে, বালকটির বয়স ৬ অথবা ৭ বৎসর ছিল। ছেলের কথা বলিতে পারিত না, কাপড় পরিতে চাইত না এবং রান্না করা কিছুই খাইত না। সে যে অনাথ নিবাসে থাকিত সেখানকার পাদ্রি সাহেব ভয়ে তাহাকে আটক করিয়া রাখিতেন। ডাক্তার সাহেব গিয়া তাহাকে ছেড়ে দিতে ব্যবস্থা করিলেন এবং মাংস ও হাড় রান্না করে খেতে দিতে বলিলেন। বাঘের মানুষ-বাচ্ছাকে ছেড়ে দেওয়া হইলে তাহার দৌরাণ্ড্য সকল অস্থির হইয়া উঠিল। একদিন ডাক্তার সাহেব গিয়া দেখিলেন যে, বাগানে ছুটাছুটি করিয়া বেড়াইতেছে। তাঁহাকে দেখিয়াই সে দৌড়িয়া আসিল এবং তাঁহার পায়ের উপর হাত দিয়া মুখের দিকে কাতর ভাবে তাকাইতে লাগিল; এবং যেন কথা বলিতে চেষ্টা করিতে লাগিল। কিন্তু অতি কষ্টেও কিছু বলিতে পারিল না, কেবল “শাক” এই কথাটা বাহির হইল। ডাক্তার সাহেব বুঝিতে পারিয়া তাহাকে শাক ও ভাত খাওয়াইতে বলিলেন। ক্রমে তাহার ছেলে বেলার কথা মনে আসিতে লাগিল এবং “মা” ও “বাবা” এই কথা বলিতে শিখিল। কিন্তু একরূপ ভাবে তাহাকে

অধিক দিন থাকিতে হইল না। শাক খাইতে খাইতে তাহার ভয়ানক পেটের অসুখ হইল। এইরূপে ক্ষীণ ও দুর্বল অবস্থায় পড়িয়া তাহার উদ্ধত ব্যাঘ্রের স্বভাব বাইতে লাগিল এবং ক্রমেই পোষ মানিতে লাগিল; ডাক্তার সাহেব কাছে গেলে আর তাহাকে সহজে ছাড়াইয়া আসিতে পারিতেন না। যদিও তাহার গায়ে বাঘের ভ্রায় দুর্গন্ধ ছিল এবং দেখিতে অতিশয় কদাকার ছিল তথাপি দয়ালু স্বভাব ডাক্তার তাহার কাছে অনেকক্ষণ বসিয়া থাকিতেন এবং তাহাকে আদর করিতেন। শত চেষ্টায়ও তাহার সে ব্যারামের উপশন হইল না। মৃত্যু দিন যখন ডাক্তার সাহেব তাহাকে দেখিতে গেলেন তখনও সে তাঁহার সহিত কথা কহিতে চেষ্টা করিল এবং যখন সাহেব আদর করিয়া তাহার মাথার উপর হাত দিলেন তখন সে সন্তোষের ভাব প্রকাশ করিল। হঠাৎ সে চমকিয়া উঠিল এবং সেই সঙ্গে সঙ্গে তাহার মুখ হইতে “শাক” এই কথাটা বাহির হইল। ডাক্তার সাহেব চাহিয়া দেখিলেন হতভাগ্য ইহ সংসার পরিত্যাগ করিয়াছে।

কিছুদিন হইল কাণপুরে একটা বাঘ-মানুষের কথা শুনা গিয়াছে। একজন ইংরেজ মহিলা যে বিবরণ দিয়াছেন তাহাতে জানা যায় যে, ইহার বয়স ২৫ কি ৩০ বৎসর হইবে। দেখিতে খুব বলবান এবং দৃঢ়কায়; চুলগুলি এবং পরিধান কাপড় বেশ মোটামুটি পরিষ্কার, দেখিলে খুব ছোট লোক কিম্বা ভিক্ষকের মত বোধ হয় না। ইহার যে চিত্র দেওয়া হইয়াছে তাহা দেখিলেই বুঝিতে পারিবে যে, বাঘ-মানুষকে কেমন ভদ্র লোকের মত দেখা যায়। চক্ষু দুটি ভয়ানক রক্তবর্ণ, দেখিলে ভয় করে, এবং জিহ্বা হিংস্র জন্তুর মত লকলকে। কাহাকেও কোন উপদ্রব করে না; কিন্তু সাধারণ

শোক বলিয়া থাকে যে, সে ছোট ছোট ছেলে পেলে দেখিলেই যেন খাইবার জন্ত জিহ্বা বাহির করে। যাহা হউক সকলেই তাহাকে ভয় করে এবং তাহাকে সন্তুষ্ট করিবার জন্ত কিছু কিছু খাদ্য দ্রব্য অথবা পরসা দিয়া থাকে।

বাঘ-মানুষকে জিজ্ঞাসা করাতে সে একটা ১০ বৎসরের মেয়েকে দেখাইয়া বলিল যে, যখন সে দেখিতে তত বড় তখন এক ভঙ্গল হইতে রোজ সাহেব তাহাকে ধরিতাছিল। তখন সে চাঁর হাত পার উপর ভর দিয়া চলিত। কিছুকাল হাঁসপাতালে থাকার পর রোজ সাহেব নিজেই তাহাকে রাখিয়া ছিন্দেন এবং মা বাপের মত যত্ন করিতেন। রোজ সাহেব বিলাত চলিয়া যাওয়ার পর হইতে সে অতিশয় দুর্বস্থায় পড়িয়াছে।


উল্ল ইংরাজ মহিলা যখন ঈশ্বর সম্বন্ধে তাহাকে জিজ্ঞাসা করিলেন তখন সে জোড় হাত করিয়া উপরের দিকে তাকাইয়া হিন্দুস্তানী ভাষায় ঈশ্বর এবং স্বর্গ সম্বন্ধে কত কথা বলিল। এই মনুষ্য-কৃতি ব্যাপ্ত-স্বভাব বিশিষ্ট জীব মদ খাইতে বিশেষ পটু। একটা ইংরেজ মহিলা ইহাকে অনেক দিন খাওয়া পরা দিতেন, কিন্তু হতভাগা ভয়ানক মদ খাইত ও খারাপ ব্যবহার করিত। অবশেষে সেখান হইতে পালাইয়া আর পুনরায় যায় নাই। এখনও যে পরসা কড়ি পায় তাহা দিয়া মদ খাইয়া থাকে।

অদ্ভুত জন্তুর আচার ব্যবহার প্রায়ই মানুষের



স্থায় হইয়াছে। এখন কাহারও কোন ক্ষতি করে না। শুনা গিয়াছে কয়েক বৎসর পূর্বে একদিন কোন স্ত্রীলোক তাহাকে তাড়াইয়া দেওয়াতে সে ভয়ানক রাগান্বিত হইয়াছিল এবং তাহাকে কামড়াইয়া রক্ত বাহির করিয়া দিল। ইহা ভিন্ন তাহার বিরুদ্ধে আর কিছু শুনা যায় নাই।

এই গল্প পড়িয়া কি তোমরা ঈশ্বরের আশ্চর্য্য করণার প্রমাণ পাইবে না? তাঁহার সৃষ্ট জীব জন্তকে তিনি কত ভাবে লালন পালন করিতেছেন ভাবিয়া মুগ্ধ হইতে হয়! যে বাঘ মানুষের ভক্ষক, ঈশ্বরের আদেশে সেই আবার রক্ষক হইয়া থাকে। আশ্চর্য্য ঈশ্বরের কৌশল!! ধন্য তাঁহার মহিমা!!!



জুন, ১৮৮৭।

## পাখীদের দেশ ভ্রমণ । (৬৮ পৃষ্ঠার পর) ।

হাঁস ভিন্ন আরও অনেক প্রকার পক্ষী শীত-কালে এদেশে আইসে এবং গ্রীষ্ম কালে আবার চলিয়া যায়। সে পক্ষীগুলি যে কি কি তাহা বলিয়া দেওয়া সহজ নয়, কারণ তাহা-দিগের অধিকাংশেরই বাঙ্গালা নাম নাই। তবে সাধারণতঃ এই শ্রেণীর পক্ষীকে “কাদাখোঁচা” বলিয়া থাকে, কারণ ইহার নদী, তড়াগ ও বিলেত ধারে ধারে চরিয়া বেড়ায়, এবং ঠোট ও পা দ্বারা নরম মৃত্তিকা হইতে ছোট ছোট ভেক ও শস্যক ভুঙ্গিয়া আহাৰ করে। হাঁসের মত ইহার সাঁতার দিতে পটু নয়। ইহারা যে হাঁসের মত সাঁতার দিতে পারে না কেন, তাহা এই দুই শ্রেণীর পক্ষীর পা দেখিলেই সহজে বুঝা যায়। হাঁস জাতীয় পক্ষীর পায়ের আঙ্গুলগুলি একখানি পাতলা চর্ম দ্বারা আবৃত, কাদাখোঁচার আঙ্গুল-গুলি মুক্ত, হাঁসের মত গোড়া নয়। হাঁসের পায়ের গঠন এইরূপ হওয়াতে তাহাদিগের পক্ষে সাঁতার দেওয়া বড় সুবিধা,—কারণ ছুখানি পা ছুখানি দাঁড়ের কাজ করিয়া থাকে। তোমরা হয় ত

অনেকেই ডাক পাখী (ডাহক) দেখিয়াছ,—আর যদি না দেখিয়া থাক তবে এবার সুবিধা পাইলেই দেখিবে, কাদাখোঁচা পাখীর আকার অবয়ব অনেকটা এই ডাক পাখীর মত।

হাঁস, কাদাখোঁচা প্রভৃতি পক্ষীগণ যখন এদেশে আইসে তখন তাহাদিগের সঙ্গে সঙ্গে বাজ, বহিরি, লঘুঘর প্রভৃতি কতকগুলি শিকারী পক্ষীও এদেশে আসিয়া উপস্থিত হয় এবং নিরীহ জলচর এবং অগ্নাত পক্ষীগণকে মারিয়া আহাৰ করে। গরিব হাঁস ও কাদাখোঁচা বেচারীদের আর নিস্তার নাই, শীতের প্রকোপ হইতে রক্ষা পাইবে এবং যথেষ্ট আহাৰ পাইবে বলিয়া তাহারা যদি এদেশে আসিল, এখানেও তাহাদের সঙ্গে সঙ্গে অত্র প্রকার শত্রু আসিয়া উপস্থিত! ঐ সকল শিকারী পক্ষীর হাঁস এবং অগ্নাত পক্ষীর প্রাণ বধ করিয়া আহাৰ করে শুনিয়াই হয়ত তোমরা চট্টয়া উঠিবে। বলিবে, ঐ নিষ্ঠুর পক্ষীরা অত্র কিছু আহাৰ করে না কেন? কিন্তু ঐ শিকারী পাখীদিগেরই বা দোষ কি? তাহারা ত আর আমোদ করিয়া কিম্বা নিছা মিছি জন্ম করিব বলিয়া অন্য পাখী মারিয়া খায় না। তাহাদের আহাৰই হ'ল মাংস। ধান, ছোলা, গম কিম্বা ফল মূল খাইয়া তাহারা জীবন ধারণ করিতে পারে না, কাজে কাজেই তাহাদিগকে অপেক্ষাকৃত ক্ষুদ্রকার পক্ষী

এবং ক্ষুদ্র ক্ষুদ্র জন্তু মারিয়া আহার করিতে হয়। একেই বলে জীবন-সংগ্রাম। সমস্ত প্রাণীদিগের মধ্যেই এই নিয়ম বিদ্যমান। তোমরা কিঞ্চিৎ পূর্বেই পড়িয়াছ যে, কাদাখোঁচা প্রভৃতি পাখীরা ক্ষুদ্র ক্ষুদ্র ভেক ও শমুক তুলিয়া খায়, ভেকগণ আবার কীট, পতঙ্গ ধরিয়া আহার করে। এইরূপ যে দিকে তাকাইবে সেই দিকেই প্রাণীদিগের মধ্যে খাদ্য ও খাদক সম্বন্ধ দেখিবে। আপাততঃ এ সকল বড় অন্যান্য বলিয়া বোধ হইবে, কিন্তু তোমরা প্রকৃতির তত্ত্ব যতই অন্বেষণ করিবে ততই দেখিতে পাইবে যে, এই অন্যান্য ও অত্যাচারের মধ্যেও একটি সূনিয়ম আছে।


গতবারের 'সখা'তে তোমরা পড়িয়াছ যে, এখন আর খঞ্জন পাখী এদেশে দেখিতে পাওয়া যায় না, তাহারা যে এখন কোথায় বাস করিতেছে তাহা ঠিক করিয়া বলা সহজ নয়, তবে প্রাণীতত্ত্ববিদ পণ্ডিতেরা অনুমান করেন যে, তাহারাও এখন মধ্য এবং উত্তর আসিয়ার স্থানে বাস করিতেছে, শীতের আরম্ভেই আবার এদেশে ফিরিয়া আসিবে। খঞ্জন ভিন্ন আরও অনেক পাখী এখন এদেশ ছাড়িয়া গিয়াছে, আবার ফিরিয়া আসিবে। তোমরা যদি যত্ন করিয়া এক খানি স্মরণ পুস্তকে (Note Book) প্রতিদিন যাহা দেখিতে ও শুনিতে পাও তাহা লিখিয়া রাখ তাহা হইলে ছয় মাস কিম্বা এক বৎসর পরে দেখিতে পাইবে যে, নূতন নূতন অনেক বিষয় শিখিয়াছ, তখন আপনা আপনিই জানিতে পারিবে কোন সময়ে কি পাখী আসে এবং কি পাখী চলিয়া যায়।

হাঁস, কাদাখোঁচা, খঞ্জন প্রভৃতি যাহাদিগের কথা এতক্ষণ বলা হইল তাহারা ভারতবর্ষ ছাড়িয়া

অন্য দেশে চলিয়া যায়, কিন্তু এ সকল ভিন্ন আরো অনেকগুলি পাখী আছে যাহারা ভারতবর্ষের মধ্যেই কখনও এদেশ কখনও ওদেশ করিয়া বেড়ায়। আমাদের দেশে এখন আম, জাম, কাঁটাল প্রভৃতি নানা প্রকার সুমিষ্ট ফল পাকিয়াছে, এখন এই সকল ফলের বাগানে কত প্রকার পাখী দেখিতে পাওয়া যায়, যাহা কিছু দিন পরে আর দেখিতে পাওয়া যাইবে না; কারণ ফল ফুরাইয়া গেলে পক্ষীরা আহার অবশ্যের নিমিত্ত অন্য স্থানে চলিয়া যাইবে। শীত কালে এখন এদেশের নদ নদীর জল কমিয়া যায় তখন ঝাঁকে ঝাঁকে গাঙ্গশালিক আসিয়া নদীর উচ্চ পাড়ে গর্ত করিয়া বাসা নিৰ্ম্মাণ করে এবং আবার যখন নদীর জল বৃদ্ধি হয় তখন অন্য স্থানে চলিয়া যাইতে বাধ্য হয়।

'সখা'র পাঠক পাঠিকা! এখন বোধ হয় তোমরা বুঝিতে পারিতেছ কত প্রকার কারণে পক্ষীগণকে কখনও এদেশ কখনও ওদেশ করিয়া বেড়াইতে হয়। কেবল যে ভারতবর্ষেই পাখীদের এইরূপ দেশ ভ্রমণ দেখিতে পাওয়া যায় তাহা নয়, ইউরোপ, আমেরিকা, চীন প্রভৃতি পৃথিবীর অন্যান্য স্থানেও তাহারা সুবিধা ও অসুবিধা অনুসারে স্থান পরিবর্তন করিয়া থাকে। তোমরা সকলেই জান—ইউরোপ শীত প্রধান দেশ, যে সকল পক্ষী বসন্ত ও গ্রীষ্মকালে ইউরোপের দক্ষিণ ভাগে বাস করে তাহারা শীতের আরম্ভে উত্তর আফ্রিকা কিম্বা অন্য কোন স্থানে চলিয়া যায়, কারণ এই সময়ে ইউরোপের প্রায় সমস্ত প্রদেশে এত প্রবল শীত হয় যে, এই সকল পাখী তাহা সহ করিতে পারে না, বিশেষ এই সময়ে সমস্ত দেশ বরফে ঢাকিয়া যায় বলিয়া আহার প্রাপ্তিরও বিশেষ অসুবিধা হয়। আবার যে সকল পাখী

শীত কালে ইউরোপ, ইউরোপ, উত্তর ফ্রান্স, হলও প্রভৃতি স্থানে বাস করে তাহারা গ্রীষ্মকাল আসিলে ইউরোপের আরও উত্তর দিকে এমন কি লাপলাও দেশ পর্যন্ত চলিয়া যায়।



## বায়ু-মণ্ডল।

জ্ঞান খার পাঠক পাঠিকা! তোমরা শুনিয়া থাকিবে এবার একটা ভয়ানক বিপদ ঘটয়াছে। রথযাত্রার সময়ে লক্ষ লক্ষ যাত্রী জগন্নাথ ক্ষেত্রে যায়। অনেক লোকে প্রায় স্থল পথে হাঁটিয়া জগন্নাথে যাইত। কিছুকাল হইতে যাত্রীদিগকে কলের জাহাজে করিয়া লইয়া যাওয়ার প্রথা প্রচলিত হইয়াছে। অনেক যাত্রী এইরূপে গিয়া থাকে। এবার প্রায় ৭৫০ জন যাত্রী "সার জন লরেন্স" নামক একখানি কলের জাহাজে আরোহণ করিয়া উড়িয়াতে যাইতেছিল। গঙ্গাসাগরে ভয়ানক "সাইক্লোন" (ঘূর্ণী-ঝড়) উপস্থিত হয়। এই সাইক্লোনে সেই সাতশতের অধিক যাত্রী সমেত জাহাজখানি জলমগ্ন হইয়াছে। আমরা কলিকাতায় বসিয়া এই "সাইক্লোনের" আভাস পাইয়াছিলাম। যে দিন গঙ্গাসাগরে ঝড় হয় তার পূর্বেই কলিকাতাতে আকাশ মেঘাচ্ছন্ন হইয়াছিল। আমরা আর কয়েকবার এইরূপ ঝড় দেখিয়াছি; আকা-

শের ভাবগতিক দেখিয়া বোধ হইয়াছিল যে, কলিকাতাতেই বা ঐরূপ ঝড় হয়। ২৬শে মে বৃহস্পতিবার তার যোগে কলিকাতায় সংবাদ আসিল যে গঙ্গাসাগরে ভয়ানক ঝড় হইতেছে, বায়ুর গতি এত দ্রুত যে ঘণ্টায় ৬৭ মাইল ছুটিতেছে। পূর্বেই অর্থাৎ বুধবার হইতেই গঙ্গাসাগরে এই ঝড় আরম্ভ হয়। তখন আমরা জানিতে পারি নাই যে, ঐ দারুণ ঝড়ে বাঙ্গালা দেশের অনেক গৃহে হাহাকার ধ্বনি উঠিবে। বুধবার "সার জন লরেন্স" নামক একখানি কলের জাহাজ প্রায় ৭৫০ জন যাত্রী লইয়া কলিকাতা হইতে গঙ্গাসাগরে প্রবেশ করে। জাহাজখানি যখন সমুদ্রে প্রবেশ করিতে যায় তখনই ঝড়ের সঞ্চার হইয়াছিল। ঐরূপ শুনা যায় যে, জাহাজখানি যখন সমুদ্রে প্রবেশ করিতে যায় তখন তাঁর বন্দর হইতে বিপদ-সূচক নিশান দেখান হইয়াছিল। তাহার অর্থ এই—“আকাশের অবস্থা বড় ভয়-জনক, সমুদ্রে প্রবেশ করিও না।” কিন্তু ঐ জাহাজের কাপ্তেন আরভিং সাহেব সে নিশান গ্রাহ করেন নাই। তিনি নাকি আরও কয়েকবার ঝড়ে পড়িয়া বাঁচিয়াছিলেন। তিনি সাহস করিয়া জাহাজ লইয়া সমুদ্রে প্রবেশ করিলেন, এই মাত্র লোকে দেখিল, তার পর সে জাহাজের কি হইয়াছে তাহা কেহ বলিতে পারে না। জাহাজের সংবাদ না পাওয়াতে গবর্নমেন্ট অবিলম্বে তিন চারিখানি জাহাজ সার জন লরেন্সের অন্বেষণে পাঠাইলেন। তাহারা চারিদিকে খুঁজিয়া বেড়াইতে লাগিল। ক্রমে ভয়ানক দৃশ্য সকল চক্ষে পড়িতে লাগিল। কোথাও ৫৭টা স্ত্রীলোক জড়া জড়ি করিয়া মরিয়া ভাসিয়া আসিতেছে, শরীরগুলি পচিয়া চোল হইয়াছে; কোথাও বা জননী ক্ষুদ্র শিশুকে কোঁড়ে লইয়া মরিয়া

ভাসিয়া আসিতেছে; কি অপূর্ব মাতৃস্নেহ! ভয়ানক বিপদের সময়েও অঞ্চলের ধনটীকে ছাড়ে নাই! কোথাও কোন ইংরেজের দেহের কতকটা ভাসিয়া আসিতেছে, অবশিষ্ট অংশ হাঙ্গরে খাইয়া কেলিয়াছে। কোথাও বা কোন ইংরেজের নামাঙ্কিত কাঠের বাস্তু তীরের নিকটে ভাসিতেছে। কাপ্তেন সাহেবের বাস্তু এইরূপে পাওয়া গিয়াছে। কি ভয়ানক দৃশ্য! এদিকে বঙ্গদেশে ঘরে ঘরে ক্রন্দনের রোল উঠিল। কি জানি এই বর্ণনাগুলি পড়িতে হয়ত সখার কোন পাঠক বা পাঠিকার হৃদয় ফাটিয়া যাইবে! হয়ত তাঁহাদের কোন আত্মীয় স্বজন ঐ ভয়ানক দিনে ছরত সাগরের গর্ভে নিমগ্ন হইয়াছেন! যদি সখার পাঠক পাঠিকার মধ্যে এমন কেহ থাকেন, তাঁহার সান্ত্বনার জন্ত আমরা কি বলিব? এই ভয়ানক বিপদের বার্তা শুনিয়া আমরা যে প্রাণে কত বেদনা পাইয়াছি তাহা বলিতে পারি না। যদিও আমাদের নিজ বাড়ীর লোক কেহ ঐ জাহাজে ছিলেন না, কিন্তু আমাদের প্রিয় জন্মভূমির শতশত সন্তান একদিনে অপঘাত মৃত্যুতে প্রাণ-ত্যাগ করিল ইহাতে কাহার প্রাণে না আঘাত লাগে! অতএব তাঁহাদের হৃৎখে সমুদায় দেশের লোক হুঃখিত। এইমাত্র সান্ত্বনা।

এই বিপদের সমাচার শুনিয়া পাঠক পাঠিকার মনে কি প্রশ্নের উদয় হইতেছে! তোমরা অনেকে বোধ হয় জাহাজ দেখ নাই। একটা বড় জাহাজ একটা সহর। তাহা জলে ডোবা বড় সহজ নয়। অধিক কি ৭৫০ জন বাতী ও তাহার উপরে আবার জাহাজের চাকর বাকর এই সমুদায় লোক লইয়া যে জাহাজ যাইতেছিল, তাহা কত বড় হইবার সম্ভাবনা তাহা তোমরা সহজেই অনুমান করিতে পার। এতবড় একখানি জাহাজ

জলে ডুবাইয়া দেওয়া বড় সহজ কথা নয়। ইহাতেই তোমরা অনুমান করিতে পার সেই “সাই-ক্লোনের” জোর কত। ১২৭১ সালে কলিকাতার নিকটে এইরূপ এক সাইক্লোন হইয়াছিল, তাহার জোর দেখিয়া একজন কবি একটা গান রচনা করিয়া বলিয়াছিলেন;—

“বাপ্রে পবনের পায়ে নমস্কার”

বাস্তবিক পবনের এই বিক্রম দেখিলে ঐ কথাই বলিতে হয়। তোমাদের কি “সাই-ক্লোনের” বিষয় কিছু জানিতে ইচ্ছা হইতেছে না? সাইক্লোন কেন হয়? ইহার এত জোর কেন? এসকল কি জানিতে ইচ্ছা কর না? যদি কর, তবে গোড়া হইতে আরম্ভ করা যাউক, মন দিয়া শুন।

তোমরা যদি খোলা জায়গায় দাঁড়াইয়া আকাশের দিকে চাহিয়া দেখ উপরে কিছুই দেখিতে পাও না; কেবল শূন্য। বাস্তবিকই কি সব শূন্য? প্রাতঃকালে যখন ঝুর ঝুর করিয়া বাতাস বহিতে থাকে, ও শরীর স্নিগ্ধ করে তখন কি বলিতে পার সমুদয় শূন্য? বোধ হয় পার না। বোধ হয় তখন জিজ্ঞাসা করিলে বলিবে যে সব শূন্য নয়, ইহার মধ্যে বাতাস আছে। বাস্তবিক কথাটা এই, পৃথিবীর জলে একটি খেলিবার মাৰ্ফল ফেলিয়া দিলে সেটা যেমন জল রাশির মধ্যে ডুবিয়া থাকে তেমনি এই পৃথিবী বায়ু সাগরের মধ্যে ডুবিয়া আছে। মৎস্যেরা যেমন জলরাশির মধ্যে ডুবিয়া থাকে, জলরাশির মধ্যেই ক্রীড়া করে, ও বিচরণ করে, আমরা তেমনি বায়ু-রাশির মধ্যে ডুবিয়া আছি, বায়ু-রাশির মধ্যে ক্রীড়া করিতেছি, বায়ু-রাশির মধ্যেই বিচরণ করিতেছি। যেন একটা বায়ুময় কোষের মধ্যে পৃথিবী আবৃত হইয়া রহি-

রাছে। এই বায়ুময় কোষকে বায়ু-মণ্ডল বলা গেল।

পৃথিবীর পৃষ্ঠ হইতে কতদূর উপর পর্য্যন্ত এই বায়ু-ময় কোষ পাওয়া যায় তাহা বলা যায় না। কোন কোন পণ্ডিত বলিয়াছেন, পৃথিবীর উপরে ৯০ মাইল অর্থাৎ ৪৫ ক্রোশ পর্য্যন্ত এই বায়ু-মণ্ডল পাওয়া যায়, কেহ কেহ বলিয়াছেন যে আরও অনেক উপরে অর্থাৎ ২১২ মাইল উপরে ও পাওয়া যায়। আমাদের দেশের পণ্ডিতগণ বলিতেন বায়ুর ভার নাই, কিন্তু ইউরোপীয় পণ্ডিতেরা প্রমাণ করিয়াছেন যে, বায়ুর ভার আছে। এমন কি এক স্কোয়ার ইঞ্চি অর্থাৎ এক বুরুল লম্বা ও এক বুরুল প্রস্থ এই পরিমাণ ভূমির উপরে প্রায় সাত সের বায়ু থাকে! তোমরা বলিতে পার তবে ত আমাদের মাথার উপরে অনেক মণ বায়ু আছে, তবে আমাদের ঘাড় ভাঙ্গিয়া পড়ে না কেন? এ কথা জিজ্ঞাসা করিতে পার। ইহার উত্তর দিবার পূর্বে তোমাদিগকে একটা কথা জিজ্ঞাসা করি। জলের ভার আছে তাহা ত জান। এক কলসী জল তুলিতে তোমাদের কত কষ্ট হয়! ভাল এক কলসী জলের যদি এত ভার হইল, তাহা হইলে একটা মানুষের শরীরের উপরে কত জলের ভার হওয়া সম্ভব, ভাবিয়া দেখিবে। কিন্তু তোমরা যখন ডুব সাঁতার দেও তখন কি ভারে শরীর পিষিয়া যায়? অধিক কি, তোমরা পরীক্ষা করিয়া দেখিবে যে, জল পূর্ণ কলসীটা উপরে তুলিতে কোমর ভাঙ্গিয়া যাইতেছে; সেই জল পূর্ণ কলসীটা জলে ডুবাইয়া দেখিবে, অনায়াসে নাড়িতে পারিবে। ইহার কারণ কি? কারণ এই, জলের উপরে বাতাসের যে চাপ পড়ে তাহা জলের সকল দিকে ও সকল ভাগে সমানরূপে সঞ্চা-

রিত হয়। অর্থাৎ কোন দেয়ালে যদি তুমি একটা গজাল মার, ও সেই গজালের উপরে ঘন ঘন হাতুড়ির আঘাত করিতে থাক, যে ভূমিটুকুর উপরে গজালটা বসিতেছে, হাতুড়ির বত জোর সেই ভূমি টুকুর উপরেই লাগে; তাহার পাঁচ হাত দূরের ইষ্টকে সে জোর পৌঁছে না। জল কিম্বা বাতাসের প্রকৃতি এরূপ নয়। পৃথিবীর এক দিকে যে শক্তি প্রয়োগ করা যায়, সকল দিকের জলেই সেই শক্তি অনুভব করিবে। তোমরা পরীক্ষা করিয়া দেখিতে পার; কাণায় কাণায় জল পরিপূর্ণ একটা বড় গামলা বা টবের একপার্শ্বে যদি একটা বড় জিনিস জোরে ডুবাইয়া দেও দেখিবে অপর পার্শ্বে দিয়া জল উছলিয়া পড়িতেছে। কে অপর-দিকের জল ঠেলিয়া তুলিল? তুমি জিনিসটাকে ডুবাইবার জন্ত একদিকে যে বল প্রয়োগ করিতেছ তাহা যদি অপরদিকে না যাইবে তবে কে সে জলকে ঠেলিয়া তুলিল?

এখন একবার স্থিরচিত্তে ভাবিয়া দেখ, তুমি জলপূর্ণ যে কলসীটা পুনরায় জলে ডুবাতেছ, তাহার ভিতরে যেমন জলের ভার আছে, তেমনি তাহার উত্তর, দক্ষিণ, পূর্ব, পশ্চিম, অধো, উর্ধ্ব চতুর্দিক হইতে জলের ভারের শক্তি, ও উপরের বায়ুর ভারের শক্তি তাহাকে ঠেলিয়া রাখিতেছে, এইজন্তই তোমার হাতে জোর লাগিতেছে না। আমরা বায়ুসাগরে যখন বেড়াই, তখনও এই কারণে মস্তকের উপরের বায়ুর ভার অনুভব করিতে পারি না।


বাতাসের ভার আছে, একথাটা যদি একবার বুঝিতে পার তাহা হইলে একথাটাও সহজে বুঝিতে পারিবে যে, উপরের বায়ুর অপেক্ষা পৃথিবীর নিকটের বায়ুর উপরে অধিক ভার স্তরতাং তাহার ঘনত্ব অধিক। অর্থাৎ যদি বেলুনে

করিয়া ক্রমাগত উপরে উঠিয়া যাও, যতই উপর উঠিবে ততই পাতলা বায়ু দেখিবে। এমন কি ৫।৬ মাইল উপরে বাতাস এত পাতলা যে, সেখানে বায়ুর অভাবে নিশ্বাস প্রশ্বাস ফেলাই হুঙ্কর।

বায়ু-মণ্ডল কি কি দ্রব্যে গঠিত? — বায়ু-মণ্ডলে অনেক প্রকার দ্রব্য আছে। প্রায় ৮০ ভাগ নাইট্রোজেন নামক একপ্রকার গ্যাস, ২১ ভাগ অক্সিজেন নামক গ্যাস, অল্পাংশ কার্বনিক এসিড গ্যাস, ও এমোনিয়া প্রভৃতি অণু অংশও আছে। তদ্ভিন্ন বায়ু-মণ্ডলের প্রায় সর্বত্রই সূক্ষ্ম জলীয় পরমাণুসকল বাষ্পাকারে ব্যাপ্ত রহিয়াছে। ইহার সকলগুলিই অতিশয় প্রয়োজনীয় পদার্থ। এই সকলের দ্বারা কি কি কাজ হয় একথা ভাবিলে, বিশ্বকর্তার অপূর্ব পালনীশক্তির পরিচয় পাওয়া যায়। নাইট্রোজেন ‘গ্যাস’ জীব-দেহের পক্ষে নিতান্ত প্রয়োজনীয় বস্তু। ইহাতে আমাদের দেহপুষ্টি হয়। অক্সিজেন গ্যাস অগ্নিকে রক্ষা করে, ঐ গ্যাসই অগ্নির খাদ্য বস্তু। অক্সিজেন না থাকিলে অগ্নি জ্বলে না। আমাদের রক্তাধারের পক্ষে ইহা নিতান্ত প্রয়োজনীয়। আমরা নিশ্বাস প্রশ্বাসে নিরন্তর অক্সিজেন গ্যাস ভিতরে গাইতেছি ও কার্বনিক এসিড গ্যাস উদ্গীরণ করিতেছি। কার্বনিক এসিড গ্যাস আমাদের পক্ষে বিষাক্ত দ্রব্য কিন্তু উদ্ভিদদিগের তাহা খাদ্য। আবার অক্সিজেন গ্যাস তরলতার পক্ষে বিষাক্ত, আমাদের দেহের পক্ষে নিতান্ত প্রয়োজনীয়। এইরূপে আমরা যাহা উদ্গীরণ করিতেছি, তাহা লইয়া বৃক্ষেরা প্রাণধারণ করিতেছে। আবার তাহার যাহা উদ্গীরণ করিতেছে তাহা গ্রহণ করিয়া আমরা বাঁচিতেছি। বৃক্ষেরা আমাদের কেমন বন্ধু!!

বিধাতা কেমন আশ্চর্য্য কৌশলে পরস্পরের বিনিময় দ্বারা আমাদের জীবিত রাখিয়াছেন।

ক্রমশঃ ।



## পিপীলিকার উপদেশ ।

( ৭০ পৃষ্ঠার পর । )

পিপড়েদের গোয়াল ঘর দেখিয়া আসিলাম। তাহার পর আহারাদি করিয়া ছুজনাঘ বাহির হইয়া গ্রাম দেখিতে গেলাম। বন, জঙ্গল, মাঠ, ঘাট সব ঘুরিয়া ঘুরিয়া দেখিতে লাগিলাম, গাছে কত সুন্দর সুন্দর ফুল ফুটিয়া রহিয়াছে। কত পাখীরা স্মৃষ্টি গান করিতেছিল। একরূপ নানা বস্তু দেখিতে গুনিতে বেলা অবসান হইয়া আসিল। পাঁচ হাত গাছের পঁচিশ হাত ছায়া হইতে লাগিল। সূর্য্য ডুবু ডুবু হয়। তখন আমরা বাড়ী ফিরিতে লাগিলাম। আসিবার সময়ে পথিমধ্যে একস্থানে ফোয়ারার মত ধূলি জোরে উপরদিকে উঠিতেছে দেখিলাম। কেন ওরূপ হইতেছে কিছু ঠিক করিতে পারিলাম না; বড় আশ্চর্য্য হইলাম। আমি আমার বন্ধু পিপড়ের দিকে চাহিয়া দেখি যে, তাহার মুখটা শুকাইয়া গিয়াছে, ভয়ে জড় সড় হইতেছেন। আমি

জিজ্ঞাসা করিলাম ‘কি ভাই’। সে বলিল “ভাই এখানে আমাদের অনেক শত্রু আছে। আমার প্রাণে বাঁচা বড় হুঙ্কর। ঐ যে ধূলা উঠিতেছে ও কি জান ও বাঘে ধূলা উঠাইতেছে। বাঘ কি বুঝিতে পারিলে না। ওরা এক রকম পোকা, পিপড়ে ও অণু অণু ক্ষুদ্র ক্ষুদ্র পোকা খাইতে ভাল বানে। ওরা মাটিতে আমাদের জন্তু ফাঁদ পাতিয়া বসিয়া থাকে, আমরা ফাঁদে পড়িলেই আমাদের ধরিয়া খায়। ওরা বড় মজার ফাঁদ পাতে। প্রথমে ঘুরিয়া ঘুরিয়া মাটিতে বড় একটি গোল দাগ দেয়। ওরা সম্মুখে অগ্রসর হইতে পারে না, কেবল পিছন দিকে হাঁটে। সেই দাগের ভিতরে মাটি খুঁড়িয়া ফেলিতে থাকে। মাটি গর্তের বাহিরে ফেলিবার সময়ে ধূলা ভিতর মাথাটা গুজিয়া দেয়, তার পরে জোরে মাথাটা সম্মুখ দিকে তেলিয়া দেয়, অমনি মাথার উপরের ধূলিগুলি দূরে গিয়া পড়ে। ঐরকম করিতেছিল বলিয়া ঐ ধূলি উঠিতেছিল। যে গর্তটি খোঁড়ে সেটা দেখিতে ঠিক তেল চালিবার ফনেলের মত। মুখটা খুব চোড়া, তার পর শেষভাগটা ক্রমে সরু হইয়া আসিয়াছে। গর্তের চারিপাশে এমনি ভাবে আলগা করিয়া ধূলি রাখিয়া দেয় যে, তার কাছে গেলেই গড়াইয়া নীচে পড়িয়া যাইতে হয়। গর্তের ভিতর ধূলা ঢাকা দিয়া কর্তা বসিয়া থাকেন কেহ তাহাকে দেখিতে পায় না, ছোট কোন পোকা গর্তের নিকট গেলেই, এমনি জোরে ভিতর হইতে ধূলা ছুড়িয়া মারে যে, সে আঘাত সহ্য করিতে না পারিয়া গর্তের ভিতরে পড়িয়া যায়। তখন তাহার ঘাড় ভাঙ্গিয়া রক্ত চুষিয়া খায়। খাওয়া হইয়া গেলে খোসাটা ঐ রকম করিয়া ছুড়িয়া বাহিরে ফেলিয়া দেয় ও নূতন

শীকারের আশায় চুপ করিয়া বসিয়া থাকে। গর্তটা বেশ পরিষ্কার পরিচ্ছন্ন করিয়া রাখে। পোকাগুলি বড় ছোট, তোমার মাথার মত বড় হইবে কিনা সন্দেহ। অথচ এত বড় গর্ত এক ঘণ্টার মধ্যে তৈয়ার করিয়া শীকার ধরিবার আশায় বসিয়া থাকে। ইহাদের গায়ের রং মেটে, মাথা আর গলা সমস্ত শরীরের পরিমাণে খুব ছোট। মুখের সম্মুখে খুব শক্ত ছোট ছুখানি কাস্তের মত গুঁড় বা দাঁত আছে তাহা দিয়া চাপিয়া ধরিয়া খায়। ইহাদের চলন বড় মজার, মাটিতে ‘কেমন গুঁড়ি গুঁড়ি হইয়া থাকে; এক এক হেঁচকা মারে আর অনেক পিছনে গিয়া পড়ে। এইরূপে পিছাইয়া যাইতে থাকে, সম্মুখে যাইতে পারে না, আর আমাদের মত ক্রমাগত পা দিয়া হাঁটিতে পারে না। এই জন্ত শীকারের পিছনে পিছনে ছুটিয়া ধরিতে পারে না। কাজেই ফাঁদ পাতিয়া শীকার ধরিতে হয়। একরূপ অবস্থায় ইহাদের অনেক দিন থাকিতে হয় না; কিছুদিন পরে একটা গুঁট করিয়া কিছুকাল তাহার ভিতর থাকিবে তার পর ফাঁড়িংএর মত হইয়া উঠিয়া যাইবে। এখনকার অবস্থা বড় কষ্টজনক। তবে যদি ভবিষ্যতে সূখের জীবনের আশা না থাকিত, তবে ইহাদের বাঁচিয়া থাকা কি দায়ের হইত।”

“এখানে ইহাদের অনেক গর্ত আছে তাই আমার ভয় হইতেছে।” আমি বলিলাম “ভয় কি আমার হাত ধরিয়া চল, আমি থাকিতে কোন ভয় নাই।” আমরা সাবধানে চলিয়া নির্ঝিল্লি বাড়ী আসিয়া পৌঁছিলাম। পিপড়েদের বাড়ীতে প্রবেশ করিবার সময়ে তাদের প্রহরীরা আনার দিকে কট মট করিয়া তাকাইতে লাগিল। তখন অন্ধকার হইয়াছে। কলিকাতায় বাবুদের বাড়ীতে



যেমন গ্যাসের আলোকে ঘর আলোকিত হয়, অত্যান্ত লোকের ঘর যেমন কেরোসিন ল্যাম্পে বা প্রদীপে আলোকিত হয়, ইহাদের সে সব কিছু নাই অথচ ইহাদের ঘরগুলি সব আলোক-ময়। পিঁপড়েকে জিজ্ঞাসা করিলাম এ আলো কোথা হইতে আসিল, সে হাঁসিয়া বলিল, “সেওলার মত ছোট ছোট একরকম ব্যাংএর ছাতার গাছ আছে রাত্রে খুব চক্চক্ করে, এ তারি আলো। আমরা- ঘর আলোর জন্ত এগুলিকে এখানে রোপণ করিয়াছি। কেন,

তুমি এরকম গাছ দেখ নাই? তোমরা কখন মাঠে ঘাটে বেড়াও না, তা জানিবে কি করিয়া। না দেখিলে গুনিলে কি কিছু জানা যায়। আমরা কত দেশ বেড়াইয়াছি, কত দেখিয়াছি, তাই কত শিখিয়াছি।” তার পর সে আমাকে কিছু খাবার দিয়া একটা ঘর দেখাইয়া দিল আর বলিল “এইখানে রাত্রে ঘুমাও।” এই বলিয়া সে চলিয়া গেল। খানিক পরে আমি ঘরের দোর বন্ধ করিয়া শুইয়া আছি এমন সময়ে কে আমার দোরে আসিয়া “এ ঘরে কে” বলিয়া

ধাক্কা দিতে লাগিল। আমি বলিলাম “তুমি কে? কি চাও।” সে রাগিয়া বলিল “তুমি কে? ভাল চাও ত শীঘ্র দোর খোল।” আমি ভয়ে তাড়াতাড়ি দোর খুলিয়া দিলাম আর বলিলাম “আমি তোমাদের বন্ধু, তোমাদেরই একজন আমাকে নিমন্ত্রণ করিয়া এখানে আনিয়াছেন,” তখন সে আস্তে আস্তে চলিয়া গেল। আমি গিয়া শুইলাম, অনেকক্ষণ পর্যন্ত ঘুম আসিল না। কত দুর্ভাবনা ভাবিতে লাগিলাম। অনেকক্ষণ পরে ঘুম আসিল। ভয়ানক স্বপ্ন দেখিতে লাগিলাম। যেন পুকুরের উপর এক ভেলা রহিয়াছে। হঠাৎ ভেলার পাশে এক প্রকাণ্ড মাথা হস্ করিয়া উঠিল। তার চোখ দুটা কট মট করিয়া আমার দিকে তাকাইয়া রহিয়াছে, যেন দুটা আগুন জ্বলিতেছে। বড় ভয় হইল, পলাইবার জন্ত মুখ ফিরাইলাম। সে দিকেও ঐরূপ একটা প্রকাণ্ড মাথা, ঐ রকম দুটা চোখ জ্বলছে। দেখিতে দেখিতে চারিদিকে বিকটাকার মূর্তি সব জল হইতে উঠিয়া আমার দিকে অগ্রসর হইতে লাগিল, সকলেরই চক্ষু আমার দিকে। সে সময়ে দেখি আমার পিঁপড়ে বন্ধু বলিতেছে “ঐ দেখ ভেলার একটা ছিদ্র আছে, আইস ইহার ভিতর দিয়া জলে ডুব দি, আর উহারা ধরিতে পারিবে না।” ইতি-মধ্যে শত শত বিকট মূর্তি আমাকে টানিয়া জলের ভিতর লইয়া গেল—নীচে নীচে আরও নীচে লইয়া যাইতে লাগিল। আমার নিশ্বাস বন্ধ হইয়া আসিল, প্রাণ ছট্ফট্ করিতেছে, এমন সময়ে পূর্বের সেই মাকড়সা আসিয়া বলিতে লাগিল “কেমন বেশ হয়েছে। আমি আগেই ত সাবধান করিয়া দিয়াছিলাম, বারণ করিয়াছিলাম পিঁপড়াদের ওখানে যাইও না।”

তার পর দেখি যে এক ক্ষুদ্র কারাগারে বন্ধ আছি। অনেকগুলি পিঁপড়ে ক্রোধাক্ত হইয়া দোর ঠেলিয়া ভাঙ্গিয়া ফেলিল, “উহাকে মারিয়া ফেল, খাইয়া ফেল” বলিয়া চীৎকার করিতে লাগিল। আমি এক কোণে জড় সড় হইয়া করজোড়ে কাতরে মাপ চাহিতে লাগিলাম, বলিলাম “দোহাই তোমাদের! আমাকে রক্ষা কর, তোমাদের নিজের লোক আমাকে আনিয়াছে। কোথায় আমার বন্ধু আমাকে রক্ষা কর!” এ সময়ে আমার বন্ধু আসিয়া আমাকে ঠেলিতে লাগিল আর বলিল “ওঠ, বেলা হইয়াছে।” আমি উঠিয়া বসিলাম। সে বলিল “ওকি কাঁপছ যে, তোমার গা দিয়া ঘাম বাহির হচ্ছে যে, কি হয়েছে কি?” আমি লজ্জায় কিছু বলিলাম না। তার পর উঠিয়া মুখ হাত ধুইয়া একটু আহালাদি করিলাম।

ক্রমশঃ



## টাকা কড়ি।

মরা যে সাদা সাদা গোল গোল চক্চকে জিনিষগুলি দেখিতে পাও, যাহার বলে ভাত খাও কাপড় পর, যাহার মধুর বন্বন্ব টুনটুন শব্দে মনটা কেমন আনন্দে নাচিতে থাকে সেই টাকা যদি সংসারে



না থাকিত তবে কি হইত বলিতে পার ? একটা গানে আছে,

“যার পয়সা নাইরে ভাই  
সংসারে তার মরণ ভাল ।”

এমন জিনিষ না হইলে কি পৃথিবী চলিত ? এরূপ অবস্থা হয়তো তোমাদের কল্পনায়ও আসে না ; অথচ পৃথিবীতে এমন একদিন ছিল যখন টাকা কড়ি কিছুই ছিল না। অবশ্য সে দুই এক শত বৎসরের কথা নয় ; পৃথিবীর অতি আদিম কালে এইরূপ অবস্থা প্রচলিত ছিল।

এখন যেমন কোন জিনিষের আবশ্যক হইলে টাকা দিয়া আমরা কিনিয়া থাকি তখন লোকে তাহা করিতে পারিত না। এখন টাকা দিয়া যাহা ইচ্ছা তাহা কিনিতে পার। লোকে কথায় বলে “পরসায় বাঘের ছুধও মেলে।” অর্থাৎ টাকা পয়সা হইলে সংসারে কিছুই দুশ্রাপ্য নয়। কিন্তু একবার ভাবিয়া দেখ পৃথিবীতে আর টাকা পয়সা কিছুই নাই। তোমার হয়ত কোন জিনিষ প্রচুর পরিমাণে আছে, আবার কোন জিনিষ হয়ত কিছুই নাই। যে লাঙ্গল চাষ করিয়া ধান জন্মায় তাহার কেবল ধানই আছে, যে কাপড় তৈয়ার করে তাহার কেবল কাপড়ই আছে, যে বই লেখে তাহার কেবল বইই আছে অর্থাৎ যাহার যে ব্যবসা তাহার তাহাই আছে। যে ব্যবসার জন্ত যে সমুদায় জিনিষ পত্রের প্রয়োজন তাহাই না কোথা পাওয়া যায় ? তবে কি পৃথিবীতে তখন ব্যবসাদি চলিত না ? যাহার ধান আছে সেইই কেবল ভাত খাইত আর সকলে কি উপবাস করে দিন কাটাত ? যাহার কাপড় আছে সেইই কেবল কাপড় পরিত আর সকলে কি ছাংটা হইয়া থাকিত ? না,

তাহা নয়। তখনও সকলে আবশ্যকীয় সমুদায় দ্রব্যই পাইত কিন্তু অত্যন্ত কষ্ট ও অসুবিধা ভোগ করিতে হইত : মনে কর, তোমার অধিক কাপড় আছে কিন্তু খাইবার কিছু নাই ; তখন তোমার এমন লোক খুঁজিতে হইত যাহার কাপড়ের প্রয়োজন আছে। যদি তাহার নিকট খাদ্যদ্রব্য অধিক থাকিত তবে তোমার বেশী কষ্ট পাইতে হইত না কিন্তু যদি তাহা না হইয়া তাহার নিকট কতকগুলি টেবিল চেয়ার থাকিতো তবে তোমার কি কষ্টই হইত !! সেই গুলি লইয়া আবার তোমাকে খুঁজিতে হইত “কাহার নিকট খাদ্য দ্রব্য অধিক আছে অথচ তাহার টেবিল চেয়ারের আবশ্যক ?” হয়তো তোমার কপালক্রমে সেখানেও বিফল হইতে হইত আবার তোমাকে “কে নেবে গো” “কে নেবে গো” করিয়া ঘুরিয়া বেড়াইতে হইত। এইরূপ ঘুরিতে ঘুরিতে হয়তো তোমার পরিবারের লোকদিগকে ১০ দিন না খাইয়া থাকিতে হইত। এই প্রথাকে “বিনিময়” প্রথা বলা যায়।


লোকে যখন এইরূপ অসুবিধা অনুভব করিতে লাগিল এবং সমাজের অবস্থা যখন ক্রমে উন্নত হইতে লাগিল তখন সকলেই একটা সহজ উপায় উদ্ভাবন করিতে উদ্যোগী হইল। সকলে একমত হইয়া একটা কোন পদার্থকে সকল প্রকার জিনিষের সাধারণ বিনিময়ার্থ নিযুক্ত করিল। ইহাতে কেমন সুবিধা !! যে কাপড় বিক্রী করিবে সেও সেই সাধারণ পদার্থের পরিবর্তে বিক্রয় করিত, যে কাপড় কিনিবে সেও সেই সাধারণ পদার্থের বিনিময়ে ক্রয় করিতে পারিত। তখন নানা দেশে নানা প্রকার পদার্থ দ্বারা এই সাধারণ বিনিময়ের কার্য চলিতে লাগিল। ইহার নাম “মুদ্রা” এবং সাধারণ ভাষায় ইহাকে

“টাকা কড়ি” বলে। কত দেশে কত প্রকার দ্রব্য এই সাধারণ বিনিময়ের জন্ত ব্যবহৃত হইত তাহা গুলিলে বড় আশ্চর্য্যাবিত হইতে হয়। চীন দেশীয় লোকেরা কিছুদিন পূর্বে চা পাতা দ্বারা টাকা কড়ির কাজ চালাইত। আফ্রিকার কোন কোন অসভ্য জাতি এখনও এক প্রকার কড়ি ব্যবহার করিয়া থাকে। প্রাচীন আরব দেশীয়েরা ঘোড়া গরু দ্বারা বিনিময় করিত। যখন কেহ কোন জিনিষ কিনিতে বাহিত তখন এক পাল গরু, ঘোড়া, ছাগল, তাড়াইয়া লইয়া বাহিত, আবার যে বিক্রয় করিত তাহারও এইরূপ জিনিষ বেচিয়া একপাল পশু তাড়াইয়া লইয়া বাহিতে হইত। ইহা হইতেও হাসির কথা আছে। আভিসিনিয়া দেশে লবণ মুদ্রারূপে বিরাজ করিতেন। কোন কোন দেশে চানড়া দিয়াও টাকার কাজ চালান হইত।


এ সকল অসভ্য দেশের কথা। সভ্য দেশে সর্বত্রই স্বর্ণ ও রৌপ্য মুদ্রা ব্যবহৃত হয়। সকল সভ্য দেশেই এই এক রূপ নিয়ম হইবার কারণ কি ? যে সমুদায় জিনিষ সহজে পাওয়া যায় তাহা দ্বারা যদি মুদ্রা প্রস্তুত হইত তবে কি অসুবিধা হইত একবার ভাবিয়া দেখা যাউক। মনে কর মাটি কিংবা কাঠ যদি টাকারূপে ব্যবহার করা যায় তাহা হইলে একটা সামান্য জিনিষ কিনিতে হইলেও গাড়ী গাড়ী টাকা বোঝাই করিয়া লইতে হইত। এইজন্তই যাহার মূল্য অধিক এবং যাহা একস্থান হইতে অল্পস্থানে সহজে লইয়া যাওয়া যায় তাহাই মুদ্রারূপে ব্যবহৃত হইয়াছে। মুদ্রার জন্ত এরূপ জিনিষ ব্যবহার করা কর্তব্য যাহা দুশ্রাপ্য নয় অথচ অধিক মূল্যবান এবং সহজে বহনীয়। কেবল যদি অধিক মূল্যবান জিনিষই মুদ্রারূপে প্রচলিত হইত

তাহা হইলে হীরক মণিমুক্তা প্রভৃতিই অধিক উপযোগী ছিল। কিন্তু এত অধিক মূল্যবান ও দুশ্রাপ্য জিনিষ ব্যবহৃত হইলেও অতিশয় অসুবিধা হইত। সামান্য লোকে টাকা কড়ি পাইত না এবং কিছুদিন পর হীরক ও মণিমুক্তা হয়তো আর পাওয়াই বাহিত না। এইরূপ নানা কারণেই স্বর্ণ ও রৌপ্য মুদ্রারূপে প্রচলিত হইয়াছে এবং হইতেছে ; আশা করা যায় এ প্রথা শীঘ্র উঠিয়া বাহিবার নহে।

যে টাকা কড়ি দ্বারা আমরা এত অসুবিধা হইতে নিস্তার পাইয়াছি এবং যাহার প্রসাদে এত সুখ ও সুবিধা ভোগ করিতেছি তাহা কত আদরের জিনিষ ! এইরূপ জিনিষ যাহারা অন্য় আমোদ প্রমোদের জন্ত ব্যয় করে তাহারা কি মূর্খ !! বাহাদের টাকা কড়ি নাই, একবার ভাবিয়া দেখ তাহারা কত কষ্ট ও কত অসুবিধা ভোগ করে। ভাই, যদি তোমার বেশী টাকা থাকে যদি তুমি নিজের ব্যয় কুলাইয়া টাকা বাঁচাইতে পার ; তবে তাহা অসংকাজে ব্যয় না করিয়া কুপথে বিসর্জন না করিয়া দরিদ্রের সুখ ও সুবিধার জন্ত ব্যয় কর। তুমি টাকার প্রসাদে যে সুখভোগ করিতেছ তাহা দিগকে সেই সুখের কিঞ্চিৎ ভাগী কর। ঈশ্বর তোমার প্রতি প্রসন্ন হইবেন—দরিদ্র স্বর্গের দিকে ছই হস্ত তুলিয়া তোমাকে প্রাণ ভরিয়া আশীর্বাদ করিবে।



## প্রজাপতি ।



ছুঁওনা ছুঁওনা প্রজাপতি ওটি,  
যেওনা যেওনা উহার কাছে ;  
বাতাসে বিছায়ে ছোটপাখা ছুটি  
ঘুরিয়া ফিরিয়া কেমন নাচে !

নবীন নধর, নিখুঁত সুন্দর  
বিমল কোমল শরীর খানি !  
কিবা অপরূপ রূপ মনোহর  
নিরখিলে আহা জুড়ায় প্রাণি !

তরুণ-তপন কোমল-কিরণ  
পড়েছে উহার শরীর'পরে,  
আহা মরি মরি কর দরশন  
কি সুন্দর শোভা বিকাশ করে !

৪

স্বভাবের শিশু, ফেরে বনে বনে  
নাহি কোন ভয় ভাবনা-ঘোর,  
নাচে, হাসে, গায় আপনার মনে  
আপনার ভাবে আপনি ভোর !

৫

সদাই প্রফুল্ল—সরল-হৃদয়,  
করে না করে না কাহার ক্ষতি !  
কপট আচার, হিংসা করে কয়,  
জানে না কখন স্মীল মতি !

৬

ফুলে ফুলে ফুলে করি মধুপান,  
কুসুমের রেণু মাখিয়া গার,  
বিহরে আনন্দে সারা-দিনমান,  
আর কোন স্মৃতি নাহিত চায় !

৭

জননী'র কোলে শিশুটি যেমতি  
স্তনপান করে ঘুমায় সুখে !  
কুসুমের মধু খেয়ে প্রজাপতি  
তেমতি ঘুমায় কুসুম-বুকে !

৮


সাদা-সিধা মন, সরল সৃজন,  
উহার মতন কে আছে আর ?  
তবু হৃষ্ট-লোকে বল কি কারণ,  
“পাগল” বলিয়া নিন্দেরে তার ?

৯


যে বলে বলুক, তাহে ক্ষতি নাই,  
নিন্দুক লোকের স্বভাব এই  
শত শত গুণ না দেখিয়া ভাই,  
তিল-পারা দোষ ধরিবে সেই !

১০

আমরাও ভাই করিয়া যতন,  
প্রজাপতি মত সকলে হব,  
সরল সৃজন, হব খোলা মন,  
যে যা বলে তাহা সকলি সব !



## কাশ্মীরে দেখিবার জিনিষ ।



হুসের দিন দিন জ্ঞান বাড়ি-  
তেছে, বিদ্যা বুদ্ধি বাড়িতেছে ।  
জ্ঞানের সাহায্যে মানুষ সকল  
কার্যেরই একটা না একটা কারণ

ষ্টিক করিয়া লইতেছে ; কিন্তু তবুও প্রকৃতির  
মধ্যে এমন অনেকগুলি অদ্ভুত ব্যাপার দেখিতে  
পাওয়া যায়, যাহার নিকট মানুষের জ্ঞান, মানু-  
ষের বিদ্যা বুদ্ধি পরাস্ত হইয়া রহিয়াছে । পৃথি-  
বীর মধ্যে অনেক স্থানে এমন আশ্চর্য্য ব্যাপার  
দেখিতে পাওয়া যায় । আজ আমরা কাশ্মীর  
রাজ্যের কয়েকটি আশ্চর্য্য পদার্থের বিষয় বলিব ।

শ্রীনগরের নিকট একস্থানে একটা ছোট  
দ্বীপ আছে, এই দ্বীপে একটা কুণ্ড আছে, এবং  
কুণ্ডের মাঝখানে ইঁটের একটা ছোট বেদীর

উপর একটা ধ্বজা ও পতাকা স্থাপিত আছে ।  
হিন্দুদিগের ইহা একটা তীর্থস্থান । যাত্রীগণ  
ক্ষীর এবং পায়স এই কুণ্ডে নিক্ষেপ করিয়া,  
দেবীর পূজা করিয়া থাকে সেইজন্ত ইহার  
নাম, —ক্ষীর ভবাণী । এই কুণ্ডের জলের বর্ণ  
অনবরত পরিবর্তিত হইতেছে ; জলের রং কখনও  
গোলাপী, কখনও রক্ত বর্ণ, কখনও সবুজ, কখনও  
বা অশ্রুপ্রকার দেখিতে পাওয়া যায় । অধিক-  
দিন যদি জলের রং রক্ত বর্ণ থাকে, তাহা হইলে  
সে দেশের লোকেরা বলিয়া থাকে যে, দেবী  
কুপিতা হইয়াছেন ; এবং রাজ্য মধ্যে কোন দুর্ঘ-  
টনা ঘটিবে, এই আশঙ্কা করিয়া থাকে । জলের  
বর্ণ কেন এপ্রকার পরিবর্তিত হয়, তাহা এপর্যন্তও  
কেহ স্থির করিতে পারেন নাই । যাত্রীরা কুণ্ডের  
জলে যে সমস্ত পদার্থ নিক্ষেপ করে, সময় সময়  
তাহা তুলিয়া কুণ্ডের পক্ষোদ্ধার করা হয়, কিন্তু  
তাহাতেও কোন পরিবর্তন দেখা যায় না ।  
জলের রং কখনও নীল হইতেছে, কখনও বা  
সাদা হইতেছে, কখনও বা রক্ত বর্ণ হইতেছে ;  
আবার কখনও বা অনেকদিন পর্যন্ত এক রংই  
রহিয়াছে । কি কারণে এপ্রকার হয়, তাহা  
এখনও কেহ স্থির করিতে পারেন নাই ।

শ্রীনগরের দক্ষিণভাগে, একস্থলে একটা অতি  
উচ্চভূমি আছে ; এই উচ্চভূমির নিম্নভাগে প্রায়  
২০ হস্ত প্রশস্ত একটা নালা দেখা যায় । এই  
নালাটি সকল সময়ই শুষ্ক থাকে ; কিন্তু প্রতি  
বৎসর ভাদ্রমাসে, গুরুপক্ষের অষ্টমী তিথিতে ঐ  
উচ্চভূমির নানাস্থান হইতে জল নিসৃত হইয়া  
নালায় পড়ে, এবং নালাটি পূর্ণ হইয়া যায় । এই  
নালাটির নাম জটাগঙ্গা ; বছরের সমস্ত সময়  
ইহা শুষ্ক থাকে, কেবলমাত্র ঐ এক নির্দিষ্ট দিনে,  
ইহা জলপূর্ণ হয় ।

এই জটীগঙ্গার কিছুদূবে, একটা খুব বড় হ্রদ আছে; ইহার নাম হাকের সর। এই হ্রদের মধ্যে কতকগুলি দ্বীপ আছে। এই দ্বীপগুলিতে বড় বড় বৃক্ষ প্রভৃতি জন্মিয়াছে এবং গরু প্রভৃতি দ্বীপের উপর চরিয়া বেড়াইতেছে। আশ্চর্যের বিষয় এই যে, খুব প্রবলবেগে যখন বাতাস বহিতে থাকে, তখন এই দ্বীপগুলি নৌকার মত ইতস্ততঃ ভাসিতে থাকে; বড় বড় গাছ, গরু বাছুর প্রভৃতি জীবজন্তু লইয়া বাতাসে এদিক ওদিক চালিত হইতে থাকে। কাশ্মীরে এ প্রকার ভাসমান ক্ষেত্র আরও আছে, কিন্তু সেগুলি মানুষের তৈয়ারী। জলের উপর লতা পাতা জন্মাইয়া, ক্রমে তাহার উপর মাটি ফেলিয়া কাশ্মীরের লোকেরা তাহার উপর শস্তক্ষেত্র তৈয়ার করে; এবং ইচ্ছামত এক স্থান হইতে আর একস্থানে লইয়া যায়। সময় সময় এই সকল ক্ষেত্র চুরি যায়, এবং তাহা লইয়া মোকদ্দমাও হইয়া থাকে। কিন্তু উপরে যে দ্বীপের কথা বলা হইয়াছে, সেগুলি মানুষের তৈয়ারী নহে, এবং তাহার আয়তনও খুব বড়।

আর একস্থানে একটা কুণ্ড আছে, তাহাতে বৈশাখ মাসের মাঝামাঝি হইতে জ্যৈষ্ঠ মাসের মাঝামাঝি পর্য্যন্ত প্রত্যহ তিনবার কুণ্ডের মধ্যস্থ সাতটি স্থান হইতে জল বাহির হইয়া কুণ্ডপূর্ণ করে, এবং প্রত্যেকবার অতি অল্পকাল পর্য্যন্ত জল থাকে, তার পর আবার শুকাইয়া যায়। ইহার নাম ত্রিসন্ধা।

আর একটা কুণ্ড দেখিতে পাওয়া যায়; সেটা সকল সময়ই শুষ্ক থাকে। কিন্তু আশ্চর্যের বিষয় এই যে, মধ্যে মধ্যে হঠাৎ কোথা হইতে জল আসিয়া কুণ্ড পূর্ণ হইয়া যায়; কুণ্ড এই ভাবে কতকক্ষণ পূর্ণ থাকে; আবার জল কোথায়


চলিয়া যায়। তখন একবিন্দু জলও কুণ্ডের মধ্যে দেখিতে পাওয়া যায় না।

আর এক স্থানে একটা খুব বড় পর্ব্বতের গুহা আছে। ইহার নাম মণ্ডা। শুনা যায় এই গুহার মধ্যে প্রবেশ করিয়া ইহার ভিতরের জিনিস খাইলে ঠিক বরফের মত বোধ হয়; কিন্তু তাহা খাইতে খাইতে গুহার বাহিরে আসিলে, আর সে শীতল বরফ থাকে না; কঠিন পাথরের মত হইয়া যায়। এখন এই গুহার মুখে একখানা বড় পাথর পড়িয়া যাওয়াতে আর ইহার মধ্যে যাওয়া যায় না।

আর একটা বলিয়াই আজ শেষ করিব। এক স্থানে একখণ্ড খুব বড় পাথর আছে, ইহার নাম হলদর। উহার নিকটে গিয়া “হলদর জল দেও” বলিয়া কয়েকবার চিৎকার করিয়া বলিলেই, সেই পাথরের গাত্র হইতে বিন্দু বিন্দু জল পড়িতে থাকে।

কাশ্মীরে দেখিবার জিনিস যে ইহাতেই শেষ হইল তাহা নহে। কাশ্মীরে দেখিবার জিনিস অনেক আছে। এমন সুন্দর এবং সুখের স্থান অতি অল্পই আছে। আমরা কেবল কয়েকটা প্রাকৃতিক আশ্চর্য ঘটনার উল্লেখ করিলাম।

পৃথিবীর কত স্থানে যে এই প্রকার কত আশ্চর্য পদার্থ আছে, তাহা কে বলিতে পারে? আজ বেগুলির কথা বলিলাম, তাহা আমাদের এ এই দেশেই রহিয়াছে। আমরা আশা করি আমাদের পাঠক পাঠিকাদিগের মধ্যে অন্ততঃ ছু চার জন এ সকল চোকে দেখিয়া চক্ষু স্বার্থক করিবেন।




কিছু দিন বড় বড় হইতেছিল! দশ বার জন লোক একটা ঘরে আশ্রয় লইল। মেঘে আকাশ অন্ধকার হইয়াছে। এমন সময় এক খানা কাল মেঘ ঘরের উপরে আসিয়া থামিল। মেঘ খানা ভয়ানক কাল; দেখিলেই ভয় হয়। ইহা দেখিয়া একজন বলিল “মেঘটা অবশ্যই কিছু চায়, হয়ত আমাদের মধ্যে একজন মহাপাপী আছে, তাহার মাথায় বাজ ফেলিয়া মেঘটা তাহাকে মারিতে আসিয়াছে।” আর একজন বলিল “একজন দোষীকে মারিতে গিয়া তাহার সঙ্গে এতগুলি নির্দোষীকে বধ করিবে, বোধ হয় এই জন্তই বাজ পড়িতে দেবী হইতেছে। কিন্তু দেবী আর কতক্ষণ হইবে, দোষী ব্যক্তি যদি শীঘ্র পৃথক হইয়া না যায় তবে আর আর সকলেও তাহার সঙ্গে মারা যাইবে।” আর একজন বলিল “ইহা কখনই হইতে পারে না; চল আমরা প্রত্যেকেই এক এক বার করিয়া বাহিরে যাই। যে দোষী সে বাহিরে গেলেই তার ঘাড়ে বাজ পড়িবে।” এই পরামর্শ বেশ সঙ্গত বোধ হইল; তার পর এক এক জন করিয়া বাহিরে যাইয়া ফিরিয়া আসিতে লাগিল। এইরূপে এক জন ছাড়া আর সকলেই বাহিরে গিয়া আসিল, কিন্তু তাহাদের কাহারও মাথায় বাজ পড়িল না। শেষ ব্যক্তির পালা যখন আসিল, তখন সে আর কোনমতেই বাহিরে যাইতে চাহে না। অত্যাচারী মনে করিল “এই ব্যক্তিই দোষী, ইহাকে ঘর ছাড়িয়া যাইতে হইবে,

নতুবা ইহার সঙ্গে সঙ্গে আমরাও মারা পড়িব।” এই ভাবিয়া সকলে ঠেলিয়া তাহাকে ঘরের বাহির করিয়া দিল, আর অমনি ঘরের উপর বাজ পড়িয়া তাহারা মরিয়া গেল। বাহাকে বাহির করিয়া দিয়াছিল সে বাঁচিল।

একটা ছোট ছেলের বাপ মা মরিয়া যাওয়াতে সে বড়ই দুঃখে পড়িল। সে মনে করিল যে একরূপ দুঃখ সহ করার চাইতে মরিয়া যাওয়াই ভাল। এই ভাবিয়া সে একটা গর্ত খুঁড়িতে আরম্ভ করিল। এমন সময়ে এক পুত্রহীন সওদাগর সেই পথ দিয়া যাইতেছিল, সে সেই ছেলেটাকে একরূপ গর্ত খুঁড়িবার কারণ জিজ্ঞাসা করিল। বালক উত্তর করিল “আমার মা নাই, বাপ নাই; আমার আর বাঁচিয়া ফল কি? আমি এই গর্তে পড়িয়া মরিব।” সওদাগরের বড় দয়া হইল; সে বলিল “তোমার মরিয়া কাজ নাই; তুমি আমার সঙ্গে এসো, আমরাই তোমার বাপ মা হইব।” বালক সওদাগরের সঙ্গে তাহার বাড়ীতে গেল, সেখানে সে খুব বহু পাইতে লাগিল। কিছু দিন পরে সওদাগরের এক ছেলে হইল। সওদাগর ও তাহার স্ত্রী এখন সেই দুঃখী ছেলেটাকে অত্যন্ত হিংসা করিতে লাগিল। তাহাদের হিংসা এতদূর বাড়িয়া উঠিল যে তাহারা সেই ছেলেটাকে মারিয়া ফেলিবার জন্ত একটা গভীর কূপ খুঁড়িয়া রাখিল—মনে করিল “একবার তো কূপে পড়িয়াই মরিতে গিয়াছিল, এবারে কূপ প্রস্তুত রহিয়াছে দেখিলে অবশ্যই তাহাতে ঝাপিয়া পড়িয়া মরিবো।” কিন্তু সেই দুঃখী সন্তান ইহার কোন খবর পাইবার পূর্বেই সওদাগরের নিজের ছেলে সেই কূপ দেখিতে গেল এবং হঠাৎ তাহাতে পড়িয়া প্রাণত্যাগ করিল।

গল্প গুলি সত্য না হউক, ইহাদের ভিতরে বেশ উপদেশ আছে? পরের মন্দ ভাবিও না। দেখ এই সকল লোক পরের অনিষ্ট করিতে গিয়া কি শাস্তিই পাইল!



## বালকের সংশিক্ষা।


কয়েক দিন হইল একখানি রেলের গাড়ীতে অনেক লোকের ভিড় হওয়াতে উপযুক্ত স্থানাভাব বশতঃ যাত্রীরা বড়ই কষ্ট পাইতেছিল, ইহার পর আবার গাড়ী ছাড়িবার কিছু পূর্বেই একটা বৃদ্ধ লোক দৌড়িয়া আসিয়া উক্ত রেলের গাড়ীতে উঠিলেন। স্থানাভাবে উক্ত বৃদ্ধ লোকটার দাঁড়াইয়া থাকিতে হইল। সে গাড়ীতে অনেক লোক ছিল কেহই কিছু বলিল না; সকলেই চুপ করিয়া বসিয়া আছে। একটা ১০।১২ বৎসরের বালক বৃদ্ধের কষ্ট দেখিয়া নিজের স্থান ছাড়িয়া দিয়া তাঁহার বসিবার জায়গা করিয়া দিল এবং নিজে দাঁড়াইয়া রহিল।

বৃদ্ধ ভ্রমশোকটী বালককে অশীর্ষাদ করিয়া তাহার যায়গায় বসিল। বালকের এইরূপ সংদৃষ্টান্ত দেখিয়া অত্যাশ্চর্য্য সকলেই তাহাকে প্রশংসা করিতে লাগিল। এটা যে উচিত কর্ম তাহা সক-

লেই জানেন তত্রাচ অত্র কেহই বৃদ্ধের বসিয়া বিশ্রাম করার স্থান দিলেন না।

এই ঘটনাটীতে বিশেষ কিছু লিপিবার নাই তত্রাচ যেরূপ সময় হইয়াছে তাহাতে না উল্লেখ করিলে এইরূপ সংকাজের জন্ত অত্যাশ্চর্য্য বালককে উৎসাহিত করা হয় না। আজ কাল সভ্যতার উন্নতির সঙ্গে সঙ্গে হ্রস্ব দিন দিন বাড়িতেছে এবং আমাদের প্রাচীনকালের হিন্দুদের যে সমুদয় সদগুণ ছিল তাহার ক্রমশঃ লোপ হইতেছে।

বৃদ্ধদের প্রতি শ্রদ্ধা প্রদর্শন এবং তাহাদিগকে ভক্তি করা সকলেরই কর্তব্য এবং যাহারা এরূপ কাজ করেন তাহারাই একটা সংশিক্ষা পাইয়াছেন ইহা বলিতে হইবে।




## ধাঁধা

গত মার্চ মাসের ধাঁধার উত্তর।

১। ৮, ১২, ৫, ২০।

## নূতন ধাঁধা।

১। এমন একটা তিন অক্ষরের কথা বল যাহার আদ্য অক্ষর ছাড়িলে সকল লোকেরই খাদ্য হয়; মাঝের অক্ষর ছাড়িলে তাহা দ্বারা সকলকেই সন্তুষ্ট করা যায় এবং শেষ অক্ষর ছাড়িলে তাহা হইতে সকলেই ভয় পায়।



জুলাই, ১৮৮৭।

## ভারতের অসভ্যজাতি।

জ্ঞান খার পাঠক পাঠিকা! এই যে ভাল ভাল কাগজে পরিষ্কার অক্ষরে ছাপান নানা প্রকার বই পড়িতেছ, সুন্দর সুন্দর জামা, কাপড়, জুতা, ছাতা ব্যবহার করিতেছ, কত প্রকার সুমিষ্ট খাদ্য আহা করিয়া আপনাকে কৃতার্থ মনে করিতেছ; আবার দীর্ঘকালের জন্ত বিদ্যালয় সকল বন্ধ হইলে বাড়ী যাইবার সময় রেলের গাড়ি কিম্বা কলের জাহাজে চড়িয়া পনের দিনের পথ এক দিনেই যাইতেছ, তোমরা কি মনে কর পৃথিবীতে চিরকালই এইরূপ চলিয়া আসিতেছে? না, তা নয়, আমরা যে সকল সুবিধা এখন ভোগ করিতেছি তাহা চিরকালও ছিল না কিম্বা হঠাৎ এক দিন কিম্বা এক সময়েও হয় নাই; এ সকল মানুষের শিক্ষা এবং জ্ঞান বৃদ্ধির সঙ্গে সঙ্গে ক্রমে হইয়াছে। তোমরা যত যত্ন ও পরিশ্রম করিয়া শিক্ষা করিবে তত জানিতে পারিবে যে, পৃথিবীর অবস্থা ক্রমে পরিবর্তন হইয়াছে। বেশি দিনের কথা নয়, আমরা যখন তোমাদিগের মত বালক ছিলাম তখন সখার মত এমন এক খানি

ভাল কাগজ ছিল না যাহা পাঠ করিয়া আমরা সংশিক্ষা পাইতাম। এখন কলিকাতা ও ঢাকা প্রভৃতি বড় বড় সহরে গ্যাসের আলো এবং কলের জল হইয়া মানুষের কত সুবিধা হইয়াছে, কুড়ি পঁচিশ বৎসর পূর্বে এ সকল কিছুই ছিল না; পরিষ্কার জলের অভাবে কলিকাতার মত বড় বড় সহরে লোকের যে কি কষ্ট হয় তাহা বুঝিতেই পারিতেছ। কলিকাতা হইতে ঢাকা কিম্বা মুরশিদাবাদ এখন এক দিনেই যাওয়া যায়, কিন্তু আগে যখন রেলের গাড়ি এবং কলের জাহাজ হয় নাই তখন অনেক দিন লাগিত। কেবল যে যাইতে বিলম্ব হইত তাহা নয়, যাওয়া আসা অতি বিপদজনক ছিল; স্থলপথে চোর ডাকাইতের ভয়, জল পথের তর্কখাই নাই—ক্ষুদ্র ক্ষুদ্র নৌকায় বড় বড় নদী বাহিয়া প্রাণটি হাতে করিয়া যাইতে হইত। কেবল যে আমাদের দেশেই এইরূপ নানা প্রকার সুবিধা জনক পরিবর্তন হইয়াছে তাহা নয়, অন্যান্য দেশেও হইয়াছে। তোমরা গুনিয়া থাকিবে আগে বিলাত হইতে এ দেশে আসিতে ছয় মাস আবার এদেশ হইতে বিলাতে যাইতে ছয় মাস লাগিত, এখন সেই ছয় মাসের পথ একুশ বাইশ দিনের হইয়াছে। এই চব্বিশ সপ্তাহের পথকে তিন সপ্তাহের করিতে যে কত সময় কত বিদ্যাবুদ্ধি, পরিশ্রম ও অধ্যবসায় এবং কত লোকের সাহায্য লাগিয়াছে তা আর

তোমাদিগকে কি বলিব। দেখিলে, অতি অল্প সময়ের মধ্যে পৃথিবীর এবং সেই সঙ্গে মানুষের অবস্থার কত পরিবর্তন হইয়াছে! একশত দেড় শত বৎসরের মধ্যে যদি এত উন্নতি হইতে পারে তাহা হইলে একবার মনে করিয়া দেখ চুই তিন হাজার বৎসরে মানুষের অবস্থার কত পরিবর্তন হওয়া সম্ভব! আর বাস্তবিক তাহাই হইয়াছে। যে ইংলণ্ড আজ এত পরাক্রমশালী, এত উন্নত চুই হাজার বৎসর পূর্বে সেই ইংলণ্ডের অবস্থা কি ছিল তোমরা জান কি? সেই সময়ে যে সকল লোক ঐ দেশে বাস করিত তাহাদিগের ঘর বাড়ী ছিল না; তাহারা চাষ করিয়া শস্যাদি উৎপন্ন করিতে জানিত না; পর্বতগুহার কিছা বড় বড় গাছের কোটরে বনে জঙ্গলে বাস করিত; বনের পশু মারিয়া আহাৰ করিত, পশুর ছাল গায়ে দিয়ে শীত নিবারণ করিত। তখন তাহারা অসভ্য ছিল। সেই দেশ এখন কি হইয়াছে! এখন বোধ হয় তোমরা শুনিয়া আশ্চর্য হইবে না যে, এমন এক সময় ছিল যখন মানুষ মাত্রেই অসভ্য ছিল, অর্থাৎ তখন কাহারও ঘর বাড়ী ছিল না, পরিচ্ছদ ছিল না, অস্ত্র শস্ত্র ছিল না, পশু পক্ষীরা যেমন ইচ্ছামত ইতস্ততঃ বিচরণ করিয়া বেড়ায়, ক্ষুধা হইলে আহাৰ অন্বেষণ করে, ভবিষ্যতের নিমিত্ত সঞ্চয় করিয়া রাখিতে জানে না, তখনকার মানুষও ঠিক তাই ছিল। মানুষের এই অবস্থাকেই প্রকৃত অসভ্য অবস্থা বলে, কত কাল পূর্বে যে, মানুষ মাত্রেই অবস্থা এরূপ ছিল তাহা বলিয়া দেওয়া কঠিন, তোমরা বত শিক্ষা লাভ করিবে, পুরাতত্ত্ব ভূতত্ত্ব প্রভৃতি পাঠ করিবে ততই জানিতে পারিবে যে, এ সকল কত প্রাচীন কালের কথা।

বর্তমান কালেও পৃথিবীর অনেক স্থানে অসভ্য-

জাতীয় মানুষ দেখিতে পাওয়া যায়; আফ্রিকা, আমেরিকা, অস্ট্রেলিয়া, প্রশান্ত ও ভারত মহাসাগরের দ্বীপপুঞ্জ, মধ্য আসিয়া, ভারতবর্ষ প্রভৃতি দেশ সকলের স্থানে স্থানে নানা জাতীয় অসভ্য মানুষ বাস করিয়া থাকে। ভারতবর্ষে যে সকল অসভ্য জাতি বাস করে বাহাতে তাহাদিগের বিষয় তোমরা কিছু জানিতে পার সেই উদ্দেশ্যে এই প্রবন্ধ লেখা হইতেছে।

ইতিহাসে পড়িয়া থাকিবে যে, প্রায় এক হাজার বৎসর পূর্বে ভারতবর্ষে হিন্দুরাই প্রধান ছিলেন, পরে মুসলমানেরা আসিয়া হিন্দুদিগকে পরাজয় করিয়া আপনাদিগের অধিকার স্থাপন করেন। মুসলমানেরা অনেক দিন রাজত্ব করার পর এখন ইংরেজরা এদেশের রাজা হইয়াছেন। এই সকল ঘটনার বহুকাল পূর্বে,—এত পূর্বে যে এখন ঠিক করিয়া সময় নিরূপণ করা কঠিন, ভারতবর্ষের সমস্ত অধিবাসী অসভ্য ছিল; কালক্রমে মধ্য আসিয়ার পশ্চিম প্রদেশ হইতে এক দল মানুষ আসিয়া ভারতবর্ষের আদিম অধিবাসীদিগকে পরাজয় করিয়া তাহাদিগের আধিপত্য স্থাপন করেন এবং আপনাদিগকে “আর্য্য” অর্থাৎ পূজ্য বা মানব কুলের শ্রেষ্ঠ বলিয়া পরিচয় দেন। আদিম অধিবাসীরা আর্য্যগণকে যে সহজে ভারতবর্ষে অধিকার বিস্তার করিতে দিয়াছিলেন তাহা নয়; তাহারা অনেক বিবাদ অনেক যুদ্ধ করিয়া ছিল, কিন্তু সংখ্যাতে অল্প হইলেও আর্য্যদিগের বল, বুদ্ধি, কৌশল, সাহস ও একতা আদিম অধিবাসীদিগের অপেক্ষা অনেক পরিমাণে বেশি ছিল বলিয়া অবশেষে আদিম অধিবাসীরা পরাজিত হয়। পরাজিত হইয়া কেহ কেহ আর্য্যদিগের দাসত্ব স্বীকার করে এবং কালক্রমে তাহাদিগের সহিত মিশিয়া যায়; কিন্তু বাহারা

অপেক্ষাকৃত বীর্যবান এবং স্বাধীনতাপ্রিয় তাহারা দাসত্ব স্বীকার না করিয়া এমন সকল দুর্গম জঙ্গলময় পাহাড়ে গিয়া বাস করে যেখানে মানুষ সহজে যাইতে পারে না। ভীল, কোল, চুয়াড়, ধাঙ্গড়, সাঁওতাল প্রভৃতি যে সকল অসভ্য জাতি এখন আমরা দেখিতে পাই তাহারা ভারতবর্ষের আদিম অধিবাসীদিগের বংশধর। ইহারা যে প্রকৃত অসভ্য তা বলা যায় না, কারণ বাহারা কেবল পশু পক্ষী মৎস্য শীকার করিয়াই আহাৰ করে, চাষ বাস করে না তাহারা প্রকৃত অসভ্য, কিন্তু যে সকল জাতির বৃত্তান্ত বলা হইতেছে ইহারা যদিও আহাৰের নিমিত্ত পশু পক্ষী শীকার করে তথাপি ইহাদিগের মধ্যে প্রায় সকলেই ধান গম প্রভৃতির চাষ করিয়া থাকে এবং সকলেই অন্ততঃ এক খানি কোপিন পরে, একবারে উলঙ্গ কেহই থাকে না। প্রকৃত অসভ্য না হইউক ইহারা অসভ্য জাতির মধ্যে পরিগণিত। তোমরা জিজ্ঞাসা করিতে পার, সহস্র সহস্র বৎসর চলিয়া গিয়াছে, কত দেশের কত অসভ্যজাতি সভ্য হইয়া গিয়াছে কিন্তু ভারতবর্ষের আদিম অধিবাসীদিগের অবস্থা এখনও কেন এত হীন? ইহার কারণ আছে, অন্যান্য অসভ্য জাতির মত ইহারাও অত্যন্ত সন্দিক্ধ চিত্ত, সহজে কাহারও সহিত মিশিতে চায় না, মিশিবার আবশ্যকও হয় না, কারণ ইহাদিগের জীবনে অভাব অতি কম, আর ইহারা যে সকল স্থানে বাস করে সে সকল স্থান প্রায়ই অস্বাস্থ্যকর এবং দুর্গম বলিয়া অপর লোক কেহ সেখানে যায় না এবং বাইবার বড় একটা আবশ্যকও হয় না। ইহারা মাক্কাতার আশ্রয় হইতে এক রকম কাজ করিয়া আসিতেছে, এক রকম গৃহে বাস করিতেছে, এক রকম খাদ্য আহাৰ করিতেছে, কিছুই পরিবর্তন নাই,

কিছুই উন্নতি নাই। পরিবর্তন এবং উন্নতি হইবেই বা কোথা হইতে? যে সকল কারণে জাতীয় অবস্থার পরিবর্তন হয় ইহাদিগের মধ্যে তাহার কিছুই নাই; শিক্ষা কাহাকে বলে জানে না, নীতি কাহাকে বলে জানে না, প্রতিদ্বন্দীতা একবারে নাই, উন্নত অবস্থার লোকের সঙ্গে মিশে না, কি করিয়া অবস্থার পরিবর্তন হইবে? ভারতবর্ষের শ্রেষ্ঠজাতির হাজার বিদ্যা, বুদ্ধি, ধর্ম্ম এবং উদারতার গৌরব করুন, তাহারা এই সকল আদিম অধিবাসীদিগকে বরাবর ঘণার চক্ষেই দেখিয়া আসিয়াছেন, কখন তাহাদিগের উন্নতির চেষ্টা করেন নাই। কিন্তু তোমরা শুনিয়া সন্তুষ্ট হইবে যে, আমরাদিগের পূর্ব পুরুষেরা বাহা করেন নাই কিছা আমরাও বাহা কখন কল্পনা করি নাই, খ্রীষ্ট ধর্ম্ম প্রচারকেরা সাত সমুদ্র পার হইয়া এদেশে আসিয়া তাহা করিতেছেন এবং ঈশ্বর ইচ্ছায় অনেকটা পরিমাণে কৃতকার্য্যও হইতেছেন। পাদ্রি সাহেবেরা এখন এই সকল অসভ্য জাতিদিগের মধ্যে বাস করিয়া তাহাদিগকে শিক্ষা দিতেছেন এবং তাহাদিগের মধ্যে খ্রীষ্টধর্ম্ম প্রচার করিতেছেন। যে উৎসাহ এবং অধ্যবসায়ের সহিত তাহারা কাজ করিতেছেন তাহাতে বোধ হয় অতি অল্প সময়ের মধ্যেই এই সকল অসভ্য জাতির শিক্ষিত ও সভ্য হইয়া উঠিবে।

বাহাতে তোমরা সহজে বুঝিতে পার কোন অসভ্য জাতি ভারতবর্ষের কোন অংশে বাস করে এই উদ্দেশ্যে একখানি ক্ষুদ্র মানচিত্র (Map) দেওয়া হইল; ইহাতে অসভ্য জাতির নামগুলি স্পষ্ট করিয়া লেখা আছে। এবারে ধাঙ্গড়দিগের বিষয় সংক্ষেপে কিছু বলা যাইতেছে।

ছোটনাগপুর, হাজারিবাগ, রাঁচি, সম্বলপুর প্রভৃতি প্রদেশ সকলের পাহাড় ও জঙ্গলে ধাঙ্গড় দিগের বাস। আমরা যদিও ইহাদিগকে ধাঙ্গড় বলিয়া থাকি কিন্তু এই জাতির প্রকৃত নাম “ওরাও”। কতকাল হইতে যে ইহারা এই সকল স্থানে বাস করিয়া আসিতেছে তাহা বলা যায় না, বোধ হয় তিন চারি হাজার বৎসরের কম নয়, ইহাদিগের মধ্যে একটি প্রবাদ আছে যে, ইহারা প্রথমে কুনকাল দেশ হইতে আসিয়া রোথায় বসতি করে, পরে একদল ছোটনাগপুরের দিকে আর একদল রাজমহলের দিকে যায়, যে দল রাজমহল পাহাড়ে গিয়া বাস করে তাহারা “পাহাড়ী” নামে পরিচিত (ইহাদের বৃত্তান্তও পরে জানিতে পারিবে)।

তোমরা বোধ হয় অনেকেই ধাঙ্গড় দেখিয়াছ, বিশেষতঃ যাহারা কলিকাতায় থাক, কারণ এখানে গৃহস্থের বাড়ীর নর্দমা প্রভৃতি অপরিষ্কার হইলে ইহারা প্রায় পরিষ্কার করিয়া দিয়া যায়। অধিকাংশ অসভ্যজাতির মত ধাঙ্গড় দেখিতে কদাকার, রং সকলেরই কাল, পেট মোটা, কপাল ছোট, চক্ষু ক্ষুদ্র ক্ষুদ্র এবং ভাব শূন্য, কিন্তু ছুই এক জনের আকার অবয়ব সুন্দর না হউক বৈশিষ্ট্য স্বর্গঠন। ইহারা মাথায় লম্বা লম্বা চুল রাখে এবং সে গুলিকে জড়াইয়া মাদ্রাজী স্ত্রীলোক দিগের মত খোঁপা বাঁধে, অর্থাৎ আমাদের দেশের স্ত্রীলোকদিগের মত খোঁপাটি উচু করিয়া না রাখিয়া চুলের নিচে গুঁজিয়া রাখে। ইহাদিগের পরিচ্ছদ অতি সামান্য একখানি কোপিন মাত্র, পুরুষ অপেক্ষা স্ত্রীলোকদিগের পরিচ্ছদ অনেক ভাল, কারণ স্ত্রীলোকেরা সর্দার মত কিছু কোমরে জড়ায় আবার কখন কখন চাদরও ব্যবহার করিয়া থাকে। আকারে আর পরিচ্ছদে

যাহাই হউক ইহারা বেশ প্রকৃষ্টিত এবং কশ্মিষ্ঠ। কি সভ্য কি অসভ্য সকল জাতির স্ত্রীলোকেই অলঙ্কার ভাল বাসে, সভ্য এবং ধনী লোকেরা না হয় সোণা রূপা, হীর, মুক্তা নিম্নিত অলঙ্কার ব্যবহার করিয়া আপন আপন শরীরের সৌন্দর্য্য বৃদ্ধি করিতে চেষ্টা করেন, গরিব অসভ্য বেচারিরা এসকল বহুমূল্য দ্রব্য কোথায় পাইবে, তাহারা শঙ্খ, প্রবাল, পাখীর পালক, পুতির মালা দিয়া শরীর সজ্জিত করে। এই সকল ভিন্ন স্ত্রীলোকেরা আবার প্রায় সর্কাঙ্গেই উকি পরিয়া থাকে। উকি পরা কাহাকে বলে বোধ হয় তোমরা সকলেই জান। অনেক জাতীয় অসভ্যের মধ্যে কি স্ত্রীলোক কি পুরুষ সকলেই উকি পরে, কিন্তু ধাঙ্গড় দিগের পুরুষের গায়ে বড় একটা উকির দাগ দেখিতে পাওয়া যায় না, তবে যুবা পুরুষেরা অনেক স্নানে সাধ করিয়া বাহুতে উকি পরে। স্ত্রীলোকদিগের মাথায় যদি চুল কম হয় তাহা হইলে ইহারা পরচুলা ব্যবহার করিয়া থাকে, এ বিষয়ে আর ইহাদিগকে অসভ্য বলিবার যৌ নাই, কারণ ইংলও ও ফ্রান্স প্রভৃতি সুসভ্য দেশের মহিলারা প্রায়ই পরচুলা পরিয়া থাকেন। আমাদের দেশে বালিকা কিশা যুবতীদিগের মধ্যে বিশেষ বদ্ধতা জন্মিলে যেমন “সই” পাতানের প্রথা আছে ধাঙ্গড় স্ত্রীলোকদিগের মধ্যেও সেই রূপ আছে, তবে ইহারা “সই” না বলিয়া “গুই” বলিয়া থাকে।

ধাঙ্গড়দিগের ঘর বাড়ী অতি সামান্য, অপরিষ্কার এবং বিশৃঙ্খল; নাহুব, গরু, ছাগল, ভেড়া, সুরকর, মুরগি সকলের এক যায়গায় বাস। ঘর বাড়ীর এইরূপ অভাব এবং দুর্দশা বলিয়া প্রত্যেক গ্রামে এক একখানি নির্দিষ্ট ঘর আছে, যেখানে গ্রামের সমস্ত অবিবাহিত যুবা পুরুষেরা রাত্রিতে

শয়ন করিয়া থাকে, এবং এই ঘরের সম্মুখের উঠানে দিনের বেলায় গ্রামের যুবক যুবতীরা একত্রিত হইয়া নাচে, গায় এবং আমোদ করে। ধাঙ্গড়দিগের মধ্যে যদিও বাল্যবিবাহ নাই, কিন্তু হিন্দুদিগের দৃষ্টান্তে অনেক পরিবারের মধ্যে এখন এই প্রথা প্রচলিত হইয়াছে। আমাদের মধ্যে যেমন পিতা মাতা কিশা অন্য আত্মীয়েরা বর কন্যা মনোনীত করিয়া থাকেন, ধাঙ্গড়দিগের মধ্যে তাহা নাই, ইহাদের মধ্যে যাহারা বিবাহ করিবে তাহারা আপন আপন স্ত্রী পুরুষ মনোনীত করিয়া লয়। বিবাহের দিন স্থির হইলে বর আপন আত্মীয় বন্ধুগণকে সঙ্গে করিয়া বিবাহ করিতে যায়। বিবাহের পূর্বে কন্যার আত্মীয় বন্ধুদিগের সহিত বরের একবার ভান যুদ্ধ হয়, তাহার মানে এই, যে কন্যার পক্ষের লোকেরা যেন কন্যাকে ছাড়িয়া দিতে চায় না আর বর যেন কন্যাকে জোর করিয়া লইয়া যাইতে চায়। এই ভান যুদ্ধ অতি প্রাচীনকালের প্রকৃত অসভ্য দিগের আচার ব্যবহারের চিহ্ন স্বরূপ। কৃত্রিম যুদ্ধ শীঘ্রই মিটিয়া যায় এবং তখন নৃত্য গীত আরম্ভ হয়, এই নৃত্য গীতে বর কন্যাও যোগ দেয়। ধাঙ্গড়দিগের বিবাহে কোন মন্ত্রাদি নাই, কেবল হরিদ্রা মাখা এবং সিন্দূর পরা হইলেই বিবাহ হইয়া গেল। হলুদ মাখার সময় বর কন্যাকে একখানি হলুদ বাটা শীলের উপর দাঁড়াইতে হয়; তাহাদিগের আত্মীয় বন্ধু চারি দিকে ঘিরিয়া দাঁড়ায় এবং একখানি চাদর দিয়া কন্যা পাত্রের সমস্ত শরীর ঢাকিয়া দেয়, এই ঢাকার মধ্যে থাকিয়া বর কন্যাকে এবং কন্যা বরকে হলুদ মাখাইয়া দেয়; ইহার পর বর কন্যা স্নান করিয়া আসে, তখন বর কন্যাকে সিন্দূর পরাইয়া দেয়। এই সিন্দূর পরানকে ধাঙ্গড়েরা


“সিন্দূর” দান বলে। বুদ্ধিমান ধাঙ্গড় দিগের সহিত কথাবার্তা কহিয়া বতদূর জানা গিয়াছে তাহাতে প্রত্যেক বিবাহ যে ঠিক এই প্রণালী অনুসারে হয় এরূপ বোধ হয় না। ধাঙ্গড়দিগের মধ্যে অবরোধ প্রথা নাই।

ধাঙ্গড়েরা বেশ পরিশ্রমপটু; ইহাদিগের বিশ্বাস এই যে, পরিশ্রম করিবার নিমিত্তই তাহারা জন্মিয়াছে। ধাঙ্গড়দিগের খাদ্যের মধ্যে ভাত আর দাল প্রধান; সাক, তরকারি কচিং আহার করে, তবে পশু পক্ষী মারিয়া প্রায়ই খাইয়া থাকে। ধর্ম্ম সম্বন্ধে ইহাদিগের বিশ্বাস এই যে, সর্বশক্তিমান পরমেশ্বর সৃষ্টিতেই সপ্রকাশ, ইহারা উপাসনার প্রয়োজন বোধ করে না, কারণ ইহাদিগের বিশ্বাস এই যে, ঈশ্বর কখন অনিষ্ট করেন না। অন্যান্য অসভ্য জাতির মত ইহারাও ভূত, প্রেত, বিশ্বাস করে, এবং এই সকল উপদেবতাগণকে সম্ভষ্ট রাখিবার নিমিত্ত পূজাদিও করিয়া থাকে। পরকাল সম্বন্ধে ধাঙ্গড়দিগের কিছুই জ্ঞান নাই, মাহুয মরিয়া গেলে তাহার কি হয় তাহা কিছুই জানে না, তবে অপমৃত্যু হইলে ভূত হয় বলিয়া বিশ্বাস করে; বিশেষতঃ বাঘে যে মাহুযকে মারিয়া ফেলে সে মাহুয যে বাঘ হয় এটি ইহাদিগের দৃঢ় বিশ্বাস। ইহাদিগের মধ্যে শব দাহ প্রথা প্রচলিত আছে, মৃত ব্যক্তির শরীর পুড়িয়া গেলে, ছাই এবং পোড়া অস্থিগুলি একত্র করিয়া কলসিতে করিয়া মৃত ব্যক্তির ঘরের নিকটে ঝুলাইয়া রাখে, এবং আগামী শীতকালে ফেলিয়া দেয়। যেখানে সেখানেই যে ফেলিয়া দেয় তাহা নয়, এই মৃত ব্যক্তির পূর্বে পুরুষদিগের অস্থি সকল যেখানে ফেলা হইয়াছে সেইখানেই ফেলিয়া দেয়।


কলিকাতার নিকটবর্তী হুর্গাপুর প্রভৃতি গ্রামে

অনেকগুলি ধান্ধড় ঘর বাড়ী বাঁধিয়া বাস করিতেছে, আপন দেশ অপেক্ষা কলিকাতায় বেশি উপার্জন করিতে পারে বলিয়াই ইহারা এখানে আছে। কলিকাতার ময়দানে মিউনিসিপালিটির অধীনে এবং বড় বড় বাগানে এই সকল ধান্ধড়কে খাটিতে দেখিতে পাওয়া যায়। পূর্বেই বলা হইয়াছে ইহারা বেশ পরিশ্রম পটু, তবে এদেশে কিছু দিন থাকিলে, এদেশের লোকের সঙ্গে মিসিলে ইহারাও কপটতা শিক্ষা করে। আপন আপন দেশে যখন যথেষ্ট শস্য জন্মে তখন অনেকে আবার এদেশ ছাড়িয়া চলিয়া যায়, আবার শস্যাদি ফুরাইলে এদেশে চলিয়া আসে। পাদ্রি সাহেবেরা এখন ধান্ধড়দিগকে শিক্ষা দিতেছেন, ধান্ধড়দিগের দেশে অনেক স্থানে তাঁহারা বিদ্যালয়ও স্থাপন করিয়াছেন, অনেক ধান্ধড় খ্রীষ্ট ধর্ম ও অবলম্বন করিয়াছে।

ক্রমশঃ



## বালক কলবার্ট ।



ন কাজের ফল ভাল হইলেই যে তাহা সাধুকর্ষ্য হইল, তাহা নহে। অভিপ্রায় দেখিয়া সাধুতা অসাধুতার বিচার করা হয়। মনে কর কোন

দরিদ্রবালক অনাহারে ক্রন্দন করিতেছে; তাহার কষ্ট দেখিয়া তোমার প্রাণে দয়া হইল; তোমার সঙ্গে কিছু নাই, কেবল তোমার জলখাবার ছইটী কি তিনটী পয়সামাত্র আছে। তুমি তোমার নিজের কষ্টের দিকে দৃকপাত না করিয়া তাহাকে ঐ পয়সামাত্র দিলে। সে তোমাকে চিনে না, অন্য কোন লোকও সেখানে নাই; সুতরাং তোমার এ কার্যের জন্ত প্রশংসালভের সম্ভাবনা নাই, তুমি সে প্রত্যাশাও রাখ না। এরূপ অবস্থায় তোমার ঐ কার্য অতি বৎসামান্য হইলেও তাহাকে সাধুকর্ষ্য বলিব।

আবার মনে কর কোন ধনশালী জমিদার সংবাদ পত্রে নিজের সুখ্যাতি প্রচারের ইচ্ছায় অথবা রাজ কর্মচারীদিগের নিকট রায় বাহাদুর বা রাজাবাহাদুর উপাধিলাভের প্রত্যাশায় সাধারণের হিতকর কোন কার্যে দশ হাজার টাকা দান করিলেন। তাঁহার হয়ত প্রকৃত পরহিতেষণা নাই, তাঁহার দরিদ্র প্রজাবর্গ হয়ত তাঁহার উৎপীড়নে অস্থির। এরূপ স্থলে তাঁহার এই দানকে সাধুকর্ষ্য বলিতে পারি না। শুদ্ধ সত্যনিষ্ঠা, দয়া, কর্তব্য জ্ঞান প্রভৃতি সংপ্রবৃত্তির বশীভূত হইয়া যে কার্য করা যায় তাহাই প্রকৃত সাধুকর্ষ্য নামের যোগ্য। তাহাতেই মানুষের হৃদয় উন্নত হয়। আর কোন প্রকার স্বার্থসিদ্ধির অভিপ্রায়ে যে কার্য সম্পাদিত হয় তাহা সাধুকর্ষ্য নহে, তাহাতে মানুষের অন্তঃকরণ উন্নত হয় না।

সংকার্যের প্রতি অনুরাগ ও অসংকার্যের প্রতি ঘৃণা মানুষের পক্ষে স্বাভাবিক। তবে বহু দিন অসং পথে থাকিয়া যাহাদের প্রাণ অসার হইয়া গিয়াছে তাহাদের কথা স্বতন্ত্র। অসংপথে থাকিয়া সুখভোগ করা অপেক্ষা সংপথে

থাকিয়া কষ্ট পাওয়াও ভাল, ইহাই মনুষ্য হৃদয়ের স্বাভাবিক অবস্থার ভাব। এই জন্যই যখন আমরা দেখিতে পাই যে, কোন ব্যক্তি প্রবল প্রলোভন সত্ত্বেও কর্তব্যপথ হইতে বিচলিত হইলেন না, তখন মুক্তকণ্ঠে তাঁহার প্রশংসা না করিয়া থাকিতে পারি না। আমরা তাঁহার সংসাহস দেখিয়া আনন্দিত হই এবং স্পষ্ট বুদ্ধিতে পারি যে, সে অবস্থায় নীচ স্বার্থের অধীন না হইয়া কর্তব্যজ্ঞানের অনুসরণ করাই যথার্থ মহত্ত্ব। নিম্নলিখিত ঘটনা ইহার একটী উজ্জল দৃষ্টান্ত স্থল।

ব্যাপ্টিস্ট কলবার্টের বয়স যখন পনের বৎসর, তখন তাঁহার পিতা তাঁহাকে একজন বস্ত্রব্যবসায়ীর অধীনে কর্মশিক্ষা করিবার জন্ত নিযুক্ত করিয়া দেন। এক দিন তাঁহার প্রভু তাঁহাকে ভিন্ন ভিন্ন মূল্যের চারি প্রকারের বস্ত্রসহ এক ধনী বণিকের নিকট পাঠাইয়া দেন। ইহার একটী গৃহের পরদা প্রস্তুত করিবার জন্য বস্ত্রের প্রয়োজন ছিল। তিনি নিজের মনোমত বস্ত্র পছন্দ করিয়া লইবেন এই অভিপ্রায়ে বস্ত্র ব্যবসায়ী তাঁহার নিকট ভিন্ন ভিন্ন প্রকারের বস্ত্র পাঠাইয়া দিয়াছিলেন। বণিক বস্ত্র মনোনীত করিয়া তাহার ত্রিশ গজ ক্রয় করিলেন। মূল্য জিজ্ঞাসা করিলে কলবার্ট ভ্রমক্রমে বলিলেন, ইহার প্রতি গজের মূল্য 'পনের ক্রাউন' কিন্তু ইহার প্রকৃত মূল্য গজ প্রতি আট ক্রাউন। বণিক তাহা জানিতেন না। তিনি কলবার্টের কথা শুনারে সমস্ত মূল্য চুকাইয়া দিলেন।

দোকানে ফিরিয়া আসিলে পর বৃদ্ধ বস্ত্রব্যবসায়ীর কথায় কলবার্ট নিজের ভ্রম বুদ্ধিতে পারিলেন।

কিন্তু লোভী বৃদ্ধের ইচ্ছা ঐ সমস্ত অর্থ আত্ম-

সাৎ করে। বৃদ্ধ বলিতে লাগিল,—“বেশ, বেশ! তুমি বড় স্মৃছেলে। এক দিন তোমা হইতে তোমার বংশের মুখ উজ্জল হইবে। পনের ক্রাউন! আমার ইচ্ছা করিতেছে আহ্লাদে চীৎকার করিয়া উঠি। যাহার দান ছয় ক্রাউনও নয়, তাহা বেচিয়া পনের ক্রাউন! আট ক্রাউনের বদলে পনের ক্রাউন দরে ত্রিশ গজ কাপড়! প্রতি গজে সাত ক্রাউন অধিক লাভ! আজ আমার কি শুভক্ষণে রাজি প্রভাত হইয়াছিল।”

ব্যাপ্টিস্ট বৃদ্ধের কথা শুনিয়া আশ্চর্য হইলেন। তিনি একটু পশ্চাতে সরিয়া গিয়া বলিলেন, “মহাশয়! বলেন কি? আমার একটা ভুল হইয়া গিয়াছে বলিয়া কি আপনি তাহা হইতে অন্যায় রূপে লাভ করিতে চান না কি?”

অর্থ লোলুপ বৃদ্ধ বলিল, “হাঁ! বুঝিয়াছি, তুমি ইহার কিছু অংশ চাও, না? অবশ্য তোমাকেও ইহা হইতে কিছু দিব।”

বালক কলবার্ট ধীর ভাবে নিজের টুপিটা হস্তে লইয়া বলিলেন, “মহাশয়, আমি এরূপ অত্যাচার্য্য করিতে পারিব না। আমি এখনি ঐ ভদ্রলোকটির কাছে গিয়া ক্ষমা চাহিব এবং তিনি অতিরিক্ত যে টাকা দিয়াছেন তাহা তাঁহাকে ফিরাইয়া দিয়া আসিব।”

মুখের কথা শেষ হইতে না হইতে কলবার্ট এক লম্ফে দোকানের বাহিরে উপস্থিত হইয়া ঐ বণিকের নিকট চলিলেন। অসাধু বস্ত্রব্যবসায়ী হতবুদ্ধি হইয়া দাঁড়াইয়া রহিল। ক্রোধে তাহার সর্ব শরীর কাঁপিতে লাগিল।

বণিকের গৃহদ্বারে উপস্থিত হইয়া কলবার্ট বিষম সঙ্কটে পড়িলেন। দ্বারবান্ প্রথমে তাঁহাকে প্রবেশ করিতে দিল না, বলিল, তাহার প্রভু এখন কাহারও সহিত সাক্ষাৎ করিবেন না।

কিন্তু কলবার্টের আগ্রহ ও অনুনয় দেখিয়া সে অবশেষে তাহার প্রভুকে জিজ্ঞাসা করিতে গেল। কলবার্ট তাহার পশ্চাৎ পশ্চাৎ চলিলেন। দ্বারবান্ বণিকের গৃহদ্বার উন্মোচন করিলে, বণিক জিজ্ঞাসা করিলেন, “কি চাও?”

দ্বারবান্ বলিল, “আজ্ঞা, সেই কাপড়ের দোকানের ছেলেটা আসিয়াছে; সে আপনার সহিত সাক্ষাৎ করিতে চায়।”

বণিক বলিলেন, “তাহাকে বল, এখন দেখা হইবে না।”

কলবার্ট বাহির হইতে মিনতি করিয়া বলিলেন, “আমি একটা কথামাত্র নিবেদন করিব।”

বণিক ক্রুদ্ধ হইয়া বলিলেন, “আবার তুমি কেন আসিয়াছ? তুমি কি চাও? আমি তোমার কাপড়ের দাম চুকাইয়া দিয়াছি? তবে আবার কি? আমার কাজ আছে। তুমি যাও।”

বণিকের কথায় ব্যাপ্টিষ্টের একটুও ভয় হইল না। তিনি মনে মনে জানিতেন তিনি কোন অত্যাচার কার্য করিতে আসেন নাই। তবে ভয় পাইবেন কেন? চলিয়া যাওয়া দূরে থাকুক, তিনি একেবারে বণিকের গৃহের মধ্যে গিয়া উপস্থিত হইলেন। বণিক মনে করিতেছিলেন দ্বারবান্কে হুকুম দিবেন যে, কলবার্টকে তাড়াইয়া দেয়। কিন্তু তাহার সাহস দেখিয়া তিনি মুহূর্তের জন্ত স্তম্ভিত হইয়া পড়িলেন।

কলবার্ট বলিতে লাগিলেন, “মহাশয়! আমি আপনার সহিত অত্যন্ত অত্যাচার ব্যবহার করিয়াছি; যদিও আমি ইচ্ছাপূর্বক এরূপ করি নাই, তথাপি তাহাতে আপনার ক্ষতি হইয়াছে।”

এই কথা শুনিয়া বণিক আরও বিস্মিত হইলেন। কলবার্টও সুবিধা বুঝিয়া গৃহের মধ্যে আরও একটু আগ্রসর হইলেন, এবং জামার পকেট

হইতে কতকগুলি মুদ্রা বাহির করিয়া টেবিলের উপর রাখিয়া বলিতে লাগিলেন, “আপনি আমাকে অল্পক্ষণ পূর্বে যে চারিশত পঞ্চাশ ক্রাউন দিয়া ছিলেন তাহা এই। আপনি অল্পগ্রহ পূর্বক এই টাকা লইয়া আমার প্রদত্ত রসীদ খানি ফিরাইয়া দিন। আমি আপনার নিকট যে কাপড় বিক্রয় করিয়াছি তাহার মূল্য পোনের ক্রাউন হিসাবে না হইয়া আট ক্রাউন হিসাবে হইবে। তাহা হইলে আমি আপনার দুইশত চল্লিশ ক্রাউন পাইব, বাকী দুইশত দশ ক্রাউন আপনি ফিরাইয়া পাইবেন। আমি ঐ টেবিলের উপর সমস্ত রাখিয়াছি।”

এই সকল কথা শুনিয়া বণিকের ক্রোধ চলিয়া গেল। তিনি মিষ্টবাক্যে জিজ্ঞাসা করিলেন, “তুমি যাহা বলিতেছ তাহা ঠিক ত? তুমি কি ঠিক জ্ঞান ইহাতে কোন ভুল হয় নাই।”

কলবার্ট উত্তর করিলেন, “না মহাশয়! আমি যাহা বলিলাম ইহাতে কোন ভুল নাই। আপনার কাজের সময় আপনাকে বিরক্ত করিলাম বলিয়া আপনার নিকট ক্ষমা প্রার্থনা করিতেছি। কিন্তু আমি স্বয়ং আমার ভুল বুঝিতে পারিবার পূর্বে যদি আপনি তাহা জানিতে পারিতেন তাহা হইলে আমার আক্ষেপ রাখিবার স্থান থাকিত না। আমি এখন বিদায় হই।”

বণিক বলিলেন, “একটু অপেক্ষা কর, তুমি কি জান যে, আমি কাপড়ের দর দামের বিষয় কিছু জানি না, সুতরাং তুমি ইচ্ছা করিলে এই সমস্ত টাকা নিজে লইতে পারিতে?”

“সে কথা আমার মনেই আসে নাই।”  
“কিন্তু যদি ইহা তোমার মনে হইত, তাহা হইলে কি করিতে?”

“এরূপ ইচ্ছা আমার মনে আসা অসম্ভব।”  
তুমি সাধুতার অনুরোধ এই যে টাকা আমাকে

ফিরাইয়া দিলে, ইহা যদি আমি তোমাকে পুরস্কার স্বরূপ প্রদান করি?”

ব্যাপ্টিষ্ট কোন প্রকার দ্বিধা না করিয়া বলিলেন, “আমার ঐ টাকাতে কি অধিকার আছে? এবং আপনিই বা উহা আমাকে দিবেন কেন? আমি কখনই উহা লইব না।”

বণিক ব্যাপ্টিষ্টের হস্ত নিজের হস্তে গ্রহণ পূর্বক বলিলেন, “আমি তোমার ব্যবহারে অত্যন্ত সন্তুষ্ট হইয়াছি।” বণিকের এক একবার ইচ্ছা হইতে লাগিল কলবার্টকে ঐ টাকা গ্রহণ করিতে বিশেষ করিয়া অনুরোধ করেন। কিন্তু পাছে তাহার মনে ক্রেশ হয় এই আশঙ্কায় তাহা হইতে নিরস্ত হইয়া মিষ্টবাক্যে তাহাকে বিদায় দিলেন।

ব্যাপ্টিষ্ট সন্ধ্যার বণিকের বাটী হইতে বাহির হইয়া যেমন রাস্তায় আসিয়া পড়িলেন, অমনিকে সজোরে তাহার জামার কলার ধরিল। ব্যাপ্টিষ্ট দেখিলেন তাহার প্রভু বৃদ্ধ বস্ত্র-ব্যবসায়ী। কলবার্ট টাকা ফিরাইয়া দিয়াছিলেন বলিয়া বৃদ্ধ ক্রোধে ক্ষিপ্তপ্রায় হইয়া তাহার প্রতি যথেষ্ট গালি বর্ষণ পূর্বক বলিল, “বা, আমার মন্থ হইতে চলিয়া যা। আর তোকে আমার কাজ করিতে হইবে না। আমাকে যেন আর কখনও তোর মুখ দেখিতে না হয়।”

\* \* \*  
সেই দিন সন্ধ্যাকালে ব্যাপ্টিষ্টের পিতামাতা আহার করিতে বসিয়াছেন, এমন সময় বালক কলবার্ট অপ্রতিভ ও ছুঃখিত ভাবে তথায় উপস্থিত হইয়া বলিলেন, “আমার মনিব আমাকে কৰ্ম হইতে বিদায় করিয়া দিয়াছেন।”

বৃদ্ধ কলবার্ট একটু রুষ্ট ভাবে বলিলেন, “তবে বোধ হয় তুমি কোন অত্যাচার কাজ করিয়াছিলে?”  
তখন ব্যাপ্টিষ্ট সমস্ত ঘটনা সরলভাবে যথাযথ

বর্ণন করিলেন। তিনি কোনও কথা বাড়াইয়া বলিলেন না, তাহার প্রভুর চরিত্রের কোন প্রকার নিন্দাও করিলেন না। তাহার কথা শেষ হইলে তাহার পিতা সগর্বে তাহাকে আলিঙ্গন করিয়া বলিলেন, “তুমি আমার উপযুক্ত পুত্র বটে, তুমি বেশ কাজ করিয়াছ।”

তাঁহার মাতাও তাহাকে আলিঙ্গন করিয়া বলিলেন, “হাঁ বাবা, ব্যাপ্টিষ্ট, তুমি ঠিক কাজ করিয়াছ।”

## ভিখারিণীর প্রার্থনা ।

(১)

“দ্যাখো বাবা একবার চেয়ে,  
ছুরারে যে আছিগো দাঁড়িয়ে,  
পিপাসায় ছাতি ফেটে যায়  
ম’রে ঝই ক্ষুধার আলায়  
চরণও ত চলে নাকো আর  
চাও বাবা চাও এক বার।

(২)

“এক মুঠো অন্ন স্নু চাই  
তাও কি এ পোড়া ভাগ্যে নাই?  
কচি কচি শিশু ছুটী আছে  
অন্ন বিনে শুকিয়ে যে গেছে  
কি নিয়ে তাদের মুখে দেবো  
কোন প্রাণে ঘরে ফিরে যাব?

(৩)

“তোমাদের এ ধন থাকিতে  
আমরা কি পাব না খাইতে?”



ঈশ্বরের রাজ্যের ভিতরে  
মোরা কি মরিব অনাহারে?  
সুখ ইচ্ছা অথ কিছু নাই  
এক মুঠো অন্ন সুধু চাই!

(৪)

“চাও তবে একবার চাও  
এক মুঠো অন্ন সুধু দাও  
তোমাদের “জয় জয়” হবে  
এক গুণে দশ গুণ পাবে।  
কাঙালেরে এক মুঠো দিলে  
শত মুষ্টি মেলে পরকালে।”

## মেরী কার্পেটার ।

স্নেহ, দয়া, পরোপকার প্রভৃতি গুণে স্ত্রীজাতীর হৃদয় পরিপূর্ণ। স্ত্রীজাতীর হৃদয়ে যদি এই সকল প্রবৃত্তিগুলি না থাকিত, যদি তাঁহাদিগের হৃদয় পুরুষের মত কঠিন হইত, অথবা ছুঃখ কষ্টে যদি তাঁহাদিগের হৃদয় ব্যথিত না হইত, অথবা চক্ষের জল দেখিলে যদি ইহাদিগের চক্ষের জল না পড়িত, তাহা হইলে আর মানুষের ছুঃখ কষ্টের সীমা থাকিত না। মাতার স্নেহ, ভগ্নীর ভাল-বাসা,—এই সকল আছে বলিয়া আমরা কত ছুঃখ কষ্টের হাত হইতে রক্ষা পাইতেছি, কত শোক বজ্রণা ভুলিতেছি, কত সুখে সুখী হইতেছি। যদি ইহাদিগের হৃদয়ে এই স্বর্গীয় প্রবৃত্তিগুলি না থাকিত, যদি স্ত্রীজাতীর হৃদয় কোমল না হইয়া কঠিন হইত, স্নেহ মমতা প্রভৃতি না থাকিত, তাহা হইলে পৃথিবীর ছুঃখ কষ্ট অনেক

বাড়িয়া যাইত। স্ত্রীজাতীর হৃদয়ে স্নেহ, মমতা, দয়া ও পরোপকারের প্রবৃত্তি আছে বলিয়া পৃথিবীর অনেক ছুঃখ কষ্ট কমিয়া গিয়াছে। রোগে সেবা, শোকে সাহায্য, ছুঃখ কষ্টে ও ক্লেশ যন্ত্রণায় সহানুভূতি, এমন আর কে করিতে পারে? সংসারের সহস্র কার্যের মধ্যেও তাঁহাদিগের এই প্রবৃত্তি কার্য করিতেছে। আবার এমন কতগুলি রমণী আছেন, যাহারা সংসারের আর সমস্ত কার্য পরিত্যাগ করিয়া পরোপকার ব্রতেই জীবন উৎসর্গ করিয়াছেন। তাঁহারা নিজের সুখ স্বচ্ছন্দতার প্রতি কখন দৃকপাতও করেন নাই। অথবা ছুঃখ, অথবা দুঃখের মোচনের জন্ত, অথবা চক্ষের জল মুছাইবার জন্ত, তাঁহারা আত্মোৎসর্গ করিয়াছেন। মানুষের মধ্যে ইহারা দেবী। আমরা ক্রমে ইহাদিগের এক একটি চিত্র সখার পাঠিকাদিগের সম্মুখে ধরিব। ছুঃখের বিষয় এই যে, আমরা দৃষ্টান্ত থাকিলেও তাহার বিবরণ সংগ্রহ করা অত্যন্ত কঠিন; সুতরাং হয়ত অনেক সময় আমরা দৃষ্টান্ত পাঠিকাদিগের সম্মুখে উপস্থিত করিতে হইবে।

পরোপকার ব্রতে যাহারা জীবন উৎসর্গ করিয়াছেন, মেরী কার্পেটারের নাম, তাঁহাদিগের মধ্যে অতি উজ্জ্বল অক্ষরে লিখিত হইয়াছে। ইহার দয়া, ইহার পরোপকারের প্রবৃত্তি, কেবল আত্মীয় বা স্বদেশীয়দিগের মধ্যে আবদ্ধ ছিল না, কিন্তু এই দূরদেশ, ভারতবর্ষে পর্যন্ত তাহা বিস্তৃত হইয়া পড়িয়াছিল। ইনি বাল্যে এই পরোপকার ব্রতে জীবন উৎসর্গ করিয়াছিলেন, এবং আজীবন ইহাতেই নিযুক্ত ছিলেন।

ইংলণ্ডের অন্তঃপাতী এক্ষিটার নামক স্থানে ডাক্তার ল্যাণ্ট কার্পেটার নামে একজন অতি সদাশয় এবং পরহিতৈষী ধর্ম-যাজক বাস করি-



তেন। ১৮০৭ সালে ৩রা এপ্রিল তাঁহার একটি কন্যা জন্মে; এই কন্যাই মেরী কার্পেটার। ডাক্তার কার্পেটারের আরও দুটি কন্যা এবং দুটি পুত্র জন্মে। বাল্য কালেই মেরীর স্বল্প বুদ্ধি, স্মৃতিশক্তি এবং অত্যন্ত কার্যতৎপরতার পরিচয় পাওয়া গিয়াছিল। যে জ্ঞান ও ধর্ম তাঁহার জীবন উজ্জ্বল হইয়াছিল, মেরী বাল্য বয়সেই

ধার্মিক পিতার নিকট তাহার উপদেশ পাইয়াছিলেন; এবং যে পরোপকার ব্রতে তিনি জীবন উৎসর্গ করিয়াছিলেন, সদাশয় পরহিতৈষী পিতার দৃষ্টান্তে, এই বাল্য বয়সেই তাহার বীজ অঙ্কুরিত হইয়াছিল। ১৮১৭ সালে ডাক্তার কার্পেটার ত্রিষ্টলে আসিয়া বাস করিতে আরম্ভ করেন। ত্রিষ্টলে আসিয়া ধর্মোপদেশ দেওয়া ব্যতীত ছাত্র-

দিগকে বিজ্ঞান প্রভৃতি শিক্ষা দিতে আরম্ভ করেন, এবং নীতি ও ধর্ম বিষয় উপদেশ দিবার জন্ত, একটি রবিবাসরীয় বিদ্যালয় স্থাপন করেন। মেরীর জ্ঞানতৃষ্ণা অতিশয় প্রবল ছিল; তিনি পিতার নিকট বালকদিগের সহিত শিক্ষা লাভে প্রবৃত্ত হইলেন, পিতাও কস্তার শিক্ষা লাভের ইচ্ছা অত্যন্ত অধিক দেখিয়া যত্নের সহিত ক্রমে উচ্চ উচ্চ বিষয়ে শিক্ষা দিতে আরম্ভ করিলেন। মেরীও পিতার যত্নে ও উপদেশে, এবং আপনার পরিশ্রম, অধ্যবসায় ও তীক্ষ্ণ বুদ্ধিবলে গ্রীক, লাতিন, গণিত, সাহিত্য, প্রাকৃতিক বিজ্ঞান প্রভৃতি কঠিন কঠিন বিষয়ে অল্প বয়সেই বিশেষ স্নশিক্ষিতা হইয়া উঠিলেন। সেই সময়ে বালিকারা যে পরিমাণে শিক্ষা লাভ করিত মেরী তদপেক্ষা অনেক অধিক শিক্ষা লাভ করেন।

পূর্বেই বলিয়াছি কার্য্য করিবার ইচ্ছা মেরীর বাল্যকাল হইতেই অত্যন্ত অধিক ছিল। ক্রমে মেরী তাহাতে প্রবৃত্ত হইলেন। ধর্ম প্রচার, শিক্ষাদান, পুস্তক প্রণয়ন প্রভৃতি নানা কার্য্যে ডাক্তার কার্পেন্টার ব্যাপৃত ছিলেন। মেরী পিতাকে তাহার কার্য্যে সাহায্য করিবার নিমিত্ত প্রস্তুত হইলেন। তাহার বয়স এই সময় সতের বৎসর মাত্র; কুমারী কার্পেন্টার মাতা ও ভগ্নীর সাহায্যে বিদ্যালয়ের ভার গ্রহণ করিলেন; এবং অত্যন্ত দক্ষতার সহিত বালকদিগকে শিক্ষা দিতে লাগিলেন।

কুমারী কার্পেন্টার অনেক দিন হইতে বালিকাদিগের জন্ত একটি বিদ্যালয় স্থাপন করিবার ইচ্ছা করিতেছিলেন; ক্রমে সে ইচ্ছা কার্য্যে পরিণত হইল। একটি বালিকা বিদ্যালয় স্থাপন করিয়া রীতিমত বালিকাদিগকে শিক্ষা

দিতে আরম্ভ করিলেন। ১৮৩১ সালে রবিবাসরীয় বিদ্যালয়ের ভারও তিনি গ্রহণ করিলেন; এবং বিদ্যালয়ের শিক্ষা দান ব্যতীত ছাত্রদিগের বাড়ীতে যাইয়া তাহাদিগের তত্ত্বাবধান করিতেন। এই সময় তাহার আর এক দিকে দৃষ্টি পড়িল। বিলাতের নিম্নশ্রেণীর দরিদ্র লোকদিগের অবস্থা অত্যন্ত শোচনীয়, ইহারা যে সামান্য অর্থ উপার্জন করে তাহা প্রায় সমস্তই সুরাপানে ব্যয় করে, স্ত্রী পুত্র কিম্বা পরিবারের অজ্ঞ সকলকে নিতান্ত কষ্টে, এমন কি অনেক সময় অনাহারে দিনপাত করিতে হয়। অনেক সময় এমনও ঘটে যে, স্নেহ মমতার জলাঞ্জলি দিয়া পিতা মাতা সন্তানদিগকে পথে পরিত্যাগ করিয়া যায়। কুমারী কার্পেন্টার যখন ছাত্রদিগের বাড়ীতে যাইতেন, তখন এই সকল শোক দুঃখের ছবি তাহার চক্ষে পড়িত; এই সকল দেখিয়া তাহার হৃদয় অত্যন্ত ব্যথিত হইত; ইহাদিগের দুঃখ দুর্দশা মোচনের জন্ত তাহার প্রাণ ব্যাকুল হইয়া উঠিল, এবং কি উপায়ে এই নিরাশ্রয় নিরন্ন লোকদিগের দুঃখ ক্রেশ দূর করিবেন, তাহাই চিন্তা করিতে লাগিলেন। যে পরোপকার ব্রতে কুমারী কার্পেন্টার নিজের জীবন উৎসর্গ করিয়াছিলেন, এই ব্রিষ্টল নগরে তাহার স্মরণ হইল। কিছুকাল চিন্তার পর তিনি জীবনের এই সর্বাপেক্ষা মহৎ ব্রত সাধনে দৃঢ়-প্রতিজ্ঞ হইলেন, কিছুতেই তাহার এই সাধু সঙ্কল্প বিচলিত হইল না। এই গুরুতর কর্তব্য সাধনের জন্ত তিনি ক্রমে প্রস্তুত হইতে লাগিলেন, এবং ঈশ্বরের নিকট বল ও সহিষ্ণুতা প্রার্থনা করিতে লাগিলেন। এই সময়ে একটি ঘটনাতে তিনি অভিষ্ট বিষয়ে অনেক সাহায্য পাইলেন। ১৮৩৩ সালে দুই মহাত্মা তাহাদিগের গৃহে অতিথি

হন; এই দুই মহাত্মার ধর্মপরায়ণতা, কর্তব্যনিষ্ঠা এবং সকল প্রকার হিতজনক কার্য্যে একাগ্রতা দেখিয়া কুমারী কার্পেন্টার অনেক শিক্ষা লাভ করিলেন। ইহাদিগের মধ্যে একজন, মহাত্মা রাজা রাম মোহন রায়, আর একজন আমেরিকার বোস্টন নগর নিবাসী ডাক্তার জোসেফ টুকারম্যান। রাজা রামমোহন রায়ের বিলাত যাইবার পূর্বেই তাহার যশ সেখানে বিস্তৃত হইয়া পড়িয়াছিল; ধর্ম ও নীতি সম্বন্ধে তাহার উদার শিক্ষায় কেবল ভারতবর্ষে নহে, ইংলণ্ডে ও তিনি যথেষ্ট শ্রদ্ধা, প্রীতি ও সম্মান পাইয়াছিলেন। রাজা রামমোহন রায় ডাক্তার কার্পেন্টারের পরম বন্ধু ছিলেন। কুমারী কার্পেন্টার ষ্টেপলটন গ্রোভ নামক স্থানে প্রতিদিন এই উদার প্রশস্ত-হৃদয় অতিথির সহিত সাক্ষাৎ করিতেন এবং তাহার নিকট অনেক শিক্ষা লাভ করিতেন। কিন্তু অল্পদিন পরেই রাজা রামমোহন রায় পীড়িত হইয়া পড়িলেন, ক্রমে রোগ সাংঘাতিক হইয়া উঠিল, রোগের হাত হইতে তিনি আর রক্ষা পাইলেন না। ২৭ এ সেপ্টেম্বর অপরিচিত স্থানে ভারতের গৌরব-রবিজ্জ্বলিত হইলেন। রাজা রামমোহন রায়ের মৃত্যুতে কুমারী কার্পেন্টার, তাহার একজন পরম বন্ধু হারাইলেন। রোগ শয্যার পার্শ্বে বসিয়া তিনি একান্ত মনে রাজার সেবা করিয়াছিলেন। তাহার হৃদয় হইতে যে করুণার ধারা নিসৃত হইয়া, শত সহস্র দুঃখী সন্তানদিগকে শান্তি প্রদান করিয়াছিল, রাজা রামমোহন রায়ের রোগ শয্যায় তাহার প্রথম বিকাশ হয়। এই মহাত্মার মৃত্যুতে কুমারী কার্পেন্টার অত্যন্ত শোক প্রাপ্ত হন। রামমোহন রায়ের মৃত্যু শয্যার পার্শ্বে দাঁড়াইয়া তিনি বুঝিলেন, যে পৃথিবীর সকলই হৃদনের জন্ত; সামান্য স্নেহের জন্ত অনন্ত কালের

স্বথ পরিত্যাগ করা উচিত নহে; পরের জন্ত জীবন উৎসর্গ করাই মহৎ, আত্মস্বথে বাহারা ব্যস্ত, তাহাদের বৃথা জীবন। এই রূপে মৃত রাজার পার্শ্বে দাঁড়াইয়া, তিনি তাহার জীবনের মহত্বের কথা যতই চিন্তা করিতে লাগিলেন, ততই তাহার হৃদয়ে মহৎ ও সাধু ইচ্ছা সকল জাগিয়া উঠিতে লাগিল, পরের জন্ত জীবন উৎসর্গ করিবার ইচ্ছা হৃদয়ে বলবতী হইল।

ডাক্তার টুকারম্যানের নিকটেও কুমারী কার্পেন্টার অনেক শিক্ষা লাভ করেন। তিনি অতিশয় দয়ালু এবং ন্যায়পরায়ণ ছিলেন; বোস্টন নগর নিবাসী দরিদ্রদিগের দুঃখ মোচনের জন্ত ইনি সর্বদাই চেষ্টা করিতেন। এতদিন পরে কুমারী কার্পেন্টারের আশা পূর্ণ হইল। ১৮৩৫ সালে দরিদ্রদিগের অবস্থা ও কার্য্য পরিদর্শনের জন্ত একটি সভা স্থাপিত হয়। বিশ বৎসরেরও অধিককাল তিনি এই সভার সম্পাদক ছিলেন, এবং তাহার আন্তরিক যত্ন ও পরিশ্রমে এই সভা দ্বারা অনেক কার্য্য হইয়াছিল। অনেক দুর্দশা-গ্রস্ত পরিবারে স্বথ শান্তি বিস্তারিত হইয়াছিল। কিন্তু তাহার সহকারীদিগের উৎসাহ ও কার্য্য তৎপরতার অভাবে, তাহার উদ্দেশ্য এই সভা দ্বারা সম্পূর্ণরূপে সিদ্ধ হইল না। তিনি ইহাতে অত্যন্ত দুঃখিত হইলেন, কিন্তু তাহার উৎসাহ, উদ্যম কিছুই কমিল না; কি উপায়ে উদ্দেশ্য সিদ্ধি করিবেন, তাহাই চিন্তা করিতে লাগিলেন। এই সময়ে আমেরিকা হইতে ডাক্তার গ্যানেট নামক আর একজন দরিদ্র-হিতৈবী পুরুষ ইংলণ্ডে আসিয়াছিলেন।

ক্রমশঃ

## পম্পীয়াই ।

বুঝি মরা অনেক সময় মানুষের খেয়ালই বুঝিতে পারি না, প্রকৃতির খেয়াল কেমন করিয়া বুঝিব! প্রকৃতির অদ্ভুত কার্য দেখিয়া অনেক সময় অবাক হইয়া থাকিতে হয়; মানুষের সামান্য বুদ্ধিতে তখন আর কুলায় না; মানুষ অবাক হইয়া চাহিয়া থাকে, আর ভাবে এ কি হইল! ভূমিকম্প, অগ্ন্যুৎপাত, ঘূর্ণবায়ু, সমুদ্র জলের উচ্চাস প্রভৃতিতে কত কত ভয়ঙ্কর কাণ্ড হইয়াছে, তাহা ভাবিতে গেলে হৃৎকম্প উপস্থিত হয়। যে সুন্দর অট্টালিকায় সুখে বাস করিতেছ, আমোদ প্রমোদে মাতিয়া সময় কাটাইতেছ; যে নানাবিধ ফুল ফলে সুশোভিত উদ্যানে বিচরণ করিয়া কত সুখী হইতেছ, যে পর্বতের উপরে উঠিয়া প্রকৃতির সৌন্দর্য দেখিয়া মুগ্ধ হইতেছ; তোমার সে সুন্দর গৃহ সে সুন্দর উদ্যান, সে সুদৃঢ় পর্বত,—কিছুই নিরাপদ নয়। প্রকৃতির খেয়াল হইলে তোমার সুন্দর গৃহ মুহূর্তে চূর্ণ বিচূর্ণ হইয়া, ধূলা হইয়া যাইতে পারে, তোমার সুন্দর উদ্যান মরুভূমিতে পরিণত হইতে পারে, যেখানে ঐ পর্বৎ মাথা উন্নত করিয়া দাঁড়াইয়া রহিয়াছে, সেখানে সমুদ্র তরঙ্গ খেলিতে পারে। ভাবিয়া দেখিতে হইলে, আমরা মৃত্যুরই হাতের মধ্যে রহিয়াছি; কখন প্রকৃতির কি খেয়াল হইবে, আর নিমেষে প্রকৃতির এ লীলাক্ষেত্র হইতে আমাদেরকে কি জানি কোথায় লইয়া যাইবে!

কিন্তু সে কথা থাক, প্রকৃতির একটা খেয়ালে ইটালী দেশের পম্পীয়াই নগরের যে দশা হইয়া-

ছিল, তাহাই আজ বলিব। ভূমিকম্প এবং অগ্ন্যুৎপাত, এ দুটাই বড় ভয়ঙ্কর জিনিষ, এবং এ দুয়েরই মধ্যে খুব সম্বন্ধও আছে। এই দুয়ের দ্বারা যে কত সর্বনাশ, কত কি আশ্চর্য ঘটনা ঘটিয়াছে, তাহার সংখ্যা নাই। ১৭৫৫ সালের ১লা নভেম্বর এক ভয়ঙ্কর ভূমিকম্প হইয়া লিসবন নগর একেবারে ধ্বংস হইয়া যায়। বিপদ প্রায় একা আসে না। একদিকে ভয়ঙ্কর ভূমিকম্প নগরের সমস্ত অট্টালিকা চূর্ণ বিচূর্ণ হইয়া পড়িতে লাগিল, এ দিকে চারিদিক ঘোর অন্ধকারে আচ্ছন্ন হইয়া গেল, ভূতল হইতে ভয়ঙ্কর গন্ধকের বাষ্প উখিত হইয়া শ্বাস রুদ্ধ করিয়া ফেলিল। যাহারা কোনমতে প্রাণ রক্ষা করিতে পারিয়াছিল, তাহারা সমুদ্র তীরে গিয়া আশ্রয় লইল; কিন্তু সেখানেও আর এক বিপদ উপস্থিত হইল, সমুদ্র জল পর্বতের ন্যায় উচ্চ হইয়া তীরের দিকে আসিতে লাগিল; জল স্রোত আসিয়াই তৎক্ষণাৎ চলিয়া গেল, এবং কত জীবন সেই সঙ্গে ভাসিয়া গেল। কতকগুলি লোক নিরাপদ ভাবিয়া এক স্থানে আশ্রয় লইয়াছিল, কিন্তু সমুদ্রের গ্রাস হইতে তাহারাও রক্ষা পায় নাই; সেই স্থানটা একেবারে জলমগ্ন হইয়া গিয়াছিল। ভূমিকম্প এত প্রবল হইয়াছিল যে, জাহাজের যে সকল নঙ্গর নদীগর্ভে ফেলা ছিল, সে গুলি একেবারে ভাসিয়া উঠিয়াছিল। এবং নদীর জল একেবারে ১৪১৫ হাত স্ফীত হইয়া আবার মুহূর্তে পূর্বের মত হইয়া গেল। কথিত আছে সহস্রেরও অধিক লোক এই ভয়ঙ্কর ভূমিকম্পে প্রাণ ত্যাগ করে।

১৮১৫ সালে সম্বন্ধীপে যে ভয়ঙ্কর অগ্ন্যুৎপাত হইয়াছিল, তাহাতে বার হাজার লোকের মধ্যে কেবল মাত্র ছাব্বিস জন জীবিত ছিল। এই

সময় আর একটা ভয়ঙ্কর বিপদ উপস্থিত হয়, ভয়ঙ্কর ঘূর্ণবায়ু উখিত হইয়া, মানুষ গরু ঘোড়া প্রভৃতি সমস্ত আকাশের দিকে লইয়া যাইতে লাগিল; বৃক্ষ সকল উন্মূলিত করিয়া সমুদ্র ছাইয়া ফেলিল।

১৬৬৯ সালে এটনা হইতে যে অগ্ন্যুৎপাত হয় তাহাতে চৌদ্দখানি নগর ও গ্রাম ধ্বংস হইয়া যায়। এবং যে ৫৪ দিন পর্যন্ত অগ্ন্যুৎপাত হইতে ছিল, তাহাতে সূর্য বা চন্দ্র কেহ দেখিতে পায় নাই; ঘোর অন্ধকারে চারিদিক আচ্ছন্ন হইয়া গিয়াছিল। প্রকৃতির কোনটাই সামান্য নহে। ১০১১ বৎসর পূর্বে, পূর্ব বাঙ্গালায় এক ভয়ঙ্কর ঘটনা হয়; দৌলতখাঁর ঝড় অনেকের মনে থাকিতে পারে। এই ভয়ঙ্কর ঝড়ে পূর্ব বাঙ্গালার যে কত লোকের প্রাণ নাশ হয়, তাহার সংখ্যা নাই। ঝড় বলিয়া সেটা বিখ্যাত, কিন্তু বাস্তবিক ঝড় না বলিয়া সেটাকে জলপ্লাবন বলাই উচিত। আমরা শুনিয়াছি, যে দিন এই ভয়ঙ্কর ঘটনা হইয়াছিল, সেদিন কিছু পূর্বেও কেহ কিছু বুঝিতে পারে নাই; অকস্মাৎ এই ভয়ঙ্কর ঘটনা উপস্থিত হয়। সন্ধ্যার কিছু পূর্বে অনেক গুলি নদীর জল প্রায় শুকাইয়া যায়, সেই সমস্ত জল একত্রিত হইয়া দৌলতখাঁ প্লাবিত করিয়া দেয়।


এখন মূল প্রস্তাবের বিষয় বলা যাউক। বেলা অপরাহ্ন, আকাশ বেশ নিশ্চল, বেশ শীতল বাতাস বহিতেছে। পম্পীয়াই নগরবাসীগণ আপন আপন কার্যে নিযুক্ত আছে, এমন সময় অকস্মাৎ বিস্মৃতিয়স পর্বত হইতে কৃষ্ণবর্ণ ধূম নির্গত হইতে লাগিল; দেখিতে দেখিতে সেই ধূমে চারিদিক আচ্ছন্ন করিয়া ফেলিল, অমাবস্তার শায় অন্ধকারে সমস্ত নগর পূর্ণ হইল। ক্রমে সেই ধূম রাশির সহিত ভস্ম, উত্তপ্ত প্রস্তর খণ্ড, এবং গন্ধকের বাষ্প উখিত

হইতে লাগিল। এবং অল্প সময়ের মধ্যেই সেই ভস্ম ও প্রস্তর ছই তিন হাত উচ্চ হইয়া জমিয়া গেল। ক্রমে নদীতে বাণ আসিবার সময় যে প্রকার শব্দ হয়, সেই প্রকার শব্দ হইতে লাগিল, এবং অল্পক্ষণ পরেই দেখা গেল যে, কৃষ্ণ বর্ণের কাদার এক প্রকাণ্ড স্রোত দ্রুতবেগে আসিয়া উপস্থিত হইল। সেই কর্দম স্রোতে নগরের সমস্ত রাজপথ এবং গৃহ প্রভৃতি পূর্ণ হইয়া গেল। যে, যে অবস্থায় ছিল, সেই অবস্থায় এই স্রোতে প্রোথিত হইল; যাহারা গৃহের মধ্যে ছিল, তাহারা সেখানেই এই কর্দমে আবৃত রহিল, যাহারা পলায়ন করিতেছিল, তাহারাও কতক প্রস্তর বৃষ্টিতে আহত হইয়া পতিত হইল, কেহ বা গন্ধকের গন্ধে শ্বাস রুদ্ধ হইয়া প্রাণ হারাইল, কেহ বা কর্দম স্রোতে প্রোথিত হইয়া রহিল। তিন দিন তিন রাত্র ক্রমাগত এই ভয়ঙ্কর অবস্থা ছিল; এবং এ তিন দিনে সমস্ত নগরটা একেবারে প্রোথিত হইয়া গিয়াছিল, চতুর্থ দিন প্রাতঃকালে আর কোম উপদ্রব ছিল না; তখন আকাশ বেশ পরিষ্কার হইয়াছে, সূর্য উঠিয়াছে; ভস্ম ও প্রস্তর বৃষ্টি বন্ধ হইয়াছে, কর্দম স্রোত নিবারিত হইয়াছে, গন্ধকের বাষ্প আর উঠিতেছে না। নিশ্চল বায়ু বহিতেছে, চারিদিক স্থির—ধীর; কিন্তু মহা-সমৃদ্ধশালী সে পম্পীয়াই নগর আর নাই—নগরের চিহ্ন মাত্রও নাই। যেখানে পম্পীয়াই নগরের রাজপ্রাসাদ, মন্দির ও অন্যান্য সহস্র সহস্র অট্টালিকা ছিল, সেখানে কেবলমাত্র ভস্ম ও কর্দমের স্তুপ দেখা গেল। পম্পীয়াইর সঙ্গে হকুলেনিয়ামও প্রোথিত হয়। প্রায় সতের শত বৎসর এই ছই নগর ভস্ম ও কর্দমের নীচে প্রোথিত থাকে। এই সময়ের মধ্যে ইহার উপর মাটি জমিয়াছিল, এবং কৃষকগণ কৃষিকার্য্যও আরম্ভ করিয়াছিল।

পরে একদিন কৃষকগণ খনন করিতে করিতে মাটির নীচে অট্টালিকার চিহ্ন দেখিতে পাইল। তখন ইহার বিশেষ অনুসন্ধান আরম্ভ হইল; নেপল্‌সের রাজা উপযুক্ত কর্মচারী নিযুক্ত করিয়া দিলেন; এবং খনন কার্য আরম্ভ হইল। ক্রমে পম্পীয়াইয়ের রাজপথ এবং অট্টালিকা সকল বাহির হইতে লাগিল। কোন স্থানে ঝাড়, লণ্ঠন, ছবি প্রভৃতি নানা প্রকার আসবাব সজ্জিত অট্টালিকা বাহির হইল; কোন স্থানে নানাবিধ দ্রব্য পূর্ণ দোকান দেখা গেল, কোথায়ও মিষ্টান্ন পূর্ণ ময়রার দোকান বাহির হইল; একটা দোকান খনন করিয়া দেখা গেল, যে দোকানী রুটী, পেয়াজ ও মাছের চচ্চড়ী বিক্রয় করিতেছিল, সেই অবস্থায়ই প্রোথিত হইয়া রহিয়াছে। একটা খুব বড় বাড়ী দেখা গেল, নানা প্রকার গৃহ সজ্জায় বাড়ীটী সজ্জিত রহিয়াছে, কিন্তু একটাও লোক নাই; পরে দেখা গেল নীচের একটা ঘরে সতেরটা মানুষের কঙ্কাল রহিয়াছে; দেখিয়া বোধ হইল যে, যখন কর্দম স্রোত গৃহে প্রবেশ করে, তখন গৃহস্বামী তাহা হইতে রক্ষা পাইবার জন্ত সেই ঘরে আশ্রয় লইয়াছিলেন। মাটিতে তাঁহাদের শরীরের এবং বস্ত্রাদি ও অলঙ্কারের অবিকল ছাঁচ রহিয়াছে। সেই ছাঁচ দেখিয়া সমস্তই বেশ বোঝা যায়; ঐ সতের জনের মধ্যে একজন সেই বাড়ীর কর্তা; তাঁহার সূক্ষ্ম রেশমের বস্ত্র পরিধানে ছিল, এবং হাতে একখানি রুমালে কতকগুলি চাবি বাঁধা ছিল, আর এক হাতে একটা ছেলেকে ধরিয়া ছিলেন। তাঁহার পাশে একটা যুবতী কণ্ঠা, এবং ছটা ছোট ছেলে ভয়ে বসিয়া পড়িয়াছে। আর এক স্থানে দেখা গেল একজন স্ত্রীলোক অলঙ্কারের বাক্স লইয়া পলায়ন করিতেছিল, এমন সময় কর্দম স্রোতে তাহাকে আবৃত করিয়া ফেলিয়াছে।

স্ত্রীলোকের অলঙ্কারের উপর বড় মমতা, মরিবার সময়ও ঐ স্ত্রীলোক তাহা পরিত্যাগ করিতে পারে নাই, দেখা গেল বৃকে করিয়া মাটির মধ্যে প্রোথিত হইয়া রহিয়াছে। দুই জন চোর একটা ধাতুনির্মিত পুতুল লইয়া পলাইতেছিল, তাহারা সেই অবস্থায়ই প্রোথিত রহিয়াছে। এই প্রকার নানাবিধ অদ্ভুত দৃশ্য দেখা গিয়াছিল; সমস্ত লিখিতে হইলে অনেক হইয়া পড়িবে।

আমরা পম্পীয়াইয়ের কথা লিখিতে গিয়া প্রকৃতির অনেক খেয়ালের কথা লিখিয়া ফেলিয়াছি। বাস্তবিক কেন এ সকল ঘটনা ঘটে তাহা আমরা বুঝিতে পারি না। কি কারণে ঘটে তাহাও অনেক সময় মানুষের কুদ্ধিতে কিনারা হয় না। অথচ এই সকল অদ্ভুত ঘটনা যে কেবল প্রকৃতির খেয়াল, তাহাও নহে। ইহার যে কোন উদ্দেশ্য নাই, তাহা নহে; তবে সকল আমরা বুঝিতে পারি না। যেখানে সমতল ভূমি ছিল সেখানে হয়ত পর্বত মালা শোভা পাইতেছে, যেখানে সুন্দর উদ্যান ছিল, সেখানে হয়ত আজ মরুভূমি, যেখানে মহাসমৃদ্ধিশালী নগর ছিল, সেখানে হয়ত আজ সমুদ্র তরঙ্গ খেলিতেছে! কেন?—তাহা আমরা জানি না। কিন্তু ইহার যে কোন উদ্দেশ্য নাই, তাহা নহে। এক একটা ঘটনায় হয়ত লক্ষ লক্ষ লোকের জীবন যাইতেছে; কত শত গ্রাম, কত শত সমৃদ্ধ নগর ধ্বংস হইয়া যাইতেছে; তবু ও ইহার যে কোন উদ্দেশ্য নাই, তাহা নহে। সকলেরই উদ্দেশ্য আছে—প্রকৃতির খেয়ালেরও উদ্দেশ্য আছে; আমাদের কাছে লইয়াও প্রকৃতি খেলা করিতেছে; প্রকৃতির কখন কি খেয়াল হইবে, তাহাতে কে কোথায় ভাসিয়া যাইবে—কে জানে?



আগষ্ট, ১৮৮৭।

## মেরী কার্পেণ্টার ।

( ১০৯ পৃষ্ঠার পর । )

ডাক্তার গ্যানেটের আগমন উপলক্ষে কার্পেণ্টারের বন্ধে, ত্রিষ্টলে একটা সভা হয়। ডাক্তার গ্যানেটের মুখে আমেরিকার দরিদ্রদিগের উন্নতির বিবরণ শুনিয়া, আপনাদিগের মধ্যেও সেই প্রকার প্রণালীতে কার্য আরম্ভ করিবার জন্ত অনেকেরই বিশেষ আগ্রহ জন্মে। মেরী কার্পেণ্টারও ইহার উপর তাঁহার সমস্ত আশা ভরসা স্থাপন করিয়া, আগ্রহ ও উৎসাহের সহিত ব্রত পালন করিতে উদ্যোগী হন। তিনি দরিদ্র ও নিরাশ্রয়দিগের বাড়ী যাইয়া, তাহাদিগকে রোগে ওষধ, শোকে সাহায্য, বিপদে সাহায্য করিতে লাগিলেন। চারিদিকে ছুঃখ বিষাদ ও দুর্দশার ছবি দেখিয়া তাঁহার হৃদয় ছুঃখে বিচলিত হইত। কিন্তু তাহাতে তিনি এক দিনের জন্তও কাতর বা নিকংসাহ হন নাই। তাঁহার মুখ সকল সময়ই প্রসন্ন থাকিত, হৃদয় সকল সময়ই প্রফুল্ল থাকিত; তাই তিনি ছুঃখের মধ্যে সুখ, বিষাদের মধ্যে প্রসন্নতা আনিতে পারিয়াছিলেন। দীন, ছুঃখী, দুর্দশাগ্রস্ত লোকেরা

তাঁহার অসীম মেহে, তাহাদিগের সকল ছুঃখ ক্লেশ ভুলিয়াছিল।

এই সময় একটা গুরুতর বিপদ উপস্থিত হইল; কুমারী কার্পেণ্টার পিতৃহারা হইলেন। কার্পেণ্টারের সত্বেতঃ কোমল হৃদয়, এই শোকে নিতান্ত স্ত্রিয়মাণ হইয়া পড়িল। কিন্তু ধীরতার সহিত নিজ শোক চাপিয়া রাখিয়া, শোক সন্তপ্ত মাতার শুশ্রূষায় নিযুক্ত হইলেন। তিনি এই সময়ে কয়েকটা কবিতা রচনা করেন, তাঁহার হৃদয়ের গভীর শোক এই কবিতায় প্রকাশ পাইয়াছিল। শাস্ত্র আলোচনার এবং শাস্ত্র চিন্তায় তিনি অত্যন্ত সুখী হইতেন; এবং সেই শোক সন্তাপের সময়, তাহা দ্বারা তিনি আপনাকে অনেক সময় পেসন্ন রাখিতেন। পূর্বেই বলা-রাছি, ইংলণ্ডের নিম্নশ্রেণীর লোকদিগের অবস্থা বড়ই শোচনীয়। কত বালক বাহিন্যপিতা মাতা কর্তৃক পরিত্যক্ত হইয়া—‘আশ্রয়স্থল’ হইয়া, রাজপথে কান্দিয়া কান্দিয়া বেড়ান তাহাদের সংখ্যা নাই। এই হতভাগাদিগকে আশ্রয় দান, বা ইহাদিগের দুর্দশা দূর করিবার জন্ত পূর্বে কেহ কোন চেষ্টা করেন নাই। ইহারা একটু আশ্রয়ের জন্ত, এক মুঠা অন্নের জন্ত, লালায়িত হইয়া বেড়াইত, কিন্তু ইহাদিগের ছুঃখ দুর্দশা দেখিয়া কেহ তাহা মোচন করিবার জন্ত অগ্রসর হন নাই। ক্রমে ক্রমে এবং প্রলোভনে পড়িয়া

ইহাদিগের চরিত্র দূষিত হইয়া উঠিত; ইহারা চুরী করিতে শিখিত, দস্যবৃত্তি শিখিত, এবং নানা প্রকার অসংকার্যে জীবন কাটাইত। আবার এমন কতকগুলি লোক ছিল, যাহারা এই সকল বালক বালিকাদিগকে রীতিমত এই সকল ছুষ্কার্য শিক্ষা দিত। মেরী কার্পেন্টারের হৃদয়, এই সকল বালক বালিকাদিগের অবস্থা দেখিয়া নিতান্ত ব্যথিত হইল; এই অল্প বয়স্ক বালক বালিকাদিগের এই প্রকার শোচনীয় অবস্থা দেখিয়া তাঁহার চক্ষে জল আসিল। কি উপায়ে ইহাদিগকে রক্ষা করিবেন, তাহাই ভাবিতে লাগিলেন। পৃথিবীতে অতি সামান্য লোকের দ্বারাও কত সময় কত মহৎ কার্যের সূচনা হয়। যে র্যাগেড স্কুলের (Ragged School) দ্বারা এখন ইংলণ্ডের এত উপকার হইতেছে, একজন সামান্য চর্মকারের দ্বারা তাহার সূত্রপাত হয়। ইংলণ্ডে পোর্টসমাউথ নামক স্থানে জন্ পাউণ্ডস্ নামে একজন চর্মকার ছিলেন। সদাশয় সাধু প্রকৃতি জন পাউণ্ডস্ দুঃখী অনাথ বালক বালিকাদিগের দুঃখ দূর করিবার জন্ত অগ্রসর হন। ইনি নিজের জুতার দোকানে অনাথ বালক বালিকাদিগকে আশ্রয় দিয়া, তাহাদিগকে শিক্ষা ও সহপদেশ দিতেন। তাঁহার যত্নে ও উপদেশে অনেক বালক বালিকা, দুঃখ হৃদশা, পাপ ও অসং কার্যের হাত হইতে রক্ষা পাইরাছিল। জন্ পাউণ্ডসের দৃষ্টান্তে অনেক হিতৈষী ব্যক্তি এই কার্যে অগ্রসর হইলেন; র্যাগেড স্কুল স্থাপিত হইল।

কার্পেন্টার অনেক দিন ধরিয়া, অনাথ বালক বালিকাদিগের হৃদশা দূর করিবার উপায় চিন্তা করিতেছিলেন, র্যাগেড স্কুলের প্রতিষ্ঠা দেখিয়া, তাঁহার আশার সঞ্চার হইল। ১৮৪৬ সালের

১লা আগষ্ট লিউইন্স মিড্ নামক স্থানে তিনি একটা র্যাগেড স্কুল প্রতিষ্ঠা করিলেন। অক্লান্ত পরিশ্রম, অধ্যবসায় ও যত্নের সহিত, ইহার উন্নতির জন্ত চেষ্টা করিতে লাগিলেন; তাঁহার চেষ্টা ও আশা ফলবতী হইল। অন্যান্য বিষয়ের সহিত বালক বালিকারা, যাহাতে নীতি ও ধর্মের উপদেশ পাইয়া, উন্নতমনা ও উন্নতচরিত্র হয়, সে দিকে কার্পেন্টারের বিশেষ দৃষ্টি ছিল। পূর্বে যাহারা আশ্রয়-শূন্য সহায়-শূন্য হইয়া পথে পথে ঘুরিয়া বেড়াইত; সং উপদেশ এবং সংস্কারে অভাবে যাহারা প্রলোভন ও কুসঙ্গে পড়িয়া, নানাবিধ ছুষ্কার্যে দিন কাটাইত, মেরী কার্পেন্টারের আন্তরিক যত্ন ও অক্লান্ত চেষ্টায়, তাহারা ক্রমে সূচরিত্র হইতে লাগিল; অসং প্রকৃতি সংশোধিত হইয়া, সাধু প্রবৃত্তি সকল ক্রমে তাহাদিগের হৃদয়ে জাগিয়া উঠিতে লাগিল। মেরী কার্পেন্টার জীবনের এক সাধনায় সিদ্ধ হইলেন; কিন্তু তখন আর এক দিকে তাঁহার দৃষ্টি পড়িল।

অল্পবয়স্ক বালক বালিকাগণও চুরী প্রভৃতি অপরাধে রাজবিবি অল্পসারে দণ্ড পাইয়া থাকে। এই সকল অল্পবয়স্ক বালক বালিকাগণ কারাগারে প্রবেশ করিলে, ইহাদিগের স্বভাব সংশোধিত হওয়া দূরে থাক, কারাগারের অসং-প্রকৃতি লোকদিগের সংসর্গে, ইহাদিগের চরিত্র আরও দূষিত হইয়া উঠে, ছুষ্কার্যে আরও অহুরক্ত হইয়া পড়ে, এবং মুক্তিলাভ করিয়া আবার ছুষ্কার্যে লিপ্ত হয়, ও দণ্ড পাইয়া আবার কারাগারে প্রেরিত হয়। একবার কারাগারে প্রবেশ করিলে, আর কেহ,—এমন কি আত্মীয় স্বজনেরাও, আর ইহাদিগকে আশ্রয় দিতে চাহে না; সূত্রাং চুরী প্রভৃতি অসং কার্যের দ্বারাই ইহারা দিনপাত করিতে বাধ্য হয়। এপর্যন্ত আর কেহ এই হতভাগ্যদিগের উদ্ধারের

জন্য কোন চেষ্টাই করেন নাই। কিন্তু মেরী কার্পেন্টারের পরদুঃখ-কাতর হৃদয়, ইহাদিগের দশা দেখিয়া নিতান্ত ব্যথিত হইল। তিনি বালঅপরাধীদিগের চরিত্র সংশোধনের জন্য, সংস্কার-বিদ্যালয় স্থাপন করিবার সংকল্প করিলেন। এবং এই সংকল্প সাধন উদ্দেশে ১৮৫১ সালে সংস্কার-বিদ্যালয়ের আবশ্যিকতা প্রতিপন্ন করিয়া, একখানি পুস্তক প্রকাশ করেন। এই পুস্তক প্রকাশ করা ভিন্ন, এই উদ্দেশ্য সিদ্ধির জন্য তিনি প্রাণপণ চেষ্টা করিতে লাগিলেন। তাঁহার চেষ্টা সফল হইল; ১৮৫৪ সালে তাঁহার চেষ্টায়, এ সম্বন্ধে এক আইন বিধিবদ্ধ হইল, এবং এই সময় হইতে অনেকে এ বিষয় তাঁহাকে যথেষ্ট সাহায্য করিতে প্রস্তুত হইলেন। সাধারণের এই আগ্রহ এবং উৎসাহ দেখিয়া, কুমারী কার্পেন্টারও উৎসাহের সহিত কার্য আরম্ভ করিলেন; এবং ১৮৫২ সালে কিংস-উড্ নামক স্থানে সংস্কার-বিদ্যালয় খোলা হইল;—মেরী কার্পেন্টারের জীবনের আর একটা মহৎ উদ্দেশ্য সিদ্ধ হইল। তিনি আন্তরিক যত্ন, অধ্যবসায় এবং একাগ্রতার সহিত, এই বিদ্যালয়ের জন্য খাটিতে লাগিলেন; অল্পদিনের মধ্যেই তাঁহার চেষ্টার সফল ফলিতে লাগিল। কুমারী কার্পেন্টারের আর একটা উদ্দেশ্য সিদ্ধ হইল বটে, কিন্তু তিনি দেখিলেন যে, বালক ও বালিকা দিগকে এক বিদ্যালয়ে রাখা যুক্তিসঙ্গত নহে; ইহাতে বালিকাদিগের পাঠের বিশেষ বিঘ্ন হয়। এজন্ত তিনি বালকদিগের জন্ত, একটা স্বতন্ত্র বিদ্যালয় স্থাপন করিতে ইচ্ছা করিলেন। অল্পদিনের মধ্যেই তাঁহার ইচ্ছা পূর্ণ হইল। কবি বায়রণের পত্নী, মেরী কার্পেন্টারের বিশেষ বন্ধু ছিলেন; তিনি নিজ ব্যয়ে ব্রিস্টল নগরে “রেড্-

লজ্” নামক একটা বড় বাড়ী কিনিয়া দিলেন। ১৮৫৩ সালে ১০ই অক্টোবর, এই বাড়ীতে বালিকাদিগের জন্য স্বতন্ত্র বিদ্যালয় খোলা হইল। কুমারী কার্পেন্টার এই বিদ্যালয়ের সম্পূর্ণ ভার লইলেন। তাঁহার আন্তরিক যত্নে, তাঁহার শিক্ষায়, তাঁহার উপদেশ ও দৃষ্টান্তে, বালিকাদিগের চরিত্র সংশোধিত হইতে লাগিল, এবং ক্রমে তাহাদিগের হৃদয়ের সাধু বৃত্তি সকল প্রস্ফুটিত হইতে লাগিল। যাহারা এক সময়ে, সমাজ এবং আত্মীয় স্বজন কর্তৃক পরিত্যক্ত হইয়া, চুরী প্রভৃতি নানা প্রকার অসং কার্যে লিপ্ত হইয়া জীবন কাটাইত; বার বার কারাগারের অসহ বন্দনা ভোগ করিয়া, সমাজকে যাহারা আপনাদিগের শত্রু মনে করিত, এবং যথাসাধ্য শত্রুতা সাধনের চেষ্টা করিত; মেরী কার্পেন্টারের যত্নে ও শিক্ষায়, উপদেশে ও দৃষ্টান্তে, তাহারাই আজ সংসারে সংপথ অবলম্বন করিয়া সুখে জীবন কাটাইতেছে। শুধু তাহাই নহে, ইহাদিগের মধ্যে অনেকে আবার অন্তর্ভুক্ত সংশোধন করিবার জন্য যত্নবতী হইয়াছেন। বিদ্যালয়ে লেখা পড়া শিক্ষার সঙ্গে, সংপথে থাকিয়া যাহাতে জীবিকা নির্বাহ করিতে পারে, এ প্রকার নানা কার্য ইহাদিগকে শিক্ষা দেওয়া হইত। “রেড্ লজ্” বিদ্যালয়ের সফল দেখিয়া, অন্যান্য স্থানেও এই প্রকার বিদ্যালয় স্থাপিত হয়। পৃথিবীর প্রধান ব্যক্তির যাহা করিতে পারেন নাই, একটা অবলা সেই মহৎ কার্য সম্পন্ন করিয়া তুলিলেন। এই জন্যই একটা কথা প্রচলিত আছে;—“সাধু যাহার ইচ্ছা, ঈশ্বর তাহার সহায়।”

যাহাদিগের হৃদয়ে দয়া অধিক—সংকল্পের দিকে যাহাদিগের ইচ্ছা ঐশ্বর, তাহারা স্থির থাকিতে পারেন না। কারাগারে কয়েদীগণ ভয়ঙ্কর

ক্লেশ যন্ত্রণা পাইয়া থাকে। অপরাধীদের চরিত্র সংশোধনের জন্য কারাগারে পাঠান হয়; কিন্তু দেখা যায় যে, চরিত্র সংশোধন হওয়া দূরে থাক, কারাগারের অভ্যাসে এবং যন্ত্রণায়, ইহাদিগের চরিত্র আরও দূষিত হইয়া উঠে। সংস্কার-বিদ্যালয় স্থাপন করিয়া, মেরী কার্পেন্টার আশাব্যবস্থা ফল পাইয়াছিলেন। এখন কারাবাসিদিগের দুর্দশা যথেষ্ট দূর হয়, তাহার সাহায্যে শিক্ষিত ও মনোরম হইতে পারে, তাহার জন্য তিনি যত্নবতী হইলেন। ১৮৬৪ সালে “আমাদের কারাবাসী” (our convicts) নামে এক পুস্তক প্রকাশ করেন। তাহাতে কারাগারের দূষিত কার্য প্রণালীতে, কয়েদীগণের কতদূর অনিষ্ট হইতেছে, তাহা স্পষ্ট বুঝাইয়া দেন; এবং যাহাতে কারাগারের অবস্থার উন্নতি এবং কয়েদীগণের শিক্ষা ও সংশোধনের উপায় হয়, তাহার জন্য কতগুলি সংস্কারমর্শ দেন। তাঁহার যত্ন ও চেষ্টা বিফল হয় নাই; এই পুস্তক প্রকাশের পর এ সম্বন্ধে খুব আন্দোলন উপস্থিত হয়; এবং ইংলণ্ডের কারাগারগুলির সংশোধন ও উন্নতির সূত্রপাত হয়।

মেরী কার্পেন্টারের বয়স এখন ষাট বৎসর হইয়াছে। তিনি এক প্রকার বৃদ্ধ দশায় উপস্থিত হইয়াছেন। কিন্তু এই বৃদ্ধ বয়সেও তাঁহার সেই যৌবনের উৎসাহ উদ্যম বর্তমান। স্বদেশে তাঁহার কার্য এইখানেই এক প্রকার শেষ হইল। কিন্তু এখন আবার এই দূরদেশ,—ভারতবর্ষের দিকে তাঁহার দৃষ্টি পতিত হইল। তাঁহার পরমবন্ধু মহাত্মা রাজা রামমোহন রায় ভারতবর্ষবাসী ছিলেন, এই জন্ত ভারতবর্ষের প্রতি তাঁহার অত্যন্ত অনুরাগ জন্মে। এদেশীয় রমণীদের স্ত্রীশিক্ষার কোন প্রকার ভাল বন্দোবস্ত নাই বলিয়া, তিনি অত্যন্ত দুঃখিত হন; এবং স্ত্রীশিক্ষার উন্নতির জন্ত তিনি

এদেশে আসিবার জন্ত ব্যগ্র হন। এই বয়সে স্বদেশ ছাড়িয়া দূরদেশে যাইতে লোকের কত আশঙ্কা হয়, কিন্তু মেরী কার্পেন্টারের পরহিতৈষী হৃদয়ে কোন আশঙ্কা উপস্থিত হইল না। ১৮৬৬ সালে তিনি প্রথমে এদেশে আসিয়াছিলেন। স্বদেশ পরিত্যাগ করিবার পূর্বে তিনি বালিকাদিগের জন্ত একটা শ্রমিক-বিদ্যালয় স্থাপন করেন। আজ পর্যন্ত সে বিদ্যালয়ের কার্য সুচারুরূপে চলিতেছে। উপযুক্ত শিক্ষয়িত্রীর অভাবে, এদেশে বালিকাদিগের ভাল শিক্ষা হইতেছে না, তাহা তিনি বুঝিতে পারিলেন; এবং উপযুক্ত শিক্ষয়িত্রী প্রস্তুত করিবার জন্ত, “ফিমেল নর্সাল স্কুল” স্থাপন করিবার উপায় দেখিতে লাগিলেন। মেরী কার্পেন্টার প্রথমে বম্বে পদার্পণ করেন। বম্বে স্ত্রীশিক্ষা এবং কারাগারের সংস্কারের জন্য বিশেষ চেষ্টা করেন। তার পর বম্বে হইতে কলিকাতা আসিবার পথে, মাদ্রাজে কয়েকদিন সেখানকার ভিন্ন ভিন্ন বিদ্যালয়ের শিক্ষা প্রণালী পরিদর্শন করেন। ২০শে নভেম্বর কলিকাতায় আসিয়া উপস্থিত হন। মেরী কার্পেন্টার এদেশীয় মহিলাদিগের মঙ্গল উদ্দেশ্যে করিয়া এই দূরদেশে আসিয়াছেন, এ কথা বঙ্গ মহিলারা বিস্মৃত হন নাই। বঙ্গ মহিলারা এই সময়ে তাঁহাকে হৃদয়ের কৃতজ্ঞতা, সম্মান, শ্রদ্ধা ও ভক্তি, দেখাইতে ক্রটি করেন নাই। মেরী কার্পেন্টারও ইহাদিগের বিনয় ও নম্রতাতে মুগ্ধ হইয়াছিলেন। কলিকাতায় আসিয়া, কলিকাতা ও তন্নিকটস্থ পল্লীগামে গিয়া শিক্ষা প্রণালী পরিদর্শন করিতে লাগিলেন; এবং স্ত্রীশিক্ষার উন্নতির জন্ত বিশেষ যত্ন ও চেষ্টা করিতে লাগিলেন। তাঁহার যত্নে বম্বে ও কলিকাতায় দুইটা সামাজিক বিজ্ঞান সভাও স্থাপিত হয়।

স্ত্রীশিক্ষার উন্নতির চেষ্টা এবং বিদ্যালয় প্রভৃতি পরিদর্শন ভিন্ন, মেরী কার্পেন্টার কারাগার এবং কারখানা প্রভৃতি পরিদর্শন করেন। কারখানা গুলিতে অনেক দরিদ্র ও নিরন্ন লোক প্রতিপালিত হইতেছে দেখিয়া, পর-জুঃখ-কাতর কার্পেন্টার একান্ত স্মৃথী হন। তিনটা প্রধান উদ্দেশ্য লইয়া পরহিতৈষী কার্পেন্টার ভারতবর্ষে আসিয়াছিলেন। প্রথম—স্ত্রীশিক্ষার উন্নতি; দ্বিতীয়—ইংলণ্ডে যে প্রণালীতে সংস্কার-বিদ্যালয় প্রতিষ্ঠিত হইয়াছে, সেই প্রণালীতে সংস্কার-বিদ্যালয় স্থাপন, তৃতীয়—কারাগার সংস্কার। গভর্ণর জেনারেলের নিকট এই তিনটা বিষয়ে, মেরী কার্পেন্টার তাঁহার অভিপ্রায় প্রকাশ করেন; এবং যাহাতে এই উদ্দেশ্য ফলবতী হয়, যথাসাধ্য তাহার চেষ্টাও করেন। সময়ে তাঁহার উদ্দেশ্য ফলবতী হইয়াছিল। ২০শে মার্চ মেরী কার্পেন্টার ইংলণ্ডে যাত্রা করেন। ভারতবর্ষে আসিয়া যাহা যাহা জানিতে পারিয়াছিলেন, “ভারতবর্ষে ছয়মাস অবস্থান” নামক এক পুস্তকে সে সমস্ত প্রকাশ করেন। এই পুস্তকে বালকদিগের শিক্ষা, স্ত্রীশিক্ষা, নিম্নশ্রেণীর লোকদিগের শিক্ষা, শ্রমিক-বিদ্যালয়, শিল্প-বিদ্যালয়, কারা-সংস্কার প্রভৃতি নানা বিষয়ে, তাঁহার অভিপ্রায় এবং অনেক সংস্কারমর্শ লিপিবদ্ধ করেন। এই পরহিতৈষী অবলার হৃদয় কতখানি মহৎ ভাবে পরিপূর্ণ ছিল, ইহাতেই তাহা বেশ বুঝা যায়। পুস্তকের এক স্থানে তিনি লিখিয়াছেন, “আমি অত্র কোন ভাবে পরিচালিত হইয়া নিজের মত প্রকাশ করি নাই, ভারতবর্ষের জন্ত কার্য করা, এবং ভারতবর্ষের মঙ্গল সাধন করাই, আমার একমাত্র উদ্দেশ্য।” প্রসংশা বা সম্মান লাভের আকাঙ্ক্ষায়, সেই বৃদ্ধ বয়সে তিনি এদেশে আসেন নাই।

নিম্নার্থ পরোপকার তাঁহার উদ্দেশ্য ছিল, তাই তাঁহার আশা—তাঁহার উদ্যান ফলবতী হইয়াছিল। কার্পেন্টার দ্বিতীয় বার ভারতবর্ষে আসিয়া গভর্ণমেণ্টের সাহায্যে মহিলাদিগের জন্ত নর্সাল স্কুল স্থাপন করেন; এবার শারীরিক অসুস্থতার জন্ত কলিকাতায় আসিতে পারেন নাই; বম্বে হইতেই তাঁহাকে দেশে ফিরিয়া যাইতে হয়। এইবার দেশে ফিরিয়া গিয়া, এদেশীয়দিগের সহিত ইংলণ্ডের লোকের মধ্যে পরস্পর ঘনিষ্ঠতা বৃদ্ধির উদ্দেশ্যে, এবং ভারতবর্ষের সামাজিক উন্নতির জন্ত, “জাতীয় ভারত সভা” স্থাপন করেন। ১৮৬৯ সালে মেরী কার্পেন্টার তৃতীয় বার ভারতবর্ষে আগমন করেন। তাঁহার চেষ্টার সুফল ফলিতেছে, তাঁহার আশা ফলবতী হইতেছে, দেখিয়া তিনি একান্ত স্মৃথী হন; এবং ক্রমে তাঁহার সংকল্প সম্পূর্ণরূপে সিদ্ধ হইবে, এই আশায় আশ্বস্ত হইয়া, স্বদেশে ফিরিয়া যান। ১৮৭৩ সালে এই পরহিতৈষী মহিলা বৃদ্ধ বয়সে কারাগারের অবস্থা পরিদর্শন করিবার জন্ত, আমেরিকা যাত্রা করেন। ১৮৭৫ সালে, মেরী কার্পেন্টার শেষবার এদেশে আসেন; বম্বে, পূনা প্রভৃতি স্থানে বিদ্যালয়, কারাগার প্রভৃতি পরিদর্শন করিয়া মাদ্রাজে গমন করেন। সেখানে চিকিৎসালয় প্রভৃতি পরিদর্শন করেন; এবং মহিলাদিগকে চিকিৎসা বিদ্যা শিক্ষা দেওয়া হইতেছে দেখিয়া বিশেষ স্মৃথী হন। মাদ্রাজ হইতে কলিকাতায় ও পরে ঢাকায় গমন করেন। ইহার পর বরদা প্রভৃতি ভারতবর্ষের প্রধান প্রধান স্থান পরিদর্শন করিয়া, দেশে ফিরিয়া যান। মেরী কার্পেন্টার সকল শ্রেণীর লোকের সঙ্গেই মিশিতেন। তিনি শেষবার যখন কলিকাতায় আসেন, তখন বরাহনগরের শ্রম-


জীবিদিগের প্রত্যেকের বাড়ীতে যাইয়া, তাহা-  
দিগের অবস্থার অনুসন্ধান করিয়াছিলেন।  
নিম্ন শ্রেণীর লোকদিগের উপরই তাঁহার বিশেষ  
দৃষ্টি ছিল, ইহারাই তাঁহার সন্তান তুল্য ছিল;  
ইহাদিগের জন্মই এই পরহিতৈষী মহিলা, আপ-  
নার জীবন উৎসর্গ করিয়াছিলেন।

কার্পেণ্টারের ভারতবর্ষে আগমনের উদ্দেশ্য  
অনেকাংশে সিদ্ধ হইয়াছিল। তাঁহার অক্লান্ত  
যত্নে, চেষ্টায় ও অধ্যবসার গুণে, এদেশে স্ত্রীশিক্ষার  
অনেক উন্নতি হইয়াছিল, কারাগারের অব-  
স্থার সংস্কার হইয়াছিল, বিশেষতঃ স্ত্রী-কয়েদী-  
দিগের সম্বন্ধে গভর্ণমেণ্ট অধিকতর মনোযোগী  
হইয়াছিলেন, ও সংস্কার-বিদ্যালয় স্থাপন সম্বন্ধে  
রাজ নিয়ম বিধিবদ্ধ হইয়াছিল। দেশের লোক  
যাহা করিতে পারেন নাই, দেশের লোকের  
যে দিকে দৃষ্টি পড়ে নাই, একটা বিদেশীয় অবলা,  
বৃদ্ধ বয়সে এই দূরদেশে আসিয়া, সেই সকল মহৎ  
কাজ সম্পন্ন করিয়া গিয়াছেন।

মেরী কার্পেণ্টারের বয়স সত্তর বৎসর হই-  
য়াছে। বয়সের সঙ্গে তাঁহার কার্য্য করিবার  
শক্তি কমিয়াছে বটে, হৃদয়ের উৎসাহ, উদ্যম  
কমে নাই। এই বৃদ্ধ বয়সেও অনেক প্রকার  
হিতকর কার্য্য করিবার কল্পনা করিতেছেন; এমন  
সময়ে তাঁহার শেষ দিন আসিয়া উপস্থিত  
হইল! যে পরহিতৈষী অবলার হৃদয় হইতে  
করণাধারা নিঃসৃত হইয়া, শত সহস্র ছুঃখী সন্তপ্ত  
দিগকে শান্তি বিতরণ করিতেছিল, ধীরে ধীরে  
মৃত্যু তাঁহাকে এ জগৎ হইতে লইয়া গেল। রোগ  
যন্ত্রণা বা মৃত্যুযন্ত্রণা তাঁহাকে ভোগ করিতে হয়  
নাই; মৃত্যুর দিন পর্য্যন্ত তাঁহার শরীর সম্পূর্ণ  
সুস্থ ছিল। ১৪ই জুন নিয়মিত কাজ করিলেন;  
সন্ধ্যার সময় একজন বন্ধুর সহিত অনেক হিত-

কর বিষয় কথাবার্তা হইল। রাত্রিতে একটা  
প্রয়োজনীয় বিষয় লিখিয়া নিদ্রা গেলেন; এই  
নিদ্রাই তাঁহার চিরনিদ্রা হইল; কুমারী কার্পে-  
ণ্টার চিরশান্তি লাভ করিলেন। তাঁহার পালিতা  
কন্যা শয়নালয়ে গিয়া দেখিল, কুমারী কার্পেণ্টা-  
রের প্রাণশূন্য দেহ শয্যায় পড়িয়া রহিয়াছে।  
১৯এ জুন করুণার প্রতিমূর্তি,—এই পরহিতৈষী  
অবলার দেহ “আর্নোস্বেভেল’ নামক স্থানে সমা-  
হিত হয়। যে সকল বালক বালিকাদিগকে  
তিনি সুশিক্ষিত ও সংসারের উপযুক্ত করিবার  
জন্ম জীবন উৎসর্গ করিয়াছিলেন, তাহারা আজ  
মাতৃহারা হইয়া, শোক পরিচ্ছদ পরিয়া, চক্ষের  
জল ফেলিতে ফেলিতে সমাধিভূমিতে উপস্থিত  
হইল। ধনী দরিদ্র সকলেই আজ এই মহিলার  
প্রতি সম্মান প্রদর্শনের জন্ম উপস্থিত হইলেন।  
মেরী কার্পেণ্টারের জীবন পরোপকার ব্রতের  
উজ্জ্বল দৃষ্টান্ত। তিনি আজীবন অবিবাহিত  
থাকিয়া, নিজের জীবন কেবল পরোপকারের জন্যই  
উৎসর্গ করিয়াছিলেন, নিজের সুখ সচ্ছন্দতার  
প্রতি তাঁহার কিছুমাত্র দৃষ্টি ছিল না। গরিব  
দিগকে দয়া বিতরণ করিয়া, ছুঃখীর ছুঃখ মোচন  
করিয়া, রোগীর সেবা করিয়া, সন্তপ্তকে সান্ত্বনা  
দিয়া, নিরাশ্রয়কে আশ্রয় দান করিয়া, তিনি যে  
সুখ পাইতেন; অত্র সুখ তাঁহার কাছে নিতান্ত  
তুচ্ছ। এদেশের লোক তাঁহার নিকট অনেক  
বিষয়ে ঋণী, বিশেষতঃ এদেশের রমণীগণ কখনও  
তাঁহার ঋণ পরিশোধ করিতে পারিবেন না।  
নিস্বার্থভাবে, ঈশ্বরের উপর নির্ভর করিয়া তিনি  
জীবনের ব্রত আরম্ভ করিয়াছিলেন, তাই তাঁহার  
দ্বারা এত মঙ্গলকর কার্য্য হইতে পারিয়াছে। বড়  
বড় লোকে যাহা করিতে পারেন নাই, ঈশ্বরের  
উপর নির্ভর করিয়া একটা অবলা তাহা সম্পন্ন

করিয়া গিয়াছেন। সেই জন্মই লোকে বলে,—  
“সাধু যাহার ইচ্ছা, ঈশ্বর তাহার সহায়।”



## গণ্ডার ।




মুখের মধ্যে যেমন সত্য ও  
অসত্য আছে, জন্তুদিগের মধ্যেও  
সেইরূপ প্রভেদ থাকিবার সম্ভা-  
বনা। শ্বেতাঙ্গেরা যেমন কৃষ্ণকায়  
দিগকে “কাল আদমি” বলিয়া উপহাস করে—  
অসত্য বলিয়া ঘৃণা করে, জন্তুদের মধ্যেও সেইরূপ  
প্রথা আছে কিনা জানি না। কিন্তু কতকগুলি  
জন্তু দেখিতে একটু পরিষ্কার, একটু ভদ্র, একটু  
সত্য বলিয়া বোধ হয়। আর কতকগুলি দেখিতে  
কদাকার ও অসত্য এবং চলা ফেরাতে অভদ্র  
বলিয়া মনে হয়। কেহ কেহ আপনাদের বশ-  
স্বাধীনতা পরিত্যাগ করিয়া মানুষের দাসত্ব  
স্বীকার করে ও অল্প দিনেই অর্দ্ধসত্য বলিয়া  
পরিচিত হয় কিন্তু কতকগুলি এমন গোয়ার যে  
কিছুতেই পোষ মানেন না স্তবরাং তাহারা চির-  
কালই জানোয়ার হইয়া থাকে।

গণ্ডার এই শ্রেণীভুক্ত। ইহার  
দেখিতে অতিশয় কদাকার এবং অত্যন্ত অসভ্যের  
ক্রিয় বাস করে। আমার মনে হয় মানুষের মধ্যে  
যেমন ধাঙ্গড় জন্তুদের মধ্যে সেইরূপ গণ্ডার।  
আমি যেখানে যেখানে গণ্ডার দেখিয়াছি সেই-  
খানেই দেখিয়াছি যে, তাহারা পচাজল, নানারূপ  
আবর্জনা ও কর্দমের মধ্যে রহিয়াছে। সকল  
গায়ে কাদা লেপা, তাতেই তাদের মহা আনন্দ!!  
বোধ হয় আমাদের গায়ে চন্দন দিলেও আমরা  
এত খুসী হই না।

এইত গেল ইহাদের আচার ব্যবহার; আকৃতি  
ও সেইরূপ। ছবিতে দেখিতে পাইবে শরীর-  
থানা কেমন সুবৃহৎ! জন্তুদের মধ্যে যাহাদের  
সিং আছে তাহাদের সকলেরই মাথার উপর;  
যেমন গরু, মহিষ, হরিণ ইত্যাদি। কিন্তু ইহা-  
দের সিং নাকের উপর। দেখিতে কেমন  
সুশ্রী!! নাকের উপর যেন একটা দাঁত উঠি-  
য়াছে। আমি ভাবি, গণ্ডার যদি কোন দিন  
আয়নায় মুখ দেখিতে পাইত তবে হয়ত লজ্জায়  
এতদিন গলায় দড়ী বেঁধে মরিত।

গণ্ডার যে অসত্য তাহার একটা প্রমাণ এই  
যে, ইহাদের বাসস্থান অসত্য এশিয়া ও আফ্রিকা-  
দেশে। সত্য ইউরোপে গণ্ডার নাই। অতি  
প্রাচীনকালে রোম নগরে ছুইবার গণ্ডার প্রদ-  
র্শিত হইয়াছিল বলিয়া উল্লেখ আছে। কিন্তু  
১৫১৩ খ্রীষ্টাব্দের পূর্বে আধুনিক ইউরোপে গণ্ডার  
দৃষ্ট হইয়াছিল বলিয়া বোধ হয় না। এই সময়ে  
ভারতবর্ষ হইতে পর্তুগালের রাজার জন্ম একটা  
গণ্ডার প্রেরিত হয়; ইহা লইয়া ইউরোপে তখন  
মহা ধূম পড়িয়াছিল; নানা স্থানে ইহার চিত্র  
প্রেরিত হইয়াছিল এবং অনেকে নানারূপ হাস্য-  
জনক বিবরণ লিখিয়াছিলেন। ১৬৮৫ খ্রীষ্টাব্দে



ইংলণ্ডে একটি গণ্ডার আনীত হয়; ইহার পর ১৭৩৯ ও ১৭৪১ খ্রীষ্টাব্দে দুইটি গণ্ডার ইউরোপের অনেক স্থানে প্রদর্শিত হয়। ক্রমে দুই একটি করিয়া ১৮০০ খ্রীষ্টাব্দ পর্যন্ত ৭টি গণ্ডার ইউরোপে প্রেরিত হয়। এই সপ্তমটি জর্মানির রাজার পশুশালার জন্ত ক্রীত হইয়াছিল; কিন্তু লণ্ডন পর্যন্ত যাইয়াই ইনি লীলা সম্বরণ করেন। ইহার কিছুদিন পর আর একটি জর্মানরাজের পশুশালার জন্ত আনীত হয়। আজকাল ইউরোপের প্রায় প্রত্যেক পশুশালায়ই গণ্ডার দেখিতে পাওয়া যায় এবং বিলাতে “রেজেন্ট পার্ক” নামক স্থানে পাঁচ রকমের গণ্ডার আছে।

পৃথিবীতে মোট কত প্রকারের গণ্ডার আছে তাহার নিশ্চয় বিবরণ পাওয়া যায় না। এশিয়াতে চারি প্রকার এবং আফ্রিকায় চারি প্রকার দৃষ্ট হয়। কিন্তু কেহ কেহ বলেন আফ্রিকায় পাঁচ রকমের গণ্ডার আছে। আফ্রিকার গণ্ডা-

রের নাকের উপর দুইদুইটি সিং আছে। আগে-রটি বড় এবং পাছেরটি ছোট; কিন্তু এক রকম গণ্ডারের দুইটি সিংই সমান উচু হয়। আফ্রিকা-বাসী গণ্ডারের নাকের উপরস্থিত সম্মুখের সিং ২০ ইঞ্চি হইতে ৪ফুট অর্থাৎ আড়াই হাতেরও উপর উচু হইয়া থাকে কিন্তু পাছেরটি ১০ হইতে ২০ ইঞ্চির অধিক কখনও বড় হয় না।

আমরা ছেলেবেলা “শিশুশিক্ষা”য় পড়িয়াছি যে গণ্ডারের চামড়া এতদূর শক্ত যে বন্দুকের গোলা গুলিতে বিদ্ধ হয় না। কিন্তু জানিতে পারা গিয়াছে যে, সে কথা সত্য নহে। আফ্রিকা দেশে ইউরোপের ভ্রমণকারীরা অনেক গণ্ডার শীকার করিয়াছেন। হাডগিলার ঞায় এক-রকম পাখী আছে তাহাদিগকে, যেখানে গণ্ডার থাকে সেই খানেই দেখা যায়। ইহারা প্রায়ই গণ্ডারের পৃষ্ঠের উপর চড়িয়া থাকে। এই জন্ত এই পাখী দিগের নাম “গণ্ডার পাখী” হইয়াছে।

শীকারীরা এই পাখী দেখিয়াই অনেক সময়ে গণ্ডার শীকার করিবার সুবিধা পায়। বেকার সাহেব নামক একজন ভ্রমণকারী গণ্ডার শীকার সম্বন্ধে অনেক বিবরণ প্রকাশ করিয়াছেন। একদিন তিনি এবং কয়েকজন আফ্রিকাবাসী শীকার করিতে গিয়াছিলেন। এক নিবিড় জঙ্গলের মধ্যে দেখিলেন দুইটি গণ্ডার মহাসুখে নিদ্রা যাইতেছে। সাহেব একাকী দুইটি বন্দুক হাতে করিয়া অগ্রসর হইলেন; সাহেব ৬০ হাত দূরে থাকিতেই হঠাৎ তাহাদের নিদ্রা ভঙ্গ হইল এবং একটা গণ্ডার তীব্রবেগে সাহেবকে আক্রমণ করিল। সাহেবও ক্ষিপ্ৰহস্তে গণ্ডারের গলদেশে বন্দুকের গুলি করিলেন। তখন গণ্ডারেরা প্রাণভয়ে উদ্ধৃষ্ণাসে পলায়ন করিল; সাহেবও তাহার দলবল লইয়া ঘোড়ায় চড়িয়া পাছে পাছে ছুটিলেন। একজন তরবারি দ্বারা একটা গণ্ডারের পশ্চাদ্দেশে আঘাত করিয়াছিল বটে কিন্তু অবশেষে গণ্ডার দুটি এমন নিবিড় জঙ্গলে প্রবেশ করিল যে, সেখানে যাওয়া তাহাদের সাধ্য হইল না। আর একদিন এই সাহেব শীকার করিতে যাইয়া গণ্ডারের ভয়ে পলায়ন করিয়াছিলেন।

এশিয়াতে চারি প্রকারের গণ্ডার আছে। ইহার মধ্যে দুই রকমের গণ্ডারের দুই দুইটি সিং আছে; এবং অল্প দুই রকমের কেবল মাত্র একটা সিং আছে। (ছবি দেখ) ইহার মধ্যে “ভারতীয় গণ্ডার” নামে এক রকমই বিশেষ প্রসিদ্ধ। বাঙ্গালা ও শ্রাম প্রভৃতি দেশে ইহাদিগকে দেখিতে পাওয়া যায়; ইহারা আকৃতিতে ৪।৫ ফুটের অধিক কখনও উচু হয় না।

আর এক রকমের গণ্ডার আছে তাহাদের কাণের উপর বড় বড় লোম হয়। বিলাতে রেজেন্ট পার্কে এইরূপ একটা গণ্ডার ১৮৬৮

খ্রীষ্টাব্দে চট্টগ্রাম হইতে নীত হইয়াছিল। এই গণ্ডারটি এক নদীতীরে কাদার মধ্যে পড়িয়া গিয়াছিল, এবং উঠিতে চেষ্টা করিয়াও উঠিতে পারে নাই। সেখানকার প্রায় ২০০ ছুইশত লোক ইহার গলায় ছুইগাছি দড়ী বাঁধিয়া টানিতে থাকে এবং অবশেষে অতি কষ্টে উঠাইয়া এক গাছের সঙ্গে বাঁধিয়া রাখে। পরদিন যখন লোকেরা দেখিল যে, গণ্ডার দেখিতে খুব সবল হইয়াছে এবং দড়ী ছিঁড়িয়া বাইতে পারে তখন তাহারা ভয়ে চট্টগ্রামের মাজিষ্ট্রেট সাহেবের নিকট দরখাস্ত করে। মাজিষ্ট্রেট সাহেবও কাপ্তেন হুড আটটি হাতী সঙ্গে করিয়া সেখানে গমন করেন। এবং বহুকষ্টে গণ্ডারের পাছের পায়ে দড়ী বাঁধিয়া এবং চারিদিকে হাতীর পাহাড়া রাখিয়া চট্টগ্রামে আনয়ন করেন। এই গণ্ডারটির নাম “বেগম”। ইহা বিলাতে ১২৫০ পাউণ্ড অর্থাৎ প্রায় ১৬০০০ টাকায় বিক্রীত হয়। এখন ইহা অনেকটা শান্ত হইয়াছে এবং রেজেন্ট পার্কে অবস্থিতি করিতেছে।

গণ্ডার সমস্তদিন আলস্যে কাটায়। প্রায়ই নিবিড় জঙ্গলের মধ্যে শুইয়া থাকে এবং নিদ্রা যায়। রাতিতে অনেক পথ চলিয়া থাকে। এবং পথের সম্মুখে যাহা পড়ে তাহা ছিন্ন ভিন্ন করিয়া ফেলে। গণ্ডার মাংস আহাৰ করে না। ইহারা নিরামিষ ভোজন করে। ইহারা কোন “নিরামিষ ভোজন বিধায়িনী” সভার সভ্য আছে কিনা আমি জানিনা; তবে জন্তুদিগের মধ্যে এইরূপ কোন সভা হইলে ইহারা সভাপতি কিংবা সম্পাদক হইবার যোগ্য ইহা আমি নিঃসংশয়ে বলিতে পারি। হাতীরা এত বড় জানোয়ার হইলেও গণ্ডারকে ভয় করে। গণ্ডার হাতীর পেট চিরিতে বড় ভালবাসে, হাতীরা এজন্ত



ইহাদিকে বড় ভয় করে। গণ্ডারের সিংএর নিকট হাতীর দাত পরাস্ত।

গণ্ডার হাতীর ত্রায় পোষ না মানিলেও বাঘের ত্রায় হিংস্র নহে; কিন্তু জন্তুর মধ্যে এমন গৌরার আর একটা আছে বলিয়া বোধ হয় না।

## অনাথা বালিকা ।

শ্রাবণের আধার রজনী ;

অবিরল বরষার ধারা ;

ঘন ঘন চমকে বিজলী

জন প্রাণী নাহি দেয় সাড়া ।

ক্ষুদ্র এক কুড়ীরের মাঝে

মিটি মিটি প্রদীপ জ্বলিছে ;

দেখ ওই বিছানার পাশে

বালিকাটা বসিয়ে রয়েছে ।

পরানের সোদর তাহার

শুয়ে আজি মরণ শয্যায় ;

ঔষধের কারণে জননী

অভাগিনী গিয়েছে কোথায় ;

“মা মা” বলে থেকে থেকে ভাই,

ক্ষণে ক্ষণে চমকি উঠিছে

স্বতনে ভগিনী কেমনে

আঙুলিয়ে ভাইকে রেখেছে ।

অই গুন! আকাশ বিদারি

‘কড়’ ‘কড়’ ভয়ঙ্কর রবে,

বজ্রপাত হইল ধরায়

যেন আজি বিনাশিতে সবে ।

“মা! মা! ধর ধর” বলি ভাই

সশঙ্কিতে করিল চীৎকার

বুকে চেপে ধরিল ভগিনী

কিন্তু তারে সাথে সাধ্য কার ?

চলে গেছে চিরদিন তরে

আত্মা সেই ক্ষুদ্রদেহ ছাড়ি

জ্ঞান-হারা অবোধ বালিকা

মরা ভাই আছে বুকে ধরি ।

অভাগিনী জননী কোথায় ?

ঔষধ লইয়ে তাড়াতাড়ি

সেই বোর নিশীথ সময়ে

পাগলিনী ফিরিছেন বাড়ী ।

ঘরে ফিরে কি দেখিবে সেথা

এই ভাবি আকুল নয়ান,

“এত দুঃখে হায় অন্তর্ব্যামী !

কেন মোর রয়েছে পরাণ ?”

এই কথা বলিতে বলিতে

গৃহদ্বারে উঠিবে যেমনি

হুঃখিনীর হুঃখ বিনাশিতে

বজ্রপাত হইল তখন ।

পরদিন প্রভাত বেলায়,

প্রতিবেশী সকলে আসিল ;

গৃহদ্বারে দাঁড়িয়ে জননী

দেখি সবে বিস্ময় মানিল ।

১২  
বহুগল্পে—বহুগুণ পরে  
বালিকার চেতন হইল ;  
কিন্তু তার জননী সোদর  
এজনমে আর না জাগিল !

## ভারতের অসভ্যজাতি ।

( ১০২ পৃষ্ঠার পর । )

পূর্বেই বলা হইয়াছে যে, ধান্ধড় জাতি রোণা হইতে এক দল ছোটনাগপুর প্রভৃতি স্থানে গিয়া বাস করে আর এক দল রাজমহল পাহাড়ের দিকে যায়। যে দল রাজমহল পাহাড়ে গিয়া বাস করে তাহাদিগকেই “পাহাড়ী” বলে, এই পাহাড়ীদিগের বৃত্তান্ত সংক্ষেপে কিছু বলা যাইতেছে।

“পাহাড়ী” জাতি যদিও আজ কালি অনেকটা শাস্ত ও সভ্য হইয়াছে, কিন্তু অতি প্রাচীন কালে ইহার অতিশয় কলহপ্রিয় এবং নিষ্ঠুরপ্রকৃতি ছিল; এমন কি মুসলমানদিগের রাজত্বকালে এবং ইংরাজ রাজত্বের প্রারম্ভেও ইহাদিগের দৌরাত্মে নিকটবর্তী প্রজাগণ সর্বদা সশঙ্কিত থাকিত। পরে জানিতে পারিবে যে, রাজমহল পাহাড়ের উপত্যকায় অনেক সাঁওতাল বাস করে, এই সকল সাঁওতাল এবং রাজমহল প্রদেশের ক্ষুদ্র ক্ষুদ্র জমিদার এবং প্রজাগণ এই পাহাড়ীদিগকে আপদ বালাই মনে করিত—কখন আসিয়া মারিয়া ধরিয়া লুট পাট করিয়া লয় এই ভয়ে তাহাদিগকে সর্বদাই ব্যতিবাস্ত হইয়া থাকিতে হইত। আজ কালি ইংরাজদিগের স্বশাসনে

বড় বড় জমিদারদিগের মধ্যে বড় একটা মারামারি, লাঠালাঠি দেখিতে পাওয়া যায় না—অবশ্য একেবারে যে নাই তা বলিতেছি না, তবে পূর্বে কালের মত আর নাই। কিন্তু যে সময়ের কথা বলা হইতেছে সে সময় জমিদারদিগের মধ্যে প্রায়ই মারামারি কাটাকাটি হইত, ঐ সময় রাজমহল প্রদেশবাসী জমিদারগণ এই সকল পাহাড়ীদিগের দস্যুবৃত্তির সুবিধা লইয়া তাহাদিগকে পরস্পরের বিরুদ্ধে উত্তেজিত করিত। পাহাড়ীরা ক্রমে এতই নির্ভীক এবং লুণ্ঠনপ্রিয় হইয়া উঠিয়াছিল যে, ঐ সকল প্রদেশের পাথে বাটে লোকজনের চলাফেরা প্রায় বন্ধ হইয়াছিল, কখন কখন তাহারা গভর্ণমেন্টের ডাক হরকরাকেও মেরে ধরে ডাকের খলেটি লইয়া পলায়ন করিত। তাহাদিগকে সাজা দিবার নিমিত্ত কখন কখন দলে দলে পুলিশ সৈন্য পাঠান হইত, কিন্তু কেহই কিছু করিয়া উঠিতে পারিত না, কারণ গোলমাল হইতে দেখিলেই তাহারা পাহাড়ের উপর উঠিয়া এমন সকল দুর্গম জঙ্গলে লুকাইত যেখানে আর অপর লোকের প্রবেশের সাধ্য থাকিত না। ইংরাজ গভর্ণমেন্ট কিন্তু ছাড়িবার পাত্র নন,— বলে বাহা হয় নাই কলে কৌশলে তাহা হইয়াছে। কিছুতেই আর যখন তাহারা জব্দ হয় না তখন গভর্ণমেন্টের সৈনিক বিভাগের ছজন সূচতুর কন্সচারী এক দিন পাহাড়ীদিগের প্রধান প্রধান মণ্ডল এবং তাহাদের অধীনস্থ লোকদিগকে নিমন্ত্রণ করেন, এবং বিদায় কালে তাহাদিগকে নানা প্রকার বস্তাদি দিয়া বিদায় করেন। পাহাড়ীরা দেখিল এত বড় মজা, তাহারা ক্রমেই ঐ সৈনিক পুরুষদিগের সহিত ঘনিষ্ঠতা করিতে আরম্ভ করিল এবং তাহাদিগের সংব্যবহারগুণে এবং উপঢৌকণের লোভে ক্রমে

বশ হইয়া পড়িল। এখন পাহাড়ীরা আর সেরূপ দক্ষ্য প্রকৃতি লুপ্তনশ্রিয় নাই, অনেক পরিমাণে শাস্ত হইয়াছে, চাস বাস করিতেছে। পাহাড়ীদিগের আকৃতি খাট, মোটা শরীর প্রায়ই দেখিতে পাওয়া যায় না; ইহারা অত্যন্ত সাহসী। অল্প অল্প অসভ্য জাতির মত ইহাদিগের রং নিতান্ত কাল নয়, কিন্তু নাক, চোক, কপাল অনেকটা ধাঙ্গড় দিগের মত। পাহাড়ী স্ত্রীলোকেরা স্কন্দরী না হউক দেখিতে বেশ স্ত্রী। পুরুষেরা বাবুগিরী করিতে বড় ভাল বাসে, চুল গুলিকে সর্কদাই আঁচড়ে খোঁপার মত ক'রে বেঁধে রাখে এবং প্রায় সदा সর্কদাই এক খানি লাল কাপড়ের পাগড়ি বাঁধিয়া রাখে, অল্প পরিচ্ছদের মধ্যে এক খানি খাটধুতি কোমরে জড়ান থাকে। স্ত্রীলোকদিগের পরিচ্ছদ অনেক ভাল। ইহারা সাদা খান কাপড়ের কোর্তা পরে এবং তাহার উপর একখান রং চং তসরের কাপড় আসামী স্ত্রীলোকদিগের ত্রায় জড়াইয়া রাখে, দেখিতে মন্দ দেখায় না। অলঙ্কারের মধ্যে পলার কাঠমালা এবং ধাতু নির্মিত আংটি পরে।

পাহাড়ীরা তিনটা প্রধান শ্রেণীতে বিভক্ত, যথা; মল্লর, মাল এবং কুমার। প্রথমোক্ত শ্রেণীই সর্কশ্রেষ্ঠ এবং ইহাদিগের মধ্যেই পাহাড়ীদিগের পূর্বপুরুষদিগের স্বভাব চরিত্রের চিহ্ন অনেক পরিমাণে লক্ষিত হয়। ইহারা শেষোক্ত শ্রেণীদ্বয় অপেক্ষা গভীর প্রকৃতি এবং অপেক্ষাকৃত কম আমোদপ্রিয়, আহালাদি সম্বন্ধেও ইহারা অনেকটা হিন্দু দিগের মত বাছিয়া গুছিয়া খায়; গো মাংস একেবারেই খায় না এবং আপন শ্রেণী ভিন্ন অস্ত্রের রাঁধা দ্রব্যও খায় না। ভূটা, মাকাই, সিম প্রভৃতিই পাহাড়ীদিগের প্রধান

খাদ্য। পাহাড়ের ঢালু জমিতে এই সকল শস্য উৎপন্ন হয়, এতদ্ভিন্ন আর আর আবশ্যকীয় বস্তুই ইহাদিগকে স্থানান্তর হইতে সংগ্রহ করিতে হয়। ইহাদিগের কিন্তু পয়সা কড়ি নাই, বাঁস, কাট, ঘাস পাহাড়ে যথেষ্ট জন্মে, পাহাড়ীরা এই সকল বাঁস, কাট কাটিয়া লইয়া পাহাড়ের নিকটবর্তী গ্রাম সকলের বাজারে যায়, এবং সেখান হইতে ঐ সকল বাঁস এবং কাঠের বিনিময়ে লবণ, তেল, কাপড় প্রভৃতি লইয়া আসে। চাস বাসের ভার স্ত্রীলোকদিগের উপরই। চাসের প্রণালীও অতি সামান্ত, একখানি খুস্তি দ্বারা পাহাড়ের গায়ে ছোট ছোট গর্ত করিয়া তাহাতেই বীজ বপন করা হয়। পুরুষেরা যে স্ত্রীলোকদিগের উপরে চাস বাসের ভার দিয়া মজা করিয়া বসিয়া থাকে তা নয়। তাহারাও জাতীয় রীতি এবং আপন আপন সংস্কার অনুসারে যথেষ্ট পরিশ্রম করে। একটা হরিণ কিম্বা ময়ূর শীকার করিবার নিমিত্ত এমন পরিশ্রম বা কষ্ট নাই যা তাহারা সহ্য করিতে প্রস্তুত নয়; একটি মৌমাছির চাকের অনুসন্ধান চারি পাঁচ ক্রোশ অনায়াসে হাঁটিয়া বেড়ায়; তাহাদিগের গৃহের প্রয়োজনীয় অনেক দ্রব্য নিজহাতে প্রস্তুত করে; কাঠ, কয়লা, বাঁস, তুলা প্রভৃতি দ্রব্য সকল মাথায় করিয়া বাজারে যায়, এবং আরও কত পরিশ্রম করে, কিন্তু পাহাড়ের গায়ের জঙ্গল পরিষ্কার করিয়া চাস করিতে হইলেই পুরুষ পাহাড়ীদিগের মহা মুঞ্চিল হয়, একাজটি আর তাদের দ্বারা হ'বার যো নাই; কাষে কাষেই স্ত্রীলোকদিগকে করিতে হয়।

পাহাড়ীদের গ্রামগুলি ধাঙ্গড়দের মত অপরিষ্কার নয়, প্রায় প্রত্যেক গ্রামের চতুর্দিকেই চাস বাসের চিহ্ন দেখিতে পাওয়া যায়। যদিও

পাহাড়ীরা নিজে অপরিষ্কার, কিন্তু ইহাদিগের বাড়ী বেশ পরিষ্কার পরিচ্ছন্ন। ধাঙ্গড়দের মত দুর্গন্ধময় নয়। ঘরগুলি বাঁসের বেড়ার, কাদার দেয়াল প্রায়ই নাই; ধাঙ্গড়দের মত ইহাদিগের গরু, ভেড়া, মুরগি, মানুষ সব এক ঘরে থাকে না, গৃহপালিত পশু পক্ষী এবং আহারীয় শস্যাদির ঘর স্বতন্ত্র। ধাঙ্গড়দিগের মত পাহাড়ীদেরও অবিবাহিত যুবকেরা গ্রামের এক খানি নির্দিষ্ট ঘরে রাত্রি বাস করে; কিন্তু যুবক যুবতীরা অল্প সময় বেশ মুক্তভাবে মিশিয়া থাকে এবং যদিও পরস্পর সদা স্পর্কদা আমোদ প্রমোদে সময় কাটায় তথাপি ইহাদিগের মধ্যে কোন অশ্লীল ব্যবহার দেখা যায় না। পাহাড়ীদিগের বিবাহ প্রণালী অতি সহজ; যুবক যুবতীর পরস্পর বিবাহ করিবার ইচ্ছা হইলে, যদি অল্প কোন আপত্তি উপস্থিত না হয়, অতি অল্প সময়ের মধ্যে বিবাহ হইয়া যায়। বিবাহের পর বর ও কন্যা উভয় পক্ষের লোকই বরকে একটা আশ্চর্য রকম অনুরোধ করে; তাহার মন্ত্র এই যে, বর যেন কন্যাকে হত্যা না করেন। বহুবিবাহ এবং বিধবা বিবাহ পাহাড়ীদের মধ্যে প্রচলিত আছে, এক ভাইয়ের মৃত্যু হইলে অপর ভাই মৃত ভাইয়ের বিধবা স্ত্রীগণকে বিবাহ করিতে পারে।


ধাঙ্গড়দিগের মত পাহাড়ীরা শব দাহ করে না—পুতিয়া ফেলে। ধাঙ্গড়দিগের মত পাহাড়ীরাও এক সর্কশক্তিমান ঈশ্বরকে বিশ্বাস করে, ইহাদিগের প্রত্যেক পল্লিতে এক একটি করিয়া গ্রাম্য দেবতা আছে, সেই সকল গ্রাম্য দেবতাগণকে তুষ্ট রাখিবার নিমিত্ত ইহারা সময় সময় পূজাদি করিয়া থাকে। ইহাদের বিশ্বাস যে, সর্কশক্তিমান ঈশ্বর এই পৃথিবী শাসন করিবার

নিমিত্ত প্রথমে সাতজন মানুষ সৃষ্টি করেন এবং ইহারা তাহাদিগের জ্যেষ্ঠের বংশধর। যদি তোমরা কখন পাহাড়ীদিগের গ্রামে যাও তাহা হইলে দেখিবে যে, প্রত্যেক ঘরের বাহিরে এক একখানি লম্বা বাঁস পোতা; ইহার অর্থ এই যে, এই বাঁস পোতা থাকিলে ভূত প্রেতের কুদৃষ্টি তাহাদিগের উপর পড়িবে না। হাজার অসভ্য হউক, নিষ্ঠুর হউক, আর তুর্দান্ত হউক, পাহাড়ীদিগের একটা মহৎ গুণ আছে; ইহারা প্রায়ই মিথ্যাকথা বলে না। কোন বিবাদ বিসম্বাদ মিটাইতে হইলে ইহারা তীর ছুঁইয়া সপথ করে যে সকলেই সত্য কথা কহিবে।

পাদ্রি সাহেবেরা অসভ্য জাতিদিগকে যেমন শিক্ষা দিতেছেন পাহাড়ীদিগকেও সেইরূপ দিতেছেন। কিন্তু দুঃখের বিষয় এই যে, এই জাতির মধ্যেও অত্যন্ত মাতুলানি ঢুকিয়াছে, আমরা গভর্ণমেন্টের নিকট বিনীতভাবে প্রার্থনা করিতেছি যে, তাঁহারা যখন এই জাতিকে উন্নত করিয়াছেন, আর যেন ইহাদিগের অবনতির পথ পরিষ্কার করিয়া না দেন।

ক্রমশঃ

## যেমন রোগ তেমনি ব্যবস্থা ।



সদুলাল মাথায়  
রুমাল বাঁধিয়া, তাকিয়া  
ঠেসান দিয়া, মাথায়  
হাত দিয়া, বসিয়া পড়ি-  
য়াছেন। বড় মাথা

ধরিয়াছে। সম্মুখে বই পড়িয়া রহিয়াছে; ওদিকে



দশটাও বাজিয়া গেল;—ইস্কুলে যাবারও সময় যায়। কিন্তু এমনি মাথা ধরিয়াছে যে মাথা আর তুলিতে পারিতেছেন না। নন্দহুলালের মা আসিয়া দেখেন, নন্দহুলাল মাথায় হাত দিয়া বসিয়া রহিয়াছেন। তিনি মনে করিয়াছিলেন, বুঝি তাঁর নন্দহুলাল ইস্কুলে গিয়াছে। নন্দহুলালকে দেখিয়া তিনি বলিয়া উঠিলেন, “বাবা নন্দহুলাল, আজও কি তোমার মাথা ধরিয়াছে?” এইখানে বলিয়া রাখি, আমাদের নন্দহুলালের এ রোগ নূতন নহে। কি যে হইয়াছে বলিতে পারি না, তবে অনেক দিন হইতেই এ রোগ তাঁহাকে ধরিয়াছে; প্রায়ই নটা দশটার সময় তাঁর মাথা ধরে, ছু তিন ঘণ্টা এমনি মাথা ধরা থাকে, যে নন্দহুলাল আর মাথা তুলিতে পারেন না। নন্দহুলাল মা বাপের বড় আদরের ছেলে; মা বলিলেন, “থাক্ বাবা, তবে আর তোমার আজ ইস্কুলে গিয়া কাজ নাই, কি যে হ’ল, কেন

আমার নন্দহুলালকে এমনি রোগে ধরিল; আজই আমি ডাক্তার আনাইয়া, বাহা হয় এর একটা ব্যবস্থা করিব।” নন্দহুলাল বই লইয়া, মার সঙ্গে গিয়া ঘরে শুইলেন। ডাক্তারের বাড়ী খবর গেল, এদিকে নন্দহুলালের মাথা ক্রমে ছাড়িয়া গেল,—ছু তিন ঘণ্টার বেশী মাথা ধরা থাকিত না। এমনি সময় ডাক্তার আসিলেন। ডাক্তার আসিয়া দেখিলেন, নন্দহুলাল আর শুইয়া নাই; উঠিয়া এদিক ওদিক করিতেছেন। ডাক্তারকে দেখিয়া নন্দহুলালের মুখ—কেন জানি না একটু বিমর্ষ হইল। বাহাই হ’ক ডাক্তার আসিবামাত্র নন্দহুলালের মা, বাপ, ভারি ব্যস্ততার সহিত, নন্দহুলালের এই উৎকট ব্যারামের কথা বলিলেন। তাঁহাদিগকে ভারি চিন্তিত দেখিয়া, ডাক্তারও একটু চিন্তিত হইলেন। এবং ব্যারামের আদ্যোপান্ত বিবরণ মনোযোগের সহিত শুনিয়া, ডাক্তার নন্দহুলালকে কাছে

ডাকিয়া অনেক প্রশ্ন জিজ্ঞাসা করিতে লাগিলেন। পরীক্ষা করিয়া সূচতুর ডাক্তার সমুদায় বুঝিতে পারিলেন। সে দিন কিছু না বলিয়া, নন্দহুলাল যে ইস্কুলে পড়িতেন, ডাক্তার সেই ইস্কুলে একটু অনুসন্ধান লইলেন। অনুসন্ধান করিয়া জানিলেন, যে নন্দহুলাল, ক্লাসে কিছুই করে না, পড়া শুনাতে একেবারেই মন নাই, প্রতিদিনই পড়া শুনার জন্ত শাস্তি পায়। ডাক্তার বুঝিলেন রোগ কি? তখন যেমন রোগ তেমনি ব্যবস্থা হইল। ইস্কুলের ভয়ে যে তার মাথা ধরে, তাহা নন্দহুলালের মা বাপ এতদিন বুঝিতে পারেন নাই। ডাক্তার পর দিন যাইয়া ব্যবস্থা করিলেন,—যখন মাথা ধরিলে, তখন আদ ঘণ্টা অন্তর পাঁচ বেত। নন্দহুলালের মুখ শুকাইয়া গেল; এতদিন মা বাপকে ফাঁকি দিয়াছিলেন বটে, কিন্তু ডাক্তারকে আর ফাঁকি দিতে পারিলেন না। বাই হ’ক, শুনিয়াছি, তার পরদিন থেকে আর একদিনের জন্যও নন্দহুলালের মাথা ধরে নাই। ব্যবস্থা শুনিয়াই রোগ পলাইয়াছে। আমরা জানি না নন্দহুলালের মত রোগ আমাদের কোন পাঠক পাঠিকার আছে কি না; যদি থাকে তবে যেন একথা মনে থাকে;—যে যেমন রোগ তার তেমন ব্যবস্থাও আছে।

## কোহিনুর।

লক্ষ্মী বড় চঞ্চলা। মানুষের কত আয়াস, চিরদিন লক্ষ্মীকে বাঁধিয়া রাখিবে! কিন্তু লক্ষ্মী কাহারও ঘরে চিরদিন বাঁধা থাকেন না। আজ যাহার লক্ষ্মী-শ্রী আছে, কাল হয়ত দেখিবে সে লক্ষ্মীছাড়া হইয়া গিয়াছে। এমনিতির চিরদিন

প্রায় কাহারও সন্ধান যায় না। কিন্তু সে কথা থাক; আমরা কোহিনুরের কথা বলিতেছি। কোহিনুরও লক্ষ্মীর ন্যায় বড় চঞ্চল; পৃথিবীর কত বড় বড় রাজারা, শত সহস্র চেষ্টা করিয়াও, এই কোহিনুরকে কেহ চিরদিন বাঁধিয়া রাখিতে পারিলেন না। আমরা দেখিয়াছি, পৃথিবীতে যে রাজার ক্ষমতা যখন সর্দাপেক্ষা বেশী হইয়াছে, কোহিনুর তখনই তাঁহার আশ্রয় লইয়াছে। চিরদিন কাহারও হাতে ইহা থাকে নাই, এবং বোধ হয় থাকিবেও না। ভারতবর্ষ রত্নগর্ভা নামে খ্যাত; কিন্তু ভারত-ভূমির সমুদায় রত্নের মধ্যে, এই কোহিনুর নামক হীরক সর্বশ্রেষ্ঠ এবং সর্দাপেক্ষা মূল্যবান। খৃষ্টের ৫৬ বৎসর পূর্বে, এই অপূর্ব হীরক মহারাজা বিক্রমাদিত্যের সম্পত্তি ছিল, বিক্রমাদিত্যের তখন অতুল প্রভাব। তারপর যখন দিল্লীর সম্রাটগণ সর্দাপেক্ষা অধিক প্রতাপশালী হইয়া উঠিলেন, তখন—খৃষ্টের চতুর্দশ শতাব্দীতে কোহিনুর তাঁহাদিগের হস্তগত হইল। এই হীরকের ওজন এই সময় ১৬ তোলা ছিল। সম্রাট সাজাহান একজন ভিনিসীয় রত্নকারকে কোহিনুর পরিকৃত ও উজ্জ্বল করিবার ভার দেন; রত্নকার চাঁচিতে চাঁচিতে রত্নটিকে এত হালকা করিয়া ফেলে যে, কোহিনুরের ওজন একেবারে ৪৮ তোলা হইয়া যায়। সাজাহান রত্নকারের বখেষ্ট দণ্ড করেন, কিন্তু সে যে ক্ষতি করিয়াছিল তাহার আর পূরণ হইল না। সাজাহানের মৃত্যুর পর দিল্লীর সম্রাটগণের হস্তেই কোহিনুর থাকে; কিন্তু নাদির সাহের নিকট, যখন মহম্মদ সাহ পরাজিত হইলেন, এবং মোগল সম্রাটগণের ক্ষমতা বিলুপ্ত হইল, তখন কোহিনুর আবার নাদীর সাহের আশ্রয় হইল। নাদীর সাহ এই রত্নটিকে কোহিনুর নাম দেন; কোহিনুর অর্থে—জ্যোতির

পর্কত। নাদীরের মৃত্যুর পর কোহিনুর কাবুল অধিপতি আমেদ খার হস্তগত হয়। যতদিন পর্যন্ত কাবুলের আমিরগণের ক্ষমতা প্রবল ছিল, কোহিনুর ততদিন তাঁহাদিগেরই হস্তে থাকে। পরে যখন সা সূজা রাজ্যভ্রষ্ট হইয়া, কাবুল পরিত্যাগ করিয়া, ভারতবর্ষে আসিলেন, তখন তাঁহার সহিত কোহিনুর আর একবার ভারতে ফিরিয়া আসিল। সা সূজা এক প্রকার বন্দীভাবে পাঞ্জাব-কেশরী রণজিৎ সিংহের গৃহে অবস্থিতি করিতে-ছিলেন। রণজিতের তখন প্রবল প্রতাপ। কোহিনুর নিঃশ্ব সা সূজার হস্তে আর কেমন করিয়া থাকিবে?—যিনি তখন মহা প্রতাপশালী, তাঁহারই আশ্রয় লইল—কোহিনুর রণজিৎ সিংহের হস্তগত হইল। রণজিৎ কোহিনুর পাইয়া, কাবুলপতি সা সূজাকে মুক্ত করিয়া দিলেন; এবং এই মহারত্ন লাভ উপলক্ষে রাজ্য মধ্যে এক মহোৎসব করিলেন। রণজিতের মৃত্যুর পর, তাঁহার উত্তরাধিকারিগণের হস্তে কোহিনুর থাকে। কিন্তু কোহিনুর চিরদিন কাহারও হস্তে থাকিবার নয়। ভারতে ইংরাজের প্রতাপ বিস্তারিত হইতে লাগিল; ভারত ইংরাজের পদানত হইল। ইংরাজের নিকট রণজিতের বংশধর পরাস্ত হইলেন; পাঞ্জাব হতবল হইল—অপ্রাপ্ত বয়স্ক দলীপ সিংহের অন্যান্য ধন সম্পত্তির সহিত কোহিনুর ও ইংরাজ গভর্নমেন্টের রক্ষণাবেক্ষণে অর্পিত হইল। কিন্তু যিনি যখন মহাপ্রতাপশালী, কোহিনুর তখন তাঁহারই। ইংরাজ এখন মহাপ্রতাপশালী, সূতরাং কোহিনুর আর কতদিন রণজিতের হতভাগ্য বংশধর দলীপের হস্তে থাকিবে? লর্ড ডালহৌসী কোহিনুর মহারাজীকে উপঢৌকন দিতে মনস্থ করিলেন। দুইজন ইংরেজ কর্মচারী এই মহারত্নের ভার লইয়া

ইংলণ্ডে যাত্রা করিলেন,—কোহিনুর ভারত পরিত্যাগ করিয়া গেল। ১৮৫০ সালের ৩রা জুন মহারাজীকে এই অতুজ্জ্বল মহারত্ন উপঢৌকন দেওয়া হয়। পূর্বে কোহিনুর দোপাতে একটি অর্ধ ডিম্ববৎ ছিল; এখন একটি আঢ়োটা গোলাপের ন্যায় হইয়াছে; এখনও ইহার ওজন চারি তোলা কম হইবে না। ভারত হতবল হইয়াছে; আজ ৩৭ বৎসর কোহিনুর ভারত পরিত্যাগ করিয়া গিয়াছে,—ভারত হতশ্রী হইয়াছে; আর কি কোহিনুর কখনও ভারতে ফিরিয়া আসিবে?


## ধাঁধা ।

গতবারের ধাঁধার উত্তর ।

১। বিছানা।

নূতন।

তিনবর্ণে নাম, চিরছুখী আমি  
বিদিত ভুবন মাঝে,  
শির না কাটিলে পারি না কখনো  
রত হ'তে কোন কাজে।  
পদশূন্য হয়ে আছি আমি সদা  
পৃথিবীর সর্বস্থানে,  
কটী মম আছে সলিল মাঝারে  
কান কি এহেন জনে?  
আছে মোর কত দুর্বল সন্তান  
অকৃতজ্ঞ নরাধম,  
মাঝখান রেখে করে চিরকাল  
শরীর ভক্ষণ মম।



সেপ্টেম্বর, ১৮৮৭।

## ফুলের সাজি ।

সপ্তম অধ্যায়।

রাজদণ্ড।

(১৬ পৃষ্ঠার পর)



গরবাসীগণ মনো-  
রমার অদৃষ্টে কখন  
কি হয় তাহারই জন্ত  
যেন উৎসুক হইয়া  
অপেক্ষা করিতে ছিল।

যাহারা তাহার মঙ্গলাকাজী বন্ধ তাহাদের হৃদয়ে এক বিষম শঙ্কা উপস্থিত হইল, পাছে মনোরমার প্রাণদণ্ডের আজ্ঞা হয়। কারণ সে সময়ে সামান্য চুবী অপরাধেও লোকের প্রাণদণ্ড হইবার নিয়ম ছিল। মনোরমা নিদোষী বলিয়া প্রমাণ হয় রাজার নিজেরও এই মনোগত অভিলাষ। সেই জন্ত তিনি বিচারের সমস্ত কাগজপত্র বিশেষ মনোযোগ সহকারে পর্যালোচনা করিতে লাগিলেন এবং বিচারকের সহিত নানাপ্রকার পরামর্শ করিলেন, কিন্তু কোন মতে মনোরমার নিদোষের প্রমাণের সুযোগ পাইলেন না। আর যে কেহ এ কার্য্য করিয়াছে তাহা বোধ হইল না।

রাজমহিষী, রাজকুমারী হেমলতা, মনোরমার প্রাণ রক্ষার জন্ত অশ্রুপূর্ণ নয়নে রাজ সমীপে আবেদন করিলেন। ওদিকে বৃদ্ধ দীননাথ কারাগারে বসিয়া ভগবানের নিকট ঐকান্তিক অন্তরে প্রার্থনা করিতে লাগিলেন যেন মনোরমার সাধুতার প্রমাণ হয়, “হা হরি! কি করিলে, কি কারণে বালিকাকে এ বিষম পরীক্ষা করিতেছ? হরি! তুমিত জান মনোরমার কোন দোষ নাই—দেখ যেন তাহার অকারণে প্রাণদণ্ড না হয়।” এক এক বার যখন দীননাথ মনোরমার প্রাণদণ্ডের কথা চিন্তা করে তখন তাহার ধমনী দিয়া রক্ত প্রবাহ বেগে ছুটিতে থাকে। আবার কতকক্ষণ পরে যখন মন স্থির হয় তখন ভাবে, না, না, পরম শ্রায়বান হরি কি এরূপ অকারণে বালিকার প্রাণদণ্ড করাইবেন। অবশ্য আমাদের বিশেষ কোন অপরাধ ছিল তাহার জন্য এই মনোকষ্ট ও যাতনা হেঁগ করিতেছি। কিন্তু কাহারও দ্রব্য গ্রহণ দূরে থাকুক আমরা কখন পরদ্রব্যে লোভ পর্যন্ত করি নাই। ভগবান তোমার মনে যাহা আছে তাহাই হউক।

মনোরমা সেই কারাগৃহে; সে কখন ক্রন্দন করিতেছে, কখন মূচ্ছিত হইয়া পড়িতেছে। কখন একটু শব্দ শুনিয়াই চমকিয় উঠিতেছে; মকল সময়েই মনে আশঙ্কা, এখনি প্রহরী আসিয়া আমায় বধ্যভূমিতে লইয়া যাইবে। নিজে এই

শোচনীয় দশায় পড়িয়া মনোরমা পিতার চিন্তায় সর্বদা আকুল। আমার প্রাণদণ্ড হইলে বৃদ্ধ পিতার কি দশা হইবে এই চিন্তায় সে অত্যন্ত অস্থির হইয়া পড়িয়াছিল।

এক দিন মায়া কোথায় যাইতে যাইতে সম্মুখে জল্লাদকে বধ্যভূমি পরিষ্কার করিতে দেখিতে পাইল। জল্লাদকে বধ্যভূমিতে দেখিয়া মায়ার মনে মনোরমা সংক্রান্ত আমূল বৃত্তান্ত উদয় হইল। তৎক্ষণাৎ যেন তাহার মনে শত বৃষ্টি এক কালে দংশন করিল—সে যে মিথ্যা সাক্ষ্য দিয়া মনোরমার মৃত্যু আনয়ন করিতেছে তাহা সে বেশ বুঝিল। এই চিন্তায় মায়ার মুখ স্নান ও হাস্য-বিহীন হইল—সে দিন সে আহার করিতে বসিল মাত্র, আহার করিতে পারিল না। রাজ অন্তঃপুরস্থ অল্প দাসদাসী মায়ার মনের এই পরিবর্তন বুঝিতে পারিল, কিন্তু ইহার কারণ জানিতে সমর্থ হইল না—অন্তর্যামী ভগবান ভিন্ন জীবের হৃদয়ের ভাব আর কে বুঝবে? সে রাত্রিতে মায়ার নিদ্রা হইল না, শয্যা যেন বিষ—একবার মাত্র একটু তন্দ্রা আসিল, তন্দ্রার সময়ে মায়া স্বপ্ন দেখিল মনোরমার রক্তাক্ত ছিন্ন মস্তক তাহার কাছে পড়িয়া রহিয়াছে, মনোরমার রক্তে আপনার হস্ত ভিজিয়া গিয়াছে। আতঙ্কে তাহার বুক কাঁপিয়া উঠিল, জাগিয়া দেখে ঘোর অন্ধকার। আর নিদ্রা হইল না। মায়ার এই ঘোর ভাবনা হইল বটে, কিন্তু তাহার এত সাহস হইল না যে বিচারকের কাছে আত্মদোষ বলিয়া ক্ষমা প্রার্থনা করে। সে অনেক কষ্টে মনকে একরূপ বুঝাইয়া রাখিল।

পরিশেষে বিচারপতি তাঁহার বিচারের মন্তব্য প্রকাশ করিলেন। তাঁহার মন্তব্যের মর্ম এই—যে মনোরমা ভিন্ন অন্য কেহ আংটা লইতে পারে না এটা প্রকৃত কথা। মনোরমা একে চৌর্য্য

দোষে দোষী, তাহাতে অপরাধ স্বীকার না করাতে সে যথার্থ প্রাণদণ্ডের যোগ্য। কিন্তু তাহার বয়স অতি কম এবং এতাবৎ কাল সকলেই তাহার চরিত্রের সূখ্যাতি করিত বলিয়া প্রাণ দণ্ড না হইয়া তাহাকে কারাগারে জন্মের মত আবদ্ধ করা হইবে। তাহার পিতা বৃদ্ধ দীননাথ এই চৌর্য্যকাণ্ডে লিপ্ত বলিয়া বোধ হওয়াতে তাহাকেও জন্মভূমি হইতে চিরদিনের মত বহিস্কৃত করিয়া দেওয়া হইবে এবং তাহার সমুদয় সম্পত্তি রাজভাণ্ডারসং হইবে। রাজা বিচারপতিকে বলিয়া দণ্ডাজ্ঞার এই পরিবর্তন করিলেন যে, মনোরমাও দীননাথের সহিত জন্মের মত নির্কাসিত হইবে। কিন্তু বিচার পতির অশ্রান্ত দণ্ডাজ্ঞা সমান রহিল।

আজ্ঞা প্রচারিত হইল যে, দুই দিনের শেষে যদি কেহ মনোরমা ও তাহার পিতাকে প্রসাদপুরের মধ্যে দেখিতে পায় তাহা হইলে তাহাদের উভয়ের প্রাণ দণ্ড হইবে।

নগরময় দণ্ডাজ্ঞা প্রচারিত হইল। পরদিন যখন প্রভাতে মনোরমা ও তাহার পশ্চাতে তাহার হস্ত ধরিয়া বৃদ্ধ দীননাথ নগর হইতে বাহির হইল তখন তাহাদের পূর্ব পরিচিত অনেক লোক তাহাদিগকে দেখিতে আসিল, অনেকে তাহাদের ছুঃখের দশা দেখিয়া কাঁদিতে লাগিল, অনেকে মনোরমার প্রাণ রক্ষা হইয়াছে বলিয়া আশ্লাদ প্রকাশ করিল। দীননাথ ও মনোরমা সকলের সহিত যথাযোগ্য কথাবার্তা প্রণামাদি করিয়া বিদায় গ্রহণ করিল। তাহারা অল্পদূর না যাইতে যাইতে মায়া তাহাদের কাছে আসিয়া উপস্থিত হইল। মনোরমার নির্কাসনের কথা শুনিয়া মায়ার পূর্বের অহুতাপ সম্পূর্ণ দূর হইয়া আবার তাহার মনোরমার প্রতি পূর্বের মত ভাব

হইয়াছিল। স্মরণ্য মনোরমার নির্কাসন তাহার আশ্লাদেরই বিষয় হইল। রাজকন্ঠার ভালবাসা ও অনুগ্রহ পাত্রী আপনি হইব এই তাহার ইচ্ছা। মনোরমা সে স্থান লইতেছিল বলিয়া তাহার প্রতি তাহার ঈর্ষা জন্মিয়াছিল। আর মনোরমা তাহার কণ্টক হইতে পারিবে না এই তাহার মহা আনন্দ। বাস্তবিক সে মনোরমাকে যে নষ্ট করিতেই চাহে তাহা নহে।

রাজকুমারী হেমলতা যখন মনোরমার বিচার হইতেছিল তখন এক দিন মায়াকে মনোরমাদত্ত সাজিটা তাঁহার ঘর হইতে অগ্ৰজ লইয়া যাইতে কহিয়াছিলেন। ঐ সাজি দেখিলেই হেমলতার মনোরমার কথা মনে হইয়া অন্তরে বড় ক্রেশ হইত বলিয়া ঐরূপ আজ্ঞা দিয়াছিলেন। মায়া মনে করিল রাজকুমারী মনোরমা দত্ত সাজি গ্রহণ করিবেন না।

পূর্বেরই বলা হইয়াছে যে, যখন মনোরমা ও তাহার পিতা নগর হইতে বাহির হইতেছিল তখন মায়া তাহাদের কাছে উপস্থিত হইল। তাহার হাতে সেই সাজি, মায়া বলিল, “মনোরমা এই সেই তোমার সাজি, রাজকুমারী চোরের উপহার লন না” এই বলিয়া মায়া সাজি মনোরমার চরণ তলে ফেলিয়া ঘৃণা প্রকাশ পূর্বক হাসি হাসিয়া চলিয়া গেল।

মনোরমা কাঁদিতে কাঁদিতে সাজি লইয়া অনেকক্ষণ চাহিয়া রহিল। মনে করিল সাজি, তোমারই জন্য আমাদের এই দশা! সত্যইত রাজকুমারী গরিবের দত্ত সাজি লইবেন কেন?

দীননাথের হাতের লাঠিগাছটি ও রাজ পুরুষেরা লইয়াছেন এই সাজিটা মাত্র তাহাদের পার্থিব সম্বল।

যতক্ষণ দেখা যায় মনোরমা চলিতে চলিতে প্রসাদপুরের দিকে চাহিতে লাগিল—হায় এত সাধের বাড়ী, এত যত্নের বাগান আজ কোথায় রহিল। ক্রমে ক্রমে প্রসাদপুর তাহাদের দৃষ্টির

বর্জিত হইল। এবং একটা অরণ্যের মধ্যে প্রবেশ করিল। বৃদ্ধ দীননাথ আর চলিতে পারিল না, শোকে ও পরিশ্রমে তাহার চলিবার শক্তি রোধ হইল। মনোরমা পিতাকে ধরিয়া একটা প্রাচীন বট বৃক্ষের স্নানিতল ছায়ায় বসাইল।

দীননাথ বৃক্ষের ছায়ায় বসিয়া কতক শাস্ত হইয়া কষ্টকে কহিল, মনোরমে এস সর্বাগ্রে আমরা ভগবানের চরণ বন্দনা করি। তিনি রূপা করিয়া আজ আমাদের প্রাণ রক্ষা করিলেন, ধন্য তাঁহার রূপা! বৃদ্ধ হাত বোড় করিয়া আনন্দ অশ্রু ফেলিতে ফেলিতে কহিল, “হরি! তুমি বৃদ্ধের একমাত্র সম্বল, তোমার রূপায় আবার আমরা স্বাধীন ভাবে নিশ্বাস প্রশ্বাস ফেলিয়া বাঁচি শম, তোমার রূপাবলে আজ আবার মনোরমাকে লাভ করিয়াছি।”

“হরি! তুমি চরনের বল, অসহায়ের সহায়, ভগবান! যাচার ছুঃখে পড়িয়া তোমার ডাকে, তুমি তাহাদের ছুঃখে মোচন কর, তুমি অভয়দাতা পিতা, তুমিই স্নেহময়ী মাতা, তুমিই বিপদের কাণ্ডারী, যখন বিপদে পড়িয়া আমরা তোমার মা, মা, বলিয়া ডাকি, তখন তুমি হৃদয়ে সাহসনা প্রদান কর। মা, আমরা নিরাশ্রয় সম্বলহীন, তুমি মাত্র আমাদের ভরসা। আজ তুমি আমাদের জন্ত কোন উপায় বিধান কর। তুমি সহায় হইয়া আমাদের দেশান্তরে লইয়া যাও” বলিতে বলিতে দীননাথের শ্বেতশ্রু বহিয়া অধিরস ধারে চক্ষের জল পতিত হইতে লাগিল। গণ্ডস্থল দিয়া আনন্দ ধারা ও প্রেম ধারা বহিয়া মনোরমার বক্ষস্থল ভাসিয়া গেল। আজ পিতা ও কন্ঠার হৃদয়ে একই ভাবের—একই ভক্তির, একই প্রেমের উচ্ছ্বাস উঠিয়াছে। ধরা-তলে ইহাই স্বর্গ শোভা।

## প্রতিশোধ ।

(গল্প ।)

**পাঁচদিন** ছিল যখন এদেশে কেহ মদ খাইত না। প্রাচীনকালে সুরাপান মহা পাপ বলিয়া গণ্য হইত। কিন্তু এখন আর সে দিন নাই। ইংরেজ বাহাদুরের রূপায় মদ খাওয়াটা আজকাল জল খাওয়ার মত হইয়া উঠিয়াছে। এই দুর্গোৎসব আসিতেছে এখন কত অর্থ এই মহা অনর্থের জন্ত নষ্ট হইবে কে জানে? পূজার মধ্যে মদ একটা অতি আবশ্যকীয় জিনিষ হইয়া দাঁড়াইয়াছে। সব না হইলে চলে কিন্তু মদ না হইলে চলে না। হয়ত ছেলে মেয়েরা পরিবার কাপড় পায় না, ডাক্তার ও ঔষধ বিনা রোগের যন্ত্রণায় ছটফট করিতেছে কিন্তু কর্তার মদ না খাইলেই নয়। আমরা এমন কথাও শুনিয়াছি যে, ঘরের গহনা বিক্রী করিয়াও মাতালের উদর পূর্ণ হইয়া থাকে।

বাড়ীর কর্তারাই যে কেবল এই বিষ পান করেন তাহা নহে। তাহাদের দৃষ্টান্তে অল্পবয়স্ক বালকদিগের মধ্যেও এপ্রথা চলিত হইয়াছে। কয়েক বৎসর হইতে মদের এমনই প্রাচুর্য্য বাড়াইয়াছে যে, ইহার বিরুদ্ধে কোন কথা বলিলে হাস্যাপদ হইতে হয়। মদ খাওয়াটা “ক্যাসন” হইয়া উঠিয়াছে। মদ না খাইলে ভদ্রলোকের সভায় যাওয়াই মুক্তি। দেপাদেখি ছেলে বাবুরাও এখন ছোট খাট রকমের “মদের বৈঠক” করেন। কলিকাতায় দুটি ছোকরা বাবু নাকি পুলিশের হাতে ধরা পড়িয়াছিলেন। আমরা জান মফস্বলের জেলায় এবং গ্রামেও এরূপ অনেক স্কুলের

ছেলে আছেন। আমরা আশা করি আমাদের “সখা”র পাঠকপাঠিকারা কখনও এরূপ দোষে লিপ্ত হইবেন না; কিন্তু পাছে হতভাগ্য লোকদিগের সংসর্গে মিশিয়া কেহ কোন দিন এই নীতি-বাক্যটা ভুলিয়া যান এই ভয়ে আমরা একটা গল্প বলিতেছি।

আরম্ভ।

প্রায় পোনের বছরের কথা; তখন কলিকাতায় স্কুল কলেজের বাজার এত সস্তা ছিল না। গভর্ণমেন্ট এবং মিশনারি সাহেবেরা দু'একটা স্কুল কলেজ করিয়াছিলেন। লোকেও তখন বড় ইংরেজী শিখিতে চাহিত না। বাহারা একটু বেশী সাংসারিক, টাকাকড়ির প্রতি একটু বেশী মনোযোগী তাহারা টাকার লোভে, কেহ কেহ বা বিদ্যার লোভেও ছেলেদিগকে ইংরেজী পড়াইতেন। কিন্তু একটা কথা, তাহার মধ্যে অনেকেই ইংরেজী শিক্ষার সঙ্গে সঙ্গে মদ এবং মুরগী খাওয়াটা বিশেষ রূপে শিক্ষা করিতেন। এই সময়ে কলিকাতার কোন স্কুলের তৃতীয় শ্রেণীতে দুইটা বন্ধু পড়িতেন। একটার নাম শ্রামলাল এবং অপরটার নাম কানাই। ইহাদের দুজনারই অবস্থা বেশ ভাল। শ্রামলালের বাবা এবং কানাইর দাদা দুজনেই সাহেব সওদাগরদের হাউসের বড় চাকরে ছিলেন। কর্তাদের মধ্যেও যেমন সন্তাব ছিল ছেলেদের মধ্যেও তেমনি ভাবু ছিল। কর্তারা এক বৈঠকের লোক ছিলেন; একসঙ্গে মদ মাংসটা চলিত। অনেক টাকা পাইতেন বটে, কিন্তু অপরিসীম ব্যয়ের জন্ত কিছুই বাঁচাইতে পারিতেন না। প্রায় প্রত্যেক দিন সন্ধ্যার পরই মজলিস হইত; কিন্তু শনিবার রাত্রিতেই আড্ডাটা ভালরূপে জম্কাইত। এইরূপ দৃষ্টান্ত দেখিয়া শ্রামলাল ও কানাই যে শিক্ষা পাইয়া-

ছেন তাহা সহজেই বুঝা যায়। তাহারাও কর্তাদের মত আপনাদের বন্ধু বান্ধব লইয়া শনিবার দিন সন্ধ্যার পর ছোটখাট মজলিস করিতেন। তাহাতে মদ খাওয়া এবং অশ্লীল সংগীত প্রভৃতির আলোচনা হইত।

কয়েকদিন হইল শ্রামলালের বিবাহ হইয়াছে। তাহার বন্ধুরা তাহাকে এক দিন একটা ভোজ দিতে অনুরোধ করিয়াছেন। শ্রামলালেরও অসম্মতি নাই; ক্লাসের ছেলেদিগকে নিমন্ত্রণ করা হইয়াছে। প্রায় সকলেই আসিয়াছেন। আজ কানাই বাবুই এ সভায় সভাপতি। তাহার বন্ধুর বিবাহের নিমন্ত্রণ; তিনিই সকল যোগাড় করিতেছেন। অবশ্য এ মহাব্যাপারে মদের ও ক্রটি হয় নাই। সে যাহা হউক কানাইর আর একটা গুচ্ছ উদ্দেশ্য ছিল। তাহাদের ক্লাসে একটা হতভাগা ছেলে ছিল সে মদ খাইত না; তাহাকে আজ দলে ভর্তি করিতে হইবে। সে গরিবের ছেলে; পড়াশুনা ভাল করিত এজন্ত একটা সদাশয় লোক তাহাকে স্কুলের মাইনা, বইর দাম এবং সময়ে সময়ে আশ্রয় সাহায্যও করিতেন। ছেলেটির নাম সুরেশ; বয়স ১৪ বৎসর। এখানে একটা কথা বলিয়া রাখা আবশ্যিক যে কানাই এবং শ্রামলালই ক্লাসের মধ্যে বড়লোকের ছেলে ছিল এবং গায়ে ও খুব বল ছিল সুরেশ; সকলেই তাহাদিগকে ভয় করিত। তাহারাই ক্লাসের সরদার ছিল। কিন্তু অনেক চেষ্টা করিয়াও তাহারা সুরেশকে মদ খাওয়াইতে পারে নাই। তাহারা সুরেশকে, পড়ার খরচ দিবে, স্কুলের মাইনা দিবে, রোজ গাড়ীতে করে বেড়াতে নিয়ে যাবে এবং আরও কত প্রলোভন দেখাইয়াছে তবুও সুরেশ তাহাদের কথায় স্বীকৃত হয় নাই। অনেকে হয়ত মনে করিবে “এটা সুরেশের ভারী

অশ্রয়; বাহারা তাহার জন্ত এত করিতে প্রস্তুত সে তাহাদের কথা শুনিব না।” কিন্তু সুরেশ, তাহা বুঝিত না। সে অশ্রুপূর্ণ বুঝিত। সে ভাবিত “যিনি অশ্রুগ্রহ করিয়া আমাকে পড়াইতেছেন তাহার মনে কত কষ্ট হইবে, দুঃখিনী মার দুঃখ আরও বৃদ্ধি পাইবে এবং মার নিকট শুনিয়াছি মদ খাওয়া যে মহা পাপ তাহা হইতে কেমনে উদ্ধার পাইব?”

আজ সন্ধ্যা প্রথমেই কানাই বাবু ছোট একটা গ্লাস এবং সুন্দর একটা বোতল বাহির করিলেন; এক গ্লাস লাল টকটকে মদ ঢালিয়া সুরেশকে বলিলেন “ভাই সুরেশ, অনেক দিন তোমাকে অনুরোধ করিয়াছি তুমি শুন নাই, কিন্তু আজ এ অনন্দের দিনে আর তেমনটা করো না।”

সুরেশ। “তোমরা ত জান, আমি মদ খাই না, আমি মার নিকট প্রতিজ্ঞা করিয়াছি কখনও মদ স্পর্শ করিব না। আমার বাবা এই মদের জন্ত অকালে মরিয়াছেন, এই মদের জন্তই আমরা এত দুঃখী; আমি কখনও মদ খাইব না।”

এইরূপ কথা হইতে হইতে কানাই বাবু এবং তাঁহার বন্ধুরা কিছু কিছু উদরস্থ করিলেন। সকলেই সুরেশকে অনুরোধ করিতে লাগিল। কেহ বলিল “তোমার মা ত ইহা জানিবেন না।” কেহ বলিল, “এক গ্লাস খাইলে আর মাতাল হইবে না, মরিয়াও যাইবে না।” আর কেহ বা বলিল “গ্লাসটা নিয়া একটু মুখ দিয়ে দাওনা, তা হইলেই ত সকল গোল চুকে যায়।” কিন্তু সুরেশ তাহা বুঝিল না, সে বুঝিল “এক পাপের জন্ত কেন আর এক পাপ করিব? মদ খাইবার জন্ত কেন প্রতারণা করিব?”

অবশেষে কানাই গ্লাসটা হাতে করিয়া সুরেশের নিকট গিয়া বসিলেন, প্রথমে হাত ধরে

সাধিল, সুরেশ গুনিল না, গলা ধরে আদর করে কত বলিল কিছুতেই রাজি হইল না। তখন কানাইর রাগ হইল; দাঁড়াইয়া চক্ষু রক্ত বর্ণ করিয়া ক্রোধে অধীর হইয়া বলিলেন।

“সুরেশ, এখনও বলিতেছি, কথা শুন; না হইলে ভাল হইবে না।”

সুরেশ তেমনি স্থিরভাবে বলিল “আমি কখনও মদ স্পর্শ করিব না।”

“তবে দেখ” বলিয়া কানাই বাঁ হাতে সুরেশকে চেপে ধরিয়া ডান হাতে মদের গ্যাস লইয়া ঔষধের মত সুরেশের মুখে ঢালিতে গেল; কিন্তু সুরেশ মুখ খুলিল না। অনেক চেষ্টায়ও কানাইর উদ্দেশ্য সফল হইল না। তখন মাতাল কানাই রাগে অন্ধ; পশুর ন্যায় জ্ঞান শূন্য; কিছু দূরে গিয়া সুরেশের দিকে কটমট করিয়া চাহিয়া রহিল এবং হঠাৎ মদপূর্ণ গ্যাস তাহার দিকে ছুড়িয়া ফেলিল। গ্যাস সুরেশের কপালে লাগিয়া খণ্ড খণ্ড হইয়া গেল; সুরেশ অচেতন হইয়া পড়িল; কপাল হইতে শতধারে রক্ত বাহির হইতে লাগিল।

তখন সকলেই অবাক। অনেকে ভয়ে প্রস্থান করিল। কানাই বাবু বড় গ্রাহ্য করিলেন না। আর ২৩ জন জল ঢালিতে লাগিল এবং বাতাস করিতে লাগিল, কিন্তু কিছুই হইল না। অবশেষে নিকটস্থ কোন ডাক্তার ডাকিতে হইল; ডাক্তার বাবুর নিকট কিছুই গোপন রহিল না, তিনি সুরেশকে সূস্থ করিয়া নিজের গাড়ীদ্বারা তাহার বাড়ী পৌছাইয়া দিলেন। সেদিন সুরেশের মা কি কষ্ট পাইয়াছিলেন তাহা অনায়াসেই বুঝা যায়; কিন্তু ঈশ্বরের রূপায় সুরেশ শীঘ্রই আরোগ্য লাভ করিল। এই অপরাধে স্কুল হইতে কানাই এবং শ্রামলালের নাম কাটা গেল; তাহারা

চিরদিনের জন্ত স্কুলের নিকট বিদায় গ্রহণ করিল।

শেষ।

উপরোক্ত ঘটনার বার বৎসর পরে রাত্রি ৮টার সময় দুইটা যুবক লাগবাজারের রাস্তার ফুটপথে দাঁড়াইয়া কথা বলিতেছে। সে দিন মাসের ৩রা তারিখ। তাহারা সেই দিন গত মাসের মাইনা পাইয়াছে এবং সেই টাকার সংব্যবহারের বিষয়ই চিন্তা হইতেছে। অনেক ক্ষণ পর পরামর্শ স্থির হইল, দুইজন নিকটস্থ গুড়ির দোকানে প্রবেশ করিল।

মদের সঙ্গে আরও দোষ আছে। তখন বড় জুয়াখেলা এবং নক্স খেলার চলন ছিল; বাহাদের এই ব্যবসা, তাহারা মদের দোকানেই কিছু সুবিধা পাইত। বাবুদের আজ ট্যাকে টাকা; খেলার দিকে মনটা সহজেই ঝুকিল। টাকার উপর টাকা বাইতেছে, দৃষ্টি নাই, “এইবারে বৃষ্টি জিতিব” ভাবিয়া ক্রমেই বেশী টাকার বাজী ধরিলেন, কিন্তু সে আশা আর পূর্ণ হইল না। একজন সন্দেহান্ত হইল;—হাতের আংটা পর্য্যন্ত গেল। আর এক জন প্রায় অর্ধেক টাকা খোয়াইল। তখন অনেক রাত্রি; দোকানদার পাহারাওয়ালার ভয়ে আন্তে আন্তে দোকান হইতে বাবু দুটিকে বাহিরে ছাড়িয়া দিল। দুজনে চুলিতে চুলিতে আসিয়া রাস্তায় একটা গ্যাসের নিকট দাঁড়াইল; একজন বলিল,

“ভাই আজ তোমার বড়ই দুর্ভাগ্য; সকল বারেই তোমার হার হইল। তা কি করিব? চিরদিন ত আর সমান যায় না; আমাদেরও একদিন আসিবে; তখন ইহার শোধ উঠাইব। কাল অবশ্য তুমি আফিসে যাইবে? রাত্রি প্রায় ১টা বাজে এখন আসি—”

এই বলিয়া শ্রামলাল বাড়ীর দিকে ফিরিল। কানাই সেইখানেই কিছু ক্ষণ স্থিরভাবে দাঁড়াইয়া রহিল তার পরে গঙ্গার পোলের দিকে চলিল। পাঠক পাঠিকা! এখন বুঝিয়াছ যে ইহার আমাদের পূর্ব পরিচিত শ্রামলাল ও কানাই। শ্রামলালের পিতার মৃত্যু হইয়াছে; তাহাদের অবস্থা এখন বড় খারাপ। কানাইরও সেইরূপ; তাহার দাদা কোন অপরাধ করার জন্ত মেয়াদে গিয়াছেন। পূর্বে কর্তারা কেহই টাকা কড়ি সঞ্চয় করিয়া যান নাই সুতরাং কানাই ও শ্রামলাল অতিশয় দুঃস্থায় পড়িয়াছে। স্কুল ছাড়িয়া হাউসে কেরাণী গিরি চাকরী লইয়াছে। কিন্তু যেরূপ স্বভাব তাহাতে তাহাদের উন্নতি হওয়া অসম্ভব। বাহাদের জন্যে উন্নতি হইবে তাহারা এখন নাই। কাজে কাজেই তাহারা অতি সামান্য বেতনে চাকরী করিত। শ্রামলালের বিধবা মাতা, স্ত্রী ও ছেলে মেয়ে এবং অল্প দুই একটা অনাথাও তাহার স্কন্ধে পড়িয়াছে। কানাইর পরিবার আরও বৃহৎ; নিজেদের বাড়ী ভাড়া দিয়া হাবড়ায় একটা সামান্য বাড়ী ভাড়া করিয়াছে; বৃদ্ধা মাতা, দাদার স্ত্রী ও ছেলে মেয়ে-দিগের ভরণ পোষণের ভার তাহার উপর; নিজেও বিবাহ করিয়াছে এবং দুইটা ছেলে হইয়াছে। এই বৃহৎ পরিবার তাহার দিকে চাহিয়া আছে। আজ মাইনা পাইবার দিন, এতরাত্রি এখনও কানাই বাড়ী ফিরিল না; মা পথের দিকে চাহিয়া আছেন; ছেলেরা “বাবা” “বাবা” করিতে করিতে ঘুমাইয়া পড়িয়াছে; স্ত্রী বৃষ্টিতে পারিয়াছেন ‘কি কাণ্ড হইয়াছে’; এবং তখনও বসিয়া কাঁদিতেছেন।

এদিকে কানাই কি ভাবিতে ভাবিতে গঙ্গার ধারে আসিল, তখন লোক জন নাই, আলো

গুলি গঙ্গার জলে পড়িয়াছে। কানাই পোলের উপর দাঁড়াইয়া দেখিতেছে গঙ্গার জল কেমনে যাইতেছে। শীতল বাতাসে মদের নেশা কমিতেছে—ক্রমে কানাইর বাড়ীর কথা মনে পড়িল। না, স্ত্রী, ছেলে মেয়ে সকলের কথা মনে পড়িল—মনে হইল; ‘আজ মাইনা পেয়েছি’ টাকা না হইলে কাল খাওয়া যাবে না; পকেটে হাত দিল টাকা নাই। হাতের দিকে দৃষ্টি পড়িল আংটা নাই তখন সকল কথা মনে হইল—মদ খাওয়া এবং জুয়াখেলার ফল কি হইয়াছে বুঝিতে পারিয়া কানাই মাথায় হাত দিয়া বসিল। এই একমাস কেমনে চলিবে?—কিছুই উপায় নাই—চারিদিক অন্ধকার—কানাইর মাথা ঘুরিয়া গেল। নীচের দিকে চাহিয়া দেখিল গঙ্গার জল—বোধ হইল বড়ই শীতল। কানাইর মনে হইল “এই জলে ডুবিয়া সকল ভাবনা ভুলি না কেন?” তখন বাড়ীর দিকে একবার চাহিল—চোখ দিয়া জল পড়িতে লাগিল, জীবনের সকল পাপ ও দুঃস্থরে কথা মনে হইল। কানাই ভাবিল “আজ তাহার প্রায়শ্চিত্ত করিব। বাহারা রহিল ঈশ্বর তাহাদের উপায় করিবেন।” অনেক দিন পরে কানাইর মনে হইল ঈশ্বর বলিয়া কেহ আছেন। বিপদে না পড়িলে অনেকেই সে কথা ভুলিয়া যায়।

কানাই তখন উঠিয়া পোলের শেষ প্রান্তে গিয়া দাঁড়াইল; একবার আকাশের দিকে চাহিল—দেখিল, গঙ্গীর নিস্তর নীলবর্ণের আকাশে নক্ষত্র ভিন্ন কিছুই নাই। গঙ্গার জলের দিকে চাহিল তাহার মধ্যে দেখিল আলো। বাড়ীর দিকে আর একবার চাহিল; গঙ্গার জলে ডুবিয়া চিরদিনের জন্ত নিশ্চিত হইবে ঠিক করিল। পাছে সাতরাইয়া তীরে উঠিতে ইচ্ছা হয় এই ভয়ে

আবশ্যক হইবে না, তারের পরিবর্তে আলোকউর্শ্ব শব্দ বহন করিবে।

আর একটা উদাহরণ দিয়া আমরা এই নিরস প্রবন্ধ শেষ করিব। বর্ণভেদ আলোকবাহী ঈথারউর্শ্বের আয়তন ভেদ মাত্র। নয়নের ছায়াপটে বিভিন্ন আয়তনের উর্শ্ব প্রতিফলিত হইলে আমরা বিভিন্ন বর্ণ দর্শন করি। বৃহদায়তন উর্শ্ব লোহিত, ক্ষুদ্র নীল-লোহিত এবং মধ্যকার নীল ও শ্রামল ইত্যাদি বর্ণ উৎপাদন করে। এই সূত্রই উক্ত খেত আলোক বিশ্লেষণে অনেক পরিমাণে প্রমাণিত হইয়াছে। আকাশের বর্ণ নীলাভ সূতরাং বৃহদায়তন আলোক উর্শ্বের অভাব বলিয়া বোধ হয়। আকাশ নীল বলিদেই মনে সন্দেহ উদয় হয় যে, “ঘন বায়ুস্তর নীল বলিয়া কি আকাশ নীল দেখা যায় না?” কিন্তু বায়ুর বর্ণ নীল হইলে, সূর্যাকিরণ উদয় ও অস্ত কালে পীত, স্বর্ণ ও লোহিত বর্ণ দেখাইত না। পণ্ডিতগণ স্থির করিয়াছেন যে বায়ুর বর্ণ নীল নহে, পশ্চাৎ-নিক্ষিপ্ত (reflected) আলোক নীল, তাহার উদাহরণ জলের উপরে সাবান বা তৈলের ফেণা। বুদ্ধদের উপর পতিত আলোক নীল, কিন্তু বুদ্ধ ভেদ করিয়া যে আলোক আসে তাহার কোন ব্যতিক্রম দেখা যায় না। এই সমস্ত ব্যাপার দর্শনে পণ্ডিতগণ স্থির করিয়াছেন যে অতি সূক্ষ্ম পরমাণুনিচয় সর্বক্ষণ শূন্যে ভাসমান রহিয়াছে। এই মতের অনুসরণ করিয়া পণ্ডিত সার জন হার্সেল এক মহাবিস্ময়কর সিদ্ধান্তে উপনীত হইয়াছেন। তিনি বলেন যে, যে ধূমকেতু আপনার পুচ্ছ দ্বারা আমাদের পৃথিবীর মত শত শত পৃথিবী আচ্ছাদন করিতে পারে, তাহার পুচ্ছের বিক্ষিপ্ত জ্যোতির্শ্ব পরমাণুচয় যদি কাঁট দিয়া জড় করা যায় তাহা হইলে তাহার সমষ্টি এক গাড়ীর অধিক হইবে না। তাহার একটা পরমাণুর আকার কত ছোট তাহা হৃদয়ে ধারণা করা যায় না।

শ্রীউপেন্দ্রচন্দ্র মুখোপাধ্যায়।

## প্রতিভার।

—00—

নদেরচাঁদ পাঁচ বৎসরে পদবিক্ষেপ করিলে, শুভদিনে শুভক্ষণে হাতে খড়ি পড়িল। ভক্ত প্রহ্লাদের মত নদেরচাঁদ “ক” দেখিয়াই কাঁদিয়া আকুল। কিন্তু কৃষ্ণনাম মনে হইয়াছিল কিনা, ইতিহাসে তা লেখে না। তবে লোকে বলে পরিণত বয়সে সে যে কাগজ বাহির করিয়াছিল, তাহারই আদি অক্ষর “ক” যে ঐরূপ বিদ্রাট ঘটয়াছিল। “বিজ্ঞানবিৎ পণ্ডিতগণ” নাকি বলেন, তাড়িত-শক্তিপ্রভাবে পরিণামদর্শনজনিত স্নায়বীর ক্ষুরণে এইরূপ রোদন সম্ভব।

বছর কয়েক বাঙ্গলা পড়িতে পড়িতে দেখা গেল, নদেরচাঁদ রচনায় অদ্ভুত ক্ষমতাশালী। পণ্ডিত মহাশয় একদিন “বিদ্যালয়-বর্ণন” লিখিতে দিলে নদেরচাঁদ সেই রচনার এক স্থানে লিখিয়াছিল, “নারায়ণের হস্তে যেমন সূদর্শন, ব্রহ্মার হস্তে যেমন কমণ্ডলু, মহাদেবের হস্তে যেমন ত্রিশূল, ইন্দের হস্তে যেমন বজ্র, ভীমের হস্তে যেমন গদা, বানরের হস্তে যেমন খোস্তা, পণ্ডিত মহাশয়ের হস্তে তেমনই বেত”; এই প্রবন্ধ-পাঠের পর পণ্ডিত মহাশয় নদেরচাঁদের Theoretical বেত-বর্ণন তাহার পৃষ্ঠে কিছু অধিক মাত্রায় Practical এ পরিণত করিলে নদেরচাঁদ বাঙ্গলা স্কুল ত্যাগ করিয়াছিল।

বয়সের পরিমাণ কিছু অধিক হইলেও নদেরচাঁদ ইংরাজি স্কুলে ভর্তি হইল। “খুদে পিপড়ের” দলে “ডেঙ্গে পিপড়ের” মত নদেরচাঁদ ছোট ছোট ছেলেদের সঙ্গে A. B. C. আরম্ভ করিল। A. B. C. পড়িতে পড়িতে মাষ্টার মহাশয়ের দিকে বই আড়াল দিয়া সে নানারূপ মুখভঙ্গি করিত এবং A. B. C. র সহিত মিল করিয়া অনেক প্রকার ছড়া আওড়াইত। শুনিয়া নিরীহ ছেলের দল হাসিয়া বাঁচিত না। নদেরচাঁদ যে রসিকতায় পরিণত বয়সে সুপরিচিত হইয়াছিল, এই হইতেই তাহার সূত্রপাত। ফাষ্ট বুক আরম্ভ করিয়াই P. u. t. put পুট হয়, আর B. u. t. but বাট, এরূপ অযথা বিভিন্নতা কেন হয়, বলিয়া, মাষ্টারের সহিত সে মহাতর্ক বাধাইয়াছিল। সেই অদ্ভুত তর্কে তাহার স্ত্রায়-শাস্ত্রোপযোগী বুদ্ধির অঙ্কুর দেখা দিয়াছিল, সেই অঙ্কুরের ফলে, না পড়িয়াও





ইহাকে বড় কেহ আদর করিত না, জন নিজেই ইচ্ছা করিয়া ইহার শিক্ষার ভার লইলেন। তিনি বহুদিন পর্যন্ত ভাবিয়া ভাবিয়া, অনেক কৌশল করিয়া, এই বালকটিকে এক জোড়া জুতা তৈয়ার করিয়া দিলেন; বিকলাঙ্গ বালক সেই জুতা ব্যবহার করিয়া অল্প দিনের মধ্যেই স্বাভাবিক অবস্থা প্রাপ্ত হইল। জন পাউণ্ড্‌স্‌ তখন তাহার বিদ্যা শিক্ষার দিকে মন দিলেন। তিনি দেখিলেন যে, আরও ছুই একটি সঙ্গী হইলে, বালকের শিক্ষার বিশেষ সুবিধা হয়। একদিন জন দেখিলেন একটা অনাথ বালক, কোনও স্থানে আশ্রয় না পাইয়া একটা বাড়ীর ধারে পড়িয়া রহিয়াছে। এই নিরাশ্রয় বালককে দেখিয়া, পরহৃৎ-কাতর সদাশয় জন পাউণ্ড্‌সের হৃদয় ব্যথিত হইল; তিনি এই বালককে নিজগৃহে লইয়া গেলেন। এবং নিজ ভ্রাতৃপুত্রের সঙ্গে ইহাকেও শিক্ষা দিতে লাগিলেন। র্যাগেড্‌ স্কুলের এই প্রথম স্থচনা হইল। ক্রমে ছাত্রসংখ্যা বাড়িতে লাগিল; যে সকল অনাথ বালক বালিকা, আশ্রয়শূন্য সহায়-শূন্য হইয়া রাজপথে ঘুরিয়া বেড়াইত, সদাশয় জন পাউণ্ড্‌স্‌ তাহাদিগকে নিজগৃহে আশ্রয় দিয়া

অতি যত্নের সহিত শিক্ষা দিতে লাগিলেন। জন এই অনাথ বালক বালিকাদিগকে যে কেবল শিক্ষা দিতেন, তাহা নহে; নিজের সামান্য গৃহে আশ্রয় দিয়া, ইহাদিগকে অল্প বস্ত্র এসমস্তই তিনি দিতেন। ইহাদিগের ধন আছে, সম্পত্তি আছে, হৃৎখীর হৃৎখ দূর করিবার ইহাদিগের শক্তি আছে, নিরাশ্রয়কে আশ্রয় দিবার ইহাদিগের ক্ষমতা আছে, তাহারা হয়ত এই হতভাগ্যদিগের কথা ভাবিয়াও দেখেন না। কত শত অনাথ—কত শত নিঃসহায়, হৃৎখী বালক বালিকা, একটু আশ্রয়ের জন্ত, এক মুঠা অন্নের জন্ত রাজপথে কাঁদিয়া কাঁদিয়া বেড়ায়, আমরা হয়ত তাহাদিগের দিকে একবার ফিরিয়াও চাহি না। কিন্তু নিঃসহায় দরিদ্র চন্দ্রকার জন পাউণ্ড্‌স্‌, জুতা মেরামত করিয়া যে সামান্য অর্থ উপার্জন করিতেন, সেই সামান্য অর্থ দ্বারা, কত ক্ষুধিতকে অল্প—কত হৃৎখী অনাথকে আশ্রয় দিয়াছেন, ভাবিলে অবাক হইতে হয়। তিনি কাহারও নিকট কখনও কোন সাহায্য পান নাই; নিজের সামান্য আয়ই তাহার একমাত্র মন্বন ছিল। তিনি চির জীবন অবিবাহিত ছিলেন; এই দীন হৃৎখী অনাথ

বালক বালিকারাই তাহার পুত্র কন্যা ছিল, ইহাদিগকে লইয়াই তাহার সংসার। নিজের সুখের দিকে তাহার দৃষ্টি ছিল না। এই হৃৎখী অনাথ দিগকে নিজ গৃহে আশ্রয় দিয়া, তিনি যে সুখ অনুভব করিতেন, অন্য সুখ তাহার তুলনায় অতি তুচ্ছ।

জন পাউণ্ড্‌সের জুতা মেরামতের যে সামান্য দোকান খানি ছিল, সেইখানেই এই বালক বালিকাদিগকে তিনি শিক্ষা দিতেন, আর স্বতন্ত্র গৃহ ছিল না। এই গৃহটাও বড় ছিল না; বারো হাত দীর্ঘ এবং চারি হাত প্রস্থে একটি মাত্র ঘর। জুতা মেরামত করিতে যে সমস্ত যন্ত্র প্রয়োজন, সেই সমস্ত যন্ত্র লইয়া, সদাশয় জন এই গৃহের মধ্যস্থলে একখানি টুলের উপর বসিতেন—বালক বালিকারা তাহার চারিদিকে ঘিরিয়া বসিত। জন জুতা মেরামত করিতেন, এবং সঙ্গে সঙ্গে ইহাদিগকে শিক্ষা দিতেন। কেহবা তাহার নিকটে দাঁড়াইয়া পড়া বলিতেছে, কেহবা শ্রুত-লিখন লিখিতেছে, কেহবা তাহাকে অক্ষ দেখাইতেছে; আবার অনেকে সেই গৃহের মধ্যে যে সামান্য ছুই একখানি টুল বা ভগ্ন বাস ছিল, তাহার উপর বসিয়া রহিয়াছে,—তাহারাও পড়িবে। জন যখন ইহাদিগকে একত্র করিয়া শিক্ষা দিতে বসিতেন, তখন বাহির হইতে দেখিলে বোধ হইত, যেন বড়ই একটা বিশৃঙ্খলা। কিন্তু জনের এমনি বন্দোবস্ত ছিল, যে কখনও কোন বিশৃঙ্খলা উপস্থিত হইত না; সকলেই তাহার কাছে সমান শিক্ষা পাইত। ছোট ছোট ছেলে দিগকে শিক্ষা দিবার রীতি বড় অদ্ভুত ছিল। একটা ছেলেকে নিকটে ডাকিয়া জন তাহার হাতখানি ধরিয়া, জিজ্ঞাসা করিতেন, “এখানা কি?” তারপর তাহাকে বানান করিতে

বলিতেন, তারপর হাতে একটা ভালি দিয়া জিজ্ঞাসা করিতেন, “বলত কি করিলাম?” কাহারও বা কানটা ধরিয়া বলিতেন, “বলত এটা কি?” তারপর কানটা মলিয়া দিয়া জিজ্ঞাসা করিতেন, “বলত কি করিলাম?” এইরূপে বালকদিগকে কথা এবং সেই সকল কথার অর্থ শিখাইতেন। যেমন শরীরের ভিন্ন ভিন্ন অঙ্গের কথা জিজ্ঞাসা করিতেন, তেমনি সেই সকল অঙ্গের কি কি কার্য, তাহাও শিখাইয়া দিতেন। জন কেবল লেখা পড়া শিখাইয়া নিশ্চিত থাকিতেন না। বাহাতে বালক বালিকাগণ নিজে জীবিকা সংস্থান করিতে পারে, এমন শিক্ষাও দিতেন। বাহাতে এই হৃৎখী অনাথ বালক বালিকারা ভবিষ্যতে সুখী হইতে পারে, বাহাতে জীবনে সংপথে থাকিয়া, নিজ নিজ জীবিকা উপার্জন করিতে পারে, জনের সেই চিন্তাই প্রধান ছিল; এবং একান্ত যত্নে, সেই প্রকার শিক্ষাই দিতেন। ছুটির দিনে, জন ইহাদিগকে লইয়া বেড়াইতে বাহির হইতেন; ইহাদিগকে ব্যাট বল, ঘুড়ী, প্রভৃতি তৈয়ার করিয়া দিতেন, এবং নিজে ইহাদিগের সহিত খেলা করিতেন।

রবিবার দিন জন ইহাদিগকে লইয়া উপাসনা করিতে যাইতেন। ছেলে ও মেয়েদের কতকগুলি কাপড় জন সংগ্রহ করিয়া রাখিয়া ছিলেন; রবিবার দিন সেইগুলি ছেলে মেয়েদিগকে পরিতে দিতেন; তাহারা তাহাদিগের ছিন্ন বস্ত্র ত্যাগ করিয়া সেইগুলি পরিয়া, মহা আনন্দে তাহার পশ্চাৎ পশ্চাৎ যাইত;—সে দৃশ্য কি সুন্দর!

যে র্যাগেড্‌ স্কুলের দ্বারা এখন ইংলণ্ড ও অগ্রান্ত দেশের এত উপকার হইতেছে, নিঃসহায় দরিদ্র চন্দ্রকার জন পাউণ্ড্‌স্‌ই তাহার মূল।

সদাশয় পরোপকার-পরায়ণ জন পাউণ্ড্‌সের দৃষ্টান্তে ডাক্তার টমাস গথী প্রথম র্যাগেড্‌ স্কুল স্থাপন করিতে উদ্যোগী হন। এক একটা অতি সামান্য কারণে কত সময়, এক একটা মহৎ কার্যের সূচনা হয়! ডাক্তার টমাস গথী ঘটনাক্রমে একদিন একটা সরাইএ উপস্থিত হন। সেখানে অনেকগুলি ছবি ছিল; তার মধ্যে একটা ছবির দিকে তাঁহার বিশেষ দৃষ্টি পড়িল। তিনি দেখিলেন, একটা জুতা মেরামতের দোকানের ছবি; দোকানের মধ্যস্থলে একজন বসিয়া জুতা মেরামত করিতেছে, আর চারিদিকে কতকগুলি দরিদ্র, বালক বালিকা, তাঁহাকে মিরিয়া রহিয়াছে; দেখিয়া বোধ হয় যেন তাহারা তাঁহার কাছে পাঠ শিক্ষা করিতেছে। ডাক্তার গথী অনুসন্ধান করিয়া জানিলেন যে, সেটা জন পাউণ্ড্‌স এবং তাঁহার স্কুলের ছবি। তিনি জন পাউণ্ড্‌সের জীবন বৃত্তান্ত অবগত হইয়া বিস্মিত হইলেন। তিনি দেখিলেন যে, একজন সামান্য দরিদ্র চর্মকারের চেষ্টায়, কত শত নিরাশ্রয় অনাথ বালক বালিকা, হুঃখ দারিদ্র্য—পাপ প্রলোভনের হস্ত হইতে রক্ষা পাইয়াছে। আমরা মেরী কার্পেন্টারের জীবনীতে বলিয়াছি যে, ইংলণ্ডের নীচশ্রেণীর লোকের অবস্থা নিতান্ত শোচনীয়। কত শত অনাথ বালক বালিকা, আশ্রয়শূন্য—সহায়শূন্য হইয়া, রাজপথে ঘুরিয়া বেড়ায়; এবং অবশেষে উদরানের জন্ত অসং-পথ অবলম্বন করিতে বাধ্য হয়। ডাক্তার গথী দেখিলেন, এই পর-হিতৈষী, দরিদ্র, সামান্য চর্ম-কারের চেষ্টায়, এই শ্রেণীর কত শত বালক বালিকার জীবনোপায় হইয়াছে। বাহাদিগের কোথায়ও আশ্রয় ছিল না, সমাজে বাহাদিগের স্থান ছিল না, আপনার বলিবার বাহাদিগের কেহ

ছিল না, এই সদাশয় মহাত্মার সামান্য গৃহে, তাহারা আশ্রয় পাইয়াছিল। শুধু তাহাই নহে; বাহাতে তাহারা জীবনে সংপথে থাকিয়া জীবিকা উপার্জন করিতে পারে, সমাজের মধ্যে দশ-জনের একজন হইতে পারে, সদাশয় জন পাউণ্ড্‌স তাহাদিগকে এরূপ শিক্ষা দিয়াছিলেন। কখন কখন দেখা যাইত, জন পাউণ্ড্‌স গরম গরম আলুসিদ্ধ হস্তে লইয়া, এক একটা বালকের পশ্চাতে দৌড়িতেছেন। ছুঃখ বালক-দিগকে তিনি আলু দিয়া ভুলাইয়া আনিতেন। পরের জন্ত প্রাণ এত ব্যাকুল কয় জনের হয়; অন্নের হুঃখ দূর করিবার জন্ত কয় জনে এত করিয়া থাকে? এই দরিদ্র চর্মকারের পরহুঃখ-কাতরতা, নিরাশ্রয় অসহায়দিগের প্রতি তাঁহার অতুলনীয় স্নেহ, দীন হুঃখী অনাথদিগের হুঃখ হৃদয় দূর করিবার জন্ত তাঁহার অক্লান্ত চেষ্টা—এই সমস্ত দেখিয়া ডাক্তার গথী বিস্মিত হইলেন; এবং লজ্জিতও হইলেন। সেই মুহূর্ত্তেই তিনি র্যাগেড্‌ স্কুল স্থাপন করিবার জন্য প্রতিজ্ঞাবদ্ধ হইলেন,—সেইদিন হইতে সেই দরিদ্র চর্মকার জন পাউণ্ড্‌সের দৃষ্টান্ত অনুসরণ করিয়া, র্যাগেড্‌ স্কুল স্থাপনে উদ্যোগী হইলেন। ইংলণ্ডের দরিদ্র অনাথ বালক বালিকাদিগের জীবনোপায় হইল।


আমরা পূর্বেই বলিয়াছি জন পাউণ্ড্‌স নিতান্ত দরিদ্র ছিলেন। নিজের স্মৃথের দিকে তাঁহার বিন্দুনাভ দৃষ্টি ছিল না; সেদিকে দৃষ্টি থাকিলে, যে মহৎ কাজের সূত্রপাত তিনি করিয়া গিয়া-ছেন, তাহা তাঁহার দ্বারা কখনই হইত না। সামান্য আহার এবং ছিন্ন বসনেই তাঁহাকে সন্তুষ্ট থাকিতে হইত। কাহারও নিকট হইতে তিনি কখনও কোন [সাহায্য পান নাই; নিজের সামান্য আয়ের উপর

নির্ভর করিয়া, তাঁহাকে এ সমস্ত করিতে হইয়া-ছিল, জীবিত থাকিতে তাঁহার নাম প্রায় কেহ জানিত না;—এবং সেই সামান্য গৃহে যে তিনি কি মহৎ কার্যের ভিত্তি গাঁথিতেছিলেন, তাহা তিনি নিজে একবারও ভাবিতেন না। অনাথ নিরাশ্রয়দিগের অবস্থা দেখিয়া, তাঁহার হৃদয় ব্যথিত হইত, তিনি তাহাদিগকে আশ্রয় দিতেন। তাঁহার দৃষ্টান্তে যে দেশময় র্যাগেড্‌ স্কুল স্থাপিত হইবে, এবং তদ্বারা দেশের অশেষ কল্যাণ হইবে, তাহা তিনি নিজেও জানিতেন না। তিনি যদি শতশত লোকের মস্তকু ছেদন করিয়া, একটা দেশ জয় করিতেন, তাহা হইলে হয়ত দেশ বিদেশে তাঁহার নাম ঘোষিত হইত। কিন্তু তিনি যে শত শত অসহায় অনাথ বালক বালিকাকে, হুঃখ দারিদ্র্য এবং পাপ প্রলোভনের হস্ত হইতে রক্ষা করিয়া, তাহাদিগকে “মানুষ” করিয়া দিয়া-ছিলেন, তাহার মূল্য তখন কেহই বুঝে নাই।

জীবনের শেষ অবস্থায়, আরই ছুই একজন সৈনিক, নাবিক অথবা অল্প কোন ব্যবসাবলম্বী লোক, তাঁহার নিকট উপস্থিত হইত। তিনি তাহাদিগকে চিনিতে পারিতেন না; কিন্তু তাহারা,—আশ্রয় শূন্য সহায় শূন্য হইয়া যখন পথে পথে কাঁদিয়া বেড়াইতেছিল, তখন তিনি তাহাদিগকে আশ্রয় দিয়াছিলেন, তাঁহার শিক্ষা ও সত্বপদেশেই তাহারা আজ স্মৃথে স্বচ্ছন্দে জীবিকা নির্বাহ করিতেছে,—এই কথা কৃতজ্ঞ হৃদয়ে যখন স্মরণ করাইয়া দিত, তখন তাঁহার কি আনন্দ হইত—কি অতুল স্মৃথেই স্মৃথী হই-তেন! বাহাদিগকে “মানুষ” করিবার জন্য তিনি জীবন উৎসর্গ করিয়াছিলেন, আজ তাহারা দশ-জনের একজন হইয়া, স্মৃথে স্বচ্ছন্দে জীবন কাটাই-তেছে, ইহা দেখিয়া তাঁহার আর আনন্দ ধরিত না।

জন পাউণ্ড্‌সের বয়স ৭২ বৎসর হইয়াছে, এই বৃদ্ধ বয়সেও তাঁহার কার্যের বিরাম নাই। একজন চিত্রকর তাঁহার স্কুলের একখানি ছবি চিত্র করিয়া দিয়াছিলেন। জন পাউণ্ড্‌স গৃহে বসিয়া একদিন প্রাতঃকালে, একদৃষ্টে সেই ছবি-খানি দেখিতে ছিলেন। ছবিখানি দেখিতে দেখিতে তিনি অজ্ঞান হইয়া পড়িলেন, এবং সেই মুহূর্ত্তেই তাঁহার প্রাণবায়ু বহির্গত হইল। যে সকল অনাথ বালক বালিকাদিগকে তিনি আশ্রয় দিয়াছিলেন, আজ তাহারা অনাথ হইয়া কাঁদিতে লাগিল। মৃত্যুর পরও এই সকল অনাথ বালক বালিকার কত দিন জন পাউণ্ড্‌সের গৃহদ্বারে আসিয়া, তাঁহাকে না দেখিয়া কাঁদিয়া কাঁদিয়া ফিরিয়া যাইত!

জন পাউণ্ড্‌সের জীবনী শেষ হইল; আমরা ডাক্তার গথীর শেষ কথা কয়েকটা পাঠক পাঠিকা-দিগকে উপহার দিয়া প্রবন্ধ শেষ করিব;—আনি দিব্যচক্ষে দেখিতেছি সেই দিন আসি-তেছে, যেদিন যিনি প্রকৃত সম্মানের উপযুক্ত, তিনিই সম্মান প্রাপ্ত হইবেন;—কবিগণ বাহা-দিগের যশ কীর্তন করিয়াছেন, এবং বাহাদিগের স্মৃতিচিহ্ন রাখিবার জন্ত কীর্তিস্তম্ভ সকল স্থাপিত হইয়াছে, তাঁহারা পশ্চাতে পড়িয়া রহিবেন, আর এই অপরিচিত দরিদ্র চর্মকার, ঈশ্বরের চরণতলে উপস্থিত হইয়া, তাঁহার প্রসাদ লাভ করিবেন।



## “আসিবে না ?”

আবার শরৎকাল

দেখ মা, এসেছে ফিরে  
বরবার জল বৃষ্টি  
চলিয়ে গিয়েছে দূরে ।

২

আকাশেতে মেঘ নাই

কেবলি গর্জন সার ।  
প্রফুল্ল পৃথিবী-মুখ  
চারি দিক পরিষ্কার

৩

মাঠেতে হরিত বর্ণ

শস্ত্র গুলি মনোহর —  
বাতাসে ঢেউর মত  
নাবে উঠে থরে থর ।

৪

নদী মাঝে কত নৌকা

আসে যার তুলি পাল  
কবে মা আসিবে দিদি ?  
এইতো পূজার কাল ।

৫

ফুটিয়াছে স্থল পদ্ম

দেখ মা, বাগানে কত  
ঝুড়ু ঝুড়ু শেফালিকা  
পড়িতেছে অবিরত

৬

কবে মা আসিবে দিদি ?

ভূজনে ভোরের বেলা  
বাগানে কুড়াব ফুল  
আনন্দে গাঁথিব মালা ।

৭

কেন মা বলনা কথা

রয়েছ এমন ভাবে ?  
আসিবে না দিদি কিগো !  
এবার বাড়ীতে তবে ?

৮

না না বাছা ; দিদি তোর

যেদেশে গিয়াছে হায় !  
ফেরে না সেখান হ'তে  
কেহ কতু পুনরায় ।



## সুরা-রাফস কোম্পানী .

আনলিমিটেড ।

আমাদিগের ব্যবসায় অতি পুরাতন । বহুদিন  
হইতে আমরা এই ব্যবসা চালাইয়া আসিতেছি ।  
পৃথিবীর মধ্যে এমন স্থান নাই, যেখানে আমা-  
দিগের কারবার নাই । বিশেষতঃ বঙ্গদেশে  
আমাদিগের ব্যবসার আজ কাল বড় উন্নতি ।

আমাদিগের সু-যশ ও সু-নাম কাহারও নিকট  
অবিদিত নাই । বালক, যুবা, বৃদ্ধ, স্ত্রী, পুরুষ  
সকলেরই নিকট আমরা বিশেষ পরিচিত ।  
সুতরাং আজ আবার নূতন করিয়া আমা-  
দিগের পরিচয় দিবার কোন দরকার ছিল না ।  
কিন্তু আমরা গুনিতোছি, কতকগুলি লোক হিংসা  
পরবশ হইয়া আমাদিগের ক্ষতি করিবার চেষ্টা  
করিতেছে । সুরাপান নিবারণী সভা, টেম্পা-  
রেন্স এসোসিয়েশন, ব্যাণ্ড অব হোপ, প্রভৃতি  
নাম দিয়া, স্থানে স্থানে ইহারা দুই চারি জন মূর্থ  
লোককে ভুলাইয়া সভা করিতেছে । ইহাদিগের  
নিশ্চয়ই কোন একটা মতলব আছে ; নিশ্চয়ই  
কোন স্বার্থ আছে ; নতুবা অশ্রের ক্ষতি করিবার  
জন্ত ইহারা কেন এত ব্যস্ত হইবে ? যাহাই  
হউক, এই ঘৃণিত-হিংসা-পরায়ণ লোকদিগের চেষ্টায়  
আমরা বিদুমাত্রও ভীত নই । আমাদিগের  
ক্রেতাগণের, বিশেষতঃ দেশের আশা তরসা—  
যুবকগণের, আজ কাল আমাদিগের প্রতি যে  
প্রকার অনুরোধ, তাহাতে এই বিবেক-পরায়ণ  
লোকেরা আমাদিগের কোন ক্ষতিই করিতে  
পারিবে না । শত সহস্র “ব্যাণ্ড অব হোপ”  
স্থাপন করিলেও, আমরা দেশময় যে প্রকাণ্ড  
“ব্যাণ্ড অব ডিসপেয়ার” খাড়া করিয়াছি, তাহার  
কিছুই করিতে পারিবেন না ।

তবে এস বঙ্গদেশের বালক, যুবা, বৃদ্ধ, স্ত্রী, পুরুষ  
—তোমাদিগের জন্ত অনন্ত নরকের দ্বার আমরা  
খুলিয়া রাখিয়াছি ! এই পূজা উপলক্ষে আমরা  
তোমাদিগের সর্বনাশের জন্ত যথাসাধ্য আয়ো-  
জন করিতে ক্রটি করি নাই । মহারাজা, রাজা,  
জমিদার, ধনী—তোমাদিগের জন্ত আমরা বিলাত  
হইতে খাঁচী হলাহল আমদানী করিয়াছি ।  
দেশের সাধারণ লোক এবং ছুঃখী দরিদ্রদিগেরও

নিরাশ হইবার কোন কারণ নাই । আমরা  
তাহাদিগের জন্ত এই বঙ্গদেশের প্রায় প্রতি  
পল্লিতে, এই হলাহল প্রস্তুত করিবার বন্দোবস্ত  
করিয়াছি । এই বাঙ্গলাদেশে গভর্ণমেণ্টের সাহায্যে  
এবং অনুরূপে আমরা ছয় শত সদরভাটি ও  
তিন হাজার খোলাভাটি খুলিয়াছি । এই  
খোলাভাটিগুলিতে অবিপ্রান্ত হলাহল প্রস্তুত  
হইতেছে,—হে বঙ্গদেশের ছুঃখী দরিদ্রগণ, তোমা-  
দেরই জন্ত ; সুতরাং তোমরাও নিরাশ হইও  
না । ক্ষুধার সময় এক মুঠা অন্ন, পিপাসার সময়  
একবিন্দু জল, রোগের সময় এক-মাত্রা ঔষধ,  
দারুণ শীতের সময় একখণ্ড ছিন্নবস্ত্র হয়ত তোমা-  
দের জুটিবে না ; কিন্তু তথাপি এই হলাহল  
পাইতে তোমাদের কোন কষ্টই হইবে না । ক্ষুধার  
সময় এক মুঠা ভাত খাইতে পাও আর নাই  
পাও,—খোলাভাটির প্রসাদে, আকর্ষণ পুরিয়া এই  
হলাহল পান করিতে পাইবে । অতএব তোমাদের  
আজ কি আনন্দের দিন !

দেখ আমাদের কত দয়া ! যেখানে হয়ত  
চারটী চাল মিলান কতিন, আমরা তোমাদের  
জন্ত সেখানেও এই খোলাভাটি বসাইয়াছি ;  
তোমরা পেটে খাইতে পাও—আর নাই পাও,  
সুহালাহলের জন্ত তোমাদিগকে কোন কষ্টই  
পাইতে হইবে না । নরকের দ্বার—সর্বনাশের  
পথ দিবারাত্র তোমাদিগের জন্ত খোলা রাখি-  
য়াছি । যদি সহজে উচ্ছন্ন বাইতে ইচ্ছা থাকে,  
তবে আর বিলম্ব না করিয়া আমাদের কাছে  
এস ;—এমন সহজ পথ আর নাই !

যে যাহা চাহিবে, সে তাহাই পাইবে । এস  
বালক ! তোমার জন্ত সুরা হলাহল চালিয়া  
রাখিয়াছি, একবার পান কর—আর ভুলিতে  
পারিবে না ! যত পান করিবে, ততই আরও

পান' করিতে ইচ্ছা হইবে; তোমার সুকুমার দেহ, অস্থিমার করিয়া দিব, ফুটন্ত ফুলের মত তোমার সুন্দর পবিত্র মুখ মলিন হইয়া পিশাচের আকৃতি ধরিবে। অল্প বয়সে যদি যমের বাড়ী যাইতে চাও, তাহা হইলে আমাদের কাছে এস,—এমন সহজ পথ আর নাই।

যদি শরীরের স্বাস্থ্য হারাইয়া চিরজীবনরোগ গ্রস্ত হইয়া থাকিতে চাও, তবে আমাদের কাছে এস! বিলাত হইতে আনীত ব্রাণ্ডী নামক এক প্রকার রক্তবর্ণ পদার্থ তোমাকে পান করিতে দিব; তাহাতে অতি অল্পদিনের মধ্যেই লিভার নামক পদার্থের আয়তন ক্রমে বাড়িতে থাকিবে, এবং সেই রক্তবর্ণ পদার্থ পানে, রক্তকাশী উপস্থিত হইয়া, তোমাকে স্তরায় ভব যন্ত্রণা হইতে উদ্ধার করিবে। বুদ্ধিমান বলিয়া তোমার যদি দুর্নাম থাকে, তবে আমাদের সুরা হলাহল পান কর, দেখিবে অল্পদিনেই তোমার সে দুর্নাম মুচিবে। তোমার মস্তিষ্ক বিকৃত হইয়া যাইবে, বুদ্ধিলোপ পাইবে; পাগলা গারদে রাজার মত থাকিতে পাইবে। কাহারও নিরাশ হইবার কারণ নাই। আমরা ধনীকে দরিদ্র করি, দরিদ্রকে ছুঃখ কষ্টে ডুবাইয়া দি; সংপথে যাহারা চলিতেছে, তাহাদিগকে পাপ-পথে লইয়া যাই; আমাদের ক্ষমতা অসীম, যিনি পরমপাশ্চিক, এই সুরাহলাহল পান করাইয়া তাঁহাকেও আমরা পাপে ডুবাইয়া দি। আমরা পরিবারের সুখ শান্তি নষ্ট করিয়া চির অশান্তির বীজ বপন করি। আমরা পিতাকে পুত্রহীন করি, ভগ্নীর নিকট হইতে ভাইকে কাড়িয়া লই। আমাদের কত প্রতাপ! কত মাতাকে আমরা পুত্রহীন করিয়াছি, কত পুত্র কন্যাকে পিতৃহীন করিয়া, পথের ভিখারী করিয়াছি; কত

স্ত্রীকে পতিহীন করিয়া চিরছুঃখে ডুবাইয়া দিয়াছি! আমাদের কত ক্ষমতা যদি দেখিতে চাও, তবে একবার বাঙ্গালাদেশের দিকে চাহিয়া দেখ। কত শত পরিবার আমাদের কৃপায় উচ্ছন্ন গিয়াছে, এবং কত যাইতেছে একবার চাহিয়া দেখ! গভর্ণমেন্টের কৃপায় বাঙ্গালাদেশের পল্লিতে পল্লিতে আমরা খোলাভাঁটি খুলিয়াছি; বালকদিগের—গরীব ছুঃখীদিগেরও উচ্ছন্ন যাইবার পথ কত সহজ করিয়া দিয়াছি! তোমাদিগের আমরা কত উপকারী! এস তবে বালক, যুবক, বৃদ্ধ, স্ত্রী, পুরুষ সকলে এস;—নরকের দ্বার, সর্বনাশের দ্বার তোমাদিগের জন্য খুলিয়া রাখিয়াছি; উচ্ছন্ন যাইবার এমন আর সহজ উপায় নাই। সুরাহলাহলের স্রোতে আমরা দেশকে একেবারে ডুবাইতে চাই; এই পূজার সময় দেশে সুরাস্রোত খুব বহিবে, এমন আশা আমাদের আছে। এই স্রোতেকি দেশ তবে এবার ডুবাইতে পারিবে!


ধাঁধা ।

গতবারের ধাঁধার উত্তর ।

১। ভারত ।

নূতন ।

১। শক্লীর যদিও হর পৃথিবী আকার, কিন্তু কোথা নাই স্থির আবাস আমার। সংসারে সকলে মোরে অনাদর করে, সম্মান যে জন করে তার মান বাড়ে। অবহেলে যেইজন বামে দেয় স্থান, আমার কারণে তার হয় অপমান।




অক্টোবর, ১৮৮৭ ।

ফুলের সাজি ।

অষ্টম অধ্যায় ।

বন্ধু সর্মাগম ।



তখন দীননাথ ও তাহার ছুঃখিতা মনোরমা বৃক্ষতলে বসিয়া আছে, দ্বারিকানাথ নামে দীননাথের পূর্ব পরিচিত একজন কাঠুরিয়া বন্ধু তথায় উপস্থিত হইল। দীননাথ ও দ্বারিকা নাথের মধ্যে অনেকদিন সৌহার্দ্য ছিল। তাহার পরস্পরকে বিলক্ষণ জানিত। দ্বারিকানাথ শ্রান্তে কাষ্ট আচরণ করিবার জগু বনের মধ্যে ভ্রমণ করিতে করিতে দূর হইতে তাহাদিগকে দেখিয়া তাহাদের সম্মুখীন হইল। সে আসিয়াই দীননাথকে কহিল—ভাল ত ভাই, একি তুমি ও মনোরমা এখানে কেন? দূর হইতে আমি তোমার গলায় স্বর শুনিয়াই চিনিতে পারিয়াছিলাম এ কাহার স্বর; অমনি ছুটিয়া আসিলাম।

দীননাথ তাহার নিকট তখন আত্মপূর্বিক সমুদায় ঘটনা বর্ণন করিল। বতক্ষণ দীননাথ

আপনাদের ছুঃখের কথা বলিতেছিল সরলহৃদয় দ্বারিকানাথ নীরবে অশ্রু বিসর্জন করিল। দীননাথের কথা শেষ হইলে দ্বারিকানাথ কহিল—ভাই রাজপুরুষেরা নিরপরাধী তোমাকে এমন করিয়া দেশ হইতে তাড়াইয়া দিল! বুড়ো বয়সে তোমার প্রতি অকারণে এরূপ ব্যবহার করা বড় অশ্রয় হইয়াছে।

দীননাথ কহিল—ভাই দ্বারিক, সেজগত ছুঃখিত হইও না—পৃথিবীর সকল স্থানই ভগবানের—তাঁহার সৃষ্টি, তাঁহার চন্দ্র সকল স্থানেই উদ্ভিত হইয়া মানবের মনে আনন্দ প্রদান করিতেছে ও সকলের বিবিধ উপকার করিতেছে। যেখানেই যাই—সর্বত্র—সর্বত্র তাঁহার রাজত্ব—সর্বত্র তিনি বিদ্যানান—সর্বত্র তাঁহার ভালবাসা—পরমেশ্বরই আমাদের গৃহ।

দ্বারিকানাথ আবার বলিল—তাইত কিরূপে তাহারা তোমার স্বভাব জানিয়াও তোমার প্রতি এরূপ কঠোর ও নির্দয় আচরণ করিল। এক কাগড়ে তুমি কিরূপে বিদেশে যাইবে? হায়! হায়! তোমার ছুঃখ দেখিলে প্রাণ ফাটিয়া যায়।

বিশ্বাসী দীননাথ কহিল—ভাই যিনি বৃক্ষদিগকে ফলপুষ্প শোভিত করেন তিনি আমাদের বস্ত্র প্রদান করিবেন।

দ্বারিকানাথ বলিল—তোমার কাছে পথ ধরচ টাকা কি কিছু আছে?

দীননাথ বলিল—আমাদের নির্মল বিবেক এবং আত্মাই আমাদের ধন। শুদ্ধ বিবেক ও আত্মার পরিবর্তে যদি আজ আমাদের অতুল ঐশ্বর্য থাকিত—এমন কি যে প্রস্তরখানির উপর আমি বসিয়া আছি, এখানি যদি স্বর্ণ হইয়া আমাদের হইত তথাপিও আমরা দরিদ্র থাকিতাম। ধনী তিনি, যাহার শুদ্ধ বিবেক ও আত্মা আছে।

দ্বারিক কহিল—যাহা বলিলে তাহা সমুদায় ঠিক, কিন্তু বল দেখি তোমার নিকট কি একটি পয়সাও নাই?

দীননাথ উত্তর করিল—এই সাজিটা আমার সমুদায় সম্পত্তি! তুমি দেখ দেখি ইহার মূল্য কত?

দ্বারিকানাথ বলিল—আট আনার অধিক হইবে না, কিন্তু ইহাতে কি হইবে?

দীননাথ হাসিয়া বলিল—তবে আমাদের অন্নকষ্ট হইবে না—যদি আমার শরীরে ভগবান শক্তি ও স্বাস্থ্য দেন তাহা হইলে আমি বৎসরে একরূপ দুই শত সাজি স্বহস্তে নির্মাণ করিতে পারিব। বৎসর এক শত মুদ্রা হইলে আমাদের ছুজনের যথেষ্ট হইবে। আমার পিতা আমাকে যেমন বাগানের কাজ সূচরূপে শিখাইয়াছিলেন সেইরূপ সাজি নির্মাণ কার্যও শিক্ষা দিয়াছিলেন। আমি এখন বুঝিতে পারিলাম আমার এই কাজ শিখিয়া কত ভাল হইয়াছে। যদি আমার পিতা আমার জন্ম দুই হাজার টাকা রাখিয়া যাইতেন তাহাও আমার আজ কোন কাজে আসিত না, সমুদায় রাজভাণ্ডারে যাইত, কিন্তু এই কর্ম শিখিয়া আমার দুই হাজার মুদ্রা প্রাপ্তি অপেক্ষা অধিক উপকার হইয়াছে। সুস্থমন ও সুস্থদেহ লইয়া ধর্ম্ম যতি রাখিয়া সামান্য

উপার্জন করিলেও মানুষ পরম সুখী হইতে পারে মন্দেই নাই।

দ্বারিকানাথ আহ্লাদ সহকারে বলিল—পরমেশ্বর ধন্য যে, তিনি তোমার একরূপ বুদ্ধি দিয়াছেন। তোমার যে মত আমারও তাই।

কিন্তু ভাই তুমি কতদূরে যাইতে মানস করিয়াছ?

দীননাথ বলিল—অনেক দূরে, এমন স্থানে যাইব যেখানে আমাদেরকে কেহ জানে না। পরমেশ্বর আমাদের পথ দেখাইয়া দিবেন।

দ্বারিকানাথ বলিল—ভাই এই শক্ত মোটা লাঠীগাছটা লও—ভাগ্যে আমি এই গাছটা সঙ্গে আনিয়াছিলাম—ভাই আর একটি কথা শুন, এই কটা টাকা লও—এই বলিয়া সে একটি টাকার গেঁজে বাহির করিয়া বলিল, আমি খাজনা দিবার জন্ম এই কটা টাকা লইয়া যাইতেছিলাম বলিয়া এটা আমার সঙ্গে ছিল।—তোমার যদি ইহাতে কিছু সাহায্য হয় তাহা হইলে আমি সুখী হইব।

দীননাথ বলিল—ভাই দ্বারিক আমি আনন্দ মনে ও বন্ধুতার স্মরণার্থে তোমার এই লাঠি লইলাম। কিন্তু আমি টাকা লইতে পারিব না। ইহা খাজনার টাকা, ইহা আমি লইলে তুমি কিরূপে যথাসময়ে খাজনা দিতে সমর্থ হইবে? খাজনার দিন গত হইলে যদি খাজনা দিতে না পার তাহা হইলে রাজা তোমার সমুদায় ঘর বাড়ী নিলাম করিয়া লইবে।

কাঠুরিয়া দ্বারিকানাথ তখন হাসিতে হাসিতে কহিল—ভাই দীননাথ তোমার সে ভয় করিতে হইবে না। আমি খাজনা দিবার দিনের পূর্বেই এই টাকার দুইগুণ টাকা পাইব। দুই বৎসর পূর্বে একজন দুঃখী চামার গরু মরিয়া যাওয়াতে সে আমার নিকট হইতে ২০ কুড়িটা টাকা ধার

লয়। আমি কখনও তাহার নিকট ঐ টাকা চাই নাই। কাল সকালে তাহার সহিত আমার দেখা হইয়াছিল। সে আমায় দেখিয়া হাসিতে হাসিতে কহিল দ্বারিক দাদা ভগবানের ইচ্ছায় ধান বিক্রয় করিয়া এবার আমি দুই পয়সা পাইয়াছি। তোমার জন্মই আমার কিছু হইয়াছে। তুমি আমার বিপদের সময়ে সাহায্য না করিলে আমার লাভ হওয়া দূরে থাকুক আমার কিছুই থাকিত না। দাদা, আগামী রবিবারে তোমার সেই টাকা কটা আমি তোমার বাড়ী দিয়া আসিব। আমি তাহার ভাল অবস্থার কথা শুনিয়া বড় খুসী হইলাম। অতএব তোমায় যদি এই টাকা দি, তাহাতে আমার বিপদে পড়িতে হইবে না, টাকা কটা লও।

দীননাথ তাহার সৌজন্মতাগুণে এত মুগ্ধ হইল যে, সে আর দ্বারিকানাথের কথায় “না” বলিতে পারিল না।

তখন দীননাথ বলিল—আমি কৃতজ্ঞতাপূর্ণ মনে তোমার এই টাকা গ্রহণ করিলাম; তোমার মত উদার হৃদয় ও দয়ালু লোক দেখি নাই। ভগবান তোমার নিশ্চয়ই মঙ্গল করিবেন। এই বলিয়া—দীননাথ মনোরমার দিকে চাহিয়া কহিল—মনোরমে দেখ ভগবান আমাদের প্রতি কত প্রসন্ন—আমরা বিদেশ যাইবার অগ্রেই তিনি আমাদেরকে কেমন আশ্চর্য সাহায্য পাঠাইলেন; তিনিই আমাদের সহায়তার জন্ম দ্বারিকানাথকে পাঠাইয়াছেন। এই লাঠি ও এই টাকা তাহারই প্রদত্ত। কত শীঘ্র তিনি আমাদের প্রার্থনাপূর্ণ করিলেন। ভগ্নোৎসাহ হইওনা, ভয় করিও না—ঈশ্বর যাহাদের সহায় তাহাদের আবার ভাবনা কি? দ্বারিকানাথ তখন কাঁদিতে কাঁদিতে কহিল—তবে—দীননাথ, মা মনোরমা, আমি বিদায় হই।

আমি চিরকাল তোমাদিগকে ভাল বলিয়া জানি, এখনও আমার সেই ভাব নষ্ট হয় নাই। “সাধু যাহার ইচ্ছা, হরি তাহার সহায়” তবে এস, তোমাদের ভয় নাই, তোমাদের কখনই এই দুঃখ চিরদিন রহিবে না। ভগবান নিশ্চয়ই তোমাদের এই দশা দূর করিবেন। তিনি তোমাদের মঙ্গল করুন।

এই বলিয়া দ্বারিকানাথ অশ্রুপূর্ণ নেত্রে দীননাথকে আলিঙ্গন করিল। দীননাথও তাহাকে দুই হস্তদ্বারা ধারণ করিল—উভয়ের নেত্র জলে উভয়ের বক্ষঃস্থল ভাসিয়া গেল—জগতে এইরূপ সদ্ভাব যেখানে, সেইখানেই স্বর্গ সুখ। এইভাবে কতক্ষণ গত হইলে দ্বারিকানাথ ধীরে ধীরে দীননাথকে পরিত্যাগ করিল—মনোরমাও দ্বারিকানাথকে নমস্কার করিয়া কাঁদিতে কাঁদিতে পিতার পাশে দাঁড়াইয়া রহিল। দ্বারিকানাথ তখন গৃহান্তিমুখে প্রস্থান করিল; যতদূর দৃষ্টি চলে তাহার তাহার দিকে চাহিয়া বহিল। যখন আর দ্বারিকানাথকে দেখা গেল না, দীননাথ কন্ঠার হস্ত ধারণ পূর্বক উৎকর্ষিত ধরিয়া গমন করিল।

ক্রমশঃ।

## ভারতের অসভ্যজাতি ।

( ১২৫ পৃষ্ঠার পর । )

স্বাধীনতার পাঠক পাঠিকা! তোমরা পূর্বেই শুনিয়াছ ছোটনাগপুর, হাজারিবাগ প্রভৃতির জঙ্গলময় পাহাড়ে অনেক অসভ্যজাতি বাস করে; ঐ সকল জাতির মধ্যে ওরাও অর্থাৎ ধাঙ্গড়দিগের বৃত্তান্ত সংক্ষেপে বলা

হইয়াছে। আজ তোমাদিগকে কোল জাতির বিষয় কিছু বলিব। হাজারিবাগের নিকট রামগড়ের জঙ্গল, গঙ্গাপুর, সরগুজা, এবং সিংহভূম প্রভৃতি স্থানে অনেক কোল দেখিতে পাওয়া যায়। কোলমাত্রেই যে এক তাহা মনে করিও না, যেমন আমাদিগের দেশে ব্রাহ্মণ, কায়স্থদিগের মধ্যে নানা প্রকার শ্রেণী বিভাগ আছে, কোলদিগের মধ্যেও সেইরূপ। ব্রাহ্মণদিগের মধ্যে যেমন রাত, বারেন্দ্র, বৈদিক, কনোজিয়া প্রভৃতি নানা প্রকার ব্রাহ্মণ, কোলদিগের মধ্যেও মুণ্ডা, লব্কা, হুস, চুরাড় এবং ভূম্জি প্রভৃতি নানা প্রকার কোল আছে। কোলেরা যে কোথা হইতে আসিয়া এই সকল প্রদেশে বাস করে তাহা ঠিক করিয়া বলা কঠিন, কারণ এই জাতির শাখা প্রশাখা ভারতবর্ষের আরও অনেক স্থানে দেখিতে পাওয়া যায়। কে বলিতে পারে এই জাতি ছিল বিচ্ছিন্ন হইবার পূর্বে কোথায় বাস করিত? এই সকল প্রদেশে যখন কোল জাতিরা প্রথমে আসিয়া বাস করে তখন অধিকাংশ নিকটবর্তী ক্ষুদ্র ক্ষুদ্র রাজপুত্র জমিদারেরা তাহাদিগের উপর কতকটা আধিপত্য করিত, কিন্তু সে আধিপত্য অনেকটা কেবল নামেই, কাজে বড় কিছু করিতে পারিত না। বর্তমান ইংরাজ রাজত্ব কালেও কোল জাতিকে অনেক সময়ে অনেক বার ঐ সকল অর্থ পিশাচ জমিদারদিগের নিগ্রহ সহ্য করিতে হইয়াছে। কিন্তু সকল প্রকার অত্যাচারের যেমন একটা সীমা আছে, সহ্য করিবার ক্ষমতারও তেমনই সীমা আছে। কোল জাতি পুরুষ পুরুষক্রমে অনেক সহ্য করিয়া আসিয়াছে আর তাহারা জমিদারদিগের অত্যাচার সহ্য করিতে পারিল না; সমস্ত কোল জাতি এক হইয়া বিদ্রোহী হইয়া দাঁড়াইল। ১৮৩১ খ্রীষ্টাব্দে

এই বিদ্রোহের সূচনা হয়। সখার পাঠক পাঠিকা! তোমরা জিজ্ঞাসা করিতে পার যে, জমিদার এমন কি অত্যাচার করিতে পারে—যাহাতে সমস্ত কোল জাতি ক্ষেপিয়া উঠে? তোমাদিগের এ প্রশ্ন নিতান্ত অসঙ্গত নয়, ইংরাজ গবর্ণমেন্টের সূশাসনে এবং জমিদারদিগের মধ্যে কতক পরিমাণে শিক্ষা বিস্তারের গুণে আমাদিগের এ সকল দেশে প্রজাদিগের প্রতি আর তত অত্যাচার দেখিতে পাওয়া যায় না। কিন্তু অতি অল্পকাল—এমন কি ২০।২৫ বৎসর পূর্বে প্রজাদিগের প্রতি জমিদারেরা যে অত্যাচার করিত তাহার কথা আর কি বলিব! খাজনা আদায়ের নিমিত্ত জমিদারেরা প্রজাদিগকে ধরিয়া লইয়া গিয়া দুর্গন্ধময় অন্ধকার কুঠরিতে ছই তিন দিন অনাহারে কয়েদ করিয়া রাখিত। চৈত্র বৈশাখ মাসের রৌদ্রে মাথায় বোঝা চাপাইয়া সমস্ত দিন দাঁড় করাইয়া রাখিত, পাছকাঁষাত করিত, খান খাইতে দিত এবং আরও কত যে নিষ্ঠুরাচার করিত তাহা আর কি বলিব! কখন কখন আবার প্রজাদের স্ত্রীলোক, বালকদিগের প্রতিও অত্যাচার করিত। এখন বুদ্ধিতে পারিলে, কোলেরা কি সাধে ক্ষেপিয়া উঠিয়াছিল। একটি কথা, তোমরা মনে করিও না যে জমিদারদিগের মধ্যে একজনও ভাল লোক ছিলেন না; অনেকে এত ভাল ছিলেন যে, তাহারা প্রজাদিগকে আপন সন্তানের মত দেখিতেন।

ইংরাজ গবর্ণমেন্ট যখন দেখিলেন জমিদারদিগের অত্যাচারই কোল বিদ্রোহের প্রধান কারণ; তখন নানা প্রকার সুনিয়ম স্থাপন করিয়া সে বিদ্রোহ নিবারণ করিলেন। এখন আর কোলদিগের উপর জমিদারদিগের কোন ক্ষমতা নাই; গবর্ণমেন্টের পক্ষ হইতে খাজনা আদায় হয়,

এবং অত্যাচার বন্দোবস্ত হয়। কোলদিগকে অত্যাচারের হাত হইতে মুক্ত করিবার নিমিত্ত পাড়ি সাহেবেরাও যথেষ্ট চেষ্টা ও যত্ন করিয়াছেন এবং ঈশ্বরের রূপায় তাহাদিগের শুভ অল্পস্থানের যথেষ্ট ফলও হইয়াছে।

ধাঙ্গড়, সাঁওতাল প্রভৃতি অল্প অল্প অসভ্য জাতির মত কোলেরাও দেখিতে কৃষ্ণবর্ণ এবং কদাকার। কদাকার হইলেও কিন্তু ইহারা বেশ বলিষ্ঠ এবং কৰ্ম্মপটু। কি স্ত্রী, কি পুরুষ, সকলের মাথায় লম্বা লম্বা চুল, তবে পুরুষেরা মাথার কতকটা কামায় বলিয়া বিস্তী দেখায়। কোলদের মধ্যে যাহারা অপেক্ষাকৃত সজ্জতিপন্ন তাহারা ধুতি এবং দোপাটা পরিয়া থাকে, তাহা ভিন্ন কি স্ত্রী, কি পুরুষ সকলেই কোঁপিন পরে। অসভ্যদিগের মধ্যে যে বস্ত্র পরিধানের প্রথা নাই তাহার প্রধান কারণ বস্ত্র প্রস্তুত করার উপায় না থাকা। কালে তাহারা যেমন উন্নত হইতেছে, তেমনি বস্ত্রাদি বুনিতেও শিখিতেছে। তোমরা পূর্বেই শুনিয়াছ অলঙ্কার পরার সাধটা সভ্য অসভ্য সকল জাতিরই আছে, তবে না হয় সভ্য জাতিরা মূল্যবান অলঙ্কার পরেন আর অসভ্যেরা বহুমূল্য অলঙ্কার কোথা পাইবে? তাহারা গাছের পাতা, পাখীর পালক পরিয়া মনের সাধ মিটায়। কোলেরাও এ নিয়মের বাহিরে নয়। কোন উৎসব হইলে কোল রমণীরা ফুল ও পাতার সুন্দর সুন্দর অলঙ্কার প্রস্তুত করিয়া পরে এবং সচরাচর কাঁসার মাকড়ী এবং শঙ্খ এবং পুতির কণ্ঠমালা পরিয়া থাকে। তীর—ধনুক এবং টান্দি কোলদিগের প্রধান অস্ত্র। তীর চালনায় ইহারা বড় পটু। আমাদিগের দেশে যেমন বালক বালিকারা পাঁচ ছয় বৎসর বয়স হইতে পাঠশালায় কিম্বা স্কুলে শিক্ষা করিতে প্রবৃত্ত


হয়, কোল বালকেরা সেইরূপ অল্প বয়স হইতেই তীর চালনা শিক্ষা করিতে আরম্ভ করে, এবং ক্রমে বেশ শিকারী হইয়া উঠে। আজ কাল কোলেরা বেশ চাষ করিয়া নানা প্রকার শস্য উৎপন্ন করিতেছে এবং সুখে স্বচ্ছন্দে সংসার যাত্রা নির্বাহ করিতেছে। ইহারা যে কেবল শস্য উৎপন্ন করিতে শিখিয়া ক্ষান্ত হইয়াছে তাহা নয়; গো, মেঘ, মহিষ পুষ্টিয়া ঘৃত, ছক্কের ব্যবসাও আরম্ভ করিয়াছে। কোলেরা সর্বভূক বলিলেই হয়, এমন জন্তু কি পাখী নাই যাহা ইহারা খায় না। ইহাদিগের মধ্যে জাতিভেদ নাই, তবে আহার সম্বন্ধে ইহাদের একটা আশ্চর্য্য কুসংস্কার আছে, আহার করিতে করিতে যদি মাহুষের ছায়া আহারীর পাত্রে উপর পড়ে তবে আর আহার করা হয় না, কিম্বা পানীয় পাত্র অল্প কেহ স্পর্শ করিলে সে পাত্রে আর জলপান করে না।

কোলেরা খুব আমোদ প্রিয়; কোন কোন পল্লিতে যাও দেখিবে নৃত্য, গীত অবিশ্রান্ত চলিয়াছে, বালক বালিকারা পর্য্যন্ত এই নৃত্য গীতে যোগ দিতেছে। কাল নাই, অকাল নাই, কি সন্ধ্যা, কি সকাল আমোদের তরঙ্গ চলিয়াছে। এই প্রফুল্ল চিত্ততা যেনন কোলদের একটা গুণ তেমনি আর কয়েকটি মহৎ দোষে সমস্ত মাটি করিয়াছে। বলিষ্ঠকায় এবং কৰ্ম্মপটু হইলেও পুরুষেরা প্রায়ই অলস প্রকৃতি; স্ত্রীলোকেরাই অধিকাংশ সাংসারিক কার্য্য করিয়া থাকে। কোন উৎসব কিম্বা বিবাহ উপলক্ষে ইহারা এত সুরাপান করে যে প্রায় সকলেই জ্ঞানশূন্য হইয়া পড়ে। যতই কেন দোষ থাকুক না কোলদের একটি মহৎ গুণ এই যে, ইহারা অত্যন্ত সং এবং সত্যপ্রিয়। এমন সময় ছিল, যখন কালের চুরী

ডাকাতি এবং লুণ্ঠ পাট করিয়া জীবনযাত্রা নির্বাহ করিত। তখনও কিন্তু কেহ মিথ্যা কথা কিম্বা প্রবঞ্চনার অভিযোগ ইহাদিগের বিরুদ্ধে করিতে পারে নাই। কোলদিগের যুবক যুবতীরা প্রায়ই মুক্তভাবে মিশিয়া থাকে; কোন যুবক যুবতীর মধ্যে ভালবাসা জন্মিলে এবং তাহাদিগের পিতা মাতা কিম্বা আত্মীয় বন্ধুর বিশেষ কোন আপত্তি না থাকিলে শীঘ্রই বিবাহ হইয়া যায়। কিন্তু যুবতীর পিতা মাতার সম্মতি লইবার পূর্বে যুবককে কন্যার মূল্য স্বরূপ কিছু দিতে হয়; বিবাহ প্রণালী অতি সংক্ষেপ। সমস্ত ঠিক হইলে পর কন্যার পিতা মাতা এবং আত্মীয় বন্ধুগণ কন্যাকে লইয়া পাত্রের বাড়ী যায়; পাত্র কন্যাকে বসিবার আসন দিয়া তাহার মস্তকে তৈল ঢালিয়া দেয় এবং ভাত, মাংস এবং আর আর আহারীয় জব্য সম্মুখে উপস্থিত কবে, কন্যা কিঞ্চিৎ আহার করিলেই বিবাহ হইয়া গেল।

ধর্ম মন্ত্রকে কোলদিগের বিশ্বাস প্রায়ই ধাক্কাড়দিগের মত, সর্বশক্তিমান ঈশ্বর সূচ্যেতে সপ্রকাশ, চন্দ্র তাহার স্ত্রী এবং নক্ষত্রগণ তাহার কন্যা। কোলেরা কোন দেব দেবীর প্রতিমূর্তি পূজা করে না, কিন্তু উপদেবতাগণের প্রীতির নিমিত্ত ছাগ, মেঘাদিঃবলি দিয়া থাকে।

ক্রমশঃ।



## মুক্তি লাভ ।

জগদীশ্বর প্রাণীগণের মঙ্গলের জন্ত কখন কি ভাবে কাহাকে রক্ষা করেন বুঝা যায় না। কখনও বা কেহ তাহার উপাসনা করে এইজন্ত শত্রু কর্তৃক বিনাশ প্রাপ্ত হইতেছে কখনও বা কেহ তাহারই আশীর্ব্বাদে শত্রুর হস্ত হইতে রক্ষা পাইতেছে। এসকলই যে তাহার সৃষ্ট-জীবের মঙ্গলের জন্ত তিনি বিধান করেন তাহা অবশ্য বলিতে হইবে।



স্বইজরলগের ভডয় নামক এক সম্প্রদায় ঈশ্বরের উপাসনা করিত এই তাহাদের অপরাধ। এই গুরুতর অপরাধ জন্ত অত্রা অত্র দেশবাসী নাস্তিক সম্প্রদায়েরা ইহাদের উপর খড়্গহস্ত হইল; কিনে এই ধার্মিক সম্প্রদায়কে বিনাশ করিতে পারে এইজন্ত তাহারা সকলেই দলবদ্ধ হইল। এমন কি প্রবল পরাক্রান্ত ধর্মগুরু পোপ পর্যন্তও তাহাদের সহায়তা করিতে লাগিলেন।

প্রবল শত্রু কর্তৃক নিপীড়িত হইয়া, নারিহ, ধর্মভীরু, ঈশ্বর-ভক্ত ভডয় সম্প্রদায় আপন দেশ, বর, বাড়ী ছাড়িয়া এক পর্বত গুহায় আশ্রয় গ্রহণ করিল। সেখানেও তাহাদের নিস্তার নাই। শত্রুগণ তাহাদের একেবারে নির্বংশ করিবে এই অভিপ্রায়। যাহাতে এক প্রাণীও না বাঁচে, যাহাতে এক প্রাণীও তুল ক্রমে ঈশ্বরের নাম না করে এইজন্ত শত্রুরা সেই পর্বতে গিয়াও ভডয়দের পীড়ন করিতে লাগিল। পর্বতের চতুর্দিকে শত্রু পক্ষীয় প্রহরীরা ঘেরিয়া রহিল; রাত্রি হইলেই সকলকে মারিয়া, কাটিয়া, পোড়াইয়া ফেলিবে এই সিদ্ধান্ত স্থির করিল। অবশিষ্ট সৈন্তেরা অনতিদূরে তাঁবু ফেলিয়া মদ খাইয়া আনোদে সময় কাটাইতে লাগিল, সকলেরই মুখে এক কথা এই যে, এবার দেখিব কেমনে “ঈশ্বর ইহাদের রক্ষা করেন।”


এদিকে ভডয় সম্প্রদায়স্থ যুবকগণ আসন্ন বিপদ উপস্থিত মনে করিয়া, মহিলা ও বালক দিগকে আরও পর্বতের দূরতম স্থানে প্রেরণ করিবার জন্ত তাহাদের দলস্থ বৃদ্ধদের উপর ভার দিল। এবং নিজেরা সকলকে রক্ষা করিবার জন্য প্রাণপণে চেষ্টা করিতে লাগিল। বারট্রাণ্ড নামে একটি অল্পবয়স্ক বালক তাহার মাতার সঙ্গে যাইতে যাইতে পথিমধ্যে অনামনস্ক হইয়া পথ হারাইয়া গেল। মাতা পুত্রকে সঙ্গে না দেখিয়া ক্রন্দন করিতে করিতে পর্বতের গুহতমস্থানে অন্যান্য মহিলাদের সঙ্গে গিয়া আশ্রয় গ্রহণ করিলেন। এদিকে বালক পথ ভুলিয়া গিয়া যে কিছু বিপদাপন্ন হইয়াছে এরূপ মনে করা দূরে থাকুক, বরং সে নানা স্থানের নানা প্রকার স্বাভাবিক সৌন্দর্য্য দেখিয়া নিজের কষ্ট ভুলিয়া বেড়াইতে লাগিল। যাইতে যাইতে অবশেষে

রাত্রি হইল। রাত্রিতে দুই একটা নক্ষত্র মাত্র জ্বলিতেছে; এই ক্ষীণ আলোকে বারট্রাণ্ড হঠাৎ একটা “জয়চাক” দেখিতে পাইল; চাকের কাঠি ও সামনে ছিল। জয়চাক বাজাইলে শব্দ শুনিয়া তাহার সাহায্যার্থে লোক আসিতে পারে এই জন্তই জয়চাক বারট্রাণ্ড বাজাইল। নিস্তরু রাত্রিতে হঠাৎ জয়চাকের শব্দ শুনিয়া নাস্তিক শত্রুপক্ষের প্রহরীদের মধ্যে ভয় উপস্থিত হইল, তাহারা ভয়ে ভীত হইয়া তাবুতে দৌড়িয়া গিয়া দলস্থ সকলের নিকট বলিল যে, “ভডয়গণ সসৈন্তে যুদ্ধ যাত্রা করিয়া আসিতেছে, ঐ শুন তাহাদের জয়চাকের শব্দ শুনা যাইতেছে” এই বলিবার মাত্র দলস্থ সকলেই জয়চাকের শব্দ শুনিতে পাইল।

সকলের মনে ভয় সঞ্চার হইল—যাহা-দিগকে অপদার্থ মনে করিয়া একদণ্ড পরে পদে দলিয়া নিপীড়িত করিবে মনে কারিয়াছিল তাহাদের সৈন্য সংগ্রহ করা, যুদ্ধ যাত্রাকরা—একটা আশ্চর্য্য ব্যাপার, অচিন্তনীয় কাণ্ড মনে হওয়ায় ভয়ে নিস্তরু হইল। নাস্তিকদল ঈশ্বর মানিত না বটে, কিন্তু এই হঠাৎ একটামাত্র শব্দ শুনিয়া মনে করিল যে, ঈশ্বর নিজেই এই ভডয়দের যুদ্ধ যাত্রা করাইতেছেন; না হইলে কোথা হইতে এই অসহায় সম্প্রদায় এই নিভৃত স্থানে সৈন্য সংগ্রহ করিল? এমন সাহস হইলনা যে, সম্মুখীন হইয়া যুদ্ধ করে। তাহাদের মধ্যে একটা হঠাৎ বিপদ উপস্থিত হইল, সৈন্যাধ্যক্ষের মনে স্থিরতা রহিল না, যে যেখানে ছিল দৌড়িয়া পলায়ন করিতে লাগিল। শত্রু-তাম্বুর মধ্যে গোলবোগ উপস্থিত হইয়াছে টের পাইয়া এই সূযোগে ভডয় যুবকগণ যাহারা শত্রুদের হইতে নিজেদের রক্ষা করিবার জন্য যথাসাধ্য আয়োজন করিতেছিল তাহারা সকলে একত্র হইয়া অগ্রসর হইল—

বেই অগ্রসর হওয়া সেই “মুক্তিলাভ” । শত্রুগণ ইহাদের দেখিবামাত্র পলায়ন করিল। ভড়গদের মুক্তিলাভ হইল।

শত্রুদের হাত হইতে উদ্ধার পাইয়া ভড়গগণ নিজ দেশে গিয়া সুখে বাস করিতে লাগিল। এই সত্য ঘটনা যখন দেশময় প্রচারিত হইল তখন যাহারা যোর সাংসারিক তাহারাই এই ব্যাপারকে ‘আকস্মিক ঘটনা’ বলিয়া উল্লেখ করিলেন—কিন্তু যাহারা বিশ্বাসী, ধর্মভীরু তাহারাই বলিলেন যে, ঈশ্বর বালক বারটাও দ্বারাই এই কার্য্য উদ্ধার কবাইলেন। পাঠক পাঠিকাগণ! তোমরা কি মনে কর ?



## রাখি-বন্ধন ।

সেদিন ভ্রাতৃত্বিতীয়া হইয়া গিয়াছে। ভাইয়ের প্রতি বোনের স্নেহ ভালবাসা দেখাইবার এইটা একটা বিশেষ দিন। ভাই বোনে যতই কেন বিবাদ থাকুন, এই দিনে সে সমস্ত ভুলিয়া, ভাই বোনের আবার মিলন হয়; সে দৃশ্য বড় সুন্দর! এই দিনে, ভাই—বোনের দোষ ভুলিয়া যান, বোন—ভাইয়ের দোষ ভুলিয়া যান। ভাই বোনের ভালবাসা যেন এই দিনে আবার নূতন হইয়া উঠে। বোন এই দিনে, ভাইকে নূতন কাপড় পরাইয়া, মনের মতন করিয়া সাজাইয়া, ভাইয়ের মঙ্গল কামনায়, ভাইয়ের

কপালে ফোঁটা দেন; এবং কত ভাল ভাল খাবার জিনিষ তৈয়ায় করিয়া, ভাইকে খাওয়াইয়া কত সুখী হন। ভাইয়ের প্রতি এইদিন বোনের কত স্নেহ, কত আদর! আমাদিগের পাঠিকারাও বোধ হয় এই স্নেহ—এই আদর করিতে ক্রটি করেন নাই; তাঁহারাও আপন আপন ভাইদিগকে এই দিনে নূতন কাপড়ে সাজাইয়া, ভাইয়ের কপালে ফোঁটা দিয়া, ভাইকে ভাল ভাল জিনিষ খাওয়াইয়া, কত সুখী হইরাছেন। এ বড় সুখের জিনিষ,—ভ্রাতৃত্বিতীয়া ভাই বোনের স্নেহের বড় সুন্দর চিত্র। এই উপলক্ষে ভাইয়ের প্রতি বোনের কতখানি স্নেহ—কতখানি ভালবাসা, তাহাই দেখান হয়, ভাইও বোনের গভীর স্নেহ—গভীর ভালবাসা বুঝিতে পারেন।

আমাদের দেশে যেমন ভ্রাতৃত্বিতীয়া, রাজপুত-নায় তেমনি একটা প্রথা চলিত আছে,—সেটার নাম “রাখি-বন্ধন”। কোন সময় এবং কি প্রকারে এই প্রথাটা প্রথম প্রচলিত হয়, তাহা জানা যায় না; কিন্তু আমাদিগের ভ্রাতৃত্বিতীয়ার ত্যায় এটাও একটা বড় সুন্দর প্রথা। বসন্তকালে রাখি-উৎসব হইয়া থাকে। ভ্রাতৃত্বিতীয়ার সহিত ইহার একটু প্রভেদ আছে; ভ্রাতৃত্বিতীয়াতে কেবল ভাইকে লইয়া সন্মত; কিন্তু রাখি-বন্ধন তাহা নহে। ভ্রাতৃত্বিতীয়াতে ভাইয়ের প্রতি বোনের যে স্নেহ ভালবাসা, তাহাই দেখান হয়; কিন্তু রাখি-বন্ধন শুধু তাহা নহে। পূর্বেই বলিয়াছি, বসন্তকালে, এই উৎসব হইয়া থাকে। এই সময়ে রাজপুত মহিলাগণ, যাহাকে ইচ্ছা রাখি-বলয় পাঠাইয়া, ভ্রাতৃত্ব বরণ করেন। আবশ্যক হইলে অল্প সময়ও রাখি প্রেরণের রীতি আছে। যুদ্ধ বিগ্রহের সময়, অথবা অল্প কোন বিপদের সময় রাজপুত মহিলাগণ সহায়ের জন্ত যাহার

নিকট ইচ্ছা রাখি প্রেরণ করিতেন; যাহার নিকট এই রাখি পাঠান হইত শত্রুতা থাকিলেও তিনি তাহা পরিত্যাগ করিয়া, ধর্মভগ্নীর সাহায্যের জন্ত জীবন পর্য্যন্ত উৎসর্গ করিতে প্রস্তুত হইতেন। এই রাখি-বলয় প্রস্তুত করিবার বিশেষ কোন নিয়ম নাই; অবস্থানুসারে কেহ বা স্বর্ণ রত্নদ্বারা এই বলয় প্রস্তুত করিয়া থাকেন,—কেহ বা সামান্ত পশমের ডোর, রাখি-বলয় স্বরূপ আপন আপন ধর্মভ্রাতা-দিগকে দিয়া থাকেন। সামান্ত পশমের হইলেও সুখের যেন ভুলনা নাই; ভাই বোনের এই রাখি-বলয় বড় সম্মানের জিনিষ। রাজপুত-গণ এবং সেই সময়ের মুসলমান রাজা ও সম্রাট-গণও, এই রাখি-বলয় পাইবার জন্ত লালায়িত হইতেন, এবং ইহাকে উচ্চপদ অথবা সাম্রাজ্যের ত্যায় মনে করিতেন। যাহারা এই বলয় পাইতেন, তাঁহারা আপনাদিগকে কৃতার্থ মনে করিতেন। রাজপুতদিগের মধ্যে কেবল মহিলা এবং ধর্মযাজকগণই এই বলয় বিতরণ করিতে পারিতেন। কখন কখনও রাজপুত কুমারীগণও এই বলয় প্রেরণ করেন। রাখি-বলয় দিয়া যাহার সুহিত এই পবিত্র ভ্রাতা ভগ্নী সন্মত স্থাপন করা হয়, তিনি “ধর্মভ্রাতা” উপাধি প্রাপ্ত হন। এই উপাধি এবং বলয় পাইবামাত্র, ধর্মভ্রাতা ধর্মভগ্নীর মঙ্গলের জন্ত, তাঁহাকে বিপদকালে রক্ষা করিবার জন্ত, নিজ জীবন পর্য্যন্ত উৎসর্গ করিতে প্রতিজ্ঞাবদ্ধ হন। রাজপুত নারীগণ এই বলয় প্রেরণ করিয়া যাহাকে ইচ্ছা, এই পবিত্র ভ্রাতাভগ্নী সন্মত আবদ্ধ করিতে পারিতেন। মোগল সম্রাট আকবর, জাহাঙ্গির, সাজিহান, এবং আরঙ্গজীব পর্য্যন্তও এই সম্মান লাভ করিয়াছিলেন, এবং এই সন্মত আবদ্ধ হইয়া আপনাদিগকে কৃতার্থ মনে করিয়াছিলেন। আরঙ্গজীব

অত্যন্ত হিন্দু বিদ্বেষী ছিলেন, রাজপুতদিগের প্রতি অত্যন্ত কঠোর অত্যাচার করিতেন; কিন্তু তিনিও পরম আল্লাদের সহিত উদয়পুরের রাজমাতার নিকট হইতে রাখি গ্রহণ করিয়াছিলেন। আরঙ্গজীব তাঁহাকে যে কয়েকখানি পত্র লিখিয়াছিলেন, তাহাতে রাজমাতাকে “ধান্নিকা ভগিনী” বলিয়া সম্বোধন করিয়াছিলেন। এই প্রথার মধ্যে একটু আশ্চর্য্যের বিষয় এই যে, ধর্মভ্রাতা ধর্মভগিনীর জন্য নিজ জীবন উৎসর্গ করিলেও, ধর্মভগিনীর মুখ কখনও দেখিতে পান না। পূর্বে দেখা সাফাং থাকিলেও, এই সম্বন্ধে আবদ্ধ হইবার পর আর দেখা করিবার রীতি নাই। রাখি-বলয় প্রেরণের পর রাজপুত মহিলা আর ধর্মভ্রাতার সহিত সাফাং করেন না; কিন্তু তবুও ইহার কি যে একমোহিনি শক্তি, বড় বড় রাজা সম্রাট-গণও ইহার জন্য লালায়িত হইতেন। যাহার সহিত সদ্ভাব আছে, এই রাখি-বলয় প্রেরণের পর সে সদ্ভাব আরও বাড়িত; যে শত্রু এই রাখি-বলয় প্রেরণের পর সে মিত্র হইত। বিপদের সময় রাজপুত মহিলাগণ শত্রুর নিকট এই বলয় পাঠাইতেন, এবং ইহার এমন শক্তি ছিল যে, যে ভয়ঙ্কর শত্রু সেও শত্রুতা পরিত্যাগ করিয়া, এই পবিত্র ভ্রাতাভগ্নীর সন্মত আবদ্ধ হইত; এবং ভগ্নীর মঙ্গলের জন্য, ভগ্নীকে বিপদ হইতে রক্ষা করিবার জন্ত, জীবন পর্য্যন্ত উৎসর্গ করিতে প্রতিজ্ঞাবদ্ধ হইত।

রাখি-বলয়ের এ শক্তি সামান্য শক্তি নহে। কিন্তু এ কি কেবল সেই বলয়ের—কেবল সেই পশমের একটা সামান্য ডোরের শক্তি? এই সামান্য পশমের ডোরের শক্তিতেই কি শত্রু মিত্র হয়, এবং যে শত্রু ছিল তাহার জন্যই আবার জীবন উৎসর্গ করিতে প্রতিজ্ঞাবদ্ধ হয়!



না; তাহা নহে। এ স্নেহের শক্তি! এ পশমের ডোরের শক্তি নহে;—স্নেহের ডোরের শক্তি— ভ্রাতা ভগ্নীর পবিত্র সম্বন্ধের শক্তি! “রাখি-বন্ধন” এর পরিবর্তে যদি ইহার নাম “স্নেহ-বন্ধন” হইত তাহা হইলেই উপযুক্ত হইত। যাহাদিগকে রাখি-বলয় দেওয়া হয়, তাহাদিগকে “রাখি-বন্ধন ভাই” বলিয়া থাকে; কিন্তু তাহা না বলিয়া “স্নেহ-বন্ধন ভাই” বলিলেই ঠিক হয়। স্নেহদ্বারা যে সকলকেই বশ করিতে পারা যায়; স্নেহদ্বারা যে শত্রুও মিত্র হয়, “রাখি-বন্ধন” তাহার উজ্জ্বল প্রমাণ। শত্রুতার পরিবর্তে শত্রুতা করিও না, শত্রুতা বৃদ্ধি পাইবে। কঠিন কথার পরিবর্তে কঠিন কথা বলিও না, প্রাণে অধিক ব্যথা পাইবে। যে শত্রুতা করিবে তাহাকে স্নেহ করিও, যে কঠিন কথা বলিবে, তাহাকে মিষ্ট কথা বলিও। একটা স্নেহের কথা—একটা মিষ্ট কথার অভাবে, কত সময় কত বিবাদ বিসম্বাদ হয়, কত মনোব্যথা, কত কষ্ট পাইতে হয়। অথচ একটা মিষ্ট কথা বলিতে আমাদের কিছুই আসে যায় না; আমাদের কিছুই খরচ হয় না;—কেবল একটা মুখের কথা; তাহাও আমরা অনেক সময় বলিতে চাই না। কত সময় কত জনকে আমরা কঠিন কথা বলিয়া কষ্ট দি! হৃদয়ের মধ্যে যে স্নেহ ভালবাসা আছে, তাহা হৃদয়ের মধ্যে রাখিবার জন্ত নহে—তাহা অস্ত্রের জন্ত। অস্ত্রকে যত সেই স্নেহ—সেই ভালবাসা দিতে পারিবে, ততই নিজে সুখী হইবে, অস্ত্রও সুখী হইবে। অস্ত্রের দুঃখ কষ্ট দূর করিবার জন্তই মানুষের হৃদয়ে স্নেহ—ভালবাসা বহিয়াছে। অস্ত্রের দুঃখ কষ্ট দূর করা, অস্ত্রকে স্নেহ বিতরণ করা অপেক্ষা সুখ আর নাই। ভ্রাতৃত্বিতীয়াতে যেমন ভাই বোনের স্নেহ নূতন হইয়া উঠে, রাখি-বন্ধনে যেমন ভাই

বোনের সম্বন্ধ স্থাপিত হয়, তেমন কেন রাখি বন্ধনের ত্রায় স্নেহ বন্ধন দিয়া তোমরা সকলকে ভাই বলিয়া গ্রহণ কর না? কত দুঃখী কত অনাথ অসহায় রহিয়াছে, তাহাদিগকে কেন তোমরা স্নেহ বিতরণ কর না? ভ্রাতৃত্বিতীয়াতে বোনের স্নেহে ভাই বশীভূত হয়; রাখি-বন্ধনে শত্রুও বশীভূত হয়; কিন্তু স্নেহ-বন্ধনে সমস্ত পৃথিবী বশীভূত হয়। এই স্নেহ হৃদয়ের মধ্যে আবদ্ধ করিয়া রাখিও না; অস্ত্রকে সুখী করিবার জন্ত—অস্ত্রের দুঃখ কষ্ট দূর করিবার জন্ত, অস্ত্রের চক্ষের জল মুছাইবার জন্ত, কি তোমরা এই স্নেহ বিতরণ করিবে না?



### বিদ্যাসাগরের মহত্ব ।

**প্রশ্ন** খায় তোমরা বিদ্যাসাগর মহাশয়ের জীবনচরিতে পড়িয়াছ যে, তিনি প্রথমতঃ গভর্ণমেন্টের অধীনে চাকরী করিতেন। তাহার পর কোন কারণ বশতঃ চাকরী ছাড়িয়া দিতে বাধ্য হন। এ বহুদিনের কথা। এই সময়ে কি প্রকারে তিনি অজ্ঞাতসারে গভর্ণমেন্টের তহবিল হইতে ৪০০০ চারি হাজার টাকা বেশী লইয়া ছিলেন; এত বৎসর পর্যন্ত

এ বিষয় তিনি কিছুই জানিতেন না। কয়েক দিন হইল “ইণ্ডিয়ান মিরর” নামক দৈনিক সংবাদ পত্র প্রকাশ করিয়াছেন যে, তিনি তাঁহার ঐ সময়ের হিসাব পরীক্ষা করিতে করিতে দেখেন যে, গভর্ণমেন্টের নিকট হইতে ৪০০০ চারি হাজার টাকা বেশী লইয়াছেন। যেই দেখিলেন অমনি শিক্ষা বিভাগের অধ্যক্ষের নিকট এই টাকা ফেরৎ দিবার জন্ত চিঠি লিখিলেন। ডিরেক্টর সাহেব তাঁহার আপীসের খাতাপত্র, হিসাব পরীক্ষা করিয়া বিদ্যাসাগর মহাশয়ের পত্রের উত্তর দিলেন যে, গভর্ণমেন্ট তাঁহার নিকট কিছুই পাইবেন না।

বিদ্যাসাগর মহাশয় কিন্তু ছাড়িবার পাত্র নহেন; তাঁহার নিজের লিখিত জমা খরচে যখন দেনা রহিয়াছে তিনি তাহা অবশ্যই শোধ করিবেন। পুনরায় ডিরেক্টর সাহেবের নিকট পত্র লিখিলেন যে, যখন তাঁহার জমা খরচে অতিরিক্ত টাকা জমা আছে তখন এই টাকা না শোধ করিলে তিনি সন্তুষ্ট থাকিতে পারেন না। ডিরেক্টর সাহেব বেঙ্গল গভর্ণমেন্টের সহিত পরামর্শ করিয়া তবে এই টাকা গ্রহণ করেন।

উপরে যে একটা সত্য ঘটনার উল্লেখ করিলাম তাহা আমাদের অনেকেরই নিকট এখন সেকলে গল্প বলিয়া বোধ হয়। পরের নিকট হইতে ফাঁকি দিয়া দুই পয়সা লইবার ইচ্ছাই যখন দেশের লোকের মধ্যে প্রবল তখন একুপ ঘটনা যে অত্যাশ্চর্য্য, তাহার আর কোন সন্দেহ নাই। সত্যের প্রতি আদর, অর্থাৎ বাহা সত্য তাহা করিতেই হইবে, অজ্ঞানের প্রতি স্নেহ, এই বাহার আছে তিনিই মহৎ। অসত্বপায়ে অর্থোপার্জন করিয়া বড় লোক হওয়া অতি নীচ লোকের কর্ম।


বিদ্যাসাগর মহাশয়ের অনেক সঙ্গুণের কথা তোমরা সখায় পড়িয়াছ, এই আর একটা গুণের কথা প্রকাশ করিলাম।



### পরদেশ-পাখী ।

**উত্তর** প্রাণীদিগের মধ্যে পক্ষী-জাতিই সর্বাপেক্ষা সুন্দর ও শাস্ত স্বভাব। পক্ষীর হিংস্রক নহে; যদিও মাঝে মাঝে শুনিতে পাওয়া যায় যে, ইগলপক্ষী ছোট ছোট ছেলদিগকে নিজের বাসস্থানে লইয়া যায়, কিন্তু বোধ হয় ব্যাঘ্র প্রভৃতি হিংস্র জন্তুর ত্রায় মানুষের প্রাণ বিনাশ তাহাদের উদ্দেশ্য নহে। ইহা ব্যতীত পক্ষীজাতির বিরুদ্ধে অস্ত্র কোন গুরুতর অভিযোগ নাই। বরং অনেক সময়ে আমরা তাহাদের সুমিষ্ট স্বর শুনিয়া এবং সুন্দর আকৃতি দেখিয়া আনন্দ লাভ করি, এবং মনে মনে ঈশ্বরকে শত শত ধন্যবাদ প্রদান করি।

পৃথিবীর সর্বত্রই নানারূপ সুন্দর সুন্দর পাখী আছে। যেখানে অসভ্য লোকের বাস, যে স্থানের লোকেরা সৌন্দর্য্য কি জানে না, সেখানেও জগদীশ্বর নানারূপ সুন্দর ও সুমিষ্ট-স্বরবিশিষ্ট পক্ষী সৃষ্টি করিয়া রাখিয়াছেন। যাহারা ঈশ্বরের সৌন্দর্য্য দর্শন করিয়া তাঁহাকে ধন্যবাদ প্রদান করিতে



শিক্ষা করে নাই—সেখানেও তাঁহার সৌন্দর্য রক্ষিত হইয়াছে। যতই ভ্রমণকারী পণ্ডিতেরা নানা স্থানে গমন করিতেছেন ততই আশ্চর্য্য আশ্চর্য্য বিষয় জানা যাইতেছে। এখনও পৃথিবীতে কতস্থান ইহাদের অজ্ঞাত রহিয়াছে—কালে আরও কত নূতন বিষয় আবিষ্কৃত হইবে কে বলিতে পারে ?

যাহা হউক, আমরা বলিতেছিলাম যে অসভ্য দেশেও অতি সুন্দর সুন্দর পাখী আছে। নিউ-গিনি এবং মলকাস্ দ্বীপে ও তৎনিকটবর্তী স্থানে এক প্রকার সুন্দর পাখী দেখিতে পাওয়া যায়। আমাদের দেশে ময়ূর যেমন সুশোভিত ও সুন্দর ইহারা তদপেক্ষাও অধিক সুন্দর। ইহা-

দিগকে ইংরেজীতে Bird of Paradise বলে। আমরা ইহাকে বাঙ্গালায় “পরদেশ-পাখী” বলিব। \* যখন ইউরোপীয় বণিকেরা সর্ব প্রথমে লবঙ্গ ও জায়ফল প্রভৃতি সুস্বাদু এবং সুগন্ধি মশলার বাণিজ্যার্থে মলকাস্ দ্বীপে গমন করে তখন তাহারা ইহার গুচ্ছ চন্দ্র দেখিয়া বিস্মিত হয় এবং ইহাকে “স্বর্ঘ্যলোক নিবাসী” এই আখ্যা প্রদান করে। তখন তাহাদের বিশ্বাস ছিল যে, এই পাখীর পালক ও পা নাই। ইহার পর একটা ওলন্দাজ পণ্ডিত লাতিন ভাষায় এসম্বন্ধে একটা

\* সংস্কৃত ও বাঙ্গালা “পরদেশ” এবং ইংরাজী Paradise উভয় শব্দই একরূপ; উচ্চারণে যেমন সদৃশ, আদি অর্থেও সেইরূপ। অর্থ—স্বর্গ।

বিবরণ প্রকাশ করেন, তাহাতে তিনি ইহাদিগকে বর্তমান নাম প্রদান করিয়াছেন। সেই হইতেই ইহারা “পরদেশ-পাখী” বলিয়া কথিত হইয়া থাকে।

এপর্য্যন্ত ৩৪ রকমের পরদেশ-পাখীর বিষয় জানা গিয়াছে; তন্মধ্যে কেবল এক প্রকারের চিত্র দেওয়া হইল। এই ৩৪ প্রকারের মধ্যে কাহারও শরীর প্রচুর ও মনোহর পালকে আবৃত; কাহারও বা ময়ূরের মত ২টা কাহারও বা ছয়টা চিত্রিত পালক এবং অল্প কাহারও বা তারের মত স্থম্ম ও সুন্দর ১২টা পালকগুচ্ছ বাহির হইয়াছে।

এই বহুসংখ্যক বিভাগের মধ্যে বাহারা সর্বোপেক্ষা বৃহৎ তাহাদের আকার ১৭।১৮ ইঞ্চি লম্বা। ইহাদের শরীর, পাখা এবং লেজ গাঢ় পিঙ্গল বর্ণে শোভিত। মাথার উপরিভাগ এবং গলদেশ পীত বর্ণের পালকে আবৃত। এই সকল পালক ক্ষুদ্র ক্ষুদ্র, মসৃণ এবং মলমলের স্থায় কোমল। নিম্ন ভাগের পালকগুলি খুব উজ্জ্বল ও সবুজ বর্ণ। ইহাদের শরীরের ছই পাশের পাখার নীচ হইতে দুইটা মনোহর পালক গুচ্ছ বহির্গত হয়। এই গুচ্ছপালক লম্বায় প্রায় দুই ফিট হইয়া থাকে। ইহার রং সোণার স্থায় উজ্জ্বল; পালকগুলি অতি শয় ঘন এবং কোমল। এইরূপ পালক গুচ্ছ কেবল বয়স্ক পুরুষ পাখীদিগের শরীরেই দৃষ্ট হয়। ছানাগুলির কিম্বা তাহাদের মাতার শরীরে এমন সুন্দর পালক নাই। এইখানে আমাদের সঙ্গে ইহাদের সম্পূর্ণ অমিল। মানুষের মধ্যে যুবক যুবতীরাই বেশ ভূষা করিতে অধিক অনুরক্ত এবং বিশেষতঃ স্ত্রীলোকেরাই অলঙ্কারে সজ্জিত হইতে আরও বেশী ইচ্ছা প্রকাশ করিয়া চলেন, কিন্তু ইহাদের মধ্যে সেরূপ নহে। ইহা গুনিয়া অনেক অলঙ্কার প্রিয় পাঠিকারা লজ্জিত হইবেন সন্দেহ নাই।

আর আর পাখীদের স্থায় ইহারাও পালক বদলাইয়া থাকে। তৃতীয়বার পরিবর্তনের সময় এইরূপ সুন্দর পালকগুচ্ছ বহির্গত হয়। পূর্বে বিশ্বাস ছিল যে, কেবল সস্তানোৎপাদনের সময়েই এইরূপ সুন্দর পালক হইয়া থাকে; কিন্তু ওয়ালেস সাহেব পরীক্ষা করিয়া দেখিয়াছেন যে, সে বিশ্বাস ভুল। কেবল মাত্র পরিবর্তনের অল্প সময় ভিন্ন সমুদয় বৎসরই এই পালক গুচ্ছ শোভা পায়।


ইহারা খুব কর্মক্ষম এবং পরিশ্রমী। এই শ্রেণীর পরদেশ-পাখী সর্বদাই প্রায় ভ্রমণ করিয়া থাকে। ইহারা অনেকগুলি একত্রে বাস করে। ইহাদের স্বাভাবিক ডাক “ওয়াক্ ওয়াক্ ওয়াক্ অক্ অক্ অক্।” এই শব্দ গুনিয়া দ্বীপ বাসীরা ইহাদিগকে শীকার করিয়া থাকে। পুরুষ পাখী অপেক্ষাকৃত অল্প পরিমাণে দৃষ্ট হয়।

পরদেশ পাখীর কিঞ্চিৎ পেটুকত্ব দোষ আছে; ফল এবং পোকাই ইহাদের প্রধান খাদ্য। ইহারা ছোট ছোট ডুমুর পাইতে খুব ভাল বাসে।

অত্যাঁচ পাখী ও ইহাদের মধ্যে এক অতি আশ্চর্য্য প্রভেদ লক্ষিত হয়। ইহাদের ডিম কখনও দেখা যায় নাই। ইহারা কিরূপে বাসা নির্মাণ করে এবং কি ভাবেই বা সন্তান প্রসব করে ইহা এপর্য্যন্ত কেহ জানিতে পারে নাই। অনেকের বিশ্বাস, ইহারা ডিম প্রসব করে না।

যদিও গ্রীষ্ম প্রধান দেশ ইহাদের জন্মস্থান, শীতপ্রধান দেশেও ইহারা বাস করিতে পারে। ওয়ালেস সাহেব যখন ইংলণ্ডে যান তখন দুইটা পাখী তাঁহার সঙ্গে ছিল। ইহাদের মধ্যে একটা এক বৎসর এবং আর একটা দুই বৎসর বাঁচিয়া ছিল। ওয়ালেস সাহেব বলেন যে, যদি ইহারা

প্রশস্ত স্থানে বিশুদ্ধ বায়ু সেবন করিতে পারে  
তবে শীত-প্রধান দেশেও ইহাদের দীর্ঘকাল বাঁচি-  
বার সম্ভাবনা আছে।



## জোনাকীর বক্তৃতা।

১

সন্ধ্যাকালে স্তম্ভুর স্বরে  
পাখী এক, গাছের উপরে  
বসিয়া করিছে গান, আনন্দেতে পূর্ণ প্রাণ;  
ক্ষুধা তৃষ্ণা যেন পাখী গিয়েছে তুলিয়া  
আছে স্তম্ভু গানেতে ডুবিয়া।

২

(কিন্তু হায় বিধির নিয়ম!  
এভাবে কাটিবে কতক্ষণ?)  
করিতে করিতে গান, করে পাখী অল্পমান  
'স্তম্ভু গানে তৃপ্ত নহে উদর তাহার  
প্রয়োজন কিঞ্চিৎ আহার।'

৩

সর্বনাশ! এই রাত্রিকালে  
আহার এখন কোথা মেলে?  
মনে ভাবে পাখী "হায়! ভগবান একি দায়,  
কেন এ উদরজ্বালা করিলে সৃজন?  
কোথা করি খাদ্য অন্বেষণ?"

৪

গান তার থেমে গেল হায়!  
সকাতরে চারিদিকে চায়  
অবশেষে থাকি থাকি, সবিস্ময়ে দেখে পাখী  
কি? যেন পাতার মাঝে করে বলমল  
বুঝিল সে "জোনাকীর দল।"

৫

মনে ভাবে "ধন্য ভগবান!  
হলো আজ ক্ষুধার নির্বাণ।"  
জোনাকীর মনে মনে, বিষম প্রমাদ গণে;  
সাহসে করিয়া ভর তবে একজন  
পক্ষী প্রতি বলিল তখন—

৬

"সবে মোরা ঈশ্বর সন্তান  
ছোট বড় সকলি সমান  
তাহারি আদেশ ভরে, তুমি স্তম্ভুর স্বরে,  
গান করি তুষিতেছ সবাকার প্রাণ  
আমরাও আলো করি দান।


৭

"তবে কেন বল অকারণে  
আমাদের বধিবে পরাণে?  
এ আধাঁর রাত্রি কালে, পরস্পরে যদি মিলে  
তুমি স্তম্ভু গান কর, আমি অলো ধরি,  
কি সুন্দর হইবে শরীরী!"

৮

পরামর্শে সায় হলো তার  
অন্ত কোথা মিলিল আহার।  
এই ভাবে পরস্পরে, মিলে সবে কাজ করে,  
কি সুখের হয় তবে পৃথিবী মণ্ডল!  
থাকে না বিরোধ কোলাহল।

## আলেয়া।



এক দিনের কথা। আমার  
বাড়ীতে এক দিন সন্ধ্যার সময়  
ছুই একটা ছেনেবেলার বন্ধুর  
সঙ্গে নদীর ধারে বসিয়া আছি; কুল্ কুল্ করিয়া  
নদী বহিয়া যাইতেছে তাহাই শুনিতেছি;  
আকাশে একটা একটা করিয়া তারা ফুটিয়া  
উঠিতেছে, আর একটা একটা ফুলের নাম  
লইতেছি; আর— তখন বয়স অল্প, মনে কোন  
চিন্তা ছিল না, দুঃখ ছিল না, শোক ছিল না,—  
প্রাণ খুলিয়া কত কি গল্প করিতেছি, আবশ্যক  
না হইলেও কথা বলিতেছি, বিনা কারণেও কত  
বার হো হো করিয়া খুব হাসিয়া উঠিতেছি; এমন  
সময় দেখিলাম, নদীর অপর পারে হঠাৎ একটা  
আগুন জলিয়া উঠিল, কিন্তু তখনই আবার নিভিয়া  
গেল; আবার জলিয়া উঠিল, আবার নিভিয়া  
গেল, এমনিতর ৩৪ বার জলিল, আবার নিভিল।  
যেখানে এই প্রকার আগুন জলিতেছিল, সে  
স্থানটা একটু ভিজে সঁাৎ সঁাৎ মাঠের মত; একটু  
পরে দেখিলাম সেই আগুনটা আবার জলিয়া উঠিল  
এবং সেই সমস্ত মাঠটা যেন দৌড়াইয়া বেড়াইতে  
লাগিল। দেখিয়া ত আমার বড়ই ভয় হইল;  
তার আগের দিন দিদিমার কাছে যে ভূতের গল্প  
শুনিয়া ছিলাম, আমার ত সেই সকল মনে পড়িতে  
লাগিল। গল্প বন্ধ হইল, হাসি থামিয়া গেল;  
ভাবিলাম আজ যদি নিরাপদে বাড়ী ফিরিয়া  
যাইতে পারি, তবে আর সন্ধ্যার সময় কোথাও  
যাইব না। সে কথা যাক্, আমাদের মধ্যে এক  
জন বলিল, "ও ভূত নয়, আমি জানি—ওটা  
আলেয়া।" আলেয়া শুনিয়া একটু সাহস হইল


বটে, কিন্তু ভয় গেল না; কোনমতে মনকে  
প্রবোধ দিয়া সে দিন বাড়ী ফিরিলাম, বৃকের মধ্যে  
ছুপ্ ছুপ্ করিতে লাগিল, পিছনের দিকে আর  
ফিরিয়া চাহিতে সাহস হইল না।

আলেয়া সম্বন্ধে কত অদ্ভুত কথা শুনিতে  
পাওয়া যায়। আলেয়া যে প্রকার জিনিষ  
তাহাতে ইহা দেখিয়া ভয় পাওয়া কিছুই আশ্চর্য  
নয়। আলেয়া কি পদার্থ, ইহা যাহারা না জানে  
তাহারা যে ইহাকে ভূত বলিয়া মনে করিবে,  
তাহা অসম্ভব নয়। ঘোর সন্ধ্যার সময় বা অন্ধ-  
কার রাত্রিতে, একাকী মাঠের মধ্যে বাইবার  
সময়, কেহ কোথায় নাই, হঠাৎ আগুন জলিয়া  
উঠিল, আবার নিভিয়া গেল, আবার জলিয়া  
উঠিল, এবং হয়ত চারিদিকে সেই আগুনটা  
ঘুরিয়া বেড়াইতে লাগিল। ইহা দেখিয়া কাহার  
না ভয় হয়? কোন প্রাণহীন পদার্থের দ্বারা যে  
এপ্রকার কাণ্ড হইতেছে, তাহা মনেই হয় না;  
মনে হয় যেন কোন একটা জীবিত শক্তিরই  
এ কার্য। এই আলেয়া মাঠের মধ্যে, একাকী  
পাইয়া অন্ধকারে কত পথিককে ভয় দেখাইয়াছে,  
কত হতভাগার প্রাণনাশ করিয়াছে! অথচ ইহা  
একটা চেতনহীন, জীবনহীন পদার্থ, কোন শক্তিই  
ইহার নাই।

এই আলেয়া কি? আলেয়া আর কিছুই নহে;  
এক প্রকার বাষ্প ও বাতাসের সংযোগে ইহা  
উৎপন্ন হয়। জীব জন্তুর শরীর এবং বৃক্ষ লতা  
প্রভৃতি পচিলে, তাহা হইতে এক প্রকার বাষ্প  
উঠিতে থাকে; এই বাষ্পের এমন আশ্চর্য গুণ  
যে, ইহাতে বাতাস লাগিলেই, তৎক্ষণাৎ জলিয়া  
উঠে। সচরাচর জলাভূমি এবং শ্মশানেই রাত্রি-  
কালে আলেয়া দেখিতে পাওয়া যায়। কারণ  
শ্মশানেই জীব জন্তু পচিয়া বাষ্প উঠিয়া থাকে, এবং

জলাভূমিতেই বৃক্ষ লতা পচিয়া বাষ্প উঠিয়া থাকে। আর শশানে এবং নির্জল জলাভূমিতে আলেয়া দেখা যায় বলিয়াই, লোকে এত ভয় পায়। আলেয়া অতিশয় চঞ্চল, ইহা এক শূন্য ও এক স্থানে ঠিক থাকে না। মাটি হইতে এক কি দেড় হাত উর্দ্ধে থাকিয়া চারিদিকে চলিয়া বেড়ায়। কখনও ইহার শিখা উপরের দিকে উঠিতে থাকে, কখনও বা আবার মাটির সহিত মিশিয়া যায়; কখনও হঠাৎ নিভিয়া গিয়া, আবার তৎক্ষণাৎ জলিয়া উঠে। কখনও দপ্ দপ্ করিয়া জলিয়া উঠে, কখনও আবার প্রদীপের শিখার ত্রায় ক্ষীণ হইয়া জলিতে থাকে। ইহা জলে নিভে না; বৃষ্টির নম্বরও আলেয়া দেখা গিয়া থাকে। কোন ব্যক্তি আলেয়ার নিকট উপস্থিত হইলে, তৎক্ষণাৎ তাহা সেখান হইতে সরিয়া যায়; ইহাতে লোকে আরও ভয় পায়। ইহার কারণ এই যে, মানুষ যখন চলিতে থাকে, তখন সেই চণার জন্ত সেখানকার বায়ু কম্পিত হয়, বায়ু কম্পিত হইলে, আলেয়াও সেই সঙ্গে কম্পিত হইয়া সরিয়া যায়। পূর্বে আলেয়া কি পদার্থ তাহা জানিতাম না, তাই ভয় পাইতাম, কিন্তু এখন আলেয়া দেখিলে, তাহা লইয়া খেলা করিতে ইচ্ছা হয়। প্রকৃতির মধ্যে এমন অনেক পদার্থ আছে, যাহাদিগের প্রকৃতি জানি না বলিয়া আমরা ভয় পাই, বা কাছে বাইতে দাঁহস করি না। কিন্তু প্রকৃতি জানিতে পারিলে আমরা তাহাদিগকে লইয়া খেলা করিতে পারি। যাহা অতি ভয়ঙ্কর জিনিষ, যাহার স্পর্শে হয়ত মানুষ মরিয়া যায়, প্রকৃতি জানিলে এমন ভয়ঙ্কর জিনিষকেও আমরা খেলার জিনিষ করিতে পারি। আকাশের বিদ্যৎ ধরিয়া মানুষ নিজের কাজে লাগাইতেছে। যত বড় হইবে, যতই জ্ঞান বাড়িবে, ততই দেখিতে পাইবে যে, মানুষ বুজির

বলে প্রকৃতির ভয়ঙ্কর পদার্থ গুলিকে বশীভূত করিয়া, কেমন করিয়া নিজের কাজে লাগাইতেছে,—ভয়ঙ্কর জিনিষ গুলিকে খেলার জিনিষ করিয়া তুলিয়াছে। বিজ্ঞানের সে সকল রহস্য, অবসর মতে তোমাদিগকেও উপহার দিতে বাসনা রহিল।




## ধাঁধা ।

গতবারের ধাঁধার উত্তর ।

১। শূন্য—০।

## নূতন ।

- ১। ত্রিভুবনে খুঁজে যার দেখা কোথা নাই,  
খুঁজিলে আপন মনে তখনি ত পাই।  
হস্ত পদ নাই; কিন্তু নহে নিরাকার।  
যা ভেবেছ তাহা নয়; করহ বিচার।
- ২। পাখা মোর নাই শূন্যেতে বেড়াই  
ভূমণ্ডলে আমি পূজিত সদাই,  
সূর্যের কৃপায় জনম আমার,  
কিন্তু মন কাছে পরাজয় ভার।  
মম কৃপা বিনা অন্ন মেলা ভার  
পার কি বলিতে কি নাম আমার ?



নভেম্বর, ১৮৮৭।

## গ্রান্ডিল সার্প ।

এক অতি সামান্য ঘটনার কত সময় কত মহৎ কার্যের সূত্রপাত হয়, পর পৃষ্ঠার চিত্রটি তাহার একটা উজ্জল দৃষ্টান্ত। এই প্রকার সামান্য ঘটনা হরত প্রতিদিনই আমাদের চক্ষে পড়িতেছে; আমরা কিন্তু তাহা দেখিয়াও দেখি না। কিন্তু এক এক জন এমন লোক আছেন, যাহাদিগের হৃদয় এই সকল এক একটা অতি সামান্য ঘটনায় অতিশয় বিচলিত হইয়া উঠে;—এক একটা অতি সামান্য ঘটনার তাঁহাদিগের জীবনে কত পরিবর্তন উপস্থিত হয়, কত মহৎ কার্যের সূত্রপাত হয়। জগতে যত বড় বড় কাজ, তাহা ইহাদিগের দ্বারাই হইয়াছে। ইহাদিগের মধ্যে অনেকেই আবার সামান্য অবস্থার লোক ছিলেন। অনেকের বিশ্বাস যাহার ধন সম্পত্তি নাই, সহায় সম্পদ নাই, উচ্চপদ নাই, তাহার দ্বারা কোন বড় কাজ হইতে পারে না। এই সংস্কার অনেকের উন্নতির পথের বিঘ্ন। আমরা দেখিয়াছি, জগতের অনেক মহৎ কাজের সূত্রপাত সামান্য অবস্থার লোকদিগের দ্বারাই হইয়াছে। আজ আমরা যাহার সংক্ষিপ্ত জীবনী পাঠক পাঠিকা-দিগকে উপহার দিব, তাঁহার জীবন ইহারই

একটা উজ্জল দৃষ্টান্ত। মহাত্মা গ্রান্ডিল সার্প সামান্য অবস্থার লোক হইয়াও, কি এক মহৎ কার্য করিয়া গিয়াছেন, আমরা আজ তাহাই দেখাইব।

গ্রান্ডিল সার্প ধনী সন্তান ছিলেন না। তাঁহার পিতামহ এবং পিতা উভয়েই ধর্ম বাজক ছিলেন। ইহাদিগের ধন সম্পত্তি ছিল না; কিন্তু চরিত্র, ধর্মভাব, দয়া, পরোপকার প্রভৃতির জন্ত ইহারা প্রসিদ্ধ ছিলেন। সার্প টাকা কড়ি না পাইলেও, পিতা পিতামহের এই সকল সদগুণের—এই সকল অমূল্য সম্পত্তির উত্তরাধিকারী হইয়া ছিলেন। অর্থাভাবে উপযুক্তরূপ লেখা পড়া শিক্ষা হয় নাই; সূত্রাং জীবিকা নির্বাহের জন্ত তাঁহাকে অতি সামান্য কার্যে নিযুক্ত হইতে হইয়াছিল। যে দাসত্ব প্রথা উন্মূলিত করিয়া, ক্লার্কসন, উইলবারফোর্স, বাক্সটন, ক্রহাম প্রভৃতি মহাত্মাদিগের নাম চিরস্মরণীয় হইয়া রহিয়াছে, দরিদ্র সন্তান সার্পই তাঁহাদিগের পথ প্রদর্শক। গ্রান্ডিল সার্প সেই সামান্য কার্যে নিযুক্ত থাকিয়াই, এই মহৎ কার্যের প্রথম সূত্রপাত করেন।

সার্প পনের বৎসর বয়সের সময় একজন বঙ্গ ব্যবসায়ীর নিকট শিক্ষা নবিশ নিযুক্ত হন। তার পর একটা কাপড়ের কলে কিছুদিন কাজ করেন। কিন্তু সে কাজ ভাল না লাগায় অল্পদিন পরেই তাহা পরিত্যাগ করিয়া গভর্ণমেণ্টের কোন আফিসে



কেরাণীর কার্যে নিযুক্ত হন। এই সামান্য কেরাণীর কার্যে নিযুক্ত থাকিয়া সার্প কি প্রকারে এমন একটা মহৎ কার্যের অনুষ্ঠান করিয়াছিলেন, ভাবিলে অবাক হইতে হয়। তাঁহার অসাধারণ অধ্যবসায়ের অসাধারণ সফলতা ছিল। একদিন এক ব্যক্তির সহিত সার্পের তর্ক হয়, তাহাতে সেই ব্যক্তি বলেন, যে গ্রীক ভাষা না জানাতে তিনি বাইবেলের কোনও কোন অংশ ঠিক বুঝিতে পারেন নাই। সার্প আর দ্বিধা করিলেন না; সেই মুহূর্ত্তে গ্রীক ভাষা শিখিবার জন্ত মনস্ত করিলেন, এবং অতি অল্পদিনের মধ্যেই গ্রীক এক প্রকার আয়ত্ত করিয়া লইলেন। একজন ইহুদীর সহিত তাঁহার এই প্রকার ধর্ম সম্বন্ধে

তর্ক হওয়াতে, ছুন্নহ হিব্রু ভাষা তাহাতে শিখিতে হয়।

সার্পের জীবনী পড়িলে আমরা দেখিতে পাই যে, মানুষের উপর প্রেম, দয়া, পরোপকার প্রভৃতি তাঁহার হৃদয়ে অত্যন্ত অধিক ছিল। এবং ইহা ছিল বলিয়াই তিনি অতি সামান্য অবস্থার লোক হইয়াও এত বড় কাজের অনুষ্ঠান করিতে পারিয়াছিলেন। ১৭৬৫ সালে একটা ঘটনা হয়; দাসত্ব প্রথার ইতিহাসে সেইটা বিশেষ দিন। গ্রান্ডিল সার্পের ভ্রাতা উইলিয়ম সার্প অস্ত্র চিকিৎসক ছিলেন; তিনি প্রতিদিন প্রাতঃকালে বিনা ব্যয়ে দরিদ্রদিগকে চিকিৎসা করিতেন। সার্প একদিন দেখিলেন যে, একজন লোক লাঠির

উপর ভর করিয়া কোনমতে সেই চিকিৎসালয়ের দিকে যাইতেছে। রোগে তাহার শরীর শীর্ণ হইয়াছে, চলিবার শক্তি নাই, দৃষ্টিশক্তিও এক প্রকার নাই বলিলেই হয়। ইহার রোগজীর্ণ শরীর, ইহার মগ্ন মুখ এবং ছুরবস্থা দেখিয়া সার্প হৃদয়ে বড় ব্যথা পাইলেন। এই হতভাগ্যের ক্লেশ ও যন্ত্রণা দেখিয়া সার্প আর স্থির থাকিতে পারিলেন না। তিনি তাহাকে উইলিয়মের চিকিৎসালয়ে লইয়া গেলেন, এবং অত্যন্ত যত্নের সহিত তাহার চিকিৎসা করাইতে লাগিলেন। সার্প বলিলেন যে, সে ব্যক্তির নাম জোনাথান ব্রুন্স; জোনাথান আফ্রিকা দেশবাসী। একজন উকীল তাহাকে ক্রয় করিয়া ইংলণ্ডে লইয়া আসিয়াছে। কঠিন পরিশ্রম, অনাহার এবং তাহার প্রভুর অত্যাচারে, সে একেবারে মৃতপ্রায় হইয়া পড়িয়াছে। যতদিন কার্য্য করিবার শক্তি ছিল, ততদিন প্রভুর বাড়ীতেই ছিল; এখন কার্য্য করিতে অক্ষম দেখিয়া তাহার প্রভু তাহাকে বাড়ী হইতে তাড়াইয়া দিয়াছে। জোনাথান পথের ভিখারী হইয়াছে; তাহার মাথা রাখিবার স্থানটা নাই। কিন্তু কঠিনহৃদয় মানুষ এই ঐসময়ে তাহাকে পথের ভিখারী করিলেও, ঈশ্বর তাহার উপায় করিলেন। সার্প তাঁহার ভ্রাতার চিকিৎসালয়ে তাহাকে আশ্রয় দিয়া, যত্নের সহিত তাহার চিকিৎসা করাইতে লাগিলেন। উভয় ভ্রাতার যত্নে জোনাথান ক্রমে রোগমুক্ত হইতে লাগিল; এবং অল্পকাল মধ্যেই সম্পূর্ণ সুস্থ হইল। সার্প কিছুদিন তাহাকে নিজ গৃহে রাখিয়া পরে একজন ডাক্তারের বাড়ীতে কার্যে নিযুক্ত করিয়া দিলেন। জোনাথান স্বাধীনভাবে কাজ করিয়া সুখে দিনপাত করিতে লাগিল। জোনাথান এই কার্যে প্রায় দুই বৎসর নিযুক্ত ছিল; কিন্তু

তাঁহার সে সুখ অধিক দিন রহিল না। একদিন পূর্ক প্রভু দেখিলেন যে, জোনাথান রোগমুক্ত হইয়াছে; এবং সম্পূর্ণ সুস্থ হইয়া স্বাধীনভাবে জীবিকা উপার্জন করিতেছে। জোনাথান এখন কর্মক্ষম হইয়াছে দেখিয়া, তিনি তাহাকে পুনর্বার পাইবার জন্ত উৎসুক হইলেন; এবং যে ডাক্তারের গৃহে জোনাথান নিযুক্ত ছিল, তাঁহার নিকট এই বলিয়া ভয় দেখাইয়া পত্র লিখিলেন যে, তিনি জোনাথানকে যদি পরিত্যাগ না করেন, তাহা হইলে তাঁহার নামে রাজদ্বারে অভিযোগ উপস্থিত করিবেন। জোনাথান তাঁহার ক্রীতদাস, স্মরণে তাঁহারই সম্পত্তি, তাহাতে আর কাহারও অধিকার নাই। জোনাথানের প্রভু তাহাকে পরিত্যাগ করিলেন। জোনাথান মহা সঙ্কটে পড়িল। স্বাধীনভাবে জীবিকা উপার্জন করিয়া সে সুখে দিন কাটাইতেছিল; আহার সেই অত্যাচার সেই ভয়ঙ্কর যন্ত্রণার মধ্যে পড়িতে হইবে, এই চিন্তায় তাহার হৃদয় শুকাইয়া গেল। একদিন জোনাথানের পূর্ক প্রভু পুলিশের সাহায্যে তাহাকে হস্তগত করিয়া, ইংলণ্ড হইতে অল্প কোন স্থানে পাঠাইয়া দিবার জন্ত গোপনে কারারুদ্ধ করিয়া রাখিলেন; জোনাথান চারিদিক অন্ধকার দেখিতে লাগিল। অনেক ভাবিয়া সে এক উপায় স্থির করিল; জোনাথান গ্রান্ডিল সার্পের দয়া বিস্মৃত হয় নাই।

গ্রান্ডিল সার্পের দয়াই যে তাহার জীবন রক্ষা হইয়াছিল, এবং তাঁহার অনুগ্রহেই যে, সে স্বাধীনভাবে কাজ করিয়া সুখে দিন কাটাইতেছিল, তাহা জীবনে সে কখনও ভুলে নাই। সে জানিত সার্প অতিশয় দয়াগু—পরোপকারী; অস্ত্রের ছুঁখ দূর করিবার জন্ত তিনি সততই ব্যস্ত। জোনাথান তাঁহাকে এই সমস্ত কথা

জানাইবার জন্ত, এক পত্র লিখিল। সার্প পত্র পাইয়াই, অনুসন্ধান করিবার জন্ত একজন লোক পাঠাইলেন, কিন্তু সে ব্যক্তি কিছুই জানিতে পারিল না; কারারক্ষক সমস্তই অস্বীকার করিল। সার্পের ইহাতে অত্যন্ত সন্দেহ হইল; তখন তিনি নিজেই কারাধ্যক্ষের নিকট গেলেন। কারাধ্যক্ষ নিতান্ত অনিচ্ছা সত্ত্বেও তাঁহাকে প্রবেশ করিতে দিতে বাধ্য হইলেন। সার্প দেখিলেন কারাগারের মধ্যে জোনাথান পড়িয়া রহিয়াছে, তাহার হস্ত পদ শৃঙ্খলে আবদ্ধ। জোনাথানের এই দুর্দশা দেখিয়া সার্পের হৃদয় ব্যথিত হইল; তিনি কারাধ্যক্ষকে বলিলেন যে, কর্তৃপক্ষদিগের অনুমতি ভিন্ন ঐ ব্যক্তিকে যেন কারাগার হাতে না দেওয়া হয়; এই বলিয়া তৎক্ষণাৎ যাইয়া, যাহারা রাজাজ্ঞা বাতীত জোনাথানকে আবদ্ধ করিয়াছিল, তাহাদিগের নামে অভিযোগ উপস্থিত করিলেন। রীতিমত মোকদ্দমা চলিল, এবং অবশেষে জোনাথান মুক্তলাভ করিল। সার্প উৎফুল্ল হৃদয়ে, দর্পের সহিত জোনাথানের হাত ধরিয়া বিচারালয় হইতে বাহির হইলেন, কেহ তাঁহার নিকটে যাইতেও সাহস করিল না।

কিন্তু এ ব্যাপার এই খানেই শেষ হয় নাই। জোনাথানের প্রভু তাহাকে পাইবার জন্ত পুনরায় চেষ্টা করিতে লাগিলেন; এবং এই জন্ত রাজদ্বারে মোকদ্দমারও বন্দোবস্ত করিলেন। কিন্তু গ্রানভিল সার্পও তাহাতে ভীত হইলেন না। যতই নূতন নূতন বিপদ উপস্থিত হইতে লাগিল, ততই যেন তাঁহার উৎসাহ, তাঁহার তেজ বাড়িতে লাগিল। দাসত্ব প্রথার উচ্ছেদের জন্ত তিনি যে সংকল্প করিয়াছিলেন, কিছুতেই তাঁহাকে তাহা হইতে বিচলিত করিতে পারিল না।

ইংলণ্ডের সেই সময়ের অবস্থা একবার চিন্তা

করিলে, সার্পের প্রকৃত মহত্ত্ব বুঝিতে পারা যায়। No slave can breathe in England;—ইংলণ্ডে ক্রীতদাস থাকিতে পারিবে না, যে মুহূর্ত্তে একজন ক্রীতদাস ইংলণ্ডে পদার্পণ করিবে, সেই মুহূর্ত্তেই সে স্বাধীন হইবে; এ সকল কেবল কথার কথা ছিল। বিজ্ঞ, বুদ্ধিমান এবং পদস্থ ব্যক্তিরও এই ঘৃণিত দাস ব্যবসায় অনুমোদন করিতেন। যাহারা আইনজ্ঞ তাঁহারাও ইহার পোষকতা করিতেন। তখন রীতিমত দাস ব্যবসায় প্রচলিত ছিল, প্রধান প্রধান সংবাদপত্রে ব্যবসায়ের বিজ্ঞাপন প্রকাশিত হইত; পলাতক দাসদিগকে অনুসন্ধান করিয়া দিতে পারিলে, তাহার জন্ত পুরস্কার দানের কথা বিজ্ঞাপন দেওয়া হইত; এক কথায় মানুষকে পশুর ন্যায় দেখা হইত—পশুর ন্যায় মানুষকে লইয়া ব্যবসা করা হইত। এই হতভাগ্য দাসদিগের প্রতি যে কি নিষ্ঠুর ব্যবহার করা হইত, কি ভয়ঙ্কর অত্যাচার ইহাদিগের প্রতি হইত, তাহা ভাবিলেও হৃদয় কাঁপিয়া উঠে। দাস প্রভুগণ ইহাদিগকে মানুষ বলিয়া মনে করিতেন না; ইহাদিগেরও যে রক্ত মাংসের শরীর—ইহাদিগেরও যে ছুঁখ কষ্ট বোধ করিবার শক্তি আছে, তাহা তাঁহারা মনে করিতেন না; যতদিন কার্য্য করিবার শক্তি থাকিত, ততদিন প্রভুর গৃহে ইহারা স্থান পাইত; যখন রোগে অকর্ম্মণ্য হইয়া পড়িত, তখন প্রভু গৃহ হইতে তাড়াইয়া দিতেন; হতভাগারা, বিনা চিকিৎসায় অনাহারে পথে পথে ফিরিয়া, অবশেষে জীবন হারাইত। সমস্ত ইংলণ্ডের লোক তখন এই ঘৃণিত ব্যবসায়ের পোষকতা করিত। দাসদিগের দুর্দশা দূর করিবার জন্ত, সার্পকে একাকী সমস্ত ইংলণ্ডের বিরুদ্ধে দাঁড়াইতে হইয়াছিল;—যাহাদিগের ধন সম্পদ আছে, বুদ্ধি বিদ্যা আছে, উচ্চপদ আছে, তাঁহারা কেহই এ

কার্য্যে প্রথমে সার্পের সহায় হন নাই। বরং তাঁহারা সার্পের বিপক্ষে ছিলেন; গ্রানভিল সামান্য কেরাণী হইয়াও, একাকী ইহাদিগের বিরুদ্ধে দাঁড়াইয়াছিলেন; ইহা কি সামান্য সাহসের কথা?

সার্প আত্মরক্ষার জন্ত যে সমস্ত আইনজ্ঞ ব্যক্তিদিগের পরামর্শ লইতে গিয়াছিলেন, তাঁহারা সকলেই সার্পকে একাধা হইতে বিরত হইতে বলিলেন। এক জন কৃত দাস ইংলণ্ডে আসিলেই যে স্বাধীন হইল, এ বিষয়ে তাঁহারা ঘোর সন্দেহ প্রকাশ করিতে লাগিলেন। সার্প আর উপায় না দেখিয়া নিজেই আইন পড়িতে সংকল্প করিলেন। এবং ক্রমাগত দুই বৎসর কাল কঠিন পরিশ্রম ও অধ্যবসায়ের সহিত আইন পড়িতে লাগিলেন। আইন পড়িবার জন্ত সার্প দিনের মধ্যে বেশী সময় দিতে পারিতেন না, সুতরাং তাঁহাকে এই দুই বৎসরকাল আইন পড়িবার জন্ত খুব আধিক রাত্রি জাগরণ করিতে হইত। এই দুর্লভ কার্য্যে তাঁহাকে উপদেশ বা সাহায্য করে, এমন এক জন লোকও ছিল না। দুই বৎসরের কঠিন পরিশ্রমের পর তাঁহার চেষ্টার ফল ফলিল। সার্প ইংলণ্ডের আইন তন্ন তন্ন করিয়া পড়িয়াছিলেন; কোথাও দাস ব্যবসায়ের পরিপোষক কথা পান নাই। বরং ইংলণ্ডে দাস প্রথা চলিতে পারে না, ইহারই প্রমাণ পাইলেন, তখন তাঁহার হৃদয় আনন্দে পরিপূর্ণ হইল, যে কার্য্যের জন্ত তিনি জীবন উৎসর্গ করিয়াছিলেন, তাহা সফল হইল দেখিয়া তিনি আনন্দে বলিয়া উঠিলেন “ঈশ্বর ধন্য হউন, আমি ইংলণ্ডের আইন তন্ন তন্ন করিয়া অনুসন্ধান করিয়া দেখিলাম দাস ব্যবসায়ের পরিপোষক কথা ইহার কোন স্থানেই নাই।” সার্প অনুসন্ধান

করিয়া যে সমস্ত প্রমাণ সংগ্রহ করিয়াছিলেন, অল্পদিন পরেই তাহা পুস্তকাকারে হাতে লিখিয়া সেই সময়ের বড় বড় আইনজ্ঞ ব্যক্তিদিগের নিকট পাঠাইলেন। ১৭৬৯ সালে তাহা মুদ্রিত হয়; যখন মুদ্রিত হয় নাই, সার্প হাতে লিখিয়াই বিতরণ করিয়াছিলেন, বোধ হয় অর্থাভাবই তাহার কারণ। ইহাদ্বারা আশ্চর্য্য ফল ফলিল;—ইংলণ্ডের লোকের এত দিনের মত ইহাদ্বারা পরিবর্তিত হইল। জোনাথানের প্রভু আর মোকদ্দমা করিতে সাহস করিলেন না; এবং অবশেষে মোকদ্দমা উপস্থিত না করার দরুণ তিন গুণ খরচ দিয়া অব্যাহতি পাইলেন। জোনাথান দাসত্ব হইতে মুক্ত হইয়া চিরজীবনের জন্ত স্বাধীনতা পাইল।

কিন্তু এপর্য্যন্তও বিচারালয় হইতে এই দাসত্ব প্রথা সশব্দে একটা স্থির মীমাংসা হয় নাই। সার্প দেখিলেন বিচারালয় হইতে ইহার একটা স্থির মীমাংসা হওয়া আবশ্যিক। এমন সময়ে জেমস স্মারলেট নামক আর এক জন ক্রীত দাসকে লইয়া মোকদ্দমা উপস্থিত হইল। তখনকার ইংলণ্ডের প্রধান বিচারপতি লর্ড মানস্ফিল্ড গ্রানভিল সার্পের মত ও পরামর্শ লইয়া এই মোকদ্দমারই দাসত্ব প্রথা সশব্দে একটা চূড়ান্ত নিষ্পত্তি করিবেন, সংকল্প করিলেন। ২৪ শে জানুয়ারী হইতে ২২ শে জুন পর্য্যন্ত, ছয় মাস কাল এই মোকদ্দমা চলিল। মোকদ্দমার বিশেষ বিবরণ এখানে উল্লেখ অনাবশ্যিক। অবশেষে ২২ শে জুন লর্ড মানস্ফিল্ড এই মোকদ্দমার রায় দিলেন; এই মোকদ্দমা উপলক্ষে যে রায় দিলেন তাহাতে তিনি স্পষ্টই প্রকাশ করিলেন যে, দাসত্ব প্রথা ইংলণ্ডে কখনই থাকিতে পারে না; এবং ইংলণ্ডের আইনের দ্বারা ইহা কখনই সমর্থন করা

যায় না। এই সার প্রকাশিত হইলে সার্প লিখিতেছেন; “লর্ড মানস্ফিল্ডের বিচারে এত দিন পরে আজ ইহাই প্রতিপন্ন হইল যে ইংলণ্ডে দাস থাকিতে পারে না, যে মুহূর্ত্তে এক জন ক্রীত দাস ইংলণ্ডে পদার্পণ করিবে, সেই মুহূর্ত্তেই সে স্বাধীনতা লাভ করিবে।” জেমস্ সমারসেট মুক্তি পাইল; সেই দিন হইতে দাসত্ব প্রথা আইন বিরুদ্ধ বলিয়া প্রতিপন্ন হইল; সার্পের ঐকান্তিক যত্ন এবং জীবন ব্যাপী চেষ্টার ফল ফলিল; এত দিনে তাঁহার মনস্কামনা সিদ্ধ হইল।

সার্প এপর্যন্তও পূর্বের সেই কার্যে নিযুক্ত ছিলেন, কিন্তু গভর্নমেন্ট আমেরিকার উপনিবেশগুলির সহিত অগ্রায় যুদ্ধে নিযুক্ত হইলেন দেখিয়া সার্প কন্ম পরিত্যাগ করিতে বাধ্য হইলেন। গভর্নমেন্ট এপ্রকার অগ্রায়—এপ্রকার অধর্মের কার্যে লিপ্ত হইলেন দেখিয়া সে কার্যের সহিত আর কোন মতে সংশ্লিষ্ট রাখিতে পারিলেন না। এই কার্য পরিত্যাগ করিয়া তিনি একবারে পথের ভিখারী হইলেন; কারণ দাসত্ব প্রথা উঠাইয়া দিবার জন্ত তিনি এক বারে সর্বস্বান্ত হইয়াছিলেন। কিন্তু অগ্রায় অধর্মের কার্যে লিপ্ত থাকিয়া জীবিকা নির্বাহ করা অপেক্ষা অনাহারে দিনপাত করা তিনি শ্রেয় মনে করিলেন।

ক্রমে গ্রান্ডিল সার্পের বয়স অধিক হইল; কিন্তু তাঁহার কার্যের বিরাম নাই। দয়া ও পরোপকার প্রভৃতি তাঁহার হৃদয়ে খুব অধিক ছিল, তিনি কি নিরস্ত থাকিতে পারেন? ইংলণ্ডে সেই সময় নাবিকের কার্য করিবার জন্য বলপূর্বক লোকদিগকে ধরিয়া লইয়া যাইত; পার্লিয়ামেন্টে যাহাতে ইহার বিরুদ্ধে নিয়ম হয়, সার্প তাঁহার জন্য ঐকান্তিক যত্ন করিতে লাগিলেন; এবং এসম্বন্ধে একখানি ক্ষুদ্র পুস্তক লিখিলেন।

১৭৮৭ সালে নিগ্রো দাসত্ব উঠাইয়া দিবার জন্য এক সভা স্থাপন করিলেন। ব্রিটিশ এবং ফরেন বাইবেল সোসাইটির সভার প্রথম সভাপতি হন। ১৮১৩ সালে পোপের অত্যাচার হইতে ধর্ম সম্বন্ধে স্বাধীনতা রক্ষা করিবার জন্য এক সভা হয়, সার্প অত্যন্ত উৎসাহের সহিত এই কার্যে যোগ দেন। কিন্তু সার্পের জীবনের প্রধান কার্য দাসত্ব প্রথার উচ্ছেদ সাধন। ক্লার্কসন, উইলবার ফোর্স, ব্রহ্ম প্রভৃতি তাঁহারই প্রদর্শিত পথে চলিয়াছিলেন; তাঁহারই পদচিহ্ন অনুসরণ করিয়া তাঁহারই এই স্বনিজ দাসত্ব প্রথা উঠাইয়া দিতে পারিয়াছিলেন। ইহাঁদিগের চেষ্টায় ১৮০৭ সালে পার্লিয়ামেন্ট হইতে দাস ব্যবসায় বে-আইনী বলিয়া প্রচারিত হইয়াছিল, এবং ১৮৩৩ সালে ইংলণ্ডের যত দাস মুক্তি লাভ করিল। এ সকল সার্পেরই চেষ্টার ফল। ক্রমে সার্পের শেষদিন আসিয়া উপস্থিত হইল। তাঁহার কর্তব্য শেষ হইল—তিনিও সংসার হইতে বিদায় লইলেন। ১৮১৩ সালে ১৬ই জুন বেলা চারিটার সময় তাঁহার শরীর অবসন্ন হইয়া পড়িল, ধীরে ধীরে তিনি নিদ্রিত হইয়া পড়িলেন, সেই নিদ্রাই তাঁহার চিরনিদ্রা হইল! রোগ বন্ত্রণা বা অন্য কোন শারীরিক ক্লেশ তাঁহাকে পাইতে হয় নাই। মৃত্যুর সময় তাঁহার বয়স ৭৮ বৎসর হইয়াছিল। জীবনের শেষদিন পর্যন্ত তিনি পরোপকার ব্রতে নিযুক্ত ছিলেন। গ্রান্ডিল সার্পের জীবনী আমরা শেষ করিলাম। সামান্য অবস্কার লোক হইয়াও জগতে কত মহৎ কার্য করিতে পারা যায়, ইহার জীবন তাহার অতি উজ্জ্বল দৃষ্টান্ত।

( প্রাপ্ত । )

## বালক বালিকাদের হাসিমুখ ।




মরা সকলেই আমাদের প্রিয় ভাই ভগিনী! তোমাদের মুখে সর্বদা হাসি দেখিতে আমাদের বড়ই সাধ।

তোমরা সুখে থাকিলেই তোমাদের হাসিমুখ আমরা দেখিতে পাইতে পারি এবং আমরাও সুখী হইতে পারি। বাড়ীর ছেলে মেয়েদের আনন্দ দেখিলে বাড়ীর সকলেরই আনন্দ হয়, সকলেরই কষ্ট দূরে যায়। তাই বলি প্রিয় পাঠক পাঠিকাগণ! সুখে থাকিবার জন্ত তোমাদের চেষ্টা করা উচিত। এইটুকু পড়িয়াই বুঝি কেহ মনে করিতেছে তবে সর্বদাই বৃথা আমোদে কাটাইবে, খেলা করিবে, তবেই সুখী হইতে পারিবে। বাস্তবিকই কি তাহা হইলে সুখে থাকা যায়? একদিন সুধু আমোদে ও খেলায় কাটাইয়া দেখিও কেমন বোধ হয়। নিশ্চয়ই আমোদের সময় চলিয়া গেলে মনটা ভাল লাগিবে না, মনে হইবে সময়গুলি ভাল গেল না। কেহ হয়ত ভাবিতেছে “টাকা না হইলে সুখী হওয়া যায় না, আমাদের টাকা নাই আমরা কেমন করিয়া সুখী হইব?” তোমাকেও জিজ্ঞাসা করি বাস্তবিকই কি তাই? তবে কত ধনীদেব দেখিতে পাওয়া যায় যে, কত সময় গালে হাত দিয়া বসিয়া ভাবিতেছে, সর্বদাই মনে দুশ্চিন্তা। অনেক সময় কৃষকদের দেখিয়া বলে “উহারাই সুখী”। তবে আর ধনে সুখ কোথায়? কিন্তু তোমরাই ভাবিয়া দেখত কোন্ দিনটা তোমাদের বেশ ভাল গিয়াছে বলিয়া মনে হয়।

আমি নিশ্চয় বলিতে পারি যেদিন স্কুলে বেশ পড়া দিতে পারিয়াছ যেদিন মাষ্টার মহাশয়ের প্রত্যেক প্রশ্নের ভাল উত্তর দিতে পারিয়াছ—যেদিন সমপাঠীদের সঙ্গে কিম্বা বাড়ীর কোন ছেলেপিলের সঙ্গে ঝগড়া কর নাই, সেই দিনটাই তুমি সুখে কাটাইয়াছ বলিয়া মনে হইতেছে। কিন্তু যে দিন তোমার পড়া প্রস্তুত হয় নাই সে দিনকার কথা ভাবিয়া দেখত? সেদিন একেবারেই তোমার স্কুলে যাইতে ইচ্ছা হয় নাই—পিতা মাতার ভয়ে যাইতে হইলেও কত ভয়ে ভয়ে গিয়াছ—এবং স্কুলে যাইয়াও স্থির থাকিতে পার নাই—ভয়ে ভয়ে তখন তাড়াতাড়ি একবার পড়াটা দেখিবার চেষ্টা করিয়াছ—সময় অল্প এবং অত্যন্ত ব্যস্ততার সহিত দোখিয়াছ তাই পড়া কিছুই প্রস্তুত করিতে পার নাই—শিক্ষক মহাশয় আসিয়া মন্দ বলিয়াছেন, মনে কষ্টও পাইয়াছ। আবার দেখ যে দিন কাহারও সঙ্গে ঝগড়া করিয়াছ সে দিনটাও ভাল যায় নাই। যতক্ষণ রাগ ছিল ততক্ষণ কেবল প্রতিশোধ লইবার জন্তই ব্যস্ত ছিলে তাই মনটা একটুও স্থির ছিল না—আবার রাগ খামিয়া গেলে রাগ করিয়াছ বলিয়া মনে বড় কষ্ট পাইয়াছ। তবেই দেখিলে তোমাদের যাহা যাহা করা উচিত ও আবশ্যিক তাহা যত অধিক যেদিন করিয়াছ সেইদিনই তুমি তত অধিক সুখী হইয়াছ। তাই বলি, প্রত্যহ স্কুলের পড়াটি ভাল করিয়া প্রস্তুত করিও, সকলের সঙ্গে ভাল ব্যবহার করিও, বাড়ী আসিয়া মাকে বিরক্ত করিও না, কিন্তু ভাল জিনিষ পাইলে হিংস্রক ছেলেটার মত কেবল নিজে রাখিও না, অগ্রায় ভাই ভগিনীদের ভাগ করিয়া দিও, একটীও মিথ্যা কথা বলিও না, বৈকালবেলা একটু বেড়াইও কিম্বা খেলা করিও—তবেই দেখিবে মন এবং

শরীর কেমন ভাল থাকে। তাহা হইলেই দেখিবে সকলে তোমাদের কত ভাল বাসিবে। এইরূপে দিনটি কাটাইলে রাত্রিতে শুইতে যাইবার সময় আপনা আপনিই তোমার মন কেমন ভাল লাগিবে—মনে হইবে ‘দিনটা কেমন ভাল গেল।’ তবেই তোমাদের হাসিমুখ আমরা সর্বদা দেখিতে পাইব—এবং সুন্দর সুন্দর সুগন্ধি ফুলগুলিকে যে দেখে সেই যেমন আদর করে তোমাদেরও আমরা তেমন করিব। ঈশ্বর করুণ সর্বদা তোমাদের মুখে সরল হাসি ফুটিয়া থাকুক।



## ঠগী।

**ছেলেবেলা** দিদিমার কাছে বর্গীর হাঙ্গামা এবং ঠগীদিগের সম্বন্ধে অনেক গল্প শুনিতাম। এই সকল গল্প—বিশেষতঃ ঠগীদিগের সম্বন্ধে যে সকল গল্প শুনিতাম, তাহাতে মনের মধ্যে কেমন একটা ভারি ভয় এবং বিস্ময়ের উদয় হইত। ঠগীদিগের বিষয় ভাল করিয়া জানিবার জন্ত আমার একটা ভারি কৌতূহল ছিল। ঠগীদিগের সম্বন্ধে গভর্ণমেন্টের রিপোর্ট এবং কর্ণেল সুম্যান প্রভৃতির গ্রন্থ পড়িলে কৌতূহল অনেকটা পরিতৃপ্ত হয়। আমার ছাত্র সখার পাঠক পাঠিকাদিগের মধ্যেও কাহারও কাহারও ঠগীদিগের বিষয় জানিবার জন্ত কৌতূহল থাকিতে পারে তাই আমরা সংক্ষেপে ঠগীদিগের বিবরণ লিখিয়া সে কৌতূহল নিবারণ করিতে চেষ্টা করিব।

ঊনবিংশ শতাব্দীর এই শেষ ভাগ;— এই ঊনবিংশ শতাব্দীর প্রথম সময়ে ভারত-বর্ষের প্রায় সর্বত্রই ঠগীদিগের ভীষণ অত্যাচার এবং প্রবল প্রতাপ ছিল। আজ ইংরাজ রাজত্বের প্রভাবে দস্যুভয় প্রভৃতি একপ্রকার নাই বলিলেই হয়, কিন্তু পঞ্চাশ বৎসর পূর্বে দেশের এ প্রকার অবস্থা ছিল না। দস্যুর অত্যাচারে, বর্গীর হাঙ্গামায় এবং ঠগীদিগের ষড়যন্ত্রে দেশের লোক সর্বদা সশঙ্কিত থাকিত। বর্গী ও ঠগীর নামে লোক কাঁপিয়া উঠিত। বর্গীর অত্যাচারে কত শ্রাম, জনপদ উচ্ছন্ন হইয়া গিয়াছে, ঠগীর ষড়যন্ত্রে কত সহস্র সহস্র লোক জীবন হারাইয়াছে, তাহার সংখ্যা নাই। পূর্বে পথ ঘাট সকল এখনকার মত বিস্তৃত ও নিরাপদ ছিল না; বিদেশে যাতায়াত করিবার সুবিধা ছিল না, রেলের গাড়ীও ছিল না; অথ কোন্ প্রকারের গাড়ী চলিতে পারে এমন পথও বেশী ছিল না। যে সকল পথ ছিল, তাহা প্রায়ই নিবিড় বন, দুর্গম পর্বত বা জনশূন্য বিস্তীর্ণ প্রান্তরের মধ্যে; স্তবরাং সে সকল বন পথ যে কত দূর ভয় ও বিপদ জনক তাহা সহজেই বুঝা যায়। পঞ্চাশ বৎসর পূর্বে কেহ বিদেশে যাইবার সময় বাড়ীতে জন্মনের রোল উঠিত। এখন রেলের গাড়ী হইয়াছে ছয় মাসের পথ এখন আমরা ছয় দিনে যাইতেছি, বিপদ ভয় আশঙ্কা কিছুই নাই। কিন্তু শুনিয়াছি সে কালে নোকে গয়া কাশী যাইতে হইলে বাড়ী হইতে চির বিদায় লইয়া বাহির হইত। গৃহে ফিরিবার আশা আর কেহ করিত না। দস্যুভয় বিশেষতঃ এই ঠগীদিগের ভয় তখন অত্যন্ত অধিক ছিল। নগর, গ্রাম, রাস্তা, ঘাট—এমন স্থান ছিল না, যেখানে ইহাদিগের সমাগম ছিল না। কর্ণেল সুম্যান বলেন

হিমালয় হইতে কুমারিকা এবং কচ্ছ হইতে আসাম পর্যন্ত ভারতের সর্বত্রই ঠগীর প্রাচুর্য্য ছিল; বিশেষতঃ দাক্ষিণাত্যে, উত্তর পশ্চিমাঞ্চলে, রাজপুতনায় এবং বাঙ্গলা ও বেহারে ইহাদিগের প্রতাপ অতিশয় বৃদ্ধি হইয়াছিল। উত্তর পশ্চিমাঞ্চলে কেবল স্থলপথে, এবং বাঙ্গলায় স্থল ও জল উভয় স্থানেই ঠগীর ভয় ছিল। প্রতিদিন অনুমান চারি পাঁচ শত লোক ইহাদিগের হাতে জীবন হারাইত। দেশীয় রাজা বা মুসলমান সম্রাটগণ কেহই এই নৃশংস নরঘাতকদিগকে দমন করিতে পারেন নাই। এমনও জানা যায় যে, কেহ কেহ ইহাদিগকে শাসন করা দূরে থাক, প্রশ্রয় দিতেন। আকবর দিল্লী ও আগার নিকটবর্তী কতকগুলি ঠগী ধরিয়া প্রাণ দণ্ড করিয়াছিলেন বটে, কিন্তু তাহাতে ইহাদিগের অত্যাচার কিছুই কমে নাই। অবশেষে লর্ড বোর্চফোর্ডের সূচাসনে ঠগী সম্প্রদায় এক প্রকার নিস্কূল হইয়াছে।

ঠগী সম্প্রদায়ের একটা রীতিমত নিয়মবদ্ধ সমাজ ছিল; এই সমাজের কাণ্ড প্রণালী নানাবিধ নিয়ম দ্বারা চালিত হইত। অনেকে অনুমান করেন ভারতে এই নরঘাতক সম্প্রদায়ের সৃষ্টি হয় নাই; ভারতবর্ষের অপর পার্শ্বস্থ দেশ হইতে ইহারা ভারতে আসিয়াছে। নর হত্যা করিয়া তাহাদিগের সর্বস্ব হরণ করাই এই সম্প্রদায়ের জীবনের ব্যবসায় ছিল। কিন্তু লোকের চক্ষে ধূলা দিবার জন্ত ইহারা সাধারণ প্রজার ছাত্র জনীজনা লইয়া চাষ বাসও করিত; কিন্তু সে একটা উপলক্ষ মাত্র। ইহাতে তাহাদিগকে হঠাৎ কেহ কিছু বলিতে বা সন্দেহ করিতে পারিত না। আবার এই নৃশংস কার্য্য যে ইহারা কেবল উদরার জন্ত করিত তাহাও নহে; ইহাকে তাহারা ধর্ম্মকার্য্য এবং দেবীর অদেশ বলিয়া জানিত।

যে কার্য্যের সহিত ধর্ম্মের সহিত যোগ থাকে, তাহা নিস্কূল করা বা দমন করা সহজ নয়, তাই ঠগীদিগের প্রতাপ এত বাড়িয়াছিল। ইহাদিগের উপাস্য দেবী করালবদনী কালী। এক এক দলে এক শতেরও অধিক, এবং কখনও কখনও চারি পাঁচ শত লোকও থাকিত; হিন্দু মুসলমান সকল ধর্ম্মাবলম্বী লোকই ইহাতে থাকিত, এবং হিন্দু মুসলমান উভয় জাতীয় ঠগই কালীর পূজা করিত; মুসলমান ঠগেরা অসকুচিত চিত্তে কালীর পূজা করিত এবং কালীকে ভক্তি করিত। ঠগী সম্প্রদায়ের বিশ্বাস ছিল যে, তাহারা কালীর আদেশেই এই কার্য্য করিতেছে;—এবং এই ঘোর নৃশংস কার্য্যে দেবী তাহাদিগের সহায়। এক এক দলে এক শত হইতে তিন চারি শত পর্যন্ত লোক থাকিত। এই সকল দলের এক এক জন অধিপতি ছিল; দলের লোকেরা এই দলধিপতির আজ্ঞানুসারে চলিত। সমস্ত দলের লোক একত্রে কখনও বাহির হইত না এবং প্রকাশে কখনও দস্যুভয় বা লুণ্ঠন করিত না। কেহ কোন প্রকার সন্দেহ না করিতে পারে এই জন্ত ইহারা ৬।৭ জন, কি ৪।৫ জন করিয়া এক একটা দল বাঁধিত, এবং স্বতন্ত্র ভাবে পথে চলিত। এক দলের সহিত যে আর এক দলের পরিচয় আছে, তাহা কেহ বুঝিতেও পারিত না। ইহারা এ প্রকার ভান করিত যে পরস্পর পরস্পরকে যেন কখনও দেখে নাই। এই প্রকারে ইহারা পথিকদিগের সঙ্গ লইত। প্রথমে শ্রান্ত ক্লান্ত পথিক, একাকী দুর্গম জনশূন্য বনমধ্যে পথ চলিতেছে, এমন সময় ছুই চারি জন সঙ্গী পাইলে তাহার কত আনন্দ, কত সাহস হয়! হতভাগ্য পথিকেরা সহায় মনে করিয়া ইহাদিগের আশ্রয় লইত এবং সঙ্কে চলিত;




কিন্তু অচিরেই এই নৃসংশদিগের হস্তে প্রাণ হারাইত।

বৎসরের মধ্যে সকল সময়েই ইহারা এ কার্যে লিপ্ত থাকিত না। বৎসরের মধ্যে একটা নির্দ্ধারিত সময়ে, শুভদিনে শুভক্ষণে আরাধ্যা দেবী কালীর পূজা দিয়া, দলপতির অধীনে গৃহ হইতে বহির্গত হয়। ধর্মের নামে ইহারা কি ভয়ঙ্কর নৃশংস কার্যই করিত! বিদেশে বাহির হইবার পূর্বে দৈবজ্ঞ ডাকিয়া, যাত্রার দিক এবং যাত্রার সময় স্থির করাইয়া লইয়া, রীতিমত চাউল পরসা প্রভৃতি দক্ষিণা দিয়া দৈবজ্ঞকে বিদায় করিত। গণনা শেষ হইলে দলপতি ডানহাতে একটা জলপূর্ণ ঘটী এবং একখানি সাদা রুমালে, হলুদ, একটা তাত্র মুদ্রা, একটা রৌপ্য মুদ্রা এবং উৎসর্গ কুঠার বাঁধিয়া, বাম হাতে করিয়া বুকের উপর রাখিয়া, গ্রামের নিকটবর্তী কোন স্থবিধা জনক স্থানের উদ্দেশে চলিতে থাকে, দলের আর সকলেও তাহার পশ্চাৎ পশ্চাৎ চলিতে থাকে। উপযুক্ত স্থানে উপস্থিত হইয়া, দৈবজ্ঞ কথিত দিকে মুখ ফিরাইয়া, এক মনে উর্দ্ধদিকে চাহিয়া, দলপতি কালীর নিকটে মনস্কামনা সিদ্ধির জন্ত প্রার্থনা করে, এবং যে দিক এবং যে সময় তাহারা স্থির করিয়াছে, তাহা কালীর অনুমোদিত কি না, তাহা জানিবার জন্ত প্রার্থনা করে। কালীর আদেশ যাহা বুঝিতে পারে, সেই অনুসারে ইহারা কার্য করিয়া থাকে। শুভচিহ্ন না দেখিলে ইহারা কখনও যাত্রা করে না। ছুতার, কুম্ভকার, তেলি, ফকির, খঞ্জ প্রভৃতি দেখিলে যাব্দা করে না। যাব্দাকালে ভিন্ন গ্রামের শব দেখিলে, আকাশ হইতে চিল শ্বেতবর্ণ বিষ্ঠা ত্যাগ করিলে, বা বামদিক হইতে দক্ষিণ দিকে শৃগাল গমন করিলে, অত্যন্ত শুভ ফল লাভ হয়।

দলপতির হাতের জলপূর্ণ ঘটী পড়িয়া গেলে অত্যন্ত অমঙ্গল আশঙ্কা করে, ইহাতে সেই বৎসরই দলপতির মৃত্যু এবং সমস্ত দল ধরা পড়িবে এমন আশঙ্কা করিয়া থাকে।

ক্রমশঃ।



## দুঃখিণীর দুঃখের কথা ।

**প্রায়** সত্তর বৎসর পূর্বে—নগরের অনতিদূরে একটা বৃদ্ধা রমণী বাস করিতেন। একখানি ক্ষুদ্র কুটীর; তাহার সম্মুখস্থ ছোট বারাণ্ডায় বসিয়া প্রত্যহ সকালে বিকালে তাঁহাকে স্নাতা কাটিতে দেখা যাইত। সংসারে বৃদ্ধার কেহ ছিল না। আপনার ভরণ পোষণের ভার আপনাকেই বহন করিতে হইত। একটা প্রতিবেশী ভদ্রলোক দয়া করিয়া, এই ক্ষুদ্র কুটীরে তাঁহাকে বাস করিতে বলিয়াছিল; কিন্তু পরের উপর নির্ভর করা তাঁহার অভ্যাস ছিল না; সামান্য কার্য হইতে যে বৎসামান্য আয় হইত তাহারই কিছু কুটীরের ভাড়া স্বরূপ দিতেন। ভদ্রলোকটি নিতান্ত অনিচ্ছা স্বত্তেও তাহা গ্রহণ না করিয়া পারিতেন না।

আর্থিক কষ্টই বৃদ্ধার একমাত্র কষ্ট নহে। তাঁহার একখানি পা একেবারে অকর্মণ্য হইয়া গিয়াছিল; স্ততরাং অতি কষ্টে চলা ফেরা করিতে হইত। বাম হাত খানিও প্রায় সেইরূপ; কিন্তু স্নাতা কাটার ব্যাঘাত হইত না। এই দুঃখপূর্ণ জীবনের ইতিহাস অতিশয় কষ্টজনক। কিন্তু এত দুঃখেও বিধবা কখনও আপনার মনুষ্যত্ব ভুলিয়া যান নাই; পরের দাসত্ব করা—পরের উপর নির্ভর করা তাঁহার অভ্যাস ছিল না। আর এক কথা—আমরা প্রায়ই দেখিতে পাই যাহারা সংসারে দুঃখ যন্ত্রণা ভোগ করে—স্বামী ও পুত্রশোকে অস্থির হয়—তাঁহারা দেবতার প্রতি অনর্থক দোষারোপ করে। কিন্তু ইহাঁর মুখ হইতে কখনও সে বিষয়ে কোন কথা শুনিতে পাওয়া যায় নাই। আপনার অবস্থায় সন্তুষ্ট থাকিয়া ভক্তিপূর্ণ হৃদয়ে ইষ্ট দেবতার পূজা করিতেন এবং শত দুঃখ কষ্ট হইলেও পরের গলগ্রহ হইতে ইচ্ছা করিতেন না।

আমরা অনেক সময়ে আপনাকেই সর্দাপেক্ষা দুঃখী মনে করি। মনে ভাবি এমন কষ্ট আর কাহারও নাই—এত দুঃখ যন্ত্রণা সংসারে আর কেহই ভোগ করে না। কিন্তু একথা কি ঠিক? যে আপনার ও আপনার পরিবারের সুখ লইয়াই সর্দাদি ব্যস্ত থাকে না এবং পরের সুখ দুঃখের প্রতিও দৃষ্টি করিতে অবসর পায় সে কখনও একথা বলিতে পারে না। সংসারে কত শত দুঃখী ও হতভাগ্য আছে যাহারা আনন্দের মধ্যে সর্দাপেক্ষা দুঃখী ও গরিবের অবস্থাকেও স্বর্গ সুখ বলিয়া মনে করে। কত লোক হয়তো এমন দুঃখ ও কষ্ট পাইতেছে যাহা আমরা কখন কল্পনাও করিতে পারি না।

এই বৃদ্ধা রমণীর জীবন তাহার এক দৃষ্টান্ত-স্থল। ইনি এক কৃষকের কন্যা। অল্প বয়সেই

কোন সৈনিকের সঙ্গে ইহাঁর বিবাহ হয়। এই সৈনিক আপনার কর্তব্যনিষ্ঠা ও ত্রায়পরায়ণতার গুণে শীঘ্রই উন্নতি লাভ করেন এবং ক্রমে আপনার চারি পুত্রকে সৈন্যদলে প্রবেশ করান। যখন স্বামী ও পুত্রগণ যুদ্ধে গমন করিত এই রমণীও তাহাদের সহিত যাইতেন এবং তাহাদের মধ্যে কেহ আহত হইলে নিজ হাতে শুশ্রূষা করিতেন।

১৮০৯ খ্রীষ্টাব্দে ইনি স্বামী ও পুত্রগণের সঙ্গে এক যুদ্ধক্ষেত্রে গমন করেন। সে যুদ্ধে বিপক্ষেরা জয়লাভ করে। এই রমণী যুদ্ধক্ষেত্রে হইতে একটু দূরে অবস্থান করিতেছিলেন; যখন একটা আহত সৈনিককে তাহার সঙ্গীরা বহন করিয়া লইয়া যাইতেছিল তখন তিনি আপনার স্বামী ও পুত্রগণের সংবাদ জিজ্ঞাসা করিলেন। যাহা শুনিলেন তাহা অতিশয় কষ্টকর। তাহারা বলিল “আপনার কনিষ্ঠ পুত্র ব্যতীত সকলেই পতিত হইয়াছে।” আর কেহ হইলে সেই খানে শোকে বিহ্বল হইয়া পড়িত কিন্তু ইনি তাহা করিলেন না। কেহ এখনও বাঁচিয়া আছে কি না—শুশ্রূষা দ্বারা এখনও কাহাকে বাঁচাইতে পারেন কি না দেখিতে চলিলেন।

এখন যুদ্ধক্ষেত্রে যুদ্ধ নাই। সৈন্যগণ যুদ্ধ করিতে করিতে অন্যদিকে চলিয়া গিয়াছে। কেবল মৃত ও আহতদিগের দেহ সেখানে পড়িয়া আছে। লজ্জা ভয় বিসর্জন দিয়া রমণী সেখানে আপনার পুত্র ও স্বামীর উদ্দেশে চলিলেন। প্রথমেই দেখিলেন তাঁহার কনিষ্ঠ পুত্রও আহত হইয়া পড়িয়াছে। এবং এখনও বাঁচিবার আশা আছে। তিনি পুত্রের নিকটে বসিয়া ক্ষতস্থান দেখিতেছেন এবং কি উপায়ে তাহাকে স্থানান্তরিত করিবেন তাহা ভাবিতে লাগিলেন।

কিন্তু হায়! এত দুঃখের মধ্যে এ সুখ টুকুও তাঁহার ভাগ্যে স্থায়ী হইল না। হঠাৎ দেখিলেন বিপক্ষের এক দল অস্বারোহী বেগে সেই দিকে আসিতেছে। তখন তিনি কি করিবেন কিছুই স্থির করিতে পারিলেন না; কিন্তু সন্তানের প্রাণ রক্ষা করিতে হইবে ইহা বেশ বুঝিতে পারিলেন। আর কোন উপায় দেখিতে না পাইয়া আপনার শরীর দ্বারা আহত পুত্রকে আঁপুলিয়া রাখিলেন। অস্বারোহীগণ দ্রুতপদে তাহার শরীরের উপর দিয়া চলিয়া গেল। এই আঘাতে তাঁহার একখানা হাত ও পা চিরদিনের জন্য নষ্ট হইয়া গেল এবং শরীরের অসংখ্য ক্ষত হইতে রক্তধারা পড়িতে লাগিল। মাতা, আহত সন্তান বুকে করিয়া, জ্ঞান-শূন্য হইয়া পড়িয়া রহিলেন। এই অচৈতন্য অবস্থায় তাঁহার পরিচিত সৈনিকেরা তাঁহাকে দেখিতে পায় এবং শিবিরে আনয়ন করে। তাহার পর ইনি হাসপাতালে থাকিয়া সুস্থ হন। নিয়ম আছে যে, সৈনিকদিগের বিধবা ও নিরাশ্রয় পরিবার গভর্ণমেন্ট হইতে সাহায্য পায়। কিন্তু ইহার প্রতি গভর্ণমেন্ট প্রসন্ন হইলেন না। ইনি বিরক্ত হইয়া আপনার বাসভূমিতে আসিলেন এবং পূর্ন কথিত প্রকারে জীবন যাপন করিতে লাগিলেন। তাঁহার কনিষ্ঠ পুত্র আছে কি না আর সে বিষয়ে খোঁজ হইল না।

যুদ্ধের পর বার বৎসর অতীত হইয়াছে। একদিন অপরাহ্নে বিধবা বারাণ্ডায় বসিয়া সুতা কাটিতেছেন এমন সময়ে একটি খোড়া ভিক্ষুক অতিকষ্টে তাঁহার বারাণ্ডার নিকট আসিল। ভিক্ষুকটার অতি শোচনীয় অবস্থা, অপরিষ্কার ও ছেড়া কাপড়; অনাহারে মুখ যেন কালিমাখা হইয়াছে। দেখিয়া বৃদ্ধার দয়া হইল। তাহাকে

বারাণ্ডায় উঠিয়া বসিতে বলিয়া নিজের রাত্রির আহারের জন্ত যাহা রাখিয়া ছিলেন তাহা আনিয়া দিলেন। সৈনিক তাহা আহার করিল এবং বৃদ্ধার দিকে এক দৃষ্টে চাহিয়া রহিল। কিছুক্ষণ পরে সে পাগলের ভায়ে “মা” বলিয়া বৃদ্ধার গলা জড়াইয়া ধরিল এবং কান্দিতে লাগিল।

জীবনের শেষ অবস্থায় দুঃখিনী জননীর হতভাগ্য সন্তান ফিরিয়া আসিল। যাহা কোন দিন জানা করেন নাই বৃদ্ধা আজ সেই সুখ লাভ করিলেন এবং আকাশের দিকে হাত তুলিয়া ভগবানকে ধন্যবাদ প্রদান করিলেন।



## সংগ্রহ ।

**সেদিন** আমেরিকার এক স্থানে একটি আশ্চর্য উদ্ভা পতিত হইয়াছে। উদ্ভা পিণ্ডটী এখন ডাক্তার সেয়ারস্‌এর নিকট আছে। একদিন রাত্রি আটটার সময় ডাক্তার সেয়ারস্‌ একজন রোগীর বাড়ী হইতে ফিরিতেছিলেন, এমন সময় এই উদ্ভাটী পতিত হয়। তিনি দেখিলেন, যে দীর্ঘপ্রস্থে চারি ইঞ্চি পরিমাণ একটি গর্ভ হইতে ভয়ঙ্কর ধূম উঠিতেছে। তিনি তৎ-

ক্ষণাৎ গাড়ী হইতে নামিয়া, সাবল দিয়া সেই স্থান খুঁড়িতে খুঁড়িতে পাঁচ ফিট মাটির নীচে উদ্ভাটী দেখিতে পাইলেন। সচরাচর উদ্ভার আকার যে প্রকার থাকে, এটী সে প্রকার নয়। উদ্ভাটী সম্পূর্ণ গোলাকার, ইস্পাতের ন্যায় রং এবং মসৃণ। উদ্ভাটীর গায়ে, নানা প্রকার আকৃতি চিত্রিত আছে, এবং অনেক লেখাও আছে; কিন্তু কি ভাষায় লেখা তাহা জানা যায় নাই। কি ধাতুতে নির্মিত তাহাও জানা যায় নাই—এক প্রকার নূতন ধাতু।

\* \* \*

যে কাগজে মথা ছাপাইয়া প্রাতিমাসে আমরা গ্রাহকদিগকে দিতেছি, বিজ্ঞানের উন্নতিতে এই কাগজে যে কত প্রকার জিনিস তৈয়ার হইতেছে, ভাবিলে আশ্চর্য হইতে হয়। সম্প্রতি কাগজের এক প্রকার বোতল তৈয়ার হইয়াছে, বোধ হয় শীঘ্রই তাহা এদেশে আসিবে। দরজা জানালায় লাগাইবার জন্ত কাগজের মার্শি তৈয়ার হইয়াছে; এই মার্শি কাচের ভায়ে স্বচ্ছ, অথচ কাচের মত এত সহজেই ভাঙ্গিবে না। বার্লিন নগরে একটি কাগজের ধর্ম-মন্দির প্রস্তুত হইয়াছে। আমরা জানি কাগজে জল লাগিলেই, তাহা ছিঁড়িয়া যায়; কিন্তু বিজ্ঞান তাহারও পথ করিয়াছে; কাগজের ছোট জাহাজও প্রস্তুত হইয়াছে। আমেরিকায় কাগজের দ্বারা রেল গাড়ীর চাকা তৈয়ার করা হইয়াছে। এই বড় বড় কাজ ছাড়া, খুব হালকা কাজও হইয়াছে; ড্রেস্‌ডেন নগরে একজন ঘড়ীওয়াল, কাগজের ঘড়ী (watch) প্রস্তুত করিয়াছে। আর বাকি কি? বুদ্ধিতে সব হয়।

\* \* \*

প্রথমে একটা জিনিস বে বাহির করে, তাহারই বাহাছরী। খবরের কাগজ ত এখন দেশ ছাই-

রাছে, হোমরা ঘরে বসিয়া বিশ্ব ব্রহ্মাণ্ডের খবর পাইতেছ; কিন্তু প্রথমে যাহার মাথায় এই খবরের কাগজ বাহির করিবার চিন্তা উঠিয়াছিল, সে ব্যক্তি সামান্য নয়। এই খবরের কাগজ প্রথমে একজন ফরাসী ডাক্তার বাহির করেন। তিনি দেখিলেন যে, যেখানে গিয়া তিনি কোন নূতন সংবাদ বা নূতন খবর বলেন, সেখানেই লোকে তাহা আগ্রহ করিয়া শুনে। ইহাতেই খবরের কাগজ বাহির করিবার চিন্তা তাঁহার মনে উঠে; এবং সেই হইতেই খবরের কাগজের প্রথম সৃষ্টি হয়।


\* \* \*

ব্রহ্মদেশে অমরাপুর নগরে “বো” নামে একটি বৃক্ষ আছে। এই বৃক্ষটী পৃথিবীর মধ্যে সর্বাধিক পুরাতন। খৃষ্টের জন্মের ২৮ বৎসর পূর্বে এটী জন্মায়; স্মরণ্য এখন ইহার ২১৭৫ বৎসর বয়স হইয়াছে। এই দুই হাজার বৎসরে, এই পৃথিবীতে কত কি ঘটনা, কত কি পারবর্তন হইয়া গিয়াছে!

\* \* \*

শিক্ষা দিলে নীচ জন্তুদিগের দ্বারাও কত কাজ করাইয়া লওয়া যায়। কুকুরের দ্বারা গৃহস্থের কত কাজ হয়, তাহা আমরা প্রত্যহই দেখিয়া থাকি। একজন সাহেব মাহুঘের পরিবর্তে বান্দরের দ্বারা পাখা টানাইতেন। যুদ্ধ প্রভৃতির সময় পায়রা দূতের কাজ করে, যেখানে হয়ত মাহুঘ পাঠাইবার সুবিধা নাই, এমন সকল স্থানে চিঠি পত্র লইয়া যায়। আবার এই পায়রাগুলির আশ্চর্য্য উড়িবার শক্তি আছে। আমেরিকায় ওহিও প্রদেশের ডেটন নগরে হইতে ফিলেড্যালফিয়া পর্যন্ত, তিনটা পায়রা সম্প্রতি উড়িয়া গিয়াছিল, ডেটন হইতে ফিলেড্যালফিয়া ৫০০ মাইল। আর একটা পায়রা ৩৪৩ মাইল, আট

ঘণ্টায় উড়িয়া গিয়াছিল,—ঘণ্টায় ৪২ মাইলেরও  
অধিক। নিউইয়র্কের কয়েকটা পায়রা ২৩৭  
মিনিটে ২৪৫ মাইল গিয়াছিল, মিনিটে এক  
মাইলেরও বেশী। আমরা রেল গাড়ীতে চড়িয়া  
মনে করি খুব দ্রুত চলিতেছি; কিন্তু ইহার কাছে  
কোথায় রেলের গতি! যদি পায়রার মত পাখা  
থাকিত, আর উড়িতে পারিতাম, তবে কোথায়  
কোথায় উড়িয়া যাইতাম!



## পলাতক পাখী ।

(১)

প্রাণের পাখীটি মোর  
স্নেহের পিঞ্জর ছাড়ি;  
কোথায় গিয়েছে চলে  
আর না আসিল ফিরি!

(২)

কত কাঁদি দিবা নিশি  
কত ডাকি “আয় আয়”  
কি জানি কোথায় গিয়ে  
ভুলে সে রয়েছে হায়!

(৩)

সারাদিন আধ আধ  
—“মা” “মা” বলে ডেকে ডেকে,  
বেথে গেছে প্রাণে মোর  
কতই মমতা মেখে।

(৪)

আগে যদি জানিতাম  
পালাবে এমনি করে;  
এত কি যতনে স্নেহে  
পুষিতাম তবে তারে?

(১)

সেদিন সন্ধ্যার বেলা  
পিঞ্জরে দেখিছু তাঁর—  
ছুটে ছুটে চারি দিকে  
যেন সে পলাতে চায়।

(২)

কতই খাবার এনে  
দিলেম আদর করে  
খেলো না “নলিনী” \* কিছু  
একধারে গেল স’রে।

(৩)

“নলিনী” “নলিনী” বলে  
ডাকিলাম কত বার;  
“মা” বলে তেমনি করে  
সাড়া নাহি দিল আর!

\* পাখীর আদরের নাম। এই নামে ডাকা হইত।

(৪)

জাগিছু নিশীথ কালে  
পাখা শব্দ শুনি তার,  
গিয়ে দেখি পাখী নাই  
রয়েছে পিঞ্জর ছার!

(১)

বড়ই সাধের ছিলি  
“নলিনী” পাখীটি মোর  
কেমনে চলিয়ে গেলি?  
কি কঠিন প্রাণ তোর!

(২)

রয়েছিস কোথা এবে  
এসব মমতা ছেড়ে?  
কে রেখেছে নলিনীকে!  
এমন যতন করে?

(৩)

অথবা বনের পাখী  
পুনরায় গিয়ে বনে  
অনন্ত আকাশে উড়ি  
গাইছ আপন মনে?

(৪)

এত স্নেহ ভালবাসা  
পেয়েছিলি যার ঠাই  
কিছু তার—নলিনীকে!—  
কিছুই কি মনে নাই?

## সাজি ।



আমাদের পাড়ায় এক ঠান্দিদি ছিলেন।  
খোসামোদ রোগটা তাঁর বড় প্রবল  
ছিল। সত্য বলিয়া হউক, মিথ্যা বলিয়া হউক,  
যে প্রকারে হউক, অন্তকে খুসী করাই যেন তাঁর  
দৈনিক কাজ ছিল। আমাদের উপর তাঁর অল্প-  
প্রহটা একটু বেশী ছিল,—আমাদিগকে তিনি  
একটু বেশী খোসামোদ করিতেন। তিনি দিন কত  
কোথায় গিয়াছিলেন, ফিরিয়া আসিয়া শুনিলেন,  
আমাদের বাড়ীতে একটা খোকা হইয়াছে, অমন  
তাড়াতাড়ি করিয়া খোকা দেখিতে আসিলেন;  
তাড়াতাড়ি খোকাকার বিছানার কাছে যাইয়া,—  
না দেখিয়াই, বলিয়া উঠিলেন, “আহা যেন  
কার্তিকী!” খোকা কিন্তু সে বিছানায় ছিলওনা,  
আমাদের মিনি বেরাল খোকাকার স্থান অধিকার  
করিয়া শুইয়াছিল। ঠান্দিদির কথা শুনিয়া  
সকলে হো হো করিয়া হাসিয়া উঠিল; হাসির  
গোলে মিনি লক্ষ দিয়া পলায়ন করিল; ঠান্দিদি  
অপ্রস্তুত। অধিক খোসামোদ করিতে গেলেই  
এমনি হয়।

\* \* \*

এখন খুব বড় বড় কলারওয়াল। জামার বড়  
ফ্যাসান উঠিয়াছে। আমাদের দোলগোবিন্দ বাবু  
সকলের উপর টেকা দিয়াছেন, তাঁর জামার কলার  
কাণ পর্যন্ত উঠিয়াছে। কোন ইংরেজ দোকানদার  
নাকি তাঁর কলারের পেছনদিকে দোকানের বিজ্ঞা

পন দিবার জন্ম তাঁর কাছে পত্র লিখিয়াছিল। সংবাদ পত্রে বিজ্ঞাপন দেওয়া অপেক্ষা ইহাতে অধিক কাজ হইত।

\* \* \*

বুল সাহেব সম্প্রতি বিলাত হইতে আসিয়াছেন—পেটের দায়ে। রেলওয়ে কোম্পানির বড় সাহেবের কাছে উমেদারী করিয়া মোটা মাহিনায় একটা বড় ষ্টেশনে ষ্টেশনমাষ্টারী পাইলেন। লেখা পড়া বিদ্যা বুদ্ধিতে বুল হস্তির্মুখ। ষ্টেশনে লাল আলো দেখান হয় সকলেই জান। বুল সাহেব যাইয়াই শুনিলেন তেল নাই; তৎক্ষণাৎ হেড আফিসে টেলিগ্রাফ করিলেন যে, অবিলম্বে লাল তেল পাঠাইয়া দেয়।

\* \* \*

আমাদের খোকা একজন তৌতলাকে কথা বলিতে দেখিয়া তার বোনকে বলিতেছিল, “দেখ দাঁদি আজ একটা লোক এসেছিল, সে এখনও কথা বলতে শেখেনি অথচ কি বলবার জন্ম সে বেচারী কত চেষ্টা করতে লাগলো।” খোকা কখনও তৌতলা দেখেনি।

\* \* \*

এক ব্যক্তি খুব টেরা ছিল; সে সময় দেখবার জন্ম নিজের পকেট থেকে ঘড়ী বাহির করিতে যাইয়া, পাশের একজনের পকেট থেকে ঘড়ী তুলিয়াছিল। বেচারী বড় টেরা ছিল, অল্প কোন কু মৎলব বোধ হয় তার ছিল না। কিন্তু আদালতে তাহা শুনিল না, জরিমানা দিয়া শেষে সে খালাস পায়।


\* \* \*

কোন এক স্কুলের শিক্ষক ছাত্রদিগকে গাধার বিষয় পড়াইতেছেন। ছেলেরা বড় অনমনস্ক;

শিক্ষক বলিলেন “দেখ তোমরা যদি আমার দিকে মনোযোগের সহিত না তাকাও তবে গাধার বিষয়ে তোমাদের কোন জ্ঞানই হইবে না।”

\* \* \*

এক ব্যক্তি বিজ্ঞাপন দেন যে,—যে ব্যক্তি নিজের অবস্থায় সন্তুষ্ট, তাহাকে আমি দশ সহস্র টাকা দিব। অবিলম্বে একজন লোক উপস্থিত হইয়া বলিল মহাশয়, আমি নিজের অবস্থায় সন্তুষ্ট, অতএব আপনার প্রতিশ্রুত দশ সহস্র টাকা আমাকে দান করুন। বিজ্ঞাপনদাতা বলিলেন—বাপু, তুমি যদি নিজের অবস্থায়ই সন্তুষ্ট হও তবে কেন এই দশ সহস্র টাকার জন্ম আসিয়াছে!



## ধাঁধা।

গতবারের ধাঁধার উত্তর।

১। “ম”।

২। (মেঘ)।

## নূতন।

আপনার কিছু নাই পরের ভূষণে।  
চিরদিন শোভা পাই জানে সর্বজনে ॥  
তবুও সকলে মোরে সমাদর করে।  
দেখিতে না পারি আমি শোভি যার তরে ॥  
পাষণ হৃদয় মোর, তবু কবিগণ।  
দেখিলে আমাকে হয় ভাবেতে মগন ॥




ডিসেম্বর, ১৮৮৭।

## ঠগী।

ঠগদিগের মধ্যে কয়েকটা পদবিভাগ ছিল। সর্ব প্রধান পদ “সুবাদার।” এক একটা সুবাদারের অধীনে পাঁচ সাতটা দল থাকিত। যে সে লোকে সুবাদার হইতে পারিত না। সুবাদার হইতে হইলে ভদ্রলোকের মত দেখিতে হওয়া চাই, শরীরে বল থাকা চাই, ধীর বুদ্ধি, তর্ক করিবার শক্তি, প্রত্যুৎপন্নমতিত্ব, এবং খুব বিচক্ষণতা থাকা চাই। পুলিশ কর্মচারী প্রভৃতির সহিত আলাপ থাকা চাই। এক জন বিশিষ্ট ধনী এবং ভদ্র ব্যক্তি বলিয়া লোকে জানে, এমন লোকেই কেবল সুবাদার হইতে পারিত। সুবাদারের পর “জমাদার”; জমাদারেরও সুবাদারের মত অনেকগুলি গুণ থাকা চাই। জমাদারের পর “বকশী।” বাহারা হত্যা কার্যে খুব পারদর্শী হইয়াছে তাহারাই কেবল বকশী হইতে পারে। তার পর গুপ্তচর, গণক, গোরখননকারী, এবং সমাধি স্থান নির্দিষ্ট করিবার জন্ম ভিন্ন ভিন্ন লোক নির্দিষ্ট থাকিত। এই সকল লোক লইয়া এক একটা দল গঠিত হইত। এক এক কার্যের জন্ম এক এক দল লোক নিযুক্ত থাকিত; ইহাতেই বুঝা যায় যে, ঠগীদিগের কি প্রকার নিয়ম-

বন্ধ সমাজ ছিল। ঠগের সন্তানেরাই প্রায় ঠগ হইত; কিন্তু ঠগেরা গোব্যা পুত্র লইয়াও তাহাদিগকে এই নৃশংস ব্যবসা শিক্ষা দিত। দশ বার বৎসর বয়সেই বালকদিগকে এই নৃশংস কার্য শিক্ষা দিতে আরম্ভ করিত। প্রথম তাহাদিগকে নরহত্যার কথা কিছুই জানিতে দেওয়া হইত না। এক জন বিজ্ঞ ঠগের নিকট প্রথমে এই স্কুমারমতি বালকদিগকে শিক্ষানবিশ রাখা হইত। প্রথমে খেলার দ্রব্য, ভাল ভাল খাবার দ্রব্য, এবং লুপ্তিত দ্রব্যাদি দিয়া, নানা প্রকারে তাহাকে ভুলাইয়া রাখা হইত। বালকের সেই সময় যাহা কিছু আবশ্যিক, এই ব্যক্তির নিকটেই পাইত। চৌদ্দ পোনের বৎসর বয়সের সময় এই ভয়ানক কার্যের এক একটু তাহাকে দেখাইতে আরম্ভ করিত। ক্রমে অভ্যাসে এই সকল নৃশংস কার্যে বালকের কোমল হৃদয়ে আর ব্যথা লাগিত না; ক্রমে এই সকল কার্য তাহার পক্ষে স্বাভাবিক হইয়া দাঁড়াইত; এবং ক্রমে নিজেই হত্যা করিবার জন্ম তাহার উৎসাহ ও প্রবৃত্তি জন্মিত। তখন গুরুর অলুমতি লইয়া সে অগ্রাগ্র ঠগদিগের সহায়তায় কোন পথিকের প্রাণ বধ করিয়া, গুরুকে প্রণামী দিত এবং একটা ভোজ দিত। গুরুও শিষ্যকে উপযুক্ত দেখিয়া ব্যবসা অবলম্বন করিতে অলুমতি দিতেন।

ঠগেরা কি প্রকারে হত্যা কার্য নিৰ্বাহ করিত



এক্ষণে তাহাই আমরা সংক্ষেপে বলিব। হত্যা-প্রণালী অতিশয় ভয়ানক, ভাবিলে হৃৎকম্প হয়। মানুষ হইয়া মানুষকে কি প্রকারে এ প্রকার নিষ্ঠুররূপে পশুর স্থায় হত্যা করে, তাহা চিন্তা করাও কঠিন। প্রথমে কোন প্রকার অস্ত্র দ্বারা হত্যা করা নিয়ম বহির্ভূত। প্রাণ না গেলে ইহারা অস্ত্র ব্যবহার করে না, বা পথিকের দ্রব্যাদি লয় না। এই হত্যা কার্য সম্পন্ন করিবার জন্ত, তাহারা কুমাল, ফাঁসযুক্ত দড়ি, ও চাদর ব্যবহার করিত। আমরা গতবারে উল্লেখ করি-


য়াছি যে, এক এক দলে প্রায় তিন চারি শত ঠগ থাকিত। যখন ইহারা বাহির হইত তখন ছোট ছোট দল করিয়া বাহির হইত। পথিক দেখিলেই ইহারা তাহাদিগের সঙ্গ লইত এবং আপনাদিগকেও পথিক বলিয়া পরিচয় দিত; পথ চলিতে চলিতে পথিকেরা কোথায় যাইবে, কোথা হইতে আসিতেছে, কথায় কথায় এই সমস্ত জানিয়া লইত। ইহারা একাধে এমন চতুর ছিল যে, অনেক সময় পথিকদিগের টাকা কড়ির বিষয়ও ইহারা জানিয়া লইত। এমন ভাবে,

এমন চতুরতার সহিত ইহারা কথাবাত্তা বলিত, যে কেহ কোন সন্দেহই করিতে পারিত না। অবশেষে স্ত্রীবিধা বুঝিয়া ইহারা হত্যার আয়োজন করিত। কোন বিপদজনক স্থানে ইহারা হত্যা করিত না। ইহাদিগের অনেকগুলি সাংকেতিক কথা আছে, অথ লোক থাকিলে ইহারা সেই সকল সাংকেতিক কথা ব্যবহার করিত। হত্যারও সাংকেতিক কথা ছিল। এই সংকেত করিবারমাত্র হতভাগ্য পথিকের পাশের একজন ঠগ তাহাকে একটু অত্মমনস্ক দেখিলেই, গলায় ফাঁস লাগাইয়া দিত, এবং আর একজন সেই ফাঁসের একদিক ধরিয়া ক্রমশঃ টানিতে থাকিত। এইরূপে দুই দিক হইতে দুই জনে টানাতে, পথিকের মুখ মাটির দিকে ঝুকিয়া পড়িত এবং এই অবসরে আর একজন পিছন দিক হইতে আসিয়া সেই হতভাগ্যের দুই পা ধরিয়া টানিত, তাহাতে সেই হতভাগ্য পথিক তৎক্ষণাৎ মাটিতে পড়িয়া যাইত, এবং আর এক জন সেই সময় তাহার পিঠের উপর বসিয়া, ফাঁস জোরে টানিয়া ধরিয়া কার্য শেষ করিত। তখন মৃত পথিকের কাছে যাহা পাইত, সে সমস্ত সংগ্রহ করিত। হত্যা করিয়া ইহারা মৃতদেহ কখনই যেখানে সেখানে ফেলিয়া যাইত না। মৃতদেহ সমাধিস্ত করা দেবী ভবানীর আজ্ঞা এবং ইহারা জানিত যে এই প্রকারে মৃত দেহ যদি যেখানে সেখানে পড়িয়া থাকে তবে সহজে ধরা পড়িবার সম্ভাবনা; এইজন্ত মৃতদেহ গোর দিয়া রাখা ইহাদিগের একটা নিয়ম ছিল। এই গোর গোলাকার ও চতুষ্কোণ হইত। হত্যার পর মৃতদেহ কোন নির্জন স্থানে লইয়া যাইত। গোর দিবার স্থান প্রায় হত্যা করিবার পূর্বেই স্থির থাকিত; এই স্থানে লইয়া গিয়া ইহারা মৃতদেহ সমাধি করিত। এই সময়ে ইহারা অস্ত্রের

ব্যবহার করিত, এই অস্ত্র, একখানি মস্ত্রে উৎসর্গীকৃত কুঠার। ইহাদ্বারা মৃতদেহটির হস্তপদ খণ্ড খণ্ড করিয়া কাটিয়া দেহটির সহিত গোর দিত। গোরও এই অস্ত্রের দ্বারা খনন করিত। মৃতদেহ গোর দিয়া, তাহার উপর মাটি চাপা দিত, এবং লোকের কোন প্রকার সন্দেহ না হয় এইজন্ত গোরের উপর ঘাস বসাইয়া দিত। এক একটা গোরের একটীর অধিকও দেহ সমাধি করিত। গোর দিবার পূর্বে যদি সেই স্থানে অথ কোন লোক উপস্থিত হইত, তাহা হইলে ইহারা নানা উপায় অবলম্বন করিয়া লোককে প্রতারিত করিত। অনেক সময় মৃত দেহটা একখানি বস্ত্র দ্বারা ঢাকিয়া রাখিয়া গোর খনন করিতে আরম্ভ করিত, এবং কেহ খেঁহ খুব ক্রন্দন করিতে থাকিত। লোকে জিজ্ঞাসা করিলে বলিত, তাহাদিগের পরিবারের কাহারও মৃত্যু হইয়াছে। অনেক সময় মৃতদেহ একেবারে গোপন করিয়া বস্ত্রের কানাত করিয়া তাহার মধ্যে সমাধি কার্য নির্বাহ করিত, কেহ জিজ্ঞাসা করিলে বলিত, কানাতের মধ্যে তাহাদিগের পরিবারেরা আছে। কোন কোন সময়ে ঠগদিগের মধ্যে এক ব্যক্তি ব্যারামের ভান করিয়া মাটিতে পড়িয়া ছট্ ফট্ করিতে আরম্ভ করিত; অথ লোকে তাহার যন্ত্রণা দেখিয়া সে স্থান হইতে চলিয়া গেলে, তখন কার্য শেষ করিত। ঠগেরা যাহার সঙ্গ লইত তাহাকে সহজে ছাড়িত না। আবশ্যক হইলে পাঁচ সাতদিন পর্যন্ত সঙ্গ লইয়া চলিত। পরে স্ত্রীবিধা বুঝিয়া হত্যা করিত। অনেক সরাই বা পাহাশালায়ও এই নৃশংস কার্য হইত। এই সকল সরাইয়ের অধিকারীদিগের সহিত ঠগদিগের পূর্বের বন্দোবস্ত থাকিত। পথিকেরা এই সকল স্থানে রাজিতে আশ্রয় লইত। হতভাগ্য পথিকেরা নিশ্চিন্ত

মনে যখন নিদ্রায় অভিভূত রহিয়াছে, এমন সময় এই নিষ্ঠুর ঠগেরা ইহাদিগকে হত্যা করিয়া সেই সরাইয়ের মধ্যেই পুতিয়া, উপরের মাটি পিটিয়া সমান করিয়া রাখিত কেহ কোন সন্দেহ করিতে পারিত না। সন্ন্যাসী এবং ফকীরদিগের নিকট হইতেও ইহারা অনেক সাহায্য পাইত। এদেশে বনের মধ্যে এবং নির্জন স্থানে অনেক মঠধারী সন্ন্যাসী বাস করিয়া থাকে। পথিকেরা নিশ্চিন্তমনে ইহাদিগের আশ্রয় লইয়া থাকে। কিন্তু এই সন্ন্যাসী ও ফকীরদিগের মধ্যে কতকগুলি অসৎ প্রকৃতির লোক আছে; তাহারা বাহিরে ধর্মের ভান করে, কিন্তু ভিতরে ভিতরে ভয়ঙ্কর কার্য করিয়া থাকে। ঠগেরা এই সকল অসৎ প্রকৃতির সন্ন্যাসী ও ফকীরদিগের নিকট হইতে অনেক সাহায্য পাইত। ইহারা ছোট খাট বাগান প্রস্তুত করিয়া সুস্বাদু ফলের গাছে পূর্ণ করিয়া রাখিত। শ্রান্ত ক্লান্ত পথিকেরা উপস্থিত হইলে ইহারা যত্নের সহিত তাহাদিগকে আশ্রয় দিত। হতভাগ্যেরা মিষ্ট কথায় এবং ইহাদিগের ব্যবহারে ভুলিয়া, কথায় বাতায় সমস্ত কথাই ইহাদিগের কাছে খুলিয়া বলিত। কিন্তু সেই সন্ন্যাসী ফকীর বেশধারী অসৎ লোকেরা অবসর বুঝিয়া সংকেত দ্বারা ঠগদিগকে আহ্বান করিত। ইহারা আসিয়া হতভাগ্যদিগের প্রাণবিনাশ করিত। অনেক সময় স্ত্রীলোকের সাহায্যে এই সকল ভয়ঙ্কর কার্য সমাধা করিত। একজন সুন্দরী স্ত্রীলোক হস্ত পথের ধারে দাঁড়াইয়া কাঁদিতেছে, এমন সময় একজন পথিক উপস্থিত হইলে, স্বভাবতই তাহার মনে একটু দয়া উপস্থিত হয়। সকলেই হস্ত তাহাকে জিজ্ঞাসা করে যে সে কেন কাঁদিতেছে। স্ত্রীলোকটা তখন একটা ঘাগর নাম করিয়া বলে যে সে সেই স্থানে যাইবে, পথে

চলিতে চলিতে সন্ধ্যা হইয়াছে, স্ত্রীলোক একাকী কেমন করিয়া যাইবে, এইজন্য কাঁদিতেছি। এপ্রকার অবস্থায় পথিকের মনে স্বভাবতই একটু দয়া উপস্থিত হয়, এবং না বুঝিয়া ঠগদিগের ষড়যন্ত্রে পড়িয়া হস্ত তাহাকে রাখিয়া আসিতে যাইয়া এই নৃশংসদিগের হস্তে শেষে প্রাণ হারায়।



### অসভ্য কাঠবিড়াল।

সেই মরীচিকা সকলেই মুন্দের কোথায় জান, মুন্দের অতি নিকটে মধুবন নামে একটা রমণীয় স্থান আছে, ত্রিশ পঁয়তাল ত্রিশ বৎসর পূর্বে স্থানটি আরও রমণীয় ছিল। তখন সেখানে শাল, তামাল, প্রভৃতি নানা জাতীয় বড় বড় গাছ এবং কত প্রকারের লতা গুল্ম দেখিতে পাওয়া যাইত; কত শত শত প্রকারের বনফুলে বনটি সর্বদা আলো হইয়া রহিত, এবং নানা বর্ণের নানা প্রকার প্রজাপতি দিনের বেলায় ফুলের সঙ্গে খেলা করিয়া বেড়াইত। ময়ূর, বন্যকুক্কট, তিত্তির, বটের প্রভৃতি ভূচর পক্ষীগণ মনের সুখে বিচরণ করিত; কোকিল, পাপিয়া, শ্রামা, দইয়াল প্রভৃতি গায়ক পক্ষীরা

গাছের ডালে, লতার আড়ালে বসিয়া প্রাণ খুলিয়া গান করিত। লেপার্ড (Leopard) হারেনা (Hyæna) ভল্লুক, বনবিড়াল প্রভৃতি হিংস্র জন্তুরা রাতে ইতস্ততঃ আহার অন্বেষণ করিয়া বেড়াইত এবং মাঝে মাঝে রাত্রের গভীরতা এবং নিস্তরতা ভেদ করিয়া চীৎকার করিত; ঐ শব্দ শ্রবণপূর পাছাড়ে প্রতিধ্বনিত হইয়া নিকটবর্তী সাঁওতাল পল্লিতে ফিরিয়া আসিত, এবং তাহা শুনিয়া ছোট ছোট ছেলে মেয়েরা ভয়ে কাঁদিয়া উঠিলে “ভয় কি বাছা কাঁল সকালে ছুট বাঘটাকে মেরে এনে দিব”, বলিয়া সাহসী পিতা মাতারা ছেলে, মেয়েদিগকে সাহসনা করিত। মধুবনের নিকটেই একটা ক্ষুদ্র হ্রদ আছে, এই হ্রদে নানা দেশ হইতে নানা প্রকার জলচর পক্ষী ঝাঁকে ঝাঁকে আসিয়া একত্রিত হইত, এবং শীত ও বসন্ত কাল এইখানে থাকিয়া আবার গ্রীষ্ম কালের প্রারম্ভেই তাহারা দেশ বিদেশে চলিয়া যাইত।

সেই মধুবন এখনও আছে কিন্তু তাহার আর সে শোভা নাই। এখনও অনেক গাছ আছে কিন্তু তত বড় প্রকাণ্ড প্রকাণ্ড গাছ আর নাই, লতা, গুল্ম আছে কিন্তু সে রমণীয়তা নাই; বনফুল আর প্রায় ফোটে না, ঝাঁকে ঝাঁকে আর প্রজাপতিগণ খেলিয়া বেড়ায় না; ময়ূরের নৃত্য আর সেখানে দেখিতে পাওয়া যায় না, গায়ক পক্ষীরা আর ডালে বসিয়া মনের সুখে গান করে না। হিংস্র জন্তুরাও এখন আর পূর্বের মত রাতে ঘুরিয়া বেড়ায় না। নিকটে সেই হ্রদ আছে, কিন্তু হাজার হাজার জলচর পক্ষীদের সেখানে জমা হইতে আর দেখা যায় না। সখার পাঠক পাঠিকা! তোমরা জিজ্ঞাসা করিতে পার মধুবন এমন শ্রীভ্রষ্ট কেন হইল। দেশে সভ্যতা

বিস্তার এবং মানুষের অর্থ পীপাসাই মধুবনের দুর্দশার কারণ। প্রথমে যখন এই দেশ দিয়া রেলের পথ প্রস্তুত হইতে আরম্ভ হয় তখন ঐ বনের বড় বড় গাছগুলি কাটিয়া রাস্তার কাজে লাগান হয়; যেখানে কখনও মানুষ প্রবেশ করিত না, সেখানে চকিষ ঘণ্টা মানুষের গোলমাল, গাছ কাটা আর গাছ পড়ার শব্দ,—গরিব পাখী বেচারীরা কেমন করিয়াইবা থাকে? গতক মন্দ দেখিয়া তাহারা কে কোথায় পলায়ন করিল। বড় বড় গাছ পড়াতে এবং তাহাদিগকে টানিয়া বাহির করাতে লতা গুল্ম ছিঁড়িয়া যাইতে লাগিল, সেই সঙ্গে সঙ্গে ক্ষুদ্র ক্ষুদ্র বন ফুলের চারাগুলি মারা যাইতে আরম্ভ হইল; কুম না পাইয়া প্রজাপতিরাও আসা বন্ধ করিল। এদিকে রাস্তা প্রস্তুত হইলে রেলগাড়ী চলা আরম্ভ হইল, মধুবনের অতি নিকটে দিয়াই রেলের রাস্তা, প্রথম ট্রেনখানা সন্ সন্, বন্ বন্ করিয়া আসিতে আরম্ভ হইল; গাছ কাটা এবং গাছ পড়ার গোলমাল সহ্য করিয়াও যে সকল জন্তু বনের এদিকে ওদিকে লুকাইয়া ছিল তাহারা এবার মহা বিপদে পড়িল; এদিকে ট্রেন যত নিকটে আসিতে লাগিল ততই পোঁ পোঁ শব্দ হইতে লাগিল, সেই কর্ণভেদী পোঁ পোঁ শব্দে বন্ জন্তু সকল দিশাহারা হইয়া কে কোথায় পলায়ন করিল। যাক, আমরা কি কথা বলিতে গিয়া কি আনিয়া ফেলিয়াছি। এই মধুবনে একটা ক্ষুদ্র কাঠবিড়াল বাস করিত; এমন স্থানে সে যে পরম সুখে থাকিত তাহার সন্দেহ নাই। সে ইচ্ছামত এ গাছ ও গাছ করিয়া বেড়াইত। ক্ষুধা হইলে আহারের এবং তৃষ্ণা পাইলে জলের অভাব ছিল না। তার ছুই একটা সংবন্ধুও ছিল। এইরূপে সুখে স্বচ্ছন্দে কিছুদিন কাটাইয়া কাঠ-

বিড়ালের মনে কেমন এক প্রধান অশান্তি জন্মিল; কাঠবিড়ালের যে গাছে বাসা ছিল সে গাছটি হ্রদের দিকে; সে বাসায় বসিয়া বসিয়া হ্রদের জলচর পক্ষীদিগকে দেখিত এবং মনে মনে ভাবিত ঐ পাখীরা কত সুখী, উহারা ইচ্ছামত কেমন এদেশ ওদেশ করিয়া উড়িয়া বেড়াইতে পারে, আর আমাকে এই বনের মধ্যেই সমস্ত সময় কাটাইতে হয়! না, এরূপ অবস্থায় থাকা আমার পক্ষে অসহ্য! অবশেষে কাঠবিড়াল মনে মনে স্থির করিল যে সেও ঐ পাখীদিগের মত বিদেশে যাইবে। সেই বনে একটা ইন্দুর ছিল সে কাঠবিড়ালের অত্যন্ত বন্ধু; কাঠবিড়াল গিয়া বন্ধুকে তাহার বিদেশ গমনের ইচ্ছা জানাইবামাত্র ইন্দুর বন্ধু অত্যন্ত উৎসাহের সহিত কাঠবিড়াল বন্ধুর সাধু ইচ্ছার যথেষ্ট প্রশংসা করিতে লাগিল, বিদেশ যাত্রার সমস্ত ঠিক হইয়া গেল।

সে রাত্রি আর কাঠবিড়ালের নিদ্রা হইল না, পরদিন প্রভাত হইতে না হইতে কাঠবিড়াল যাত্রা করিল। হুর্ভাগ্যক্রমেই হউক আর সাংসারিক কোন বিষয়ের জ্ঞান না থাকাতাই হউক কাঠবিড়ালের বিদেশ যাত্রার কোন একটা উদ্দেশ্য ছিল না; পক্ষীরা উড়িয়া এদেশ ওদেশ যায় আমি কেন যাইব না, উদ্দেশ্যের মধ্যে এইমাত্র। ক্ষমতা থাকা না থাকার বিষয় যে সে একবারে ভাবেনি তাহাও নয়। সে ভাবিয়াছিল পাখীদের যেমন ডানা আছে উড়িয়া যাইতে পারে, তাহার তেমনই চঞ্চল পা আছে, সে দ্রুত চলিতে পারে; যাহা হউক সে অতি প্রকল্পচিত্তে যাত্রা করিয়া কখন বা লাফাইতে লাফাইতে কখন বা চঞ্চল গতিতে চলিতে লাগিল এবং মাঠের পর মাঠ, বাগানের পর বাগান প্রভৃতি পার হইয়া এক

ক্ষুদ্র পাহাড়ের নিকটে উপস্থিত হইল। যখন সে এই ক্ষুদ্র পাহাড়টির নিকট উপস্থিত হইল তখন বেলা প্রায় দশটা। ইন্দুর বন্ধুর পরামর্শে সঙ্গে যাহা কিছু খাবার আনিয়াছিল এখানে বসিয়া আহার করিয়া কাঠবিড়াল আবার চলিতে আরম্ভ করিল। সমতল ভূমিতে যত দ্রুত গদে উল্লাসের সহিত চলিয়া আসিয়াছিল এবার পাহাড়ে উঠিবার সময় তত দ্রুত উঠিতে পারিল না, কিন্তু তাই বলিয়া সে ছাড়িবার পাত্র নয়। সে ক্রমাগত উঠিতে লাগিল এবং কিছুকাল পরেই পাহাড়ের উপরে উঠিল। পাহাড়ের উপরে উঠিয়া পশ্চাদিকে তাকাইবামাত্র মধুবন দেখিতে পাইল, যে গাছে তাহার বাসা ছিল সে গাছটিও দেখিতে পাইল। আপনার বাসা, মধুবনের সৌন্দর্য ইত্যাদি সমস্ত মনে হইয়া তাহার মন কেমন করিয়া উঠিল, কিন্তু তাহা অতি ক্ষণকালের নিমিত্ত। কাঠবিড়াল আবার চলিতে আরম্ভ করিল। কত বন, কত জঙ্গল পার হইয়া চলিতে লাগিল। কিন্তু এবার আর তত দ্রুতপদে চলিতে পারিল না, পরে বেলা আন্দাজ মাড়ে চারিটার সময় অপেক্ষাকৃত একটা বৃহদাকার পাহাড়ের নিকটে আসিয়া উপস্থিত হইল, এই পাহাড় পার হইতে পারিলেই কাঠবিড়াল বিদেশে পৌঁছে। সঙ্গে যাহা কিছু খাবার ছিল তাহা দশটার সময় আহার করিয়াছে আর কিছু সঙ্গে নাই, এখানে কিছু পাওয়াও যায় না যে খাইয়া সে ক্ষুধা নিবারণ করে; কাজে কাজেই ক্ষুধা লইয়াই সে পাহাড়ে উঠিতে আরম্ভ করিল। কাঠবিড়াল ক্রমাগত উঠে কিন্তু পথ আর ফুরায় না, সে উঠিতে যথেষ্ট চেষ্টা করে কিন্তু পা আর উঠে না, অবশেষে অনেক কষ্টে খানিকটা উঠিয়া মনে করিল ঐ যে স্থান দেখা যাইতেছে এখানে

বাইতে পারিলেই তাহার কষ্ট শেষ হইবে কিন্তু অবশেষে সেখানে গিয়া দেখে যে তখনও অনেক উঠিবার আছে। উঠিবার আছে বটে কিন্তু চলিবার আর সাধ্য নাই, ক্ষুধায় ও তৃষ্ণায় শরীর একেবারে অবসন্ন হইয়া পড়িয়াছিল, হঠাৎ বিদেশ যাত্রার সংকল্প মন হইতে দূর হইল। কাঠবিড়াল দেশের উদ্দেশ্যে আবার ফিরিয়া চলিতে লাগিল কিন্তু এখন প্রায় সন্ধ্যা হইয়াছে, সে আর পথ দেখিতে পাইল না, এদিকে মহা ঝড় বৃষ্টি আরম্ভ হইল, কাঠবিড়ালের মহা বিপদ উপস্থিত। একে ক্ষুধায় পেট জ্বলিতেছে, পথ চলিয়া পায়ে ব্যথা হইয়াছে, তাহার উপর আবার ঝড়, বৃষ্টি,—সে কাঁপিতে কাঁপিতে একখানি পাথরের আড়ালে গিয়া আশ্রয় লইল এবং শরীর অত্যন্ত অবসন্ন হওয়াতে শীঘ্রই ঘুমাইয়া পড়িল। ঘুম ভাঙ্গিলে দেখে বৃষ্টি ছাড়িয়া গিয়াছে, রৌদ্র উঠিয়াছে, শীত আর নাই কিন্তু ক্ষুধায় পেট জ্বলিতেছে, সে শীঘ্র শীঘ্র বাহির হইয়া রৌদ্রে শরীর শুকাইতে লাগিল এবং কতক্ষণে মধুবনে যাইবে ভাবিতে লাগিল, এমন সময় একটা চিল আসিয়া ছেঁঁ মারিয়া তাহাকে লইয়া গেল। কাঠবিড়াল জ্ঞানশূন্য, যতপ্রায়! চিলের নখরে কাঠবিড়ালকে আবদ্ধ দেখিয়া একটা বাজ তাহা অপহরণ করিতে আসিল, চিলেও বাজে যুদ্ধ বাঁধায় চিলের নখর হইতে কাঠবিড়াল পড়িয়া গেল। কতক্ষণ পরে যে তাহার চৈতন্য হইয়াছিল তাহা কাঠবিড়াল জানিতে পারে নাই কিন্তু চৈতন্য হইলে সে দেখিতে পাইল যে, যে গাছে তাহার বাসা সেই গাছের এক ডালে সে পড়িয়া আছে।

## শৃঙ্খলা ও বন্দোবস্ত ।

বন্দোবস্তের কি স্ত্রীলোক, কি পুরুষ কাহারও কার্যে শৃঙ্খলা নাই; পুরুষের এই দিকে তত দৃষ্টি না থাকিলে বিশেষ অনিষ্ট হয় না, কিন্তু স্ত্রীলোকের কার্যে শৃঙ্খলা ও বন্দোবস্ত না থাকিলে, সংসার হতশ্রী হইয়া যায়। অনেক ধনী পরিবারের সংসার শৃঙ্খলা ও বন্দোবস্তের অভাবে ছারখার হইতে দেখা যায়; আবার শৃঙ্খলা ও বন্দোবস্তের গুণে অনেক দরিদ্র পরিবারও চিরকাল সুখে কাটাইতে পারে। বঙ্গীয় রমণীগণের এই দিকে মোটে দৃষ্টি নাই বলিলেও বড় অগ্রায় হয় না। স্ত্রীলোক গৃহের লক্ষ্মী;—তাহাদের দোষে সংসার হতশ্রী হয়, আবার তাহাদের গুণেই গৃহ সুখ ও শান্তিতে পরিপূর্ণ থাকে। আমাদের দেশে স্ত্রীলোকদের মধ্যে একটা কথা চলিত আছে,

রাজার দোষে রাজ্য নষ্ট, প্রজা কষ্ট পায়।

গীর্নীর দোষে ঘর নষ্ট, লক্ষ্মী ছেড়ে যায়।

বঙ্গ মহিলাগণ যেন ইহা কখনও ভোলেন না।

অনেক স্ত্রীলোক দেখিয়াছি, তাহারা শৃঙ্খলার লেশ মাত্রও জানেন না, অথচ তাহারা গৃহের কর্তা। ইহারা কোথায় কি জিনিস রাখেন, কাহাকে কি দেন, এবং ঘরে কোন জিনিসটা আছে, কোনটা নাই, তাহা মনে রাখিতে পারেন না! ইহারা ভবিষ্যতের ভাবনা ভাবিতে প্রস্তুত নহেন, কোন প্রকারে দিন গেলেই যথেষ্ট মনে করেন। লবণের হাঁড়িটা ভাঙ্গিয়া লবণগুলি মাটিতে পড়িয়া খারাপ হইয়া যাইতেছে, চাউল গুলি অবহ্নে পড়িয়া যাইতেছে, বাস্কাটি ভূমিতে থাকায় সর্দি লাগিয়া জীর্ণ হইয়া

বাইতেছে, কাপড় গুলি ইঁহুরে কাটিয়া ছারখার করিতেছে, তবুও তাহাদের চৈতন্য হইতেছে না। যে ঘরে একরূপ গৃহিণী, সে ঘর রাজার সংসার হইলেও অচিরে হতশ্রী হইবে, তাহার কোন সন্দেহ নাই। শৃঙ্খলাবদ্ধ করিয়া সমস্ত জিনিষ রাখা তাহাদের অভ্যাস নাই, কোন স্থানে কোন জিনিষ রাখিলে দেখিতে সুন্দর হয় তাহারা বুঝিতে পারেন না। এমন কি কোথায় কোন দ্রব্য রাখেন তাহাও প্রতি মুহূর্তে ভুলিয়া যান; সুতরাং প্রয়োজন হইলে, ২৩ ঘণ্টা তল্লাস না করিলে কোন জিনিষ পাওয়া ভার হয়। তৈল খুঁজিতে নুন বাহির হয়, কাগজ খুঁজিতে কলম বাহির হয়, কিন্তু প্রয়োজনীয় দ্রব্য আর পাওয়া যায় না। অনেক গৃহে দেখিতে পাওয়া যায় যে একখানা বস্তুর প্রয়োজন হইলে ৫৭টা সিন্ধুক, ২৩টা আলমারা, ৩৪টা বাস ও ছই একটা দেবরাজ না খুলিয়া, উপরের কাপড় নীচে ও নীচের কাপড় উপরে না আনিলে, তাহা পাওয়া যায় না। একখানা আয়না পাইতে হইলে পঞ্চাশবার এঘর ওঘর তল্লাস না করিলে চলে না। এমন কি, সময় সময় দোয়াত, কালী, কলম, দেশলাইরে বাস, পিরাণ, ছুরী, বাস্কের চাবি, চুলির দড়ি, ইত্যাদি নিত্য প্রয়োজনীয় জিনিষ গুলির জন্ত ব্যতিব্যস্ত হইতে হয়। একরূপ বিশৃঙ্খলা ও অসাবধানতা যে অতীব অশ্রয়, বুদ্ধিমতী পাঠিকাগণ তাহা অবশ্যই বুঝিতে পারেন। আশাকরি পাঠিকাগণ শৃঙ্খলা ও বন্দোবস্তের উপকারিতা বুঝিতে পারিয়া তদনুরূপ কার্য করিবেন।

ঘরের জিনিষগুলি উত্তমরূপ সাজাইয়া উপযুক্ত স্থানে রাখিয়া দিলে দেখিতে সুন্দর হয়, এবং প্রয়োজন মত তল্লাস ব্যতীতই সব পাওয়া

যায়। একটি সু-সজ্জিত গৃহ দেখিলে মনে মনে কর্তীকে প্রশংসা করিতে ইচ্ছা হয়। ভিন্ন ভিন্ন শ্রেণীর দ্রব্যাদি ভিন্ন ভিন্ন স্থানে রাখা কর্তব্য, কারণ তাহা হইলে কোন জিনিষের জন্ত তল্লাস করিয়া মরিতে হয় না। অনেকের এমন কু-অভ্যাস যে বাহা পান তাহাই আনিয়া এক স্থানে রাখিয়া দেন। এইরূপে পুস্তক, কাগজ, কলম, কালী ও সূতা, পানের মসলা, চুলের দড়ী, ছুঁই, বস্ত্র ইত্যাদি নানা প্রকার দ্রব্য এক স্থানে একরূপ এলোমেলো করিয়া রাখিয়া দেন যে, একটা জিনিষের প্রয়োজন হইলে সমুদয় উলট পালট না করিলে তাহা পাওয়া যায় না। ইহাতে সময় সময় মহা ক্ষতি হয়; হয়ত চুলের দড়ী ধরিয়া টান দেওয়াতে কালীর দোয়াতটি উন্টাইয়া পড়িয়া বস্ত্র, পুস্তক, ইত্যাদি সাধের দ্রব্য সকল কালীময় হইয়া গেল; না হয়, পানের মসলাগুলি ভুনিতে ছড়াইয়া পড়িল। এমন ও অনেক জীলোক দেখা যায় যে তাহার লেপ, তোষক, মসারী, বস্ত্র প্রভৃতি জিনিষগুলি এমন করিয়া এক স্থানে রাখিয়া দেন যে ধুতিখানা নামাইতে হইলে অগ্রে লেপ ইত্যাদি না নামাইলে চলে না; কেহ কেহ আবার খাট, তক্তপোষ ইত্যাদির নীচে বা অগ্নত্রয়ী বাসন প্রভৃতি এমনভাবে এলোমেলো করিয়া রাখেন যে উহার কোন একটা দ্রব্যের দরকার হইলে সমস্তগুলি স্থানান্তরিত না করিলে হয় না। ইহা যে নিতান্ত অসুবিধাজনক, তাহা আর কাহাকেও বুঝাইয়া দিতে হইবে না। সুতরাং শৃঙ্খলা শিখিতে হইলেই প্রথমতঃ সমুদয় এক স্থানে রাখিবার অভ্যাসটি পরিত্যাগ করিতে হইবে। ভিন্ন ভিন্ন শ্রেণীর দ্রব্যাদি ভিন্ন ভিন্ন স্থানে উত্তমরূপে সাজাইয়া রাখিতে অভ্যাস

করিতে হইবে। নিত্য প্রয়োজনীয় জিনিষাদি এমন স্থানে রাখিবে, যেন প্রয়োজনের সময় পাওয়া যায়।

গৃহের পারিপাট্য বিধানে ইংরেজ রমণীগণ বড়ই পটু; কোন স্থানে কোন দ্রব্য রাখিলে সুন্দর দেখায় অথচ কার্যের সুবিধা হয়, তাহা তাহারা বেশ বুঝেন। উহাদের মধ্যে যাহাদের অবস্থা নিতান্ত শোচনীয়, তাহারাও গৃহটিকে উত্তমরূপে সজ্জিত করিয়া রাখেন; উহাদের এক একটি গৃহ এক একটি ছোট খাট স্বর্গ, নিতান্ত গরীব একটি ইংরেজের বাড়ী যাও, দেখিবে ঘর-গুলি পরিষ্কার পরিচ্ছন্ন, গৃহ সামগ্রীগুলি সুন্দর, ঘসা মাজা ও যথাস্থানে স্থাপিত, শৃঙ্খলার অভাব কোথায় ও দেখিতে পাইবে না। কিন্তু বঙ্গীয় গৃহে ঠিক তাহার বিপরীত ভাব! ইহা বড়ই হৃৎখের বিষয়। বাসস্থান সজ্জিত, পরিষ্কার পরিচ্ছন্ন ও শৃঙ্খলাবদ্ধ না হইলে মনে কৃতি থাকে না। অনেক লোক যে অধিকক্ষণ বাড়ীতে থাকেন না, ইহা তাহার একটা কারণ। হৃৎখের বিষয় এই যে, বঙ্গ মহিলাগণ তাহা বুঝেন না। আমরা বঙ্গ মহিলাদিগকে বিলাসিনী হইতে বলি না, কিন্তু বৃথা ব্যয় বাহুল্য করিয়া গৃহ সজ্জিত করিতে ও বলি না; আমরা বলি গৃহে যে সকল আবশ্যকীয় দ্রব্য আছে, তাহা এলোমেলো, অপরিষ্কার করিয়া না রাখিয়া, সজ্জিত ও শৃঙ্খলাবদ্ধ করিয়া রাখেন।

শৃঙ্খলার সঙ্গে সঙ্গে বন্দোবস্ত ও শিক্ষা করিতে হইবে। কি কি প্রকারে সংসারের জিনিষাদির অপব্যয় না হয়, এবং কি করিলে পরিস্রিত ব্যয়ে সংসার নির্বাহ করা যায়, এবং কি করিলে ভবিষ্যতে মঙ্গল হইবে, প্রত্যেক বুদ্ধিমতী মহিলার তৎপ্রতি দৃষ্টি রাখা আবশ্যক। কোন কোন

মহিলা এ বিষয়ে বড় উদাসীন। ঘরের দ্রব্যাদি সর্বদা লোকসান খাইতেছে, দাস দাসীরা অনেক জিনিষ চুরি করিয়া নিজগৃহে নিয়া খাইতেছে, যে তিন চারি দিনের মধ্যে ফিরাইয়া দিবে যদি এ একটা দ্রব্য চাহিয়া লইয়া গেল সে ৩৪ মাসেও তাহা ফিরাইয়া দিতেছে না তবুও অনেক গৃহিণী দৃষ্টিপাত করেন না।

যে গৃহের গৃহিণীগণ ভবিষ্যতের ভাবনা ভাবিতে চান না, সে গৃহের মঙ্গল নাই। অনেক সম্পন্ন পরিবারে দেখিয়াছি যে বাড়ীতে একজন সম্ভ্রান্ত লোক আসিলে সময় সময় হলখুল পড়িয়া যায়। গৃহে হয়ত জলযোগ বা আহারের উপযুক্ত কোন সামগ্রী নাই। বাবু পলায়ন রাখিতে হুকুম পাঠাইলেন; কিন্তু তদুপযুক্ত কোন দ্রব্যই গৃহিণী খুঁজিয়া পাইলেন না। গ্রাম্য বাজারেও হয়ত তাহা পাওয়া গেল না। তখন কিরূপ বিষম সমস্যা উপস্থিত হয়, পাঠিকাগণ তাহা অবশ্যই বুঝিতে পারেন। কু-গৃহিণীর দোষে এসব হয়; কারণ কর্তী যদি পূর্বেই এই প্রকার আবশ্যকের বিষয় চিন্তা করিয়া, সকল জিনিষ কিছু কিছু সংরক্ষণ করিয়া রাখেন তবে কার্যের সময় এত বৃথা দৌড়াদৌড়ি ও করিতে হয় না, কার্য ও সুন্দররূপে সম্পন্ন হয়। ফলতঃ মহিলাগণের গৃহকার্যে শৃঙ্খলা ও বন্দোবস্ত না থাকিতে অনেক সময় কর্তী বাবুদিগকে লাঞ্ছনা ও অপমান সহ করিতে হয়। যে গৃহিণীরা শৃঙ্খলা ও বন্দোবস্ত জানেন, তাহারা নিতান্ত সামান্য দ্রব্যকেও অবহেলা করেন না। কারণ তাহারা জানেন যে সামান্য দ্রব্যও সময়ে অসামান্য উপকার সাধন করিতে পারে। “তৃণ হতে কার্য হয় রাখিলে যতনে” পাঠিকাগণ এই কথাটা মনে রাখিবেন। সুগৃহিণীগণের আর একটা লক্ষণ এই যে, ছয় মাস,



এক বৎসর, এমন কি দশ বৎসর পর যে কার্য  
করিতে হইবে, পূর্ব হইতেই তাহার তাহার  
বন্দোবস্ত ও যোগাড় করিয়া রাখেন ।

( প্রাপ্ত । )

( অধিক বয়স্ক পাঠিকাদের জন্য লিখিত । )



## বর্ষ-শেষ ।

(১)

নূতন বর্ষ সনে  
কত আশা লয়ে প্রাণে  
নূতন উৎসাহে বাধি হৃদয় আমার ।  
ভেবেছিলুম সেই সব পূর্বাব এবার ।

(২)


যদিও অনেক বার  
আশাই হয়েছে সার  
কল্পনায় রহিয়াছে প্রতিজ্ঞা কেবল ;  
ভেবেছিলুম মনে মনে  
“এইবার প্রাণ পণে  
সংকল্প নিশ্চয় মোর করিব সফল ।  
আর না তেমন ক’রে  
অকারণে অনাদরে  
করিব বৃথায় ব্যয় অমূল্য সময় ;  
এ মোর প্রতিজ্ঞা স্থির সাধিব নিশ্চয় ।”

(৩)

কিন্তু একি দেখি হায় !  
সেই দশা পুনরায়  
বরষ চলিয়া গেল তেমনি আবার  
কত আশা করিলাম  
ভাঙ্গিলাম গড়িলাম  
কিছুই না পূর্ণ হলো বাসনা আমার  
কল্পনা কল্পনা—ছি ছি!—কল্পনাই সার !

(৪)

মনে করি সেই কথা  
প্রাণে পাই বড় ব্যথা  
কেমনে কেটেছে এই বরষ আমার !  
কাজে করি অবহেলা  
করিয়াছি কত খেলা  
বৃথা গল্পে লভিয়াছি কিবা সুখ ছার !  
অকারণে কত জনে  
বাতনা দিয়াছি প্রাণে ;  
আপন কর্তব্য ভুলে গেছি কতবার ।  
এইভাবে যেন দিন কাটেনাকো আর ।



## ধাঁধা ।

গতবারের ধাঁধার উত্তর ।

১। চন্দ্র ।

